

22

საქართველო

მედიის

საქართველო



მედიის

საქართველო

საქართველო

საქართველო



მცირე შედეგები

აღმანახი

II



საქართველოს უნივერსიტეტის გამომცემლობა

თბილისი

2011

UDC (შაკ) 32+327
პ-563

გ. ჭუმბურიძისა და ზ. ჭილაძის რედაქციით


გარეკანი: ნანუკა ჭილაძე

საქართველოს უნივერსიტეტის გამომცემლობა 

დაიბეჭდა საქართველოში, თბილისში
გამომცემლობა „საქართველოს უნივერსიტეტი“
Copyright © The University of Georgia
საავტორო უფლებები დაცულია © 2010 გამომცემლობა „საქართველოს უნივერსიტეტი“
ISSN 1512-2557

სარჩევი

წინათქმის მაგიერ:	
‘ასე რომ დაუკრა, ათი წელი მაინც უნდა სწავლობდე...’	5
რომანები	
პატრიკ ზიუსკინდი – ნელსურნელება	9
ამონარიდები	
პოლ ჯონსონი – "შერეკილი, მაგრამ – საინტერესოდ..."	182
ნოველები	
მოთხრობები	
გიომ აპოლინერი – მეზღვაური ამსტერდამიდან	211
ართურ კონან დოილი – კარამაზოვების საქმე	217
უილიამ ფოლკნერი – ბოლი	229
ელიგ ზანდერ ა. მილნი – ჭიქა ღვინო	257
პიესები	
ჯონ ბოიტონ პრისტლი – 31 ივნისი	272
ეს ე რთი და...	361
თინათინ თოფურია – წითელი წიგნი ანუ the things you let go.....	364
პოეზია	
<i>Ad Memoriam: იოსებ ბროდსკი & ვახუშტი კოტეტიშვილი</i>	
ორი საათი რეზერვუარში	385
საჩვენო ზღაპრები	
“სამართალმა პური ჭამა...” ანუ გუბერნატორი კომბლე	392
ნაცარქექია ინტერნეტში	398
კბილის გასაკრავი	
თარგმანი თუ გრანტიყლაპიობა?	407
საჯოლდაო ქვად . . .	
Valeri Chkadua:	
HOW NOT TO BE AN ALIEN	
(Jelter-Skelter Mythstories of Georgia)	411



წინათქმის მაგიერ

‘ასე რომ დაუკრა, ათი წელი მაინც უნდა სწავლობდე...’

(ერთი ძველისძველი კინოფილმიდან)

საოცარი ნეოლოგიზმი მახსოვს, ჩემი ახალგაზრდობისდროინდელი — “საკითხავი წიგნი”...

‘საკითხავი რაღე ისეთი არაფერი გაქ?’ — და იგულისხმებოდა რაიმე გასართობი, იოლად საკითხავი — თითქოსდა ტვინმისატანებელი უცილობლად ტვინსაჭყლეტიც უნდა ყოფილიყო, მსუბუქი საკითხავი კი — გადაღლილ გონებაზე საფურცლავი ლაყე ლიტერატურა.

ის ლოზუნგიც მახსენდება — პარტიამ რომ ერთადერთი რამ აუკრძალა საბჭოთა მწერლებს — ცუდად წერა...

კარგად წერა არც ისე ძნელია, ოღონდ ერთი ათი წელი მაინც უნდა ისწავლო.

“მე ლექსს არა ვწერ, ლექსი თვითონ მწერს...”

“ყველა ხევსური ვიცის, დანტეა...”

“ქართველი პოეტი 2-ჯერ პოეტია...”

“საზოგადოდ, გალაკტიონის დონის პოეტს ჯერ ფეხი არ დაუდგამს დედამიწაზე...”

“არა უშავს, პოეზიაა, გაიტანს...”

არა-ა, ასე ვერაფერს ისწავლი.

უ-უდიდესი ლიტერატურა გვაქვს, რაღა თქმა უნდა, უბრალოდ — პატარა ვერი ვართ და არავინ გვიცნობს; აი, რომ გაგვიცნობენ...

მითოლოგიზირებაა ეს, სხვა არაფერი.

ყველა ყველას იცნობს, როცა ამის სურვილი უჩნდება: სერბ პავიჩს, პაკისტანელ რუშდის, კოლუმბიელ მარკესს, ინდოელ ვიკრამ სეთს, თურქ ორჰან პამუკს... ნეტა საიდან? და თარგმნიან, თარგმნიან, თარგმნიან!.. ნეტა რატო? გვიკვირს — ხალხს ფული არა აქ, ქართულად თარგმნილ საკითხავს ცოტას ყიდულობს, დახლები კი სავსეა ორ-სამჯერ უფრო ძვირი რუსული წიგნით და იყიდება, იყიდება...

ოღონდ ქართული ძნად გადის — სახელი გატეხილი აქვს, და არც ქართულად გახმოვანებულ ფილმებზეა დიდი მოთხოვნა — მათი ტოპ-ათეულიდან 8^{1/2} ისეა თარგმნილი, კიდევ კარგი რომ ქართულის ხაბარს არ არიან, თორემ დე ნირო გინდა, ალ პაჩინო, ჯექ ნიკოლსონი თუ ასე გასინჯეთ, სილვესტერ სტალონეც კი გვიჩვილებდნენ — იდიოტებად რატო გამოგყევართო!

და რა აზომ-აწონვა ამას უნდა: თუ სახელგანთქმული ესპანურენოვანი მწერლის, რომელიც რაღაცა მანქანებით ვერაფრით მოხვდა ნობელიანტთა სიაში (ბორხესს ვგულისხმობ) ნოველები რეზო მიშველაძისას არა სჯობია, ნობელიანტ მარკესის “გაცხადებული მკვლელობის ქრონიკა” — “სამოსელ პირველს” ან თუნდაც მარიო პიუზოს “ნათლია” (და არა *ნათლიძაძე!*) “დათა თუთაშხიას” — ცუდად ყოფილა მთარგმნელის საქმე; ხოლო თუ მიქელანჯელოს, შექსპირისა და ემილი დიკინსონის სონეტები — შესაბამისად, მ. მაჭავარიანის, ბესიკ ხარანაულისა და ლია სტურუას ლექსებს, ე.ი. აქ მოსკოვის ამრევი ხელი ურევია! და როცა აკა მორჩილაძის “გადაფრენა” 10 თავით მაღლა დგას პატრიკ ზიუსკინდის “სუნამოზე”, ქართულ ენას კი არა აქვს ბატონებო პრობლემები — ენის მოხმარების პრობლემა გვექონია, ეგაა და ეგ. ბოლო-ბოლო, ამის მაგალითად შექსპირის მრავალთნაქები ქართული თარგმანების მოხმობაც საკმარისი იქნებოდა — იგივე რობერტ სტურუას სულაც გამარტივებული პროზაული ტექსტის დაკვეთა დასჭირდა...

ზოგადად, ხომ ცხადზე-ცხადია — ტომას სტერნზ ელიოტი, ქართულად ნათარგმანები, ჩვენი პოეტ-ლაურეატების ნებისმიერ კრებულს უცილობლად უნდა აღემატებოდეს, და იმ სახელგავარდნილი პოსტ- თუ პრე- მოდერნისტის ლექსები, რომლის კითხვით მიღმა ქვეყნების ინტელექტუალური ელიტა თურმე კითხვით ვერა ძლება — კოტე ყუბანეიშვილის ოპუსებზე ნაკლებ “საკაიფო” არ უნდა იყოს... ვითომ, ბევრს ვითხოვ?!

ესეცა ვთქვათ — თუ იცის ვინმემ, გინესის წიგნში რომ ვართ შესატანი ე.ა. პოს “ყორანის” თარგმანთა რაოდენობის მხრივ?! ჯერ კიდევ იმ საუკუნის მიწურულს, 41-ე ვარიანტი ჩამივარდა ხელში... და რა მერე? ახსოვს ვინმეს რომელიმე?

ეგრეა, შუემერი მკვდარია, ჩეჩენი — ცოცხალი; ჩვენ — ვართ რა... ერთ-მანეთის ქება-განქიქებაში.


თარგმნა ხელოვნება კი არა, *ხელობაა*; ხელოსანს კიდევ, რომ დაოსტატდე, 10 წელი მაინც გინდა.

მე კიდევ იმის თქმა მინდა, ყველა თუ თავის ნავში ჩაჯდა, იქნება სახლის გზაც გამოჩნდეს...

ეგაა, მაგისტოვის კიდევ ბევრი 10 წელია საჭირო.

კ.ჭ.

ᄒ ᄒ ᄒ ᄒ ᄒ ᄒ ᄒ ᄒ



ნელსურნელება

(მაგანი მკვლელის ამბავი)

პარი I

1.

მეთვრამეტე საუკუნის საფრანგეთში ცხოვრობდა კაცი, ვინაც იმ დროის უსასიზღრეს და უადმატებულეს პიროვნებებს განეკუთვნებოდა, ანუ — იმ ხანისა, ასე მდიდარი რომ გახლდათ ადმატებული და საზიზღარი პიროვნებებით. სახელად ჟან-ბატისტ გრენუი ერქვა და თუ ეს სახელი — დე სადის, სენ-ჟიუსტის, ფუშეს, ნაპოლეონისა და სხვა გენიალური ურჩხულებისაგან განსხვავებით — მივიწყებულია, მივიწყებულია არა იმიტომ, თითქოს იგი წყვდიადის ამ სახელგანთქმულ ნაშიერებს ჩამორჩებოდა ქედმაღლობაში, ადამიანის სიძულვილში, გარყვნილებაში... მოკლედ — უღმერთობაში, არამედ იმის გამო, რომ მისი გენიალობა და უკიდევანო პატივმოყვარეობა იმგვარი სფეროთი შემოიფარგლა, რომელიც ისტორიაში კვალს არ ტოვებს, კერძოდ — სურნელთა ქროლვადი სამეფოთი.

იმ დროის ქალაქებში ჩვენთვის, თანამედროვე ადამიანებისთვის წარმოუდგენელი სიმყრალე იდგა: ქუჩები ყარდა ნეხვით, ეზოები ყარდა შარდით, კიბეები — დამპალი ხითა და ვირთხის ცურცლით, სამზარეულოები — უვარგისი ქვანახშირითა და ცხერის ქონით; ფენა-ფენა მტვრით ყარდა გაუნიავებელი სადარბაზო ოთახები, საძინებლები — ჭუჭყიანი თეთრეულით, ნესტიანი ბუმბულითა და ღამის ქოთნების მომწარო-მოტკბო ანაორთქლით; ბუხრებიდან მწერის სუნი მოედინებოდა, სათრიმლავე სახელოსნოებიდან — მტუტის სიმყრალის, სასაკლაოებიდან — გამოშვებული სისხლის. ადამიანები ოფლითა და გაურეცხავი თეთრეულით ყარდნენ; პირიდან დამპალი კბილების სუნი ამოსდიოდათ, სტომაქებიდან — ხახვის წვენის, ხოლო სიბერეში მათ სხეულებს ობიანი ყველის, ამჟავებული რძისა და ავადმყოფური სიმსივნეების სიმყრალე სდიოდა. ყარდა მდინარეები, ყარდა მოედნები, ეკლესიებიც ყარდა. ყარდა ხიდების ქვეშ და სასახლეებში. მყრალი სურნელი ასდიოდათ

გლეხებსა და ღვთისმსახურებს, ხელოსნების შეგირდებსა და ხელოსნების ცოლებს. ყარდა თავადაზნაურობა და თვით მეფეც კი ყარდა – მტაცებელი ნადირის ყროლით, ხოლო დედოფალი — ზაფხულშიცა და ზამთარშიც – ბებერი თხისა. იმხანად ბაქტერიების გამხრწნელ აქტიურობას წინ არავითარი დაბრკოლება არ ეღობებოდა და ამიტომაც ადამიანის ყოველგვარ საქმიანობას, როგორც შემოქმედებითს, ისე დამანგრეველს, სიცოცხლის ჩასახვისა თუ ქრობის ყოველგვარ გამოვლინებას — სიმყრალე ახლდა.

თავისთავად იგულისხმება, რომ პარიზში ყველაზე დიდი სიმყრალე იდგა, ვინაიდან საფრანგეთის უდიდესი ქალაქი სწორედ პარიზი გახლდათ, ხოლო ოფერისა და ფერონრის ქუჩებს შორის მოქცეულ ერთ ალაგს „უმანკო გვემილთა სასაფლაო“ ერქვა და აი იქ მართლაც რომ ჯოჯოხეთურად ყარდა. მთელი რვაასი წლის განმავლობაში სწორედ აქ ეზიდებოდნენ მიცვალებულებს ოტელ-დიედან და სხვა ახლომდებარე სამწყსოებიდან; რვაასი წლის განმავლობაში ჯგროდ მოჰქონდათ ისინი საზიდრებით და გრძელ ორმოებში ყრიდნენ; რვაასი წლის განმავლობაში აწყობდნენ მათ ფენებად, ჩონჩხი ჩონჩხთან, საძმო საფლაგებში და საოჯახო სამარხებში. მხოლოდ მოგვიანებით, ზედ საფრანგეთის დიდი რევოლუციის წინა დღეებში, მას შემდეგ რაც საფლაგების ნაწილი ჩამოიშალა, ხოლო სიმყრალემ გარეშემო მაცხოვრებლები აიძულა არათუ ხმა ამოეღოთ, არამედ უკვე ნამდვილი ჯანყისათვის მიემართნათ, სასაფლაო დახურეს, მილიონობით ძვლები და თავის ქალები მონმარტრის კატაკომბებში ჩაყარეს და იმ ადგილას ბაზარი გამართეს. სწორედ აქ, სამეფოს უმყრალეს ადგილას, 1738 წლის 17 ივლისს, ქვეყნიერებას მოეკლინა ჟან-ბატისტ გრენუი. ეს წელიწადის ერთ-ერთ ყველაზე მცხუნვარე დღეს მოხდა; ზვატი ტყვიასავით ეფინა სასაფლაოზე და მესობელ ჩიხებში დამპალი საზამთროსა თუ დამწვარი რქის სუნით გაჟღენთილ ხრწნილის ბუღს მიაღინებდა. გრენუის დედა, როდესაც შეტყვევები დაეწყო, ოფერის ქუჩაზე, თევზის დახლთან იდგა და სათლიდან ამოღებულ ქორჭილებს წელავდა. სენაში ვითომდა იმავე დილით დაჭერილი თევზი უკვე სათლშივე ისე ყარდა, ჯერ კიდევ შემორჩენილ გვამების სუნსაც ახშობდა. ოღონდაც გრენუის დედა საერთოდ ვერ გრძნობდა ვერც თევზისა და ვერც გვამის სუნს, რადგანაც საოცრად დაჩლუნგებული ჰქონდა ყნოსვა. გარდა ამისა, შიგანიც სტკიოდა და ტკივილი უგრძნობელს ხდიდა გარეშე გამაღიზიანებლების მიმართ. მხოლოდ ერთი რამ სურდა – ტკივილი შემწყდარიყო და ეს საზიხლარი მშობიარობაც, მისთვის უკვე რიგით მესხუთე, წარსულს მიბარებოდა... მანამდელეებსაც აქვე, თევზის დახლთან გაუსწორდა: ყველა ბავშიე მკვდარი, ან ცოცხალ-მკვდარი დაიბადა, რადგან მისგანვე გამომყრალი სისხლიანი ნაყოფი არაფრით განსხვავებდებოდა თევზის შიგნეულისაგან, რომელიც მის გარშემო ყყარა და არც მასზე დიდხანს ატანდა – სადამოს, ყველაფერს ერთად, ნიჩბით მოხვეტავდნენ ხოლმე და საზიდრებით გადაჰქონდათ ან სასაფლაოზე, ან დაბლა, მდინარის პირას. ასევე უნდა მომხდარიყო დღესაც და ქალბატონი გრენუი, ჯერ კიდევ ახალგაზრდა ქალი (ზუსტად იმ ხანებში შეუსრულდა 25 წელი), ჯერაც საკმაოდ კარგი შესახედავი, შენარჩუნებული რომ ჰქონდა თითქმის ყველა კბილი პირში და საკმაო თმა თავზე, და ნიკრისის ქარის, და ათამანგის, და მსუბუქი თავბრუსხვევების გარდა სერიოზული ავადობა არა სჭირდა რა, ჯერ კიდევ

რომ იმედოვნებდა დიდი ხნის სიცოცხლეს – ხუთი, ან შეიძლება ათი წელიც კი – და არც ის მიაჩნდა გამორიცხულად, რომ გათხოვდებოდა და ნაქერივალი, ხელოსნის პატივცემული მეუღლის სახელით ბავშვებს გააჩენდა... ქალბატონ გრენუის ალაღად სურდა, ყველაფერი რაც შეიძლება მალე დამთავრებულიყო. როდესაც შეტყევები გაუძლიერდა, შეძვრა თევზის გამოსაწელავი მაგიდის ქვეშ (სადაც ადრე უკვე ოთხჯერ მოილოგინა), იმშობიარა და ახლადდაბადებული არსების ჭიპლარი თევზისავე ასაქნელი დანით გადაჭრა. ოღონდაც, შემდგომ, სიცხისა და სიმყრალის გამოისობით, რასაც აღიქვამდა არა როგორც თავისთავად სიცხესა და სიმყრალეს, არამედ როგორც რასმე აუტანელს, გამაბრუებელს, მწველს – როგორც შრომანებით გადაპენტილ ველს, როგორც ნარგიზებით გამოტენილ ვიწრო ოთახს – გრძნობა დაკარგა, გვერდზე გადაწვა, მაგიდის ქვეშიდან გადმოგორდა და ზედ შუა ქუჩაში აღმოჩნდა, დანით ხელში...

ატყდა ერთი ყაყანი და ვაი-ვიში, უსაქმურების ბრბო გარს შემოერტყა სხეულს და პოლიციაც იქვე გაჩნდა.

ეკითხებიან – რა გჭირს?

– არაფერი!

– რისთვის დაგჭირდა ეგ დანა?

– არაფრისთვის!

– საიდანაა სისხლი კაბაზე?

– თევზისაა!..

ქალი დგება, დანას მოისვრის და განსაბანად მიდის...

უცაბედად, ჩვილი ტირილს იწყებს. მაგიდის ქვეშ, ბუზების ზუზუნში, თევზეულობის შიგნეულობასა და თავებს შორის ახალშობილს პოულობენ და გამოათრევენ ღვთის სინათლესა და ხალხის სამსჯავროზე. პოლიცია რომელიღაც მეძუძურს აბარებს ბავშვს, ხოლო ღედას აპატიმრებენ. ვინაიდან ქალი არაფერს უარყოფს და ზედმეტი მიეთ-მოეთის გარეშე აღიარებს, რომ ამ ნაბიჭურის სადმე მიტოვებას ეპირებოდა, რათა შიმშილით ამოსძრობოდა სული და მსგავსი რამ უკვე ოთხჯუზის ჰქონია თურმე ჩადენილი, მას სასამართლოს გადასცემენ, ბევრჯერად ბავშვთაკვლაში სცნობენ ბრალეულად და კვირის სწორს, გრევის მოედანზე, თავს კვეთენ.

ამ დროისათვის, ჩვილმა უკვე რამდენიმე ძიძა გამოიცვალა – არცერთი მათგანი არ თანხმდებოდა ორ დღეზე მეტ ხანს გაეჩერებინა თავისთან. ქალები ჩიოდნენ—ძალიან ხარბია, ორის ულუფას სწოვს, უხსენოდ ტოვებს სხვა ძუძუმწოვრებს და ამით თავად ჩვენ საარსებო წყაროს გვისპობსო. მართლაცდა, ერთადერთი ბავშვის კვება განა, რა სარფას მოიტანს!.. პოლიციის ოფიცერმაც, რომლის მოვალეობაში შედიოდა კიდევ ობლებისა და მიგდებულების ზედამხედველობა – ვინმე ლაფოსმა, მალე დაკარგა მოთმი-

ნება და სენ-ანტუანის ქუჩაზე მდებარე თავშესაფარში გადაწყვიტა მისი წაყვანა, საიდანაც უპატრონო ჩვილებს უკვე რუანში, სახელმწიფო ინტერნატში აგზავნიდნენ ყოველდღე; მაგრამ ვინაიდან ბავშვების ტრანსპორტირება ფეხოსანი მებარგულების მეშვეობით ხდებოდა, ლაფანის ყუთებით, რომლებშიაც ეკონომიის მიზნით ოთხ-ოთხ მათგანს სვამდნენ, და ვინაიდან ამის გამო სიკვდილიანობის პროცენტი ძლიერ მატულობდა, და ვინაიდან მებარგულები, ამავე მიზეზთა გამო მხოლოდ მონათლული ბავშვების წაყვანას ყაბულდებოდნენ და ისიც შევსებული საგზაო ფურცლის თანხლებით, რომელზედაც რუანში, ბავშვის ჩაბარების შემდეგ, ბეჭედს უსვამდნენ, და ვინაიდან გრენუის იმდროისათვის არც ნათლობა მიუღია და არც სახელი, რომლის შეტანაც საგზაო ფურცელში იქნებოდა შესაძლებელი, და ვინაიდან პოლიციის მხრიდან უხერხული იქნებოდა მოუნათლავე და უსახელო ბავშვის შესაკრები პუნქტის კარებთან ჩამოსმა, რაც სიძნელებების თავიდან აცილების ერთადერთი საშუალება გახლდათ... და რადგანაც, ამასთანავე, ზოგიერთი სხვა ბიუროკრატიული ხასიათის სიძნელებებიც წარმოიშვა და თან დროც არ ითმენდა, პოლიციის ოფიცერმა ლაფოსმა თავდაპირველ განზრახვაზე ხელი აიღო და ბრძანება გასცა – ბავშვი, ხელწერილით, რომელიმე სასულიერო დაწესებულებაში ჩაბარებინათ, რათა იქ მონათლათ და მის შემდგომ ბელზეც ეზრუნათ. ჰოდა, გრენუიც სენ-მარტენის ქუჩაზე მდებარე სენ-მერის მონასტერს მიაბარეს.

სახელად ჟან-ბატისტი დაანათლეს. ვინაიდან მონასტრის წინამძღვარი იმ დღეს რიგიან ხასიათზე გახლდათ და საქველმოქმედო ხარჯებიც ჯერ კიდევ სრულად არ ამოეწურა, ბავშვი აღარ გადააგზავნეს რუანში – გადაწყვიტეს, მონასტრის ხარჯით აღეზარდათ. ამ მიზნით გადასცეს იგი სენ-დენის ქუჩაზე მცხოვრებ ჟანა ბიუსის, რომელსაც, საწყის ფასად, კვირაში სამი ფრანკი შესთავაზეს გაწეული მომსახურებისათვის.

2.

რამდენიმე კვირის შემდგომ, მოწნული კალათით ხელში, ჟანა ბიუსი მონასტრის კართან აიტუზა და მამა ტერიეს – მელოტ, ორმოცდაათი ოდე წლის ბერს, ოდნავ ნაკებნი ღვინის სუნი რომ სდევდა მუდამ, განუცხადა: აგერა, ბატონო – და კალათი ზღურბლზე დადგა.

– რაა ეს? – იკითხა ტერიემ, დაიხარა და კალათი დაყნოსა იმ იმედით, შიგრადაც სასუსნავს აღმოაჩენდა.

– ო'ფერელი ბავშვთამკვლელის ნაბუშარი!

მამა ტერიემ ხელები მოაფათურა კალათში და ბავშვს სახეზე გადახადა.

– მშვენივრად გამოიყურება. ვარდისფერია და პუტკუნა...

– იმიტომ რომ მე შემხეთქა, ძირამდე გამომწოვა! ოღონდ ეხლა კი მეყო, ეხლა უკვე თხის რძეც შეგიძლიათ აჭამოთ, ფაფაც, თაღამის წვენიც... ყველაფერს ხეთქავს ეგ ნაბუშარი...

მამა ტერიეს, ამ მეტად დამყოლი კაცის მთავარი სამსახურებრივი მოვალეობა მონასტრის საქველმოქმედო ფონდის მართვა იყო. იგი ურიგებდა ფულს ღარიბებსა და უქონელთ და მოელოდა, რომ ამისათვის მადლობას ეტყოდნენ და სხვა საქმეებით მაინც აღარ დატვირთავდნენ. წვრილმანები არ სიამოვნებდა, ვინაიდან წვრილმანებს მუდამ გართულებები მოსდევდა, ნებისმიერი საქმის ყოველგვარი გართულება სულიერ წონასწორობას ურღვევდა და მსგავს რაიმეს კი – საერთოდ ვერ იტანდა. ახლაც საკუთარ თავზე ბრაზობდა იმის გამო, რომ ჭიშკარი გააღო. ერჩივნა, ამ არსებას აელო თავისი კალათი და ჯანდაბამდეც წასულიყო თავისი სადარდებლითა და ძუძუმწოვრებით. ტერიე ნელ-ნელა გასწორდა წელში, ჩაისუნთქა მოთელილი მატყლისა და რძის სუნი, ჟანას რომ ასდიოდა... სასიამოვნო სუნი იყო.

– არ მესმის რა გინდა. ამ ჩვილს სულაც არ აწყენს, ერთხანობა თუ კიდევ აჭმევ ძუძუს.

– მაგას არა, – გააწყვეტინა ჟანამ, – მე კი მწყენს. სამმაგსა ვჭამდი და მაინც მთელი ათი ფუნტი დავიფერთხე! და რისთვის? კვირაში სამი ფრანკისთვის!

– აპაა, გასაგებია, – ტერიეს ოდნავ გულს მოეფონა, – გასაგებია: ისევ ფულზეა საქმე.

– არა!

– ნუ მედავები. როდესაც ამ ჭიშკარზე აკაკუნებენ, ყოველთვის ფულზეა ლაპარაკი. ხშირად ვოცნებობ ხოლმე, ჭიშკრის მიღმა ერთხელ მაინც აღმოჩნდეს ადამიანი, რომელმაც ისე შემოიარა, მცირეოდენი ყურადღების გამო-საჩენად! რომელსაც რამოდენიმე ცალი კაკალი, ან ცოტაოდენი ხილი დაეტოვებინა პატივისცემის ნიშნად... განა ცოტაა შემოდგომით ისეთი რამ, რაც შეუძლიათ შემოგვაწიონ, თუკი ახლოში ჩაივლიან? ვთქვათ, ყვავილები... თუნდაც ერთხელ ვინმემ უბრალოდ შემოიხედოს და ისე, მეგობრულად მი-თხრას: „ღმერთი შეგეწიოთ, მამაო ტერიე, სულ ჯანმრთელად გამყოფოთ!“, მაგრამ როგორც ჩანს, მაგას მე ვერ მოვესწრები. თუ აბრახუნებენ – ესე იგი მათხოვარია, თუ მათხოვარი არაა – ვაჭარია, თუ არც ვაჭარია, მაშინ ხელოსანია და თუ მოწყალეობს არა გთხოვს, მაშასადამე, ანგარიშს წარმოგიდგენს. ქუჩაშიც კი აღარ გამეხვლება – ბიჯი ვერ გადამიდგამს, ვი-დაცეები არ დამეხვიონ გარს, ვინძლო ბებერ ტერიეს რამე დავცინცლოთო.

– ე-ეგ მე არა ვყოფილვარ, – თქვა ჟანამ.

– იცი რას გეტყვი: განა ერთადერთი ძიძა ხარ ჩვენს სამწყსოში! რამდენია ვისაც ერთი სული აქვს, სამ ფრანკად ამ შესანიშნავ ჩვილს ძუძუ აჭამოს, ან ფაფა, ან წვენიც... ან სხვა რამ საკვები...

– მერე, მიეცით ვინმე მაგნიარს!

– მეორეს მხრივ, არც ბავშვის ასე მიგდება ვარგა. ვინ იცის – მოუხდება კია სხვისი რძე? ხომ იცი, ჩვილი უკვე შენი მკერდის სუნსა და შენს გულისცემას იქნება მიჩვეული...

ერთხელ კიდევ ღრმად ჩაისუნთქა თბილი ანაორთქლის სურნელი, ძიძას რომ ასდიოდა, მაგრამ რაკი შეატყო, ჩემმა სიტყვებმა მიზანს ვერ მიაღწიაო, დაამატა:

– ეხლა მოკიდე ამ კალათას ხელი და წადი სახლში. წინამძღვარს მოველაპარაკები, კვირაში ოთხი ფრანკი გადაგიხადონ.

– არა! — თქვა ძიძამ.

– კარგი, ასე იყოს: ხუთი!

– არა.

– აბა, რამდენი გინდა?! — წამოიყვირა ტერიემ, — ხუთ ფრანკისა რა უნდა აჭამო ამ ჩვილს?

– არავითარი ფული მე არ მინდა! — თქვა ჟანამ, — საერთოდ არ მინდა ეს ნაბუშარი სახლში გავაჩერო...

– კი, მაგრამ, რატომ? — პერიემ ისევ ჩაჰყო ხელი კალათაში. — გადასარევი ბავშვია: ასეთი ვარდისფერი, არც ტირის, წყნარად სძინავს და უკვე მონათლულიცაა!

– ეგ ეშმაკსა ყავს შეპყრობილი...

ტერიემ სასწრაფოდ ამოიღო ხელი კალათიდან.

– შეუძლებელია! გამორიცხულია, ძუძუთა ბავშვი ეშმაკის შეპყრობილი იყოს. ჩვილი ჯერ არაა ადამიანი, ის მომავალი ადამიანია მხოლოდ და სულიც არ ჩამოყალიბებია ჯერ. აქედან გამომდინარე, ეშმაკისათვის ის ყოველგვარ ინტერესს მოკლებულია. იქნება და უკვე ლაპარაკობს? თუ ბნედა მოსვლია ოდესმე? ან იქნებ გოგირდის სუნი ასდის?

– მაგას არაფრის სუნი არ სდის!

– ა, ხომ ხედავ! აი, ნიშანი! ეშმაკის შეპყრობილი რომ იყოს, მყრალი სუნი აუვიდოდა.

ძიძა რომ დაემშვიდებინა და თან საკუთარი გამბედაობაც ეჩვენებინა, ტერიემ კალათი ასწია და ჩაყნოსა.

– არაფერი განსაკუთრებული, — წარმოთქვა მან რამდენიმეგზის შეყნოსვის შემდგომ, — მართლაც რომ არაფერი! ერთი ეგაა, მეჩვენება თითქოს მის

სახვევებს კი ასდის რაღაცა სუნი, – და კალათა ქალს გაუწოდა, რათა მასაც დაედასტურებინა ეჭვი.

– მაგაზე არ ვამბობ, – პირქუშად შეეპასუხა ძიძა და კალათი უკან გააწევინა. – სახვევებზე არ გეუბნებით. მაგის ჩასვრილ სახვევებს სხვა რა სუნი უნდა სდიოდეს? რაცაა, ეგაა. თავად მაგას, მაგ ნაბუშარს არ ასდის!

– ეგ იმიტომ რომ ჯანმრთელია! – ხმას აუწია ტერიემ, – ჯანმრთელია და იმიტომაც არ ასდის სუნი! ნებისმიერმა იცის, რომ სუნი მხოლოდ ავადმყოფ ბავშვებს ასდით. თუ ბავშვს ყვავილი სჭირს, მას ცხენის ჩონჩროვიკის სუნი ასდის, თუ ქუნთრუშა შეეყარა – ძველი ვაშლის, ხოლო ჭლექის დროს – ხახვის. ეს კიდევ ჯანმრთელია – სულ ესაა მთელი მისი ავადმყოფობა. რატომ უნდა ყარდეს? განა შენი საკუთარი ბავშვები ყარან?

– არა, – თქვა ჟანამ. – ოღონდ მათ ადამიანიშვილის შესაფერისი სუნი მაინც ასდით.

ტერიემ ისევ მიწაზე დადგა კალათა, რაკილა მრისხანების იმ პირველი ტალღების შემოტევა იგრძნო, დედაკაცის სიჯიუტის გამო რომ ეწყებოდა. კამათის გაგრძელების შემთხვევაში, გამორიცხული არ იყო ორივე ხელის თავისუფლად ქნევა დასჭირებოდა და შიშობდა, ამით ბავშვს არ დაშავებოდა რაიმე. თუმცა, საწყისად, ჯერ ხელები ზურგსუკან დაიწყო, ღიპი დარბაის-ლურად გაიგდო წინ და მკაცრი კილოთი დაეკითხა ქალს:

– ესე იგი, შენ ამტკიცებ რომ იცი, როგორი სუნი უნდა ასდიოდეს ადამიანის ნაშიერს, ვინაც ამავე დროს – ნება მიბოძე ესეც შეგახსენო, მი-თუმეტეს რომ იგი უკვე მონათლულია – იგივე ღვთისშვილი არს?

– ღიახაც, – თქვა ძიძამ.

– და ამავე დროს შენ ამტკიცებ, რომ თუ მას იმგვარი სუნი არ სდის, როგორიც თავად მიგაჩნია საჭიროდ – შენ, მეძუძურ ჟანა ბიუსის, სენ-დენის ქუჩიდან – იგი უცილობლად სატანას კერძია?!

ღირსმა მამა ტერიემ მარცხენა ხელი ზურგსუკნიდან გამოაცურა და კითხვის ნიშნად მოლუნული თითი მუქარით მიუტანა ქალს ცხვირთან. ჟანა ჩაფიქრდა. სულაც არ ეპიტნავენებოდა, საუბარი თეოლოგიური დისპუტის კალაპოტში მოქცეულიყო – მანდ იმთავითვე დასახრჩობად იყო განწირული.

– მსგავსი თითქოს არაფერი მიქვამს – უკან დაიხია ქალმა. – ჩარეულია აქ სატანა, თუ არაა ჩარეული – თავად გადაწყვიტეთ, მამაო ტერიე, ეგ მე არ მეხება. მე მხოლოდ ერთი რამ ვიცი: ეს ბავშვი თავზარს მცემს, იმიტომ რომ ის სუნი არ ასდის, ჩვილებს რომ უნდა სდიოდეთ.

– აჰა-ა-, კმაყოფილებით წარმოთქვა ტერიემ და ხელები ისევ ზურგსუკან შემოიწყო. – ესე იგი, ჩვენს სიტყვებს ეშმაკის შესახებ უკანვე ვიღებთ. ძალიან კარგი. ახლა კი ქენი სიკეთე და ამიხსენი: როგორი სუნი ასდით ძუ-

ძუთა ბავშვებს, როცა მათ სწორედ ისეთი სუნი ასდით, როგორც შენის აზრით, მათ ჩვეულებრივ უნდა სდიოდეთ?!

– კარგი სუნი ასდით, – თქვა ძიძამ.

– რას ნიშნავს „კარგი“? – შეღრინა ტერიემ. – განა ცოტა რაიმეს ასდის კარგი სუნი? იის კონას კარგი სუნი ასდის, შეჭამანდიდან ამოღებულ ზოცსაც, და ბალებს არაბეთისას... მე იმას გეკითხები – რაგვარი სუნი ასდით ძუძუთა ბალებს?!

ძიძამ პასუხი შეაგვიანა. რაღა თქმა უნდა, მშვენივრად იცოდა როგორი სურნელი ასდის ძუძუთა ბავშვებს, იცოდა ძალიან ზუსტად — მის ხელში ათეულობით მათგანს გაეუღო — იგი აჭმევდა მათ, არწევდა, კოცნიდა და ეფერებოდა. ღამ-ღამობით ყნოსვით შეიგრძნობდა ჩვილს ლოგინში და ახლაც ზუსტად ახსოვდა ეს სურნელი. ოღონდაც, სიტყვიერად მისი გადმოცემა არც არასოდეს უცდია...

– აბა? – ტერიე აიზღარბა და მოუთმენლობისაგან თითები აატკაცუნა.

– ახლა როგორაა საქმე, – ქალი იხტიბარს არ იტეხდა, – ესე უცებ ვერც იტყვი... აი, მაგათ ყველგან სასიამოვნო სუნი ასდით, ოღონდ ერთნაირი კი არა, ხვდებით მამაო? მათ ფეხებს, მაგალითად, მზით გამთბარი, გლუვი ქვების სუნი ასდის... არა, უფრო თიხის ქოთნების... ან უფრო სწორედ კარაქის, ახალი კარაქის, აი, ეგრეა – მაგათ ფეხებს ახალი კარაქის სურნელი სდის. სხეულებს კიდევ... რძეში რო გალეტს ჩააღობთ, ისეთი; ზოლო თავებს, იქ, კეფაზე, სადაც თმები ხუჭუჭდება... მოკლედ აი აქ, მამაო, სადაც თქვენ უკვე აღარაფერი აღარა გაქვთ — და ამდენი სისულელის მოსმენისაგან გაშეშებულ, მორჩილად თავდახრილ ტერიეს მოტყვლებილ კეფაზე დაუკაკუნა — დიახ აქ, ზუსტად აქ მამაო, მათ ყველაზე გემრიელი სუნი ასდით. კარამელის სუნითაა მამაო, და ისეთი საოცარი, ისეთი ტკბილია, ვერც წარმოიდგენთ! როგორც კი ემანდ უყნოსავ — მაშინვე შეგიყვარდება, გინდა საკუთარი იყოს და გინდა სხვისი. სწორედ ასეთი სუნი უნდა ასდიოდეს ძუძუთა ბავშვს და არა სხვაგვარი. თუ მათ არავითარი სურნელი არ ასდით, თუ კეფაზე არავითარი სუნი არ ასდის, როგორც ამ ნაბუშარს, ზამთრის სუსხვით, მაშინ... როგორც ინებებთ, ისე ახსენით ეს მამაო, მაგრამ მე... – ქალმა ხელები მკერდზე მიიკრა და ისეთი ზიზღით შეხედა კალათას, თითქოს შიგ გომბეშო იჯდა, – მე, ჟანა ბიუსის, მაგასთან საქმე აღარა მაქ!

მამა ტერიემ ნელი-ნელ ასწია თავი და რამდენიმეჯერ გადაისვა ხელი ტონზურაზე, თითქოს იქ თმების გასწორება უნდაო; მერე, ვითომდა შემთხვევით, თითები ნესტოებთან მიიტანა და დაყნოსა.

– როგორც კარამელს? – დაეკითხა ისევ და შეეცადა მკაცრი ტონი დაებრუნებინა. – კარამელიო!.. რა გესმის შენ კარამელის? გიჭამია ოდესმე?

– მე კი არა, ოღონდ... – ჩაილაპარაკა ჟანამ, – აი ერთხელ, დიდ სასტუმროში ვიყავი, სენ-ონორეს ქუჩაზე და ჩემი თვალით ვუყურე, როგორ

ამზადებდნენ მწვარი შაქრისა და ნაღებისაგან. ისეთი გემრიელი სუნი ქონდა, ისეთი, ცხოვრებაში არ დამავიწყდება!

– კაი, ჰო... როგორც გინდა. – ტერიემ ერთხელ კიდევ ეჭვიანად იყნოსა თითხე... ოღონდ ახლა გაჩუმდი ერთ წამს... ვატყობ, სრული ძალისხმევა დამჭირდება ამ დონეზე შენთან სასაუბროდ! მაშ, ასე: ვადასტურებ, რომ გარკვეული მიზეზების გამო, უარს ამბობ გააგრძელო ჩემთვის მონდობილი ჩვილის, ჟან-ბატისტ გრენიუს კვება და უბრუნებ მას დროებით მეურვეს, სენ-მერის მონასტერს.. საწუხ არს ესე, მაგრამ ვფიქრობ, შენი გადარწმუნება ჩემს ძალ-ღონეს აღემატება. დათხოვნილი ხარ.

ამ სიტყვებით ასწია კალათა, კიდევ ერთხელ შეიყნოსა რძის, მატყელისა და მიმქრალი სითბოს ფუმფულა სუნი, ჭიშკარი მიკეტა, გადარაზა, შებრუნდა და თავისი კაბინეტისაკენ გაემართა.

3.

განათლებული ადამიანი გახლდათ ღირსი მამა ტერიე. თეოლოგიას ნა-ზიარები, იგი ფილოსოფიასაც სწყალობდა და გზადაგზა არც ბოტანიკასა და ალქიმიას აკლებდა ხელს... ყოველნაირად მეცადინეობდა, საკუთარ პიროვნულობაში კრიტიკული აზროვნება განვეითარებინა. განათუ მეტისმეტი მოსდიოდა – მათსავით, ვისაც სასწაულქმედებებს, წინასწარმეტყველებებსა თუ წმინდა წიგნებში შეაქვთ ეჭვი – მიუხედავად იმისა, რომ ეს წიგნები ხშირად არ ექვემდებარებიან გააზრებულ ახსნას და ზოგჯერ, ეწინააღმდეგებიან კიდევ ერთმანეთს; პირიქით – ერჩივნა, სრულიად არ შეხებოდა ასეთ საკითხებს, რადგან არც გული უთქმოდა და თანაც, მოუსვენრობისა და ეჭვის მორევში ჩაძირვას უფრთხოდა. ხოლო იმისათვის, რომ საღი გონებით ისარგებლო, კაცს უპირველესად, სიმშვიდე და საკუთარი თავის რწმენა სჭირდება. ოღონდაც, იგი ყოველგვარი მისაღები მეთოდებით ებრძოდა უბირი ხალხის ცრურწმენებს: ჯადოქრობა თუ ბანქოზე მკითხაობა, ჯადოთილისმების ტარება, გათვალვისაგან გამოლოცვა, სულების შელოცვა, ათასი ჯურის თვალთმაქცობანი სავსე მთვარობისას... რაღას არ სჩადიოდნენ ეს კეთილი ადამიანები! გულით წუხდა, რომ ქრისტიანობის ათასწლოვანი ისტორიის მიუხედავად, ეს წარმართული ჩვევები ჯერ კიდევ არ იყო ამოძირკვეული და თან, უმეტეს შემთხვევებში, ეგრედ წოდებული „სატანასთან კავშირიცა“ და „ემმასაგან შეპყრობილობაც“ – ახლოთ განჩხრეკისას – უბრალოდ, ცრუმორწმუნეობის ზეობა აღმოჩნდებოდა ხოლმე. მართალია, თავად სატანას არსებობისა თუ მისი ძალის უარყოფა, მამა ტერიეს მხრივ, მეტისმეტი იქნებოდა – მსგავსი პრობლემების გადაწყვეტა, რაიც ღვთისმეტყველების ძირითად საფუძვლებს შეეხება, ერთი უბრალო, მდაბალი ბერის საქმე არაა. ამისათვის ზეგარდმო ინსტანციები არსებობენ. *Autem**, თუკი

* აქ: მეორეს მხრივ (ლათ.)

ისეთი ჭკუამოკვლე არსება, როგორც ჟანა ბიუსია, აცხადებს – რაღაც ეშმაკეული აღმოვაჩინეო, სწორედ ეგაა იმის უტყუარი საბუთი, რომ სატანას ამ საქმეში ხელი არ ურევია... სწორედ იმით რომ ჟანას მიაჩნია, თითქოსდა ხსენებული ეშმაკეული აღმოაჩინოს, ურყევლად დასტურდება – აქ არაფერი ეშმაკეული არაა განრეული! სატანა არც ისეთი ბრეყვია, თავისი თავი ვიღაც მეტუქურე ჟანა ბიუსის აღმოაჩინოს, და ისიც ყნოსვით – ამ ყველაზე პრიმიტიული, ყველაზე ქვედა გრძნობით! განათუ ჯოჯოხეთს მხოლოდ გოგირდის სიმყარაღე ასდის და სამოთხეს – საკმევისა და მირონის სურნელი! ... ესაა უშვებნელესი ცრურწმენა, შორეული, წარმართული დროის შესაფერი – როცა ადამიანები პირუტყვებით ცხოვრობდნენ, როცა სახელველიც ისეთი სუსტი ჰქონდათ, ფერებსაც კი ვერ არკვევდნენ ხეირიანად, მაგრამ სამაგიეროდ სისხლის გემისა სწამდათ; სუნის, რომელსაც გრძნობდნენ, რომლის მიხედვითაც მტერს მოყვარისაგან განარჩევდნენ და სწამდათ, რომ მათ სუნსაც ასევე გრძნობდნენ გოლიათი კაციაჭამიები, მაქცია მგლები და როკაპი ფურიები, რომლებიც თითქოსდა მათზე ნადირობდნენ... ამიტომაც სწირავდნენ თავიანთ ამაზრზხენ ღმერთებს კოცონებზე დამწვარ, აყროლებულ, მხრჩოლავ მსხვერპლს... საშინელებაა! „სულელი ცხვირით ხედავს“ – ნათქვამია და ალბათ მართლაც მეტს, ვინემ თვალებით; და საფიქრებელია, ღვთივობებუღი გონების ნათელმა კიდევ ათასწლეული უნდა ანათოს, სანამ პირველყოფილი ცრურწმენების ნაფლეთები საბოლოოდ განიფანტება...

მაგრამ რა შუაშია აქ ეს პატარა არსება, ეს პაწია ბაღლი?! წევს თავისთვის კალათში და სძინავს ტკბილად... არც არაფერი გაეგება იმ დამზაფრავი ბრაღლებების, მას რომ წაუყენეს. თავხელი ძიძა კიდევ ბედავს ამტკიცოს, თითქოს ისეთი სუნი არ აგდის, როგორც ადამიანების შვილს უნდა ასლიოდეს... რა გინდა ახლა ამაზე რო უთხრა?! უ-ტუ-ტუ-ტუ-ტუ...

მამა ტერიემ ფრთხილად დაარწია კალათი, რამოდენიმეჯერ კიდევ დაადუღუნა ეს თავისი უ-ტუ-ტუ... რაკილა ფიქრობდა, ასეთი წამოძახილი უებარი დამამშვიდებელია და კეთილისმყოფელადაც მოქმედებს ტუტუთა ბავშვებსზეო.

„მამ, ჩვენ თურმე მაინცდამაინც კარამელის სუნი უნდა აგვდიოდეს, არა? უ-ტუ-ტუ...“ – მერე კალათში ხელი მოაფათურა, ამოიღო, დასუნა, მაგრამ მის მიერვე სადილად მირთმეული მჭავე კომბოსტოს სუნი შეიგრძნო მხოლოდ. შეყოყმანდა, მიმოიხედა – ემანდ ვინმე არ მითვალთვალებდესო, კალათა ასწია და თავისი სქელი ცხვირი ჩარგო შიგ, ღრმად, იმდენად ღრმად, რომ ბავშვის თხელმა, წითურმა თმამ ცხვირის ნესტოებზე მოუღიჭინა; მაინცდამაინც კარგად გააზრებული არც ჰქონდა, როგორი სუნი უნდა ასლიოდეს ჩვილს – არა კარამელის, რა თქმა უნდა, ეს თავისთავად გასაგები იყო: კარამელი ხომ დამწვარი შაქარია და ჩვილს, რომელსაც რძის გარდა ჯერ არაფერი უჭამია, არ შეიძლება დამწვარი შაქრის სუნი ასლიოდეს. შეიძლება ძიძის რძის სუნი აუვიდეს... მაგრამ რძის სუნი ნამდვილად არ ასლიოდა. იქნებ თმების, კანის ან სულაც ოდნავი ოფლის? ტერიემ დაყნოსა და შეეცადა საკუთარი თავი დაერწმუნებინა, სწორედ რომ თმების, კანის ან სულაც ოდნავი ოფლის სუნს ვგრძნობო, მაგრამ ცდა ამაო გამოდგა – ვერავითარი სუნი ვერ მოყნოსა. “ბავშვებს ალბათ, საერთოდ არ ასლით არავითარი სუნი,” –

გაიფიქრა ღირსმა ტერიემ. – “საქმეც სწორედ ისაა, რომ ძუძუთა ბავშვს, თუკი მას სისუფთავეში ამყოფებენ, არ შეიძლება რაიმეს სუნი ასდიოდეს; ის-ევე, როგორც არ შეუძლია ილაპარაკოს, ირბინოს, ან წეროს. ეს ყველაფერი მხოლოდ ასაკთან ერთად მოდის. უფრო ზუსტად – ადამიანი ძლიერი სუნის გაგრძელებას მხოლოდ სქესობრივი მომწიფების შემდგომ იწყებს; დიახაც, სწორედ რომ ასეა და არა სხვაგვარად... განა თავის დროზე ჰორაციუსმა არ დაწერა: *ემაწვილს ბეკეკას სუნი სდიოდა, ქალიშვილს კი – თეთრი ნარ-გიზის...* ვის-ვის, და რომაელებს მაინც გაეგებოდათ მსგავსი რამეები! ადამიანის სუნი – სხეულის სუნია, და აქედან გამომდინარე – ცოდვის სუნი... რა სუნი უნდა ასდიოდეს ბავშვს, რომელსაც არც სიზმარში და არც ცხადში, არავითარ ცოდვაში ფეხი არ ჩაუდგამს? რისი სუნი უნდა სდიოდეს? *უ-ტუ-ტუ!* არც არაფრის!”

ბერმა კალათი მუხლებზე დაიდგა და ფრთხილად დაარწია. ბავშვს ჯერ კიდევ ეძინა. მარჯვენა ხელი, პატარა და ვარდისფერი, წნულის კიდეზე გადმოეშვირა. ტერიეს გაეღიმა და უეცრად ძალზე მყუდროდ იგრძნო თავი. დროის ამ მცირე მონაკვეთში ერთი იმგვარი უსაგნო ფიქრიც კი გაივლო გუნებაში, რომ დავუშვათ და – ის ამ ბავშვის მამაა; ვითომდა ბერი კი არა, ერთი უბრალო, პატიოსანი ხელოსანია; უპოვია თავისთვის ცოლი, თბილი ისეთი დედაკაცი, მატყლისა და რძის სუნი რომ ასდის, გაუჩენიათ ბიჭუნა და აი, ანანავებს ახლა მუხლებზე საკუთარ შვილს! – *უ-ტუ-ტუ...* გაფიქრებაც კი ეამა. იყო ამაში რაღაც ნუგეშის მომგვრელი... მამა მუხლებზე ათამამებს თავის ბიჭუნას, *უ-ტუ-ტუ...* სურათი სამყაროსავით ძველი იყო და მაინც მუდამ ახალი, ალალ-მართალი, დასაბამიდან... დიახ! დიახ!..

მამა ტერიეს გრძნობები მოეძალა, სული გაუთბა...

ამასობაში ბავშვმაც გამოიღვიძა. ოღონდ ჯერ გაიღვიძა მისმა ცხვირმა: პაწაწინა ცხვირი ამოძრავდა, შეიჭმუნა და შეყნოსვა იწყო; შეისუნთქა პაერი და ნელ-ნელა, მოკლე-მოკლე სრუტუნით გამოუშვა, თითქოს დაცემი-ნება სურსო. მერე დაიმანჭა და ბავშვმა ახლა თვალები გაახილა. გაურკვეველი ფერის თვალები – მქრქალი ნაცრისფერის, ტბორის მწვანესა და მოთეთრო-ნაღებისფერი რაღაც ნაზავი; თხელი, ლორწოვანი ლიბრით დაფარული და ჯერჯეობით არც სახედველად გამოსადეგი. ტერიეს ისეთი შთაბეჭდილება დარჩა, თითქოს ეს თვალები მას საერთოდ არც აღიქვამდნენ. აი, რაც შეეხება ცხვირს... თუ დაბინდული მზერა რაღაც გაურკვეველს მისჩერებოდა, ცხვირს, ეტყობა, რაღაც გარკვეული ამოელო მიზანში და მამა ტერიესაც უცნაური გრძნობა გაუჩნდა, რომ ეს მიზანი თავად იყო, პირადად იგი – მამა ტერიე! პაწაწა ნესტოები გასაშლელი კოკრებივით იბერებოდნენ ბავშვის სახეზე; ოღონდ იმ კოკრებივით, მტაცებელ ყვავილებს რომ აქვთ, სამეფო ბოტანიკურ ბაღში მოშენებულებს – რაღაც მომწუსხავი, მიშხიდველი, შემსრუტავი ძალა იგრძნობოდა მათში. ტერიეს ისეთი გრძნობა ჰქონდა, თითქოს ბავშვი ხედავდა მას, აღიქვავდა თავის ნესტოებით; მჭახედ და გამომცდელად, და გაცილებით უფრო გამსჭვალავად, ვიდრე ეს თვალებს შეუძლიათ. თითქოს ნესტოებით ისრუტავდა რაღაც ისეთს, მისგან გამომდინარეს, რაც ტერიეს ვერც შეეკავებინა და ვერც დაეფარა.

ბავშვი, რომელსაც თავად არ ასდიოდა არავითარი სუნი, ყოვლად მოურიდებლად იყნოსავდა მას, ბავშვი მას გემით გრძნობდა! და უცებ, ტერიეს საკუთარი თავი მოეჩვენა ამყრალებული – ოფლითა და ძმრით, მკავე კომბოსტოთი და გაურეცხავი თეთრეულით; მოეჩვენა, რომ შიშველია და მახინჯი, რომ მას შეჰყურებს ვინმე, ვისაც თავი ჯერ არაფრით გაუცია. ეჩვენებოდა – ყნოსვამ კანს გააღწია, შეიჭრა შიგნით, სულ, სულ შიგნით, სიღრმეებში... უფაქიზესი გრძნობები, ყველაზე ბინძური აზრები შიშველდებოდა ამ პატარა, ხარბი ცხვირის წინაშე, ჯერ ცხვირიც რომ არ ეთქმოდა – რაღაც წამონაზარდი სახეზე, რომელიც რიტმულად იჭმუხნებოდა და იბერებოდა; პაწაწინა, ნასვრეტებიანი, მთრთოლავი ასო. ტერიეს გააჟრჟოლა, გულზიდვა მოაწვა. ამჯერად მანაც შეარხია ცხვირი, თითქოს მის წინ ისეთი რამ იყო, რასაც უამური სუნი ასდის და რასთანაც მას არავითარი კავშირი არ სურდა ჰქონოდა. მშვიდობით, ზმანებანო საკუთარ სისხლსა და ხორცზე! გაითელა გრძნობამორეული ხილვა მამისა, ძისა და სურნელოვანი დედიკოსი. გაქრა ნაზი ოცნებების აცმა, საკუთარ თავსა და ამ ბავშვზე რომ ააგო: უცხო, ცივი არსება ეწვა ახლა მუხლებზე, სამტრო ცხოველი – და ღვთისმშობიშობა, თავდაჭერა და საღი აზრი რომ არა, რაიც მამა ტერიეს თავთვისებუთაგანი განხლდათ, ისე ჩამოიბერტყავდა კალთიდან, როგორც რამ ობობას...

ტერიე წამოიძარტა, კალათი მაგიდაზე დადგა. ერთი სული ჰქონდა, საერთოდ გათავისუფლებულიყო ამ ჩვილისა და მთელი ამ ამბიდან, რაც შეიძლება სასწრაფოდ, ახლავე, დაუყოვნებლივ!...

და აი, სწორედ ამ დროს ჩვილმა ჯდავილი მორთო. თვალები მოჭუტა, წითელი პირი დააფჩინა და ისე საზიზღრად და გამყინავად აწივლდა, მამა ტერიეს, ლამის იყო, ძარღვებში სისხლი გაეყინა. ბავშვის გასაჩუმებლად, კალათას აყანყალებდა და გაჰყვიროდა: უ-ტუ-ტუ-ტუ-უ, მაგრამ ჩვილმა უფრო უმატა ტირილს; სახე სულმთლად წამოუჭარხალდა, ლამისაა ჩაბჟირებულიყო.

“როგორმე უნდა მოვაშოროთ აქაურობას!” – ფიქრობდა ტერიე, – “მოვიცილოთ ეს...” – ეშპო, უნდოდა ეთქვა, მაგრამ გამოერკვა და ენა მოიკვნიტა... – “მოვიშოროთ ეს ურჩხული, ეს აუტანელი ბავშვი! მაგრამ საით?” – უბანში ბევრი ძიძა და თავშესაფარი მოიძებნებოდა, ოღონდ მონასტერთან მეტისმეტად ახლოს, თითქმის გვერდიგვერდ. ეს არსება კი სადმე შორს უნდა წაეყვანა, იმდენად შორს, შეუძლებელი ყოფილიყო მისი ასე, ნებისმიერ დღეს კარზე მოყენება. ჯობდა, რა თქმა უნდა, სულაც სხვა მრევლისთვის გადაელოცა; სენის გაღმა გაყვანა ხომ – კიდევ უკეთესი. უფრო კიდევ – ქალაქის გარეთ, სენ-ანტუანის გარეუბანში. “აჰა! აი სად წავიყვანოთ ამ მყვირალას – ქალაქიდან შორს, აღმოსავლეთით, ბასტილიის გაღმა, სადაც ღამ-ღამობით ქალაქის ჭიშკრებს კეტავენ!”

ტერიემ ანაფორის კალთები აიკეცა, ხელი სტაცა აღნავლებულ კალათას და გაიქცა. გაიქცა ჩიხების ლაბირინთებით, სენ-ანტუანის გარეუბნისაკენ, სენის გაყოლებასზე. იქ, აღმოსავლეთით, შარონის ქუჩის სულ ბოლოში, მაგდალინელის მონასტრის ახლოს, ცხოვრობდა ვინმე ქალბატონი გაიარი, რომელიც ნებისმიერი ასაკისა და წარმომავლობის ბავშვებს იღებდა სრულ კმაყ-

ოფაზე, ოღონდ კი ვინმეს ფული გადაეხადა. აქ მან ჯერ კიდევ მყვირალი კალათა მადამ გაიარს გადასცა, ერთი წლის ქირა წინასწარ გადაიხადა და ისევ ქალაქისაკენ გამოიქცა. მონასტერში დაბრუნებულმა, ანაფორაც გაიძრო, საცვლებიც, თითქოს ჭირი რამ შეეროდაო, თავით-ფეხებამდე განიბანა, საკუთარ სენაკში, საწოლში მწოლიარემ კიდევ დიდხანს ილოცა, პირ-ჯვარიც ბევრჯერ გადაიწერა და ბოლოს, როგორც იქნა, ჩაიძინა.

4.

ქალბატონი გაიარი ჯერ ოცდაათისაც არ იყო, მაგრამ ცხოვრება უკვე გამოვლილი ჰქონდა. გარეგნობით საკუთარ ასაკს თითქოს სავსებით შეეფერებოდა, ოღონდ ამავე დროს, ორჯერ, სამჯერ ხნიერადაც გამოიყურებოდა და ქალიშვილის მუმიას უფრო მოგაგონებდათ. შინაგანად, დიდი ხნის მკდარი იყო: ბავშვობაში მამამ ბუხრის საჩხრეკი ჩაარტყა შუბლში, ზედ წარბებს შუა და მას შემდეგ დაკარგა ყნოსვაც და ყოველგვარი ადამიანური სიტბოს შეგრძნებაც, გინდ სიცივისაც და საერთოდ, ყოველგვარი გაცდის უნარი. იმ ერთი დარტყმით მოკლეს მასში სინაზე, სიძულვილი, სიხარული თუ სასოწარკვეთილება. უფრო გვიან კიდევ, არც ქმართან თანაცხოვრებისას და არც ბავშვების გაჩენისას უგრძნია რაიმე – არაფერი, სრულიად არაფერი. არც დარდობდა მათზე, რომლებიც დაეხოცნენ და არც ხარობდა მათით, რომლებიც დაურჩნენ. ქმარი რომ სცემდა ხოლმე – არც კი კრთებოდა და არც მაშინ უგრძნია შვება, როდესაც იგი, ოტელ-დიეს თავშესაფარში, ქოლერიით მოკვდა. ორად-ორი შეგრძნება ჰქონდა – ოდნავი სულიერი ნალველი, როდესაც თვიური შაკიკის დრო მოუწევდა, და ოდნავ შესამჩნევი სულიერი შემსუბუქება, როდესაც შაკიკი გაუვლიდა; არავითარი სხვა გრძნობები ამ ცოცხლად მკვდარ ქალს არ გააჩნდა.

მეორეს მხრივ... ან იქნებ, სწორედაც რომ ემოციურობის სრული ატროფიის გამო, ქალბატონი გაიარი დაუოკებელ, შეიძლება ითქვას, დაუნდობელ ლტოლვას იჩენდა სამართალიანობისა და წესრიგის მიმართ. მის აღსაზრდელებში არცერთს არავითარი უპირატესობა არ ენიჭებოდა და მათგან არც არავინ დაჩაგრულა ოდესმე. მადამ გაიარი დღეში სამჯერ აჭმევდა მათ და ამის მეტად, არა ნამცეცი, არა წინწყალი არ ერგებოდათ. ასევე, დღეში მხოლოდ სამჯერ უცვლიდა ჩვილებს საფენებს და ისიც მხოლოდ წლამდე: ის, ვინც ამის შემდეგ ჩაისველებდა, ჯილდოდ ერთ სილაქს და ერთი ჭამით ნაკლებს იგემებდა. მიღებული თანხის ზუსტად ნახევარი აღსაზრდელებზე იხარჯებოდა, ნახევარს კი თავად იტოვებდა. სიიაფის დროს, არასოდეს ცდილა შემოსავლის გაზრდას და არც სიღუხჭირის ხანებში მიუმატებია დანახარჯებისთვის თუნდაც ორიოდ სუ – მაშინაც კი, როცა საკითხი სიკვდილ-სიცოცხლეზე იდგა: წინააღმდეგ შემთხვევაში მთელი ეს საქმიანობა მისთვის წამგებიანი იქნებოდა. ქალბატონი გაიარი ფულს კი არ იყო დახარბებული – მას ფული სჭირდებოდა. ყველაფერი ზუსტად ჰქონდა გათვლილი: სიბერეში რენტის ყიდვა სურდა, და კიდევ საკმარისი თანხის მოქუჩება, რათა

უფლება მიეცა თავისათვის, საკუთარ სახლში მომკვდარიყო, ქმარივით ღატაკთა თავშესაფარში არ გაეჭიმა ფეხი. ქმრის სიკვდილს იგი მაინც-ცადამაინც არ შეუშფოთებია, მაგრამ სძულდა ერთმანეთისათვის საცხები უცხო ადამიანების ეს საერთო-სახალხო სიკვდილი – საკუთრად სიკვდილის უფლება უნდოდა ჰქონოდა, და ამისათვის საჭირო თანხა სრულად მოეგროვებინა. მართალია, ხდებოდა ხოლმე, ოცდახუთამდე აღსაზრდელიდან სამი ან ოთხი უკვდებოდა გამორჩეულად სუსხიან ზამთარს, ოღონდ ეს შედეგი მაინც უკეთესი იყო სხვა კერძო გადიებთან შედარებით; ხოლო დიდი სახელმწიფო თუ საეკლესიო თავშესაფარების შედეგებს, სადაც ხშირად უპატრონო ბავშვების ცხრა მეათედი იღუპებოდა, ხომ სჯობდა და სჯობდა. სიმართლე ითქვას, მათი შევსება ადვილი იყო: პარიზის საშო ყოველწლიურად აწარმოებდა ათი ათასზე მეტ მიგდებულ, უკანონოდმობილ თუ ობოლ ბავშვს, ასე რომ გარკვეულ დანაკარგებს იოლად ურიგდებოდნენ.

პატარა გრენუისათვის ნაღდი ღვთის წყალობა იყო ქალბატონ გაიარისას მოხვედრა. სათუთა, სადმე სხვაგან რომ გადარჩენილიყო, აქ კი, ამ უსულგულო ქალთან – გაიხარა. მაგარი აგებულებისა იყო და იშვიათი გამძლეობით გამოირჩეოდა. ვისაც მასავით გადაეტანა დაბადება ნამუსრევს შორის, ცხოვრებიდან საკუთარი თავის გაძევების ნებას ძნელად თუ მისცემდა ვინმეს. შექმლო მთელი დღეობით ეხვრიბა წყალ-წყალა წვნიანი, შექმლო დაკმაყოფილებულიყო გაწყალებული რძით, მოენელებინა დამპალი ბოსტნეული თუ სუნდაკარული ხორცი. ჩვილობაშივე გადაიტანა წითელა, დიზენტერია, ყვავილი, ქოლერა; ჩავარდა ექვსმეტრიან ჭაში, მღუღარე წყლითაც დაიფუფქა და მიუხედავად იმისა, რომ ყოველივე ამისაგან მრავალი ნაიარევი, ნაწიბური, ფუფხი, დაკენკილი სახე, დამახინჯებული ფეხი დარჩა სამახსოვროდ, ის მაინც ცოცხლობდა, რადგან ბაქტერიასავით შემეგუებელი იყო და ტკიპასავით ამტანი – იმ ტკიპასავით, ხის ტოტზე რომ მოყუჩებულა და ჯერ კიდევ წინა წელს გამოწოვილი სისხლის პაწაწკინტელა წვეთით იკვებება.

სხეულისათვის საკვებისა და სამოსის მეტად მწირი რაოდენობა სჭირდებოდა, სულისათვის კი არ სჭირდებოდა არაფერი. უსაფრთხოება, ყურადღება, სინაზე, სიყვარული და ყველაფერი მსგავსი, რაც ვითომდა, ბავშვებს სჭირდებოდათ, გრენუისათვის რულიად ზედმეტი ბარგი იყო. მეტიც, ისე ჩანდა, მან დასაბამიდან უარი თქვა ყოველივეზე – იმთავითვე – რათა ეცოცხლა.

ძახილი, რომლითაც თავის დაბადება განაცხადა – ძახილი თევზის დასახარისხებელი მაგიდის ქვემოდან, რითაც მშობელი დედა ეშაფოტთან მიიყვანა, არ იყო შეუცნობელი ძახილი თანაგრძნობასა და სიყვარულზე, არამედ გაცნობიერებული – მეტიც, კინაღამ წამოგვცდა, გააზრებული-თქო, – რითაც ახალშობილი მთელი შეუპოვრობით ილაშქრებდა სიყვარულის წინააღმდეგ; სიცოცხლისათვის, ოღონდ – სიყვარულის გარეშე. მოცემულ შემთხვევაში, ერთ-ერთი ამ ორიდან შესაძლებელი იყო მხოლოდ მეორის გამორიცხვის შედეგად, და გრენუის რომ მოეთხოვა ყველაფერი ერთად, უცილობლად დაიღუპებოდა, დაიღუპებოდა ყოვლად საბრალობლად. თუმცა... მისთვის მინიჭებული მეორე შესაძლებლობის გამოყენებაც ხომ შექმლო – დადუმებულიყო და დაბადებიდან სიკვდილამდე ის გზა აერჩია, ცხოვრებას რომ გვერდს უკლის – ამით როგორც ქვეყანას, ისე საკუთარ თავსაც დიდ ბოროტებას

აარიდებდა. ოღონდ ეგაა, არყოფნაში ასე უხმაუროდ წასასვლელად თანდაყოლილი გულითადობის თუნდაც ცინცხალი იყო საჭირო – ანუ ის, რაც მას არ გააჩნდა. თავიდანვე ურჩხული იყო და სიცოცხლესაც მხოლოდ სიჯიუტისა და ღვარძლიანობის გამოისობით მისცა ხმა.

თავისთავად გასაგებია, მან ეს გადაწყვეტილება მიიღო არა როგორც ზრდასრულმა ადამიანმა, რომელიც ასე თუ ისე, გონებითა და გამოცდილებით საზღვრავს — ორი პერსპექტივიდან რომელი აირჩიოს; და მაინც, გააკეთა არჩევანი, გააკეთა ვეგეტატიურ დონეზე, ასე ვთქვათ, მცენარეულად — ისე, როგორც ამას მარცვალი შეება: ამოუშვას ყლორტი, თუ გაუღვივებელი დარჩეს; ან როგორც ის ტკიპა ხეზე, რომელსაც სიცოცხლე, ზამთრის გადატანის გარდა, არაფერს სთავაზობს; პატარა, მახინჯი ტკიპა თავის ლეგატყვიისფერ სხეულს ბურთულად ახვევს, რათა გარე სამყაროს რაც შეიძლება მცირე ზედაპირი მიუშვიროს; საკუთარ ტყავს სქელსა და პრიალას ხდის, რათა გარეთ არ გაექცეს არაფერი — არა სითბო, არა ანაორთქლი. ტკიპა საკუთარ თავს პატარას და შეუმჩნეველს ხდის — რათა არავინ შეარჩნიოს და არ მიაჭყლიტოს. მარტოხელა, თავისთავში ჩაძირული, ზის თავის ხეზე — ბრმა, ყრუ, მუნჯი და მხოლოდ ეძიებს, წლობით ეძიებს მოშორებით ჩავლილი ცოცხალი არსებების სისხლის სუნს — არსებებისა, რომელთაც ვერასოდეს დაეწევა. ტკიპას შეეძლო ჩამოვარდნის უფლება მიეცა თავისათვის, ნემომპალაზე დაცემულიყო, განოხებულიყო რამდენიმე კილომეტრით აქეთ ან იქით, ჩაფლულიყო გამხმარ ფოთლებში — სასიკვდილოდ გადაედო თავი და არავისაც არ დაენანებოდა, ღმერთმა ხომ იცის — არავის. მაგრამ ტკიპა — ჯიუტი, უდრეკი და საძაგელი, მიიყუჟა, და ცოცხლობს, და ელოდება; ელოდება — ვიდრე სრულიად არასავარაუდო ვითარება, ზუსტად მისი ხის ძირში, რომელიმე ცხოველის სახით სისხლს არ მოუვლენს. მხოლოდ მაშინ ანებებს თავს მალვას, ვარდება, და ეჭიდება, და ეწებება, და ეხრახნება ამ უცხო სხეულს...

სწორედ ასეთის რამ ტკიპა იყო პატარა გრენუი. ცხოვრობდა საკუთარ გარსში გამოყუდული, უკეთესი დროების მოლოდინში. არცა ღიმილს, არცა ყვირილს, არცა თვალების ციალს და არცა სუნს — სრულიად არაფერს არ გასცემდა გარესამყაროს, საკუთარი უწმინდურებების გარდა. მაღამ გაიარის ადგილას ნებისმიერი სხვა ქალი თავიდან მოიშორებდა ამ ბავშვს, მაგრამ ქალბატონ გაიარს ხომ ყნოსვა არ ჰქონდა, ვერც კი გრძნობდა, რომ ბავშვს სუნი არ ასდის და არც არავითარ სულიერ მოქცევას არ ელოდა მისგან, ვინაიდან მისივე სული სამუდამოდ დაეხშო განგებას.

სამაგიეროდ, სხვა ბავშვებს მაშინვე ტანმა უგრძნოთ, რომ გრენუის ყველაფერი რიგზე ვერ ჰქონდა. ახალმოსული რაღაც გაურკვეველ, პირველყოფილ ზაფრას იწვევდა მათში; ყოველთვის გვერდს უვლიდნენ მის საწოლს და თავიანთ ქვეშაგებშიც ისე მჭიდროდ იწვნენ და ეკვროდნენ ერთმანეთს, თითქოს ოთახში საცივემ იმატაო. უფრო პატარებს ისიც ეჩვენებოდათ, გამჭოლი ქარი უბერავსო და ტიროდნენ. სხვებს ესინძრებოდათ, რომ გრენუი მათ სუნთქვას ართმევს. ერთხელაც, მოზრდილებმა მისი დახრჩობა გადაწყვიტეს და სახეზე ნაჭრები, საბნები და თივაც კი დააყარეს. დილით, როდესაც ქალბატონმა გაიარმა გამოათრია იგი ამ გროვიდან, გრენუი — დაჩქქვილი,

დალურჯებული, ნატანჯი, მაგრამ მაინც ცოცხალი იყო. ბავშვებმა კიდევ ორ-სამჯერ სცადეს მსგავსი რამ, მაგრამ ამაოდ. საკუთარი ხელებით რომ მოეშოთოთ, ცხვირი და პირი აეკრათ – რაც უფრო სანდო ხერხი იქნებოდა – თავს არიდებდნენ. მიკარება არ უნდოდათ, რადგან მათში ის ზიზღს იწვევდა – ამაზრზენი ობობასავით, რომლის გაჭყლეტაც ასევე ამაზრზენია.

მერე გრენუი მოიზარდა და ბავშვებმაც მსგავს გამოხლომებზე ხელი აიღეს; თითქოს შეიგნეს, რომ ამგვარად მას ვერ მოსპობდნენ. ახლა უბრალოდ, გაურბოდნენ – მიკარებას, შეხებასაც კი ერიდებოდნენ. მათ იგი სძულდათ, არც ეჭვიანობდნენ და არც შურდათ მისი: მსგავსი გრძნობებისათვის მაღამ გაიარის სახლში, სიმართლე ითქვას, არც არავითარი საბაბი არ მოიძებნებოდა. ოღონდ ბორკავდათ კია მისი თანყოფნა, მის სუნს ვერ იღებდნენ და ეშინოდათ მისი...

5.

ამასთანავე, უცხო თვალისთვის საშინელი მასში არაფერი იყო: ყმაწვილობაში არც იმდენად მაღალი ჩანდა და არც იმდენად ძალოვანი; მახინჯი, მაგრამ არც ისეთი, მის დანახვას ვინმე შეემრწუნებინა. არც აგრესიული იყო, არც ლაქუცა, არც ცბიერი და არც ყელზე ადგებოდა ვინმეს. მუდამ განზე დგომა ერჩია. თითქოს არც გონება უჭრიდა ისე, კაცს ეშმაკეული ეხსენებინა. პირველად მხოლოდ სამი წლისამ გაიარა ორივე ფეხზე; პირველი სიტყვა ოთხისამ წარმოთქვა: *თევზებიო* – ექოსავით აღმოხდა უცაბედად წამოგზნებულს, როდესაც შარონის ქუჩაზე, შორი გზიდან ჩამოსული თევზით მოვაჭრე გამოჩნდა და მაღალი ხმით იწყო თავისი საქონლის ქება. შემდეგი სიტყვები, რომლებიც მან ამოღერდა, იყო: ‘ბალბიფოთლა’, ‘თხის ბაგა’, ‘მწნილი კომბოსტო’ და ‘ბუა-ჟაკი’ (*მშვიდობისმცემელთა დედათა მონასტრის* მებაღეს შეკედლებული ერთი უპოვარის მეტსახელი, რომელსაც მაღამ გაიარა ქირაობდა ხოლმე ყველაზე მძიმე სამუშაოსათვის და რომელიც იმითი იყო ცნობილი, რომ სიცოცხლეში ტანი არასოდეს დაებანა). რაც შეეხება ზმნებს, ზედსართავ სახელებსა და ზმნიზედებს, გრენუი მათ, შეიძლება ითქვას, საერთოდ არ ცნობდა. ‘კი’ და ‘არა’-ს გარდა მხოლოდ საყრდენ სიტყვებს იყენებდა, ძირითადად საკუთარ ან ამა თუ იმ საგნების სახელებს – მცენარეების, ცხოველების, ადამიანებისა და ისიც მხოლოდ მაშინ, თუ ისინი მისი ყნოსვის არეში ხვდებოდნენ.

მარტისთვის თბილი მზის ქვეშ, ღღობისაგან ატკაცუნებულ წიფლის მორების გროვაზე მჯდომმა, პირველად წარმოთქვა სიტყვა ‘შეშა’. აქამდე ასჯერ მაინც უნახავს შეშა, გაუგონია ეს სიტყვა, მშინველობაც კი ესმოდა მისი: ხშირად გაუგზავნიათ ზამთრობით შეშის მოსატანად, მაგრამ თავად საგანი – შეშა – არანაირად არ მიაჩნდა იმდენად საინტერესოდ, მისი სახელი წარმოეთქვა. ეს სწორედ მარტის დღეს მოხდა, როდესაც იმ ზორაზე იჯდა. მორები თაკარად იყო დაწყობილი ქალბატონ გაიარის ფარდულის კედელთან,

ცერად გადმოწეული ჩარდახის ქვეშ. ზემოთა მორებს ცხელი და ტკბილი სუნი ასდიოდა, ხორის სიდრმიდანაც ხავსის რბილი სურნელი აღწევდა, ხოლო ფარდულის ფიჭვის კედლიდან ფისის ანაორთქლის თბილი ნაკადი მოიწევდა.

იჯდა გრენუი შეშაზე, ფეხები გან-გან გაეშალა, ხოლო ზურგი ფარდულის კედლისათვის მიეპჯინა; თვალები დახუჭული ჰქონდა და წარბსაც არ ატოკებდა. არაფერი ესმოდა, ვერაფერს ხედავდა და ვერც გრძობდა ვერაფერს. უბრალოდ, ისუნთქავდა ხის სუნს – ბოლქვებად რომ იდგა მის გარშემო, ზემოთ იწევდა და ჩარდახის ქვეშ გროვდებოდა. სვამდა ამ სურნელს, იძირებოდა მასში, იჟინთებოდა სხეულის ყველაზე შიდა ფორებამდე, თვითონ ხდებოდა ხის ნაწილი; იწვა ხის ხორაზე ხის თოჯინა – პინოქიო, მკვდარივით, ვიდრე კაი ხნის, ალბათ ნახევარი საათის შემდეგ, არ ამოღერდა სიტყვა „შეშა“, – ისე, თითქოს თავად იყო სავსე შემით, ყელამდე იყო შემით გამამდარი; თითქოს მუცელი, ყელი, ცხვირი, ამოვსებული ჰქონდა შემით – და ლამის ამოაღებინა ეს სიტყვა.

სწორედ ამან გადაარჩინა და გამოაფხიზლა; გადაარჩინა თავად ხის გამომძალავი არსისაგან, მისი სურნელისაგან, დახრჩობით რომ ემუქრებოდა. წამოიწია, ჩამოგორდა მორებიდან და წაჩანჩალდა თავისი გახევებული ფეხებით. რამდენიმე დღის შემდეგაც კი ჯერ კიდევ არ იყო გონს მოსული იმ მძაფრი ყნოსვითი შთაბეჭდილების გამო და როდესაც მოგონება ახალი ძალით ამოუტივტივდებოდა ხოლმე, თავისთვის ბუტბუტებდა, შელოცვასავით: *‘შეშა, შეშა...’*.

ასე სწავლობდა ლაპარაკს. სიტყვებისადმი, რომლებიც უსუნო საგნებს აღნიშნავდნენ – ანუ აბსტრაქტულ, უმთავრესად კი ქცევითსა და ზნეობრივ ცნებებზე, გართულება ჰქონდა: ვერ იმახსოვრებდა და ხმარების დროს ერთმანეთში ურევდა ხოლმე. შემდგომშიც, როდესაც დაკაცდა, უხალისოდ და ხშირად არასწორად ხმარობდა: უფლება, სინდისი, ღმერთი, სიხარული, პასუხისმგებლობა, თავმდაბლობა, მადლიერება – ყველა ესენი მისთვის ბინდით იყო მოცული და ვერც ის შეეგნო ბოლომდე, რაც ამ სიტყვებით უნდა გამოიხატოს. მეორეს მხრივ, საყველბურო ენაც მალე უკმარისი გახდა, რათა ყველა ის საგანი აღენიშნა, რომელიც მას მხოლოდ ყნოსვით წარმოდგენებად ჰქონდა გათავისებული. ის უკვე ყნოსვით არჩევდა არამართო შეშას, არამედ მის ჯიშებსაც: წიფელი, მუხა, ფიჭვი, თელა, მსხალი; ძველი შეშა, ახალი, გამოფიჭული, დამპალი; ყნოსვითვე არჩევდა ცალკეულ ნამორებს, ნაფორებს, ნახერხს – და არჩევდა უკეთ, ვიდრე სხვები თვალით გაარჩევდნენ. და იგივე ხდებოდა, კაცმა რომ თქვას, სხვა საგნების მიმართაც.

ის, რომ თეთრი სასმელი, რომელსაც ქალბატონი გაიარი დღეყოველ ურიგებდა თავის აღსაზრდელებს და რასაც ყოველთვის რძე ერქვა, გრენუის მიერ მუდამ სხვადასხვაგვარად აღიქმებოდა როგორც სუნით, ისე გემოთი – ხან ცხელი იყო, ხან ცივი; ხან ერთი ძროხის, ხან მეორის; ხან მეტი ნაღები ჰქონდა მოხდილი, ხან ნაკლები... ის, რომ ბუხრის კვამლი ყოველ წუთს, მეტიც – ყოველ წამს სუნთა ათეულობით ახალ ნაზავს აერცვლებდა და სურნელის ახალ-ახალ ერთეულად ერთიანდებოდა, ოღონდ ამ კვამლს მაინც

მხოლოდ ერთი სახელი – „კვამლი“ ჰქონდა; ის რომ მიწა, სანახები, გარემო – ის, რაც ყოველი ფეხის ნაბიჯზე, ყოველი შესუნთქვისას, ახალ-ახალი სურნელით ივსებოდა და სულ სხვა აღსანიშნით ცოცხლდებოდა, უნდა დაგესახელებინა სამი, სამად-სამი მოუქნელი სიტყვით – მთელი ეს შეუსაბამობა ყნოსვით აღქმული სამყაროს სიმდიდრესა და ენის სიღატაკეს შორის პატარა გრენუის აიძულებდა, სწორედ რომ თავად ენის საფუძვლიანობაში შეეტანა ეჭვი. ამიტომაც, სიტყვიერ გამოხატულებამდე მხოლოდ მაშინ დამდაბლდებოდა ხოლმე, როდესაც ეს უცილობელი იყო, სხვა ადამიანებთან ურთიერთობის დასამყარებლად.

ექვსი წლისათვის, ყნოსვით ჰქონდა შესწავლილი გარე სამყარო. არ იყო არა ნივთი მადამ გაიარის სახლში, შარონის ქუჩის ჩრდილო ნაწილში არ მოიძებნებოდა არც ადგილი, არცა ადამიანი, არც ქვა, ხე, ბუჩქი თუ მესერი, არც ერთი, თუნდაც სულ პატარა შუკა, რომელსაც ყნოსვით ვერც იცნობდა და მახსოვრობაში არ ექნებოდა შემონახული მთელი თავისი განუმეორებლობით. მოაგროვა ათი, ან იქნებ ასი ათასი სპეციფიური, თავისებურად განუმეორებელი სუნი და ისე ცხადად, ისე ცოცხლად ჰქონდა დანარჩუნებული, რომ არა მხოლოდ იხსენებდა მათ – თუკი ხელახლად შეიგრძნობდა სადმე – არამედ მაშინვე შეიგრძნობდა, როცა კი იხსენებდა. უფრო მეტიც, შეეძლო საკუთარ წარმოსახვაში ახლებურად შეეერთებინა ისინი, და ამრიგად სურნელების ისეთი კონა შეექმნა, ბუნებაში საერთოდ რომ არც არსებობდა.

უნარმაზარი ლექსიკონის პატრონივით, გრენუის შეეძლო მრავალი სუნისაგან ნებისმიერი რაოდენობის ახალი ფრაზები შეექმნა და ეს იმ ასაკში, როდესაც სხვა ბავშვები ძლივ-ძლივობით არჩევენ საჭირო სიტყვებს და მარტივ, მოკლე წინადადებებს ტიტინებენ, რაც სრულიად არაა საკმარისი ქვეყნიერების აღწერისათვის. ყველაზე ზუსტი იქნებოდა გრენუის შედარება ვინმე ვუნდერკინდ მუსიკოსთან, რომელსაც გარკვეული მელოდიიდან თუ ჰარმონიიდან ამოუჩნრეკია ცალკეული ხმების ანბანი და უკვე თავად თხზავს ახალ-ახალ მელოდიებსა და ქმნის ჰარმონიებს – ოღონდაც იმ განსხვავებით, რომ სუნის ანბანი გაცილებით დიდი და მრავალმხრივია, ვიდრე მუსიკის, და კიდევ იმით, რომ ვუნდერკინდ გრენუის შემოქმედებითი მოღვაწეობა მხოლოდ მასშივე თამაშდებოდა და ვერავინ, მისსავე გარდა, ვერაფერს ამჩნევდა.

გარეგნულად, სულ უფრო და უფრო იკეტებოდა თავისთავში. სენ-ანტუანის გარეუბნის ჩრდილო ნაწილში დაწინააღმდეგებდა, დამკრებოდა ბაღებში, მინდვრებში, ვენახებში. ხანდახან იქვე ეძინა: გაქრებოდა ხოლმე რამდენიმე დღით და იმ სასჯელს, რომელსაც დაადებდნენ, ხმისამოუღებლად იტანდა. სარდაფში გამოკეტვას, მშვივრად დატოვებას, დამატებით მისჯილ სამუშაოს – არაფერს არ შეეძლო მისი ქცევის შეცვლა. ვერც *ღვთისმშობლის ნეტარი დიდების* ეკლესიის სამწყსო სკოლის შიგადაშიგ მონახულებამაც (სრული წელიწად-ნახევრის განმავლობაში) ვერავითარი შესამჩნევი კვალი ვერ დაატყო. ჩამარცვლით კითხვისა და საკუთარი სახელის დაწერის გარდა არაფერი უსწავლია. მღვდელსაც, უბრალოდ, ერთ ჭკუასუსტ ღვთისშვილად მიაჩნდა. სამაგიეროდ, მადამ გაიარმა შეამჩნია გრენუის უჩვეულო – თუ არ ვიტყვოდით ზებუნებრივი – უნარი და თვისებები; თუნდაც ის, რომ სრულიად

არ გააჩნდა ღამისა და სიბნელის ბავშვური შიში. ყოველთვის და ყოველ საქმეზე შეიძლებოდა მისი ჩაგზავნა სარდაფში, სადაც სხვა ბავშვები ჩახედ-ვასაც კი ძლივს ბედავდნენ; ან ნებისმიერ შავბნელ ღამეს შეშის მოსატანად ფარდულიდან; თან არასოდეს მიჰქონდა სანათური და მაინც ზუსტად პოულობდა და მაშინვე მოჰქონდა საჭირო ნივთი. არასოდეს აკეთებდა ზედმეტ მოძრაობებს, არ ბორბიკობდა და არც არასოდეს არაფერი გადაუყირავებია. ყველაზე საოცარი კი ის იყო, რომ გრენუის, როგორც ქ-მა გაიარმა შეატყო, ქაღალდის, ფიცრულის, მოხურული კარის, მტკიცედ ნაგები ქვის კედლების მიღმა ხედვაც შეეძლო: არც შეიხედავდა, ისე მოგახსენებდათ, აღსაზრდელებიდან იმ დროს ვინ იმყოფებოდა საძინებელში. ყვავილოვანი კომბოსტოს თავში რომ ლოქორა იმალებოდა, მან ამ თავის გაჩეხვამდე იცოდა; ხოლო ერთხელ, როცა ქალბატონმა გაიარმა ისე კარგად დამალა ფული, მერე თავადაც ვედარ მიაკვლია, გრენუიმ ყოველგვარი ყოყმანის გარეშე მიათითა საკვამურის უკანა მხარეს და წარმოიდგინეთ – ფული სწორედ იქ აღმოჩნდა! მომავლის წინასწარმეტყველებაც შეეძლო: ხდებოდა ხოლმე, ვინმეს სტუმრობას მის მოსვლამდე კარგა ხნით ადრე მოახსენებდა, ანდა უშეცდომოდ გამოიცნობდა წვიმისა და ჭექა-ქუხილის მოახლოებას ჯერ კიდევ მაშინ, როცა ცაზე ღრუბლის ფთილიც არსად მოჩანდა.

არადა, რომ ყველაფერს ამას ის კი ვერ ხედავდა, არამედ სულ უფრო და უფრო მკაფიოდ შეიგრძნობდა ყნოსვით – ლოქორას კომბოსტოში, ფულს საკვამურის მიღმა, ადამიანს კედლის იქითა მხარეს თუ რამდენიმე კვარტლის სიშორიდან – ქალბატონი გაიარა სიზმრადაც კი ვერ ისიზმრებდა, მაშინაც კი, მისი ყნოსვა საჩხრეკის დარტყმას რომ არ დაეზიანებინა; დარწმუნებული გახლდათ, რომ ბავშვს – ჭკუასუსტი იყო თუ არა – სხვა, მეორე სახეც ჰქონდა; ხოლო რამდენადაც დანამდვილებით იცოდა, რომ ორსახოვნებას უბედურება და სიკვდილი მოაქვს, საბრალო ქალი ძრწოლამ შეიპყრო.

რადა თქმა უნდა, ასევე სრულიად აუტანელი იყო იმის გაფიქრებაც, რომ მასთან ერთად, მის ჭერქვეშ ცხოვრობს ვინმე, ვისაც აქვს ნიჭი კედლებსა და ტიხრებს მიღმა დაინახოს გულმოდგინედ დამალული ფული... და როგორც კი გრენუის ეს თვისება აღმოუჩინა, მაშინვე მისი თავიდან მოშორება ჩაიდო გულში. ყველაფერი შესანიშნავად აეწყო: ზუსტად იმ ხანებში – გრენუი რვა წლისა იქნებოდა – სენ-მერის მონასტერმა გაუგებარი მიზეზის გამო შეწყვიტა ყოველწლიური შესატანის გადახდა. ქ-მა გაიარმა არც შეახსენა მონასტერს დავალიანება, წესისა და რიგის დაცვით ერთი კვირა აცალა, მერე ჩაავლო ბავშვს ხელი და ქალაქს მიაშურა.

მორტერლის ქუჩაზე, მდინარის შორიახლოს, ერთი მისი ნაცნობი დაბალი ცხოვრობდა, სახელად გრიმალი, რომელსაც მუდმივად სჭირდებოდა ბიჭუნები – და არა იმისთვის, მოწაფედ თუ შეგირდად აეყვანა; უბრალოდ, იაფ მუშახელს ეძებდა შავი სამუშაოსათვის. ეს ხელობა ხომ სიცოცხლისათვის სამიმ საქმიანობის შესრულებასაც ითხოვს – ეს პირუტყვის შემპალი ტყავის გაფხეკვაო, ეს შხამიანი სათრიმლაკი და საღები სითხეების შერევაო, მძაფრი შესაწამლების გამოყვანაო – ამიტომაც წესიერ ხელოსანს მუდამ ენანებოდა თავისი უკვე გამოწვრთნილი დამხმარეების ასეთ საქმეზე მიშვება და ჯერი-ჯერზე ქირაობდა ხოლმე უმუშევარ მაცანწალებს ან უპატრონო ბავშვებს,

რომელთა ამბის გამკითხავი, უბედურების შემთხვევაში, კაცი არ იყო. ქალბატონმა გაიარმა, რასაკვირველია, იცოდა, რომ გრიმალის სათრიმლაკეში გრენუის, ადამიანური საზომით, გადარჩენის შანსი არ ჰქონდა; იცოდა, მაგრამ ისეთი ქალი არ იყო, მსგავს რამეებზე ფიქრით აეტკივა თავი. ვალი მოიხადა, ჩვილი გამოზარდა და აწი, რაც უნდა მოსვლოდა ბავშვს შემდგომში, მას უკვე აღარ მოეკითხებოდა. გადარჩება – კარგია, მოკვდება – ეგეც არაფერი; მთავარია, ყველაფერი კანონის მიხედვით იყოს. ამიტომაც გამოართვა ბატონ გრიმალს ბავშვის გადაცემაზე ხელწერილი, თვითონაც მოუწერა ხელი საკომისიო თხუთმეტი ფრანკის მიღებაზე და სახლში, შარონის ქუჩაზე დაბრუნდა.

უნდა ითქვას, ქალბატონი გაიარი არავითარ სინიდიისს ქენჯნას არ გრძნობდა. პირიქით, დარწმუნებული იყო, არა მარტო კანონიერად, სამართლიანადაც მოვიქცეო: იმ ბავშვის ყოფნა თავშესაფარში, რომლისთვისაც ფულს არავინ იხდის, მხოლოდ სხვა ბავშვების ხარჯზე, ან მის საკუთარ ხარჯზე იქნებოდა შესაძლებელი და ეს უკვე არა მარტო სხვა ბავშვების, თვით მის საკუთარ მომავალსაც ემუქრებოდა — იმ პირად, საკუთრად, კერძოდ სიკვდილს — იმ ერთადერთ რაიმეს, რისი სურვილიც ჯერ კიდევ შემორჩენოდა ცხოვრებაში.

ვინაიდან სწორედ აქ უნდა დავცილდეთ ქალბატონ გაიარს და მეტად ვეღარც შევხვდებით ჩვენს მონათხრობში, რამდენიმე სიტყვით მაინც გეტყვით მისი უკანასკნელი დღეების ამბებს. სულიერად ბავშვობაშივე მკვდარმა, ზორციელად, მისსავე საუბედუროდ, ღრმა სიბერემდე იცოცხლა. ქრისტეშობიდან 1782 წელს, ზაფხულში, მეშვიდე ათეულს მიტანებულმა, მიატოვა თავისი ხელობა და როგორც იმთავითვე გადაწყვეტილი ჰქონდა, რენტა შეისყიდა. იჯდა თავის ერთი ციციქნა სახლში, სიკვდილს ელოდა და განა რა მანქანებით წარმოიდგენდა, თუ მის მაგივრად მოვიდოდა ისეთი რამ, რისი გამოთვლაც ქვეყნად არავის შეეძლო, რაც ჯერ არასოდეს მომხდარიყო ამ ქვეყნად! რევოლუცია — ესე იგი, სასწაულებრივი სისწრაფით მომხდარი ძირფესვიანი ცვლილებები — საზოგადოებრივ, მორალურ, ტრანსცენდენტურ ურთიერთობებში... თავდაპირველად, ეს რევოლუცია ქალბატონ გაიარის პირად ბედილობაზე არავითარ გავლენას არ ახდენდა; შემდგომ, ოთხმოცს რომ მიუკაკუნა, გამოირკვა — ის კაცი, რომელიც რენტას უხდიდა, გადატაკდა და იძულებული გახდა, ემიგრაციაში წასულიყო, ხოლო მისი ქონება ვინმე შარვლების ფაბრიკანტმა იყიდა აუქციონზე. საკმაო ხანს ისე სჩანდა, ვითარების ასეთი ცვლილება ქალბატონ გაიარისათვის საბედისწერო ვერანაირად ვერ იქნებოდა, ვინაიდან ზემოხსენებული ფაბრიკანტი, თავის მხრივ, პატიოსნად უხდიდა რენტას; მაგრამ დადგა დღე, როდესაც ფულმა ლითონის მონეტების მაგივრად ქაღალდის პატარა ფურცლების სახე მიიღო და ეს უკვე მისი მატერიალური დასასრულის საწყისად იქცა...

ორი წლის შემდეგ რენტა შეშის საფასურის გადასახდელადაც აღარ კმაროდა. ქალბატონი გაიარი იძულებული შეიქნა, შეუსაბამოდ მცირე ფასად გაეყიდა სახლი, ვინაიდან მის გარდა ათასობით აღმოჩნდა სხვა, ვისაც ასევე სახლის გაყიდვა მოუხდა, ხოლო საფასურად ისევე ეს უმაქნისი ქაღალდები მიიღო; კიდევ ორი წლის შემდგომ აღარც ამ ქაღალდებს ჰქონდა ფასი და

1797 წელს – უკვე ლამის ოთხმოცდაათისა გახლდათ – ამდენი ხნის შრომით, ნამცეც-ნამცეც ნაგროვები მთელი თავისი ქონება დაელია. ბოლოს კოკიის ქუჩაზე, საქათმისხელა მიწურში ცხოვრობდა და მხოლოდღა მაშინ, ათი თუ ოცი წლის დაგვიანებით ესტუმრა სიკვდილი: მოვიდა სიმსივნის სახით – აუადობამ ჯერ ყელში წაუჭირა, ჭამის მადა დააკარგვინა, შემდეგ ხმაც. ასე რომ, უარის თქმაც აღარ შეეძლო, როდესაც ოტელ-დიეს თავშესაფარში აგ-ზაენიდნენ. იქ იმავე, ასობით მომაკვდავით გამოჭედილ პალატაში მოათავსეს, სადაც თავის დროს მისმა ქმარმა მიაბარა სული უფალს: საერთო საწოლში ჩააწვინეს, ხუთ სრულიად უცხო დედაბერთან და სამი კვირით დატოვეს იქ, საერთო-სახალხოდ სასიკვდილოდ. შემდეგ კი ტომარაში გამოკერეს, დილის ოთხ საათზე, ორმოცდაათ სხვა გვამთან ერთად საზიდარზე დააგდეს და ეჟე-ნების წკარუნის თანხლებით წაიღეს ახალ სასაფლაოზე, კლემარში, ქალაქის კარიდან მოშორებით. იქ, საერთო საფლავში, გამოუმწვარი კირის სქელი ფენის ქვეშ ჩააწვინეს, სამუდამოდ განსასვენებლად.

ეს 1799 წელს მოხდა. მადლობა უფალს, მას არ ჰქონია საკუთარი ბედიდ-ბლის რაიმე წინათგონობა, სახლში რომ ბრუნდებოდა 1747 წლის იმ ავბე-დით დღეს – როდესაც მან ყრმა გრენუი და ჩვენი თხრობა დატოვა. წი-ნააღმდეგ შემთხვევაში, ალბათ საერთოდ დაკარგავდა სამართლიანობის რწმენას – ანუ ამქვეყნიური ყოფის მისთვის მისაწვდომ ერთადერთ საზრისს.

6.

პირველივე მზერით, რომელიც მან ბატონ გრიმალს მიაპყრო – არა, პირველივე ალღოიანი შესუნთქვით, რომლითაც გრიმალის სუნი შეიფნოსა – გრენუი მიხვდა, ამ ადამიანს შეეძლო ცემით მიესიკვდილებია თუნდაც სულ უმცირესი დაუდევრობისათვის. ახლა მისი სიცოცხლე ზუსტად იმდენი ღირდა, რამდენიც მისი სამუშაო, ანუ მისი სიცოცხლე მხოლოდ იმ სარგე-ბლობას უთანასწორდებოდა, რომლითაც მას გრიმალი ზომავდა; და გრენუიც მორჩილად გაწვა პატრონის ფეხებთან, თავის წამოწევის მცდელობაც რომ არ ჰქონია, ისე. დღიდან დღემდე იხშობდა საკუთარი სიჯიუტისა და ჭირვეუ-ლობის მთელ ენერგიას და ზემოხსენებულ ტკიპასავით მხოლოდ იმისთვის იყენებდა, როგორმე გამყინვარების ეს პერიოდი გადაეტანა: მოთმინებით, თავმდაბლობით, შეუმჩნევლად – რათა სიცოცხლის იმედის ნაპერწკალი შეენარჩუნებინა – მინავლებულ, ოღონდაც გულმოდგინედ ნაცარმიყრილ ნაკ-ვერჩხალზე. გრენუი ახლა მორჩილების, შრომისმოყვარეობისა და უმცირე-სით კმაყოფის უებრო მაგალითი გახდა. ყოველ ბრძანებას სულმოუთქმელად ასრულებდა, ყოველგვარ საკვებზე ყაბულს იყო. საღამოობით უსიტყვოდ თანხმდებოდა სადაბალოს გვერდზე მიშენებულ საკუჭნაოში ჩაკეტვას, სადაც სახელოსნო იარაღები ეწყო და დამარილებელი ტყავები ეკიდა. იქ ეძინა, და-ბეკნილი მიწის იატაკზე. კვირიდან კვირამდე მუშაობდა, დილიდან გვიან დამემდე, ზამთარში – რვა, ზაფხულში – თოთხმეტი, თხუთმეტი, თექვსმეტი საათიც კი: ფხეკდა აყროლებულ ტყავებს, წყალში ალბობდა, ბალანს აგლე-

ჯდა, კირს უსვამდა, შაბით ჟღენთავდა; აპობდა შეშას, ქერქს აცლიდა არყსა და ურთხელს, ჩადიოდა სათრიმლაკ ორმოებში, მუდამ საზიზღარი ანაორთქლით რომ იყო სავსე; შეგირდების ბრძანებით ფენებად აწყობდა ტყავებს, აფანტავდა მელნის დაჭყლეტილ ბურთულებს, მერე ამ შემზარავ ნაზავს ურთხელის ტოტებსა და მიწას აყრიდა... რამდენიმე წლის შემდეგ იმ-ულელებული იყო ისევ ამოეთხარა ეს ორმოები და თითქმის უკვე გათრიმლული, მუმიფიცირებული ტყავები ამოეთრია. თუ ტყავებს არ მარხავდა და არ თხრიდა, მაშინ წყალს ეზიდებოდა, თვეობით ეზიდებოდა, მდინარიდან ზემოთ, სახელოსნომდე. ყოველთვის ორი სათლით, ასობით სათლში დღეში, ვინაიდან ტყავის დამუშავებას უამრავი წყალი სჭირდება: დასარეცხად, დასალბობად, გამოსახარშად, შესაღებად. თვეობით მუშაობდა ასე, მეთულუხჩედ, უკანასკნელ ძაფამდე ილუმპებოდა და საღამოობით ტანსაცმლიდან წურწურით ჩამოსდიოდა ხოლმე წყალი, ხოლო კანი ცივი ჰქონდა და ლბილი, ნატივით.

ამგვარი – უფრო პირუტყვეული, ვინემ ადამიანური არსებობის წლისთავზე ჯილეხით დაავადდა, მეტყავეების ამ სასტიკი დაავადებით, რომლის დასასრულიც, უმეტესწილად, მხოლოდ სიკვდილია. გრიმალმა ხელი ჩაიქნია და მის შემცვლელს დაუწყო ძებნა, თუმცა კი ერთგარი სინანულით, ვინაიდან არასოდეს ჰყოლია გრენუიზე უფრო დამჯერე და მონდომებული მესაქმე. მაგრამ მოლოდინის საწინააღმდეგოდ, გრენუი გადარჩა. ოღონდ დიდი, შავი ნახეთქებისაგან ნაწიბურები დარჩა კისერზე, დაწვებსა და ყურებს უკან, რამაც კიდევ უფრო დაამახინჯა და ადრინდელზე უსიამო შესახედი გახადა. სამაგიეროდ, დარჩა ფასდაუდებელი უპირატესობა – იმუნიტეტი ჯილეხის წყლულის მიმართ; ასე რომ, ახლა დახეთქილი და სისხლმდინარი თითები-თაც უშიშრად შეეძლო ყველაზე ცუდი ტყავების დამუშავება, ხოლო რადგან მისი შეცვლა აღარ იყო ასე ადვილი, მისი სამუშაოსა და, აქედან გამომდინარე, მისი სიცოცხლის საფასურიც გაიზარდა. მოულოდნელად, უფლება მისცეს შიშველ მიწაზე აღარ დაეძინა, თავისივე ხელით გაეკეთებინა ხის საწოლი ფარდულში, ზედ თივა დაეყარა და ძველი საბანი დაეფარებინა. დამდობით აღარ კეტავდნენ და საკვებიც უფრო ასატანი გახდა. გრიმალი მას უკვე არა როგორც უბრალოდ პირუტყვს, არამედ როგორც სასარგებლო შინაურ პირუტყვს, ისე ექცეოდა.

როდესაც გრენუის თორმეტი წელი შეუსრულდა, გრიმალმა კვირაობით, ნახევარი დღით, მისი სამუშაოდან დათხოვნა დაიწყო; ხოლო ცამეტისას უფლება მისცეს სადაგ დღეებშიც, სამუშაოს შემდეგ, ერთი საათით გასულიყო ქუჩაში და თავის ჭკუაზე ეკლო ადმა-დადმა. მან გაიმარჯვა, ვინაიდან ცოცხალი დარჩა და გარკვეულწილად უფლებაც მიიღო, საკუთარი ცხოვრებით ეცხოვრა. გადაიარა გამყინვარების ხანამ. ტკიპა გრენუი ისევ გამოცოცხლდა, დილის ჰაერს იფოსავდა და მასში მონადირის ინსტინქტმა გაიღვიძა. ახლა მის წინაშე ყოველგვარ სურნელთა უდიდესი ნაკრძალი – პარიზ-ქალაქი გადაშლილიყო.

7.

აი, აქ კი ზღაპარში მოხვდა თითქოს: უახლოესი, სენ-ჟაკ-დე-ლა-ბუშის უბანი და წმ. ევსტახის ეკლესიის მიმდებარე ქუჩები უკვე ზღაპარივით იყო — სენ-დენისა და სენ-მარტენის ქუჩებიდან განშტოებულ შუკებში, ხუთ-ექვს სართულიან სახლებში ხალხი ისე მჭიდროდ დაბეკნილი ცხოვრობდა, ეს სახლები კიდევ ისე ახლო-ახლო წამოემართათ, შხის სხივი არ აღწევდა შიგ, ხოლო ჰაერი დამდგარი წყალივით უძრავ იყო და ათასგვარი სუნით გაჯერებული. ადამიანებისა თუ ცხოველების, კერძებისა თუ ავადობის ყროლი, სოკომოდებული ქვისა თუ დამპალი წყლის შმორი, საპნის ნახარშის, დამბალი ტყავის, ახალგამომცხვარი პურისა და ნადგამი ძმრის, ცარციით ნაპრი-ალები ლითონის, შალფეისა და ლუდის, ცხიმების, ცრემლებისა თუ მშრალი თივის სუნები ერთმანეთში არეულიყო; ათასობით სხვადასხვა სუნი ლავა-სავით ეფინებოდა ქუჩების ახლებს და სახურავების თავზეც კი იშვიათად თუ ქრებოდა, ხოლო ქვაფენილებიდან — არასოდეს. ყნოსვამოჩლუნგებული მაცხოვრებლები ერთიანად შეჩვეულიყვნენ სუნების ამ მორევს: ის მათგან იშვა და მათშივე ბუდობდა, ეს ის ჰაერი იყო, რომლითაც ოდითგანვე სუნთქავდნენ, რომელსაც ისევე მორგებოდნენ, როგორც ზედშემოდნარ ძველმან ტანსაცმელს — მას ვერც ტანზე გრძნობ, ვეღარც მის სუნს აღიქვამ.

ოღონდ გრენუისათვის ეს პირველი იყო და არათუ სრულად აღიქვამდა არომების ამ ჯარს — ახარისხებდა კიდევ, ანაწევრებდა და უმცირეს ნაწილებად თუ ნაწილაკებად შლიდა. მისი ზემგრძობიარე ყნოსვა ოზშივრებისა და ანაორთქლების ამ ჩახლართული გორგალიდან ძაფი-ძაფად გამოათავისუფლებდა ხოლმე ძირითად, მყარ სუნებს და დიდ სიამესაც გვრიდა ამგვარი ნართის ხვევა.

ხშირად, რომელიმე სახლის კედელს მიყუდებული, ან სადმე ბნელ კუთხეში მიყუჩული, თვალმინაბული, ნესტოებდაბერილი იდგა პირლია — ღრმა, მღორე წყლების მტაცებელი თევზივით; და როდესაც ჰაერის ოდნავი შეთრთოლება თითქოსდა უწვრილესი ძაფის ბოლოს შეურხევედა ცხვირწინ, შანსს არ უშვებდა ჩაეელო, და მოეყნოსა, და შთაენთქა, და საკუთარ მეხსიერებაში დაეკონსერვებინა სამუდამოდ. ეს შეიძლება უკვე კარგად ნაცნობი სუნის რომელიმე ნაირსახეობა ყოფილიყო, ან სულაც ახალი, ჯერეთ მოუყნოსავი სუნი, რომლის წყარო არც კი იცოდა, რა შეიძლება ყოფილიყო — ვთქვათ, აბრეშუმის ახლადდნაუთოები საცვლების, ან ჩინური ჩაის, ან ვერცხლით მოსირმული დიბა-ატლასის, ბოთლის ყელიდან ახლამოდრობილი კორპის საცობის, კუს ბაკნის სავარცხლის... გრენუი ნადირობდა ამ უცხო სუნებზე, კოლექციონერის სიხელით აგროვებდა მათ და მეხსიერების თაროებზე, დანომრილებივით უჩინდა ადგილს.

მაძებრის ყნოსვა-ყნოსვით რომ გამოძებნოდა, ახლა ბაზრის მოედანს მიადგებოდა, სადაც საღამოობით მთელი დღის დანაღვეი ბასრი სუნები ბატონობდნენ და გრენუი ისევე ზედავდა მათ თავისი ცხვირით, როგორც მავანი თვალთ აღიქვამდა მათი წარმოშობის წყაროს: გახვითქულ მეკურტნეებს, კვერცხებით სავსე კალათას, ღვინითა თუ ძმრით სავსე რუმბებს, კარტოფილისა და ფქვილის ტომრებს, ახალგაჭედილი ლურსმნებით სავსე ყუთს,

თევზის დახლებს, თოფებად დახვეული ნაჭრების პირამიდებს, თიხის ჭურჭელს და ათასობით სხვა წვრილმანს, რაც კი დღისით გამოეჩანათ გასაყიდად — და ყველაფერ ამას გრენუი უკეთ ყნოსავდა, ვიდრე სხვა დაინახავდა: ის, ასე ვთქვათ, ჰაერში დანატოვარ მათ არსს აღიქვამდა, მათს მიმჭროლავ სულს, და ამ აღქმაში ადგილი ადარ რჩებოდა მათი თანმზღები უხეში მატერიალური გამოვლინებებისათვის — ხმაურის, ჯგლეთვის, ყაყანის...

ანდა სულაც გრევის მოედნისაკენ გაუხვევდა ხოლმე, სადაც დედამის წაასოსნეს თავი; იქ, სანაპიროზე, გემები, კარჭაპები და ათასი ჯურის ნავების ჯგრო ლივლივებდა, და მზით გამთბარი ქვანახშირის, და გადასატვირთი მარცვლეულის, და დაწნეხილი თივის, და გაფისული ხის, და სველი ბაგირების სუნი იდგა. აი, დასავლეთიდან კი — ქალქის მდინარით განასერი ჭრილიდან, ქარს მინდორ-ველების, ნეის მდელიების, სენ-ჟერმენისა და ვერსალის მიდამო ტყეების სუნი მოჰქონდა; და ზღვისაც — ტილოს აფრის, იოდიანი წყლის, მარილისა და ცივი მზის შორეული სუნი... მარტივი სუნი იყო, თავისთავად, ოღონდ ძლიერი და ფენოვანი, და გრენუის არც სურდა მისი დანაწევრება მარილოვანის, წყლოვანის, თევზის, წყალმცენარეების, სინოტივისა და ა.შ. ფენებად; ერჩივნა ერთიანად შეენახა, მთლიანობაში, და როდესმე სუფთა ესენციად ექცია, ყოველგვარი მინარევების გარეშე. მერე, როცა გაიგო რომ ზღვა დიდია, თვალუწვდენელი, მრავალი დღე-ღამე შეიძლება იცურო ზედ, ნაპირის დაუნახავადო, ზმირად წარმოიდგენდა ხოლმე — წინა ანძის ზედ კენწეროზე, სათვალთვალო კასრში ზის და ზღვის უკიდევანო სუნში მიცურავს, — არა, სუნიც კი არაა ეს, უფრო ფშვინვა, ჩასუნთქვა-ამოსუნთქვა, და სიამით ინთქმებოდა კიდევ ამ ნასუნთქში. ოღონდაც, არაფერი ამის მსგავსი არ ეწერა გრენუის — სენის ნაპირას, გრევის მოედანზე მდგარს არ ეწერა ენახა მართლა დიდი წყალი, დასავლეთით მდებარე ვეებერთელა ოკეანე, არ ეწერა მის სუნთქვაში გათქვეფილიყო...

წმ. ევსტახის ეკლესიის მიმდებარე უბნები ისე შეისწავლა, კუნაპეტ ღამე-შიც კი ყნოსვით გაიგნებდა გზას. ამის მერე სანადირო არეალიც გაიფართოვა — ჯერ დასავლეთით, სენ-ონორეს გარეუბანი აითვისა, შემდეგ სენ-ანტუანის ქუჩას აუყვა ბოლომდე და ბოლოს მდინარის მეორე ნაპირზეც გადავიდა, სორბონის კვარტალსა და სენ-ჟერმენის მხარეს, სადაც მდიდრები სახლობდნენ. აქ ალაყაფებიდან ეტლის ტყავისა და ლაქიების დაპუდრული პარიკების სუნი გამოდიოდა, გალავანშემორტყმულ ბაღებიდან კი — ვარდების, ახალშეკრეჭილი ბუჩქებისა და შადრვენის სუნი აღწევდა. და სწორედ მაშინ მოყნოსა გრენუიმ პირველად სუნამო — ამ სიტყვის პირდაპირი გაგებით. ერთი უბრალო ლავანდისა და ვარდისწყლის სუნი იყო — ალბათ შადრვენების წყალს თუ ურევდნენ საგანგებო შემთხვევებში, მაგრამ მერე და მერე სხვანაირი, უფრო ძვირფასი შენარევების სურნელიც გაარჩია, საღამოობით ოთხცხენებმულ ეტლებს შლეიფივით რომ გასდევდათ უკან. დიდად გასაკვირი არც მათში იყო რაიმე — ამ პრობესაც სულ იოლად იმახსოვრებდა — ოღონდ იმას კი მიაქცია ყურადღება, რომ ზოგი მათგანი სწორედაც ყურადღების მისაქცევად იყო გამიზნული, და არც მთლად უვარგისი ჩანდა.

და მაინც, გრენუისათვის ისინი ისევ და ისევ უბრალოდ განზავებულ და არა შერეულ, ანუ — თვითმყოფად ესენციებად რჩებოდა; დარწმუნებული გახლდათ, იგივე მასალებიდან თავად სრულიად სხვა, სრულიად განსხვავებულ ნელსურნელებას გამოიყვანდა. თუმცა ისიც ითქვს, გრენუისათვის ჯერ არავითარი პრინციპული მნიშვნელობა არ ჰქონდა იმას, *კარგი* უცხო სუნი მოსდიოდა თუ *ცუდი* — ჯერ-ჯერობით არ ჰქონდა. მისი ამ უცნაური ნადირობის მიზანი ქვეყნად არსებული ყველა ახალი, მისთვის ჯერეთ უცნობი სუნის მოყვანა და დამახსოვრება იყო: ცხენის ოფლის სუნი მისთვის ისევე ფასეული გახლდათ, როგორც მეწამული ვარდის კოკრისა, ტილოს მძაღვ-მომწარო სუნი — იგივე რაც დიდვაჭართა სამზარეულოდან გამონადენი, ღვინოში ჩამბალი ხბოს ხორცის სუნი. გრენუი ეძებდა, პოულობდა, ნთქავდა, იწოვდა განურჩევლად, და მის მიერ შედგენილ სუნების კომბინაციებში ჯერ არავითარი ესთეტიური პრინციპი არ ისახებოდა; უბრალოდ, უცნაურ ფანტაზიებს აყოლილი, წარმოსახვაში აჯვარებდა მათ და სულ ახალ-ახალ ვარიანტებს ქმნიდა, ქმნიდა და იქვე შლიდა შემადგენელ ნაწილებად, როგორც კუბებით მოთამაშე ბავშვი — ქმნიდა და ანგრევდა, ყოველგვარი შემოქმედებითი პრინციპის გარეშე.

8.

1753 წლის 1 სექტემბერს, მისი უდიდებულესობის არცთუ ისე მრგვალი თარიღის აღსანიშნად, სამეფო ხილზე ფეიერვერკი მოეწყო. მთლად ისეთი დიდებული ვერ გახლდათ, როგორც მეფის ქორწინებისადმი მიძღვნილი, ან ის ლეგენდარული ფეიერვერკი, უფლისწულის დაბადებას რომ მიეძღვნა, და მაინც, ფრიად შთაბეჭდავი სანახაობა გამოვიდა. გემების ანძებზე „ემმაკის ბორბლები“ ტრიალებდა, ცეცხლოვანი მხეცების გამოსახულებები ხიდიდან წყალში ვარსკვლავების წვიმას აფრქვევდნენ, გამაყრუებელი ხმაურით ფეთქდებოდა პეტარდები და ქვაფენილზე სატკაცუნოები სკდებოდა, ცაში მქროლავი შუშხუნები კი თეთრ შროშანებს აქარგავდნენ ღამის შავ კალთას. ორივე სანაპიროზე შეკრებილი მრავალათასიანი ბრბო აღტაცებული შეძახილებს არ იშურებდა — ისმოდა „ბრავო“ და ასევე, თქვენ წარმოიდგინეთ, „ვივატ!“ — იმის მიუხედავად, რომ მეფე ოცდათვრამეტი წლის წინ ავიდა ტახტზე და სახალხო სიყვარულის მწვერვალიც კარგა ხანია, უკან მოეტოვებინა. აი, რისი გაკეთება შეუძლია ერთ კარგ ფეიერვერკს.

გრენუი ხმის ამოუღებლად იდგა პავილიონის ჩრდილში, მდინარის მარჯვენა ნაპირზე, სამეფო ხიდის პირდაპირ. ზეიმში არავითარ მონაწილეობას არ ღებულობდა და არც ცეცხლოვანი ეფექტების მიმართ გამოუჩენია რაიმე ინტერესი. იმ იმედით მოვიდა აქ, რაღაც ახალი შეეყნოსა, მაგრამ თავად ფეიერვერკი, სუნის თვალსაზრისით, ახალს არაფერს პირდებოდა. ყველაფერი, რაც იქ ასეთი თვალისმომჭრელი ფუფუნებით კაშკაშებდა, ნაპერწკლდებოდა, ტკაცუნობდა და სტვენდა, მხოლოდ დ მხოლოდ გოგირდის, ზეთისა და გვარჯილის სუნის ყოვლად ერთფეროვანი ნარევი გახლდათ.

უკვე ამ მოსაწყენი ღონისძიების მიტოვებას აპირებდა გრენუი, რათა ლუ-
ვრის გალერეის გაყოლებით სახლში წასულიყო; მაგრამ უეცრად ქარმა რა-
ღაც მიიტანა მასთან – პაწია, ძლივს შესაყნოსი კორპუსკული, ნატიფი
სურნელის რაღაც ნაწილაკი – არა, უფრო მცირე; უფრო მეტად წინათ-
გრძნობა, ვიდრე სურნელი და ამასთანავე სარწმუნო ვარაუდი, რომ არაფერი
მსგავსი მას არასოდეს უგრძნია. კედელს მოსწყდა და ნესტოები დაბერა.
სურნელი ისეთი ნატიფი და გამჭვირვალე იყო, ისევე და ისევე უსხლტე-ბოდა
ხელიდან. ძნელი იყო მისი დაჭერა, იფარებოდა პეტარდების ღენტის ბოლით,
ადამიანების ჯგროს ანაოროთქლით, იგლიჯებოდა და იშლებოდა ქალაქის
ათასი სხვადასხვა სუნით. მაგრამ შემდგომ, უეცრად, ისევე გამოიკვეთებოდა
და სუნის პატარა ნაფლეთი მეყვსეულად, რაღაც შეუცნობი მინიშნებით ელა-
მუნებოდა... და იქვე ქრებოდა. წამებულოვით იტანჯებოდა გრენუი, და იტან-
ჯდებოდა არა მარტო მისი ხარბი ბუნება, ასეთ გამოწვევას რომ ვერ გუობდა,
არამედ გულით, ნამდვილად რომ – იტანჯებოდა. ბუნდოვანი ეჭვი გაუჩნდა,
ეს სურნელი გასაღები იქნებოდა ყველა დანარჩენის გამოსაჩხრეკად, ჩამო-
სამწკრივებლად, დასახარისხებლად; რომ არ შეიძლებოდა სურნელთა
სამყაროში გარკვევა, თუკი ვერ გაითავისებდა ამ ერთადერთს და იგი,
გრენუი, ტყუილუბრალოდ განვლიდა ცხოვრებას, თუ ვერ მიითვისებდა, ვერ
დაიმორჩილებდა მას; და უნდა მოეპოვებინა იგი არა იმიტომ, რომ უბრალოდ,
დასაკუთრების პირველყოფილი წყურვილი კლავდა, არამედ საკუთარივე სუ-
ლის მოსათოკად.

აღზნებისაგან ლამის შეუძლოდ გახდა. ჯერ კიდევ ვერც გაერკვია, საერ-
თოდ საიდან მოდიოდა ეს სურნელი. წვევტილები მის მოყნოსვას შორის ხან-
დახან რამდენიმე წუთი გრძელდებოდა და ასეთ დროს შემადრწუნებელი შიში
იპყრობდა, რომ სამუდამოდ დაკარგა კვალი. ბოლოს და ბოლოს იმ დამამშ-
ვიდებელ დასკვნამდე მაინც მივიდა, რომ მდინარის მეორე ნაპირიდან,
სადაც სამხრეთ-აღმოსავლეთის მხრიდან აღწევსო.

გრენუი პავალიონის კედელს მოშორდა, ადამიანების მორევში ჩაყვინა,
ხილზე გადასასვლელად იწყო გზის გაკვლევა. ხშირად ჩერდებოდა, ფეხის
წვერებზე დგებოდა და ადამიანების თავებს ზემოთ ყნოსავდა ჰაერს. აღზნე-
ბის გამო, ხან ვერაფერს გრძნობდა, მერე რაღაცას დაიჭერდა, ჩაეჭიდებოდა
სურნელის მონაბერს, დარწმუნდებოდა, რომ სწორად ეჭირი გეზი და ისევე
ჩაყვინთავდა ათასი ღოყლაპიისა და პიროტექნიკოსების ბრბოში – ამათ კი
გამუდმებით მიჰქონდათ ჩირაღდნები ნაირ-ნაირ პატრუქებთან – მერე კარ-
გავდა გეშს ღენტის საზიზღარ კვამლში, თავგზასაც კარგავდა და ისევე ჯიკავ-
ჯიკავით მიძვრებოდა წინ. რამდენიმე დაუსრულებლად გაწელილი წუთის
მერე გაღმა ნაპირზე აღმოჩნდა, გვერდი აუარა მაიის პალატებს, მალაკეს
სანაპიროს და იმ ადგილს, სადაც სენის ქუჩა მთლად სანაპირომდე უწევს.

აქ შეჩერდა, სული მოითქვა და კვლავ შეიყნოსა ჰაერი. აშკარა იყო,
სწორად მიდიოდა. ახლა აღარ დაკარგავდა კვალს. უცნობი სურნელი ლენ-
ტივით ეშვებოდა სენის ქუჩის მხრიდან, მკვეთრი და განუმეორებელი, ოდონდ
ამავე დროს თხელი, ნატიფი და გამჭვირვალე... უცებ გრენუიმ იგრძნო
როგორ უფეთქავდა გული, მაგრამ არა სირბილისა და დაძაბულობის, არამედ
იმ უცაბელი უსასოობისაგან, რაიც ამ სუნის შეგრძნებას მოჰყვა. ეცადა,

გაეხსენებინა რაიმე მსგავსი, მაგრამ არავითარი შედარება აქ არ ვარგოდა. ამ სუნში რაღაც სიხალისე იყო; მაგრამ არა ლიმონის ან ნარინჯის, არა სურნელოვანი ფისის, ანდა ღარიბინის ფოთლის, ან პიტნისა, ან არყის ხის წვენი, ან ქაფურის, ან თუნდაც ფიჭვის წიწვების, არც მაისის შხაპუნა წვიმის, არც მონაბერი სუსხის, არც წყაროს ანკარა წყლის... და იმავე დროს სიტბოს გამოსცემდა თითქოს: ოღონდ არა ისე როგორც ბერგამოტი, კვიპაროსი ან მუშკი, არა როგორც ჟასმინი ან ნარგიზი, ან ვარდის ხე ან ზამბახი... ამ სურნელში შეუთავსებადი უთავსდებოდა ერთმანეთს – ქროლვადიც და მდგრადიც; ოღონდ უბრალოდ ერთმანეთში კი არ იყვნენ არეულნი, არამედ ერთ რაღაც მთლიანს წარმოადგენდა. ერთსა და იმავე დროს, ეს სურნელი მცირე იყო და სუსტი და თან მტკიცე და გამძლე, როგორც უთხელესი ფერადოვანი აბრეშუმის ნაკუწი. თუმცა... არა, მაინც არა როგორც აბრეშუმი, უფრო თაფლივით ტკბილი რძე, ფუნთუშა რომ ჩააღნება ხოლმე – არადა, ერთი მეორეს როგორღაც არ ეწყობა: რძე და აბრეშუმი! ეს რაღაცნაირი მიუწვდომელი სურნელი, ენით აუწერელი, ვერავითარ ჩარჩოსა თუ განსაზღვრებაში ვერ ეტეოდა, ის არ უნდა არსებულებოდა საერთოდ; და მაინც, ის არსებობდა – ანუ მუნდყოფობდა თავისი დიდებული უცილობლობით. გრენუი შიშმემდგარი გულით მიუყვებოდა მას – გრძნობდა, თვითონ კი არ მისდევდა ამ სუნს, სურნელს დაეჭყვევებინა და ახლა დაუძლეველი ძალით ეზიდებოდა თავისკენ.

სენის ქუჩას აუყვავა. სახლები გამოცარიელებულები ჩანდა, არც გარეთ ჭაჭანებდა ვინმე. ხალხი სანაპიროს შეფენოდა, ფეიერვერკით დასატკობდად. აქ ხელს აღარ უშლიდა ბრბოს ფეთიანი სუნი, არც დნთის სიმყრალე. ქუჩას ჩვეული ოხშივარი სდიოდა – წყლისა და ნარეცხის, ვირთხებისა და ბოსტნეულის მპალის. ოღონდ ყოველივე ამის თავზე ლივლივებდა – ნაზად და ცხადად – ის სურნელი, რამაც გრენუი აქ მოიყვანა. რამდენიმე მოსახვევის შემდეგ, ღამისეული ცის მკრთალი სინათლე მაღალმა სახლებმა გადაკეტა და გრენუიც ბნელში აგრძელებდა გზას – არც არანაირი ნიშანსვეტი არ სჭირდებოდა, სუნი საიმედო გზამკვლევადა უჩნდა.

ორმოცდაათი ორე მეტრის იქით მარჯვნივ შეუხვია, მარეს ქუჩის გადაკვეთაზე, სრულიად ჩაბნელებულ შუკაში. აქ, ქვაფენილის ორივე მხარეს, სახლები ხელის ერთ გაწვდენაზე იდგა. უცნაური ის იყო, სუნი კი არ ძლიერდებოდა, უბრალოდ, უფრო სუფთა, კრიალა ხდებოდა და სწორედ ამის წყალობით იძენდა ანდამატივით ძალასა და მიშხიდველობას. ახლა გრენუი თითქოს საკუთარი ნების გარეშე მიდიოდა. ერთგან სუნმა მტკიცედ მიაბრუნა მარჯვნივ და რომ ეგონა, კედელს მივებჯინები შუბლითო – ერთ დაბალ, თაღოვან გასასვლელში აღმოჩნდა. მთვარეულივით გაიარა თაღის ქვეშ, უფრო მომცრო ეზოში მოხვდა და იქ, ბოლოს და ბოლოს, სინათლევ გამოჩნდა: კედელთან, დახრილი კუთხით მიშენებული ხის ჩარდახის ქვეშ, მაგიდაზე, სანთელი ენთო. მაგიდასთან გოგონა იჯდა და ქლიავს ჩურჩავდა. იღებდა ხილს დაყანთრებული კალათიდან, ყუნწს აგლეჯდა, დანით კურკას აცლიდა და მერე იქვე სათლში ყრიდა. ასე, ცამეტი-თოთხმეტი წლისა თუ იქნებოდა. გრენუი გაშრა. მაშინვე იგრძნო, რა ავრცელებდა იმ სურნელს, რომელიც მან კარგა ნახევარი მილის მოშორებით, სენის გაღმა ნაპირზე

იყნოსა: არა ეს ჭუჭყიანი ეზო, ან ეს მწიფე ქლიავი. სუნის წყარო თავად ეს გოგონა იყო.

გრენუი გონს ვერ მოდიოდა. წამით ისიც გაიფიქრა, არასოდეს ამ გოგონას სუნზე მშვენიერი არაფერი შემისუნთქავსო. მხოლოდ სილუეტს ხედავდა, რადგან სინათლის პირისპირ იდგა, მაგრამ იცოდა რა ზოგადად ადამიანების სუნი, და მრავალი ათასი სუნი ცალკეული მამაკაცის, ქალისა თუ ბავშვის, მის გონებაში ვერაფრით თავსდებოდა აზრი, რომ ამგვარი ნატიფი სურნელი ადამიანს შეიძლებოდა ასვლოდა. საერთოდ, ადამიანებს მდარე და უბადრუკი სუნი დასდევდათ. ბავშვებს უგემური სუნი, ქალებს – მოხრაკული ღორის ქონისა და ღამპალი თევზის, მამაკაცებს – შარდის, მწარე ოფლისა და ყველის; სრულიად უინტერესო, უსიამო სუნები... და აი, პირველად თავის სიცოცხლეში, გრენუი არ ენდო საკუთარ ცხვირს და დასახმარებლად თვალებს მოუხმო, სურდა დარწმუნებულიყო, ყნოსვა არ მატყუებსო. ოღონდაც, ეს გრძნობათა აღრევა დიდხანს არ გაგრძელებულა. სულ ერთი წამი დასჭირდა, რათა ხედვით დაედასტურებინა თავისი ყნოსვითი შთაბეჭდილებები და ახლა უკვე უყოყმანოდ მინდობოდა მათ. ირწმუნა, რომ ადამიანს იყნოსავდა, გრძნობდა მისი ილღიების ოფლის, მისი თმების ცხიმის, მისი წელის მძაღე-მწარე სურნელებას და ნეტარებდა. ზღვაურის სიგრილეს აგონებდა გოგონას ოფლი, თმები – კაკლის ზეთს, წელი – წელის შროშანების თაიგულს, კანი – ჭერმის ყვავილებს... და ყველა ამ შემადგენელის ერთიანობა იმდენად ჰარმონიულ, აღმატებულ, ლამის ჯადოსნურ სურნელს ქმნიდა, რომ ყველაფერი ის, რაც კი ოდესმე შეეგრძნო გრენუის, სურნელთა ყველა ის შენობა, რომელთაც იგი ასე თამამ-თამამით აგებდა საკუთარ წარმოსახვაში, უეცრად ხუხულასავით დაეშალა – სიმწირისა და უმნიშვნელობის გამოისობით. ასი ათასი სხვა სუნი ახლოსაც ვერ მოვიდოდა ამ ერთთან. იგი იყო უმაღლესი მოცემულობა, ყველა დანარჩენი კი მხოლოდ მის კვალად და მსგავსად უნდა აგებულიყო...

და უცებ იაზრა გრენუიმ: ვერ მიითვისებდა, ვერ გაითავისებდა ამ სურნელს და მისი ცხოვრებაც ყოველგვარ აზრს დაკარგავდა. სულ უმცირეს წვრილმანებამდე უნდა შეეცნო, სულ უკანასკნელ, უნახვეს ელფერამდე; მისი უბრალოდ აღქმა სრულიადაც არ იყო საკმარისი – მას სურდა საკუთარი დამლა დაედო ამ არომაზე; საკუთარი შავბნელი სულის ხვეულებში ჩაებეჭდა, სულ ბოლომდე გამოეკვლია და ამიერიდან მხოლოდ ამ ჯადოსნური ფორმულის შინაგანი აგებულების თანახმად ეცხოვრა, ეფიქრა, შეეყნოსა გარე სამყარო.

გრენუი ნელ-ნელა მიიწვევდა წინ. ახლოს, უფრო ახლოს. აი, უკვე, უკვე ჩარდახის ქვეშ შეაბიჯა და გოგონას ზურგსუკან გაჩერდა, სულ ერთ ნაბიჯზე... მას კი ჯერ არაფერი ეგრძნო.

წითური თმები ჰქონდა, ხოლო ნაცრისფერი, უსახელო კაბა თეთრ, გაჩხინკულ მხრებს და ქლიავის წვეწვინსაგან გაყვითლებულ ხელებს უჩენდა. გრენუი წინ გადახრილი იდგა და მის სურნელს ისუნთქავდა, ამჯერად სრულიად შეურყვნელს, თმებიდან თუ კაბის ამონაჭრებიდან რომ ამოსდიოდა და მძიმედ მოედინებოდა მისკენ.

გოგონას შეამცივნა. იგი ჯერ ვერ ხედავდა გრენუის, მხოლოდ რაღაც უანგარიშო შეკრთომა იგრძნო, უცნაური თრთოლვა – დიდი ხნის წინათ გადალახულმა შიშმა შეიპყრო თითქოს; მოეჩვენა, მის ზურგს უკან ცივმა ქარმა მოხერა, თითქოს ვიღაცას დიდი, ღრმა სარდაფის ფართო კარი გამოვლო ბოლომდე. დანა გვერდზე გადადო, ხელები მკერდზე მიიკრა და შემობრუნდა.

გრენუის სრულად ეყო დრო, რათა ყელში ხელები წაეჭირა მისთვის. გოგონას არ წამოუყვირია, არც განძრეულა, არც თავის დაცვა უცდია როგორმე – ერთიანად გახევებულიყო ძრწოლისაგან. გრენუი კი ვერ ხედავდა მის ნახ, ჭირფლით მოფენილ სახეს, ვერც ალისფერ პირს, ვერც დიდრონ, ღია-მწვანე თვალებს, რადგან ვიდრე ახრჩობდა, ქუთუთოები მაგრად ჰქონდა მოხუჭული და იმას შიშობდა მხოლოდ – მისი სურნელის ერთი მისხალიც არ დაკარგვოდა...

როცა დარწმუნდა, მკვდარიაო, დააწვინა მიწაზე, ქლიავის კურკებს შორის, ჩამოგლიჯა კაბა და სურნელის ჭავლი ახლა ნაკადად იქცა, ჯერ თავის თავში მოაქცია და მერე ტალღად გადაუარა; გრენუი სახით მიეკრა კანზე, ფართოდ დაბერილი ნესტოები გადაატარა მისი მუცლიდან მკერდისაკენ, ყელისაკენ, სახეზე, თმებზე და ისევ უკან – წელზე და ქვემოთ, თეძოებზე, ბარძაყებზე, მის თეთრ ფეხებზე; მისი სუნი შეისუნთქა თხემით-ტერფამდე, თმებიდან თითის წვერამდე, მისი სუნის ნარჩენები შეაგროვა ნიკაპიდან, ჭიპის ღრუდან თუ იღლიების ნაკეცებიდან.

როდესაც გრენუიმ მთელი სურნელი შეიწოვა და გოგონაც თითქოს ხელში შეაჭკნა, რამოდენიმე ხანს კიდევ იყო მის გვერდით ჩაცუცქეული, მისი სუნით გაჟღენთილი; არც სურდა დაეხარჯა ამ სუნიდან სულ ოდნავიც კი – ჯერ-ჯერობით მაინც მჭიდროდ უნდა დაეგმანა ყნოსვითი მეხსიერების შინაგანი ხუფები... მერე წამოდგა და სანთელი ჩააქრო.

9.

ამ დროისათვის, დღესასწაულის მონაწილეებმა სიმღერებითა და წარამარა ერთი და იგივე წამოძახილით „ვივატ!“ სენის ქუჩაზე, თავთავიანთ სახლებში დაბრუნება იწყეს. გრენუიმ სიბნელეში, ყნოსვა-ყნოსვით მიაგრო შესახვევიდან გასასვლელს, ხოლო იქიდან კი მის მიმყოლ, პტი-ოგიუსტენის ქუჩას, რომელიც ასევე მდინარისაკენ ეშვებოდა. ცოტა მოგვიანებით ხალხი მოკლულს გადააწყდა. ატყდა ჩოჩქოლი, შეატყობინეს უანდარმერიას; ოღონდ გრენუი უკვე კარგა ხნის გასული იყო გაღმა ნაპირზე.

იმ ღამეს თავისი სარდაფი სასახლედ ეჩვენა, ხოლო ფიცრის საწოლი – დიდებულ სარეცელად. ამ ღამემდე, მთელი თავისი სიცოცხლის მანძილზე, არასოდეს გასჩენია ბედნიერების შეგრძნება, თუმცა ჩლუნგი კმაყოფილების განცდა – მართალია იშვიათად – მაინც ეწვეოდა ხოლმე. ახლა კი ბედნიერ-

ბისაგან თრთოდა, ნეტარებისაგან ვერც იძინებდა – თითქოს მეორედ დაიბადაო; არა, არა მეორედ, არამედ პირველად, ვინაიდან აქამდე მხოლოდ არსებობდა როგორც ცხოველი, რაღაც დაბინდული წარმოდგენით საკუთარ თავზე; ხოლო დღეს მიხვდა ვინაა ის სინამდვილეში: უბრალოდ – გენიოსი; და რომ ამიერიდან მის სიცოცხლეს აქვს აზრი, და მოწოდება, და მიზანი, და უმაღლესი დანიშნულება; მან უნდა მოახდინოს გადატრიალება სუნთა სამყაროში, და რომ ქვეყნად მხოლოდ ის ერთი ფლობს ამისათვის ყველა აუცილებელ საშუალებას: ფენომენალურ ყნოსვას, ფანტასტიკურ მეხსიერებასა და – რაც ახლა მთავარი იყო – ამ მეხსიერებაში სამუდამოდ აღბეჭდილ იმ მარეს ქუჩელი გოგონას სურნელს, რომელშიც რაღაც ჯადო-ფორმულის სახით იფარებოდა ყოველივე, რითაც ნელსურნელება შედგება: სინატიფე, სიმკვეთრე, სიმტკიცე, მრავალმხრივობა და უცნაური, დამთრგუნველი მშვენიერება. თითქოს ნიშანსვეტი ჰპოვა საკუთარი მომავალი ცხოვრებისათვის და როგორც ყველა გენიალურად ბოროტ პიროვნებას, მოწყობილთ ისე, რომ მხოლოდ გარე მოვლენების გამოისობით იკაფება პირდაპირი ნაკვალევი მათი სულების ქაოტურ ხვეულებში, გრენუის ადარ შექმლო უარეყო ის, რაც ერთხელ უკვე ეღიარებინა თავისი ცხოვრების წარმმართველად. ახლა მისთვის ცნობილი გახდა, რისთვის ეჭიდებოდა ასე ჯიუტად და გამწარებით სიცოცხლეს – სურნელთა შექმნელი უნდა გახდეს; და არა ვიღაც რიგითი თითხნია, არამედ ყველა დროის უდიდესი მენელსაცხებლე!..

იმავე ღამეს, ჯერ სიფხიზლეში, შემდეგ კი ძილშიაც, საკუთარ მოგონებათა მთელი საწყობი გადაქექა – მილიონობით ნატეხი, კენჭი, აგური, ანუ მთელი ის სამშენებლო მასალა გადაარჩია, რითაც თვისობრივად შედგება ხოლმე რომელიც გნებავთ ნელსურნელების სტრუქტურა და ისინი ერთგვარ სისტემაში მოიყვანა: საამო საამოსთან, უსიამო უსიამოსთან, რბილი რბილთან, ხეშეში ხეშეშთან, ყროლი ყროლთან, სურნელოვანი სურნელოვანთან... ერთი კვირის შემდეგ ეს წესრიგი, სუნთა ეს კატალოგი უფრო მწყობრი და შესაბამისად დახარისხებულიც გახდა, იერარქია – უფრო ზუსტი. უკვე ძალიან მალე შექმლო შესდგომოდა სურნელთა მრავალსართულიანი შენობების გეგმაზომიერ აღმართვას: სახლები, კედლები, საფეხურები, ოთახები, საიდუმლო სათავსოები... და ყოველდღიურად იზრდებოდა, მატულობდა, მიმზიდველი ხდებოდა ნელსურნელებათა მრავალხაზოვანი კომპოზიციების შინაგანი სიმკვიდრეც.

ის გარემოება, რომ ყოველივე ამას საძირკვლად მკვლელობა ედგა (თუკი საერთოდ იაზრებდა ასეთ ფაქტს) გრენუისათვის ყოვლად უმნიშვნელო ამბავი იყო. მარეს ქუჩელი გოგონას გარეგნობას – მის სახეს, მის სხეულს – უკვე ვეღარც იხსენებდა. აკი შეინარჩუნა მთავარი, რაც მას აართვა და მიითვისა: მისი სურნელი!

იმ დროის პარიზში ნაღდ პარფიუმერთა სახელი სულ რაღაც ათ-თორმეტ კაცს ჰქონდა დაგდებული. ექვსი მათგანი სენის მარჯვენა ნაპირზე ცხოვრობდა, ექვსი – მარცხენაზე, ხოლო ერთი ზუსტად შუაში, ზარაფ-მეკერმეთა ხიდზე, რომელიც მარჯვენა ნაპირს კუნძულ სიტესთან აკავშირებდა. ამ ხიდს ორივე მხრიდან ისე მჭიდროდ ჰქონდა ოთხსართულიანი სახლები მოდგმული, ვერც ერთ მხარეს მდინარეს ვერ დაინახავდი – ყოვლად ჩვეული, საფუძვ-

ლიანად მოკირწყლული და ამასთანავე, მეტად ელევანტური ქუჩის შთაბეჭდილებას ქმნიდა. ამ ხიდის მიდამოებიც ქალაქის ერთ-ერთ მოდურ უბნად ითვლებოდა — აქ იყო განლაგებული სახელგანთქმული სავაჭროები, სადაც მუშტარს თავის საქონელს სთავაზობდნენ ოქრომჭედლები, ხის ძვირფას ჯიშებზე მომუშავე ოსტატები, პარიკების, ჩანთების, საფულეების, სურათების ჩარჩოების დამამზადებელნი თუ უთხელესი ქვედა საცვლებისა და წინდების მქსოველი ხელოსნები, საუკეთესო მეწაღეები; ეპოლეთების ამომქარველები, ოქროს დილების ჩამომსმელები და ზარაფები. აქვე იდგა ცნობილი მენელსაცხებლის, ჯუზეპე ბალდინის მაღაზიაცა და საცხოვრებელი სახლიც. ვიტრინის თავზე ნაჯერი მწვანე ფერის ჩარდახი ჰქონდა გადაჭიმული, კედელზე — ოქროთი გაწყობილი, ბალდინის პირადი ღერბი ეკიდა: ოქროს ფლაკონი, რომლიდანაც ოქროსავე ყვავილების თაიგული ამოზრდილიყო; კარის წინ მწვანე ხალიჩა დაეფინათ, ოქროთი ამოსირმული იგივე ღერბით. წინკარის გაღებისას პაწია ზარები სპარსულ ჰანგს ჩამოაწკრივლებდნენ ხოლმე, და ორი ვერცხლის ყანჩა ნისკარტებიდან იის წყალს ასხურებდა ოქროცურვილ ფიალაში, რომელსაც ასევე ბალდინის ღერბის ფორმა ჰქონდა.

წიფლის ხის დახლთან თავად ბალდინი იდგა, ხანმოთეული და სვეტივით უძრავი, პუდრმოფრქვეულ პარიკსა და ოქროსფერი სირმით გაწყობილ სერთუკში გამოკვართული. ფრანჟიპანის ფირმის ნუშისწყალი — რომელსაც იგი ყოველ დილას ისხურებდა — ანაორთქლ ღრუბლად ებურვოდა გარშემო და მის არსებას გარეშემო მყოფთაგან რაღაც მჭვირვალ-ნისლოვან სიშორეში ამყოფებდა. ყოვლად არაბუნებრივი უძრაობით, საკუთარი თავის მანეკენს ჰკავდა და მხოლოდ მაშინ, როდესაც ზანზალაკების მელოდიური ჟღარუნი გაისმოდა, ხოლო ყანჩები ჭავლის ფრქვევას იწყებდნენ — რაც, თავისთავად, არც ისე ხშირად ხდებოდა — მანეკენი სასწრაფოდ ცოცხლდებოდა, მოიბუხებოდა, პატარა, მკვირცხლი ხდებოდა და მრავალჯერადი თავის დაკვრით გამოფრინდებოდა ხოლმე დახლსმიდმიდან, ისეთი გამალებით, რომ ნელსურნელების ღრუბელი უკან მიეოლას ძლივსლა ასწრებდა; ამის შემდეგ მორჩილად სთხოვდა ხოლმე კლიენტს დაბრძანებულიყო და უნატიფესი არომებისა თუ კოსმეტიკური საშუალებების არჩევანით დატკობა ენება.

ბალდინის ისინი ათასობით ჰქონდა. ასორტიმენტი იწყებოდა სუფთა ესენციებით, ყვავილების ზეთებით, ნაყენებით, ნაწურებით, სეკრეციებით, ბალზამებით, სურნელოვანი ფისებითა და სხვა პრეპარატებით — დაფშენილ, თხევად თუ ბლანტ ფორმებში — პომადებში, პასტებში, ყველა ხარისხის პუდრებში და საპნებში, ვრცელდებოდა მშრალ სუნამოებზე, ფიქსატურებზე, ბრილიანტინებზე, თმის ამოსაზრდელ ელექსირებზე, მეჭეჭების მოსაშორებელ წვეთებსა თუ მცირე გარეგანი ზადის დასაფარ პაწაწინა საღებუნებზე; ხოლო მთავრდებოდა მაღამოებით, ლოსიონებით, სხვადასხვაგვარი მარილებით, ტუალეტის წყლებითა და სუნამოების აურაცხელი რაოდენობით. ესეცაა, ბალდინის ოდენ კლასიკური კოსმეტიკის პროდუქტები არ აკმაყოფილებდა და ღირსების საქმედ მიითვლიდა, მოეგროვებინა თავის სავაჭროში ყველაფერი, რასაც კი რაიმე სურნელი სდიოდა, ანთუ ასეთის მისაღებად გამოიყენებოდა. ამიტომაც საკმეველი ჩხირების, პასტილებისა და სანთლების გარდა, იქვე ნახავდით ყველა სხვა სანელებელსაც — ანისულის თესლიდან

დაწყებული, მიხაკ-დარიჩინამდე; სიროფებს, ლიქიორებს, ხილის წვენებს; ღვინოს – კვიპროსიდან, მალაგიდან და კორინთოდან; მრავალი სახის თაფლს, ყავასა და ჩაის, და დაშაქრულ ხილის ჩირს, კარამელს, შოკოლადს, დაკონსერვებულ წაბლს, კიტრებსა და ხახვს და მარინადში ჩადებულ ვორთევზასაც კი. ამას გარდა, სურნელოვანი ცვილი ბეჭდებისათვის, სუნამო-მოფრქვეული საწერი ქაღალდი, მელანი – სასიყვარულო ბარათებისათვის, ვარდის ზეთის სუნი რომ ასდიოდათ, ესპანური ტყავის რიდიკიულები, აბანოზის ხის ლუსკუმები ყალმებისათვის, ქოთნები და ფინჯნები ყვავილების ფურცლებისათვის, თითბრის საკმევლები, მთის ბროლის დიდი თუ მცირე ფლაკონები, შიგ ქარვის საცობებით; ნატის ხელთათმანები, ნატიფსუნიანი ცხვირსახოცები, ჯავზით გაჯერებული ყურთბალიშები და მუშკით გაჟღენთილი შპალიერები, ათწლეულობით რომ იკავებდნენ სურნელს...

ცხადია, მთელი ეს აუარება საქონელი ვერანაირად ვერ განეფინებოდა ერთ ასეთ პომპეზურ სავაჭროში, რომელიც ქუჩაზე (უფრო სწორად, ხიდზე) გამოდიოდა და ვინაიდან სარდაფი არ ჰქონდათ, არამარტო საკუჭნაო, არამედ მეორე და მესამე სართული და ასევე, პირველ სართულზე განლაგებული, მდინარის მხარეს გამავალი ყველა სათავსოც საწყობად იყო ქცეული. ყოველივე ამის გამოისობით, ბალდინის სახლში სუნთა აუწერელი ქაოსი იდგა: რამდენადაც ნატიფი იყო ცალკეული საქონლის სურნელი – ბალდინი ზომ მხოლოდ უმაღლესი ხარისხის ნედლეულს იმარაგებდა – იმდენადვე აუტანელი იყო მათი ერთად აღრეული სუნი, როგორც იმ ორკესტრის ჟღერადობა, რომელშიც ყოველი მუსიკოსი თავის საკუთარ მელოდიას ფორტისიმოთი უკრავს; თავად ბალდინი და მისი მსახურები რახანია შეჩვეულიყვნენ ამ ქაოსს, დაბერებული ღირიჭორებივით, მუდამ ყურნაკლულობა რომ აწუხებთ და თავად პატრონის მეუღლეც, რომელიც მეოთხე სართულზე ცხოვრობდა და შეუპოვრად ეწინააღმდეგებოდა საწყობი ფართის შემდგომ ზრდას, თითქმის უკვე შერიგებოდა ბედს. აი, კლიენტის ამბავი კი სულს სხვა იყო – თუკი პირველად ეწვეოდა ბალდინის საწარმოს, აქ გამეფებულ სუნთა დომხალი სახეში მუშტის დარტყმასავით მოქმედებდა მასზე და ხასიათისდა მიხედვით, ან აღფრთოვანებას იწვევდა, ან შეცბუნებას. ყოველ შემთხვევაში, ისე აბნევდა, კაცი ზმირად ვედარც ახერხებდა იმის გააზრებას, თუ საერთოდ რატომ შემოიარა აქ. შიკრიკ ბიჭუნებს ავიწყდებოდათ დავალებები, კადნიერი ბატონები უხერხულად იშმუშნებოდნენ, ხოლო ყოფილა შემთხვევა, ზოგიერთ ქაღალტონს რაღაც ისტერიკისდაგვარი მოძალებია, ან კლაუსტროფობიის შეტევა მოუმიზეზებია, გული წასვლია და მათი გრძნობაზე მოყვანა მხოლოდ ნიშადურისა თუ ქაფურის სპირტის წყალობით გამხდარა შესაძლებელი.

ამა გარემოებებისდა გამოისობით, სულაც აღარ იყო გასაკვირი, რომ ზან-ზალაკები ჯუხეპე ბალდინის კარებთან სულ უფრო იშვიათად ჩამოაწკარუნებდნენ ხოლმე სპარსულ მელოდიას და ყანჩებიც სულ უფრო და უფრო იშვიათად ასხურებდნენ იის წყალს...

10.

– შენე! – გამოსძახა ბაღდინიმ დახლისიქიდან, სადაც ის რამდენიმე საათს ბოძივით იღგა და დახურულ კარს მისჩერებოდა – ჩამოიცივით პარიკი!

ზეთისხილის ზეთით სავსე მომცრო კასრსა და კაუჭებზე დაკიდებულ ბაიონურ შებოლილ ბარკალს შორის გამოჩნდა შენე, ბაღდინის შეგირდი, ისიც უკვე საკმაოდ ხნიერი, თუმცა მაინც პატრონზე ახალგაზრდა; გამოვიდა წინ სავაჭროს შედარებით კოხტად მოწყობილ ნაწილში, სერთუკის ჯიბიდან პარიკი ამოაძვრინა და თავზე დაიკოსა.

– უკვე მიბრძანდებით?

– არა, – გაეპასუხა ბაღდინი, – რამდენიმე საათით ჩემს სამუშაო კაბინეტში ავალ და იმედია, იქ მაინც არავინ შემაწუხებს – გამიგეთ? ა-რა-ვინ!

– აჰა, გასაგებია, – ახალი სუნამოს შექმნას აპირებთ...

ბაღდინი: სწორედაც რომ, გრაფ ვერამონის შეკვეთით. ესპანური ტყავის ნელსურნელებით გაჯერება მთხოვა და რაღაც სრულიად ახალი სურს. მოითხოვს რაღაც... ე-ე... აი, ამის მსგავსს, რა ქვია... მგონი, „ამური და ფსიქა“ უნდა ერქვას... იმ უნიჭო რეგვენის შეთითხნილია, სენ-ანდრე-დუზ-არის ქუჩიდან... რას ეძახიან...

შენი: პელისიე.

ბაღდინი: ხო, პელისიე. სწორედ ეგრე უწოდა მაგ გონებაჩლუნგმა – „ამური და ფსიქა – პელისიესაგან“. იცნობთ მაგ სუნამოს?

შენი: მოდი და ნუ იცნობ... მთელი ქვეყანა ახლა მაგას ისხურებს. ოღონდ პირადად ჩემი აზრი თუ გაინტერესებთ – დიდი ვერაფერი! თქვენს ნამუშევართან ხომ ახლოსაც ვერ მოვა, მსიე ბაღდინი!

ბაღდინი: სწორეა, ვერ მოვა.

შენი: უაღრესად ბანალური სუნი ასდის მაგ „ამურს“.

ბაღდინი: უხამსიც კი, შეიძლება ითქვას.

შენი: უკიდურესად უხამსი, მსიე ბაღდინი, როგორც ყველა მაგის სუნამოს. ლიმეტინზე თუ აყენებს.

ბაღდინი: ეგრე იქნება. კიდე რა ურევია შიგ?

შენი: ნარინჯის ესენცია და იქნებ, როზმარინის ნაყენიც.

ბაღდინი: ეგ მე ნაკლებად მალეღვებს.

შენი: რაღა თქმა უნდა.

ბალდინი: ფეხებზეც მკიდია, რა აურდაურია თავის ნარეცხში მაგ ბრიყვმა პელისიემ. ახლა ეგ მადარდეთ!

შენი: საესებით მართალი ბრძანდებით, მსიე ბალდინი.

ბალდინი: ვგონებ, თქვენთვის კარგად უნდა იყოს ცნობილი, რომ ბალდინი ყოველთვის თავად ქმნის საკუთარ პარფიუმერიას!

შენი: ვიცი, მსიე.

ბალდინი: იღებოც ჩემია და დამუშავებაც!

შენი: ღიახ. მსიე.

ბალდინი: ახლა ისეთ რამეს შეექმნი გრაფისთვის, მთელი პარიზი მაგაზე ლაპარაკობდეს...

შენი: ეჭვიც არ მეპარება, მსიე ბალდინი.

ბალდინი: სავაჭროს თქვენზე ვტოვებ, შენიე: უნდა ვიმუშაო, ნურავის მისცემთ ჩემი შეწუხების უფლებას, შენიე.

და ამ სიტყვებით მოხუცი, უკვე არა დიდებული, არამედ წელში მოხრილი, როგორღაც მოტეხილი, ნელ-ნელა აუყვან კიბეს ზემოთ, მეორე სართული-საკენ, სადაც მისი სამუშაო კაბინეტი იყო.

ახლა შენიემ დაიკავა ადგილი დახლსუკან, ზუსტად იგივე პოზა მიიღო, როგორც მის პატრონს სჩვეოდა და უძრავი მზერით მიაჩერდა კარებს. ზუსტად იცოდა, რაც მოხდებოდა უახლოეს საათებში, კერძოდ: დახლთან – სრულიად არაფერი, ხოლო ზემოთ, ბალდინის სამუშაო კაბინეტში – მორიგი კატასტროფა. ბალდინი ფრანჟიპანის წყლით გაჟღენთილ თავის ცისფერ სერთუკს გაიხდის, მიუჯდება სამუშაო მაგიდას და ზემთაგონებას დაელოდება. ის კი არა და არ მოვა. მერე მივარდება საცდელი ფლაკონების კარადას და ესენციების ალაღბელზე არევას მოჰყვება. არც აქედან გამოვა რაიმე ხეირი. ბალდინი წყველა-კრულვით გამოაღებს ფანჯარას და ნაზავს მდინარეში მოისვრის. შემდეგ სხვა ნაერთის გაკეთებას სცდის და ისევ არაფერი გამოუვა. მაშინ ბატონი ბალდინი გამძვინვარდება, აკივლდება და ბოლოს, ოთახში ჩამოწოლილი ეთერზეთების მძიმე სურნელებით გამოქანთარებული, აქვითინდება. საღამოს, ასე, შვიდი საათისათვის დაბლა დაემყვება ნამტირალევი, საბრალო, აკანკალებული და იტყვის: „შენიე, სულ დავკარგე ყნოსვა, არავითარი სუნამოს შექმნა მე აღარ შემიძლია... დავიღუპე, ჩემში ისედაც ყველაფერი მკვდარია, შენიე! მე ახლა მართლა სიკვდილი მინდა— ამაში მაინც დამეხმარეთ, შენიე!“ და შენიე შესთავაზებს, ვინმე გააგზავნონ პელისიესთან, ერთი ფლაკონი მოდური სუნამოს საყიდლად; ბალდინიც დაეთანხმება, ოღონდ იმ პირობით, რომ ვერა სულიერი ვერ გაიგებს ამ თავისმოსაყენებელ ამბავს. შენიე შეფიცებს, და ისინი საიდუმლოდ, ღამით გაჟღენთავენ გრაფ ვერამონის ბიუვარს – სხვისი სუნამოთი. ყველაფერი ზუსტად ასე მოხდება და არა სხვანაირად, და ახლა შენიეს მხოლოდ ერთი სურ-

ვილი აქვს – ეს კომედია რაც შეიძლება მალე დამთავრდეს. ბალდინი აღარაა ის დიდებული პარფიუმერი... კი, ადრე, ახალგაზრდობაში, ამ ოცდაათი, ორმოცი წლის წინათ, სწორედ მან შექმნა „სამხრეთის ვარდი“ და „ბალდინის თაიგული“ – ორი მართლაც რომ ღვთაებრივი სურნელი, რომლებსაც უნდა უმაღლოდეს კიდევ თავის ქონებას; მაგრამ ახლა მოხუცდა, გაცვდა, ჩამორჩა დროს, დღეისდღის გემოვნებას, და მაშინაც კი, როცა საერთოდ ახერხებდა რაიმე ახლის შეთითხნას, ყოველთვის წარღვნამდელი, გაუსაღებელი საძაგლობა გამოუდიოდა, რასაც მერე ათგზის აზავებდნენ და ცალობით ასაღებდნენ ხოლმე, როგორც დასამატ საშუალებას შადრევნების წყლისათვის. „ცოდო კია, – გაიფიქრა შენიემ და სარკეში ჩაიხედა, პარიკის სისწორე შემოწმა – ცოდოა ბებერი ბალდინი, და გაკოტრების პირას მისული მისი ეს მშვენიერი სავაჭროც დასანანია; მეც ცოდო ვარ, განა არა – ვიდრე ის საბოლოოდ გაკოტრდებოდეს, კიდევ მოვხუცდები და მერე რაღა მისი შესყიდვის თავი მექნება“...

II

ჯუზუპე ბალდინიმ კი გაიძრო თავისი სართუკი, მაგრამ უფრო ძველი ჩვეულებისამებრ, თორემ ფრანჟიპანის წყლის სუნი უკვე კაი ხანია მის ყნოსვას აღარ აღიზიანებდა: რამოდენიმე ათეული წლის განმავლობაში ისე მიეჩვიოდა, საერთოდ ვეღარც ამჩნევდა. მართალია, კაბინეტის კარიც გაიხურა, ისიც მართალია, რომ ითხოვა – არავინ შემაწუხოსო, მაგრამ არც საწერ მაგიდას მისჯლომია და არც ზეშთაგონებას დალოდებია, რადგან შენიეზე უკეთ უწყოდა, არავითარი ზეშთაგონება არ ეწყვოდა. საქმე ისაა, იგი არც აროდეს სწევია – დიახ, სწორია, ბებერი იყო, და გაცვეთილი, და აღარც დიდებული პარფიუმერი ეთქმოდა, მაგრამ სინამდვილეში ხომ არც არასოდეს ყოფილა ასეთი: „სამხრეთის ვარდი“ მან მემკვიდრეობით მიიღო მამისაგან, ხოლო „ბალდინის თაიგულის“ რეცეპტი ერთი გენუელი სანელებლებით მოვაჭრისაგან შეისყიდა. ყველა სხვა მისი სუნამო კარგა ხნის წინათ ცნობილი, ოღონდ საკმარისად მივიწყებული ნარევები იყო. თავად მას ჯერ არასდროს არაფერი გამოუგონია და საერთოდ, ბალდინი არც იყო რაიმეს გამომგონებელი – იგი უფრო მაღალხარისხოვან ნელსაცხებელთა დამამზადებელი გახლდათ – როგორც მზარეული, რომელიც შესანიშნავად ამზადებს სხვისი რეცეპტების მიხედვით, ოღონდაც ვერა კერძს ვერ დაარქმევს საკუთარ სახელს, უცილობლადქცეულ თავსართ *a la*-ს დამატებით... მთელ ამ კომედიას – ლაბორატორიით, და ექსპერიმენტებით, და ზეშთაგონებით, და იღუმალებით – ბალდინი მხოლოდ იმიტომ გაითამაშებდა ხოლმე, რომ ოსტატის სახელი შეენარჩუნებინა – “პარფიუმერი და მეხელთათმანე”. პარფიუმერი ხომ სასწაულებს ქმნის და ცოტათი ალქიმიკოსია, ასე თვლის ხალხი – მით უკეთესი! ის, რომ მთელი მისი ხელოვნება ისევე ხელობაა, როგორც ნებისმიერი სხვა, იცოდა მხოლოდ მან, და კიდევ ამაყოფა ამით; არც სურდა გამომგონებელი ყოფილიყო – გამომგონებლობა ფრიად საეჭვო რამ გახლავთ, რადგან მუდამ და ყოველთვის წესების დარღვევას ნიშნავს. ბალდინი იმთა-

ვითვე არ აპირებდა ახალი სუნამოს შექმნას გრაფ ვერამონისათვის. ყოველ შემთხვევაში, შენიეს მაინც არ დასჭირდება მისი დაყოლიება, არც პელისიეს ნათითხნის შოვნა... თავად იშოვა. აგერ, საწერ მაგიდაზე დევს, ფანჯარასთან, დაწახნაგებულსახურავიან პაწია ფლაკონში. რამდენიმე დღის წინ შეიძინა. რა თქმა უნდა არა პირადად – სად გაგონილა, ბალდინი პირადად ცხადდებოდეს ვინმე პელისიესთან სუნამოს საყიდლად! შუამავლის საშუალებით მოქმედებდა და იმ შუამავალმაც კიდევ სხვას მიმართა. სიფრთხილეს თავი არ სტკივა. ოღონდაც ამჯერად ბალდინი სულაც არ აპირებდა ამ სხვისი სუნამოს გამოყენებას ერთადერთი ტყავის გასაჯვრებლად – მან უარესი რამ ჩაიფიქრა: ასლის გადაღება.

ამგვარი ქმედება კანონით არ იყო აკრძალული, თუმცა უზნეობად კი ითვლებოდა. კონკურენტის ნაწარმის ფარულად დუბლირება და მისი საკუთარი ღამლით გაყიდვა, ზედმიწევნით არაკეთილშობილური საქციელი გახლდათ. მაგრამ უარესი ამბავია, სამხილით ხელში თუ დაეგზერენ და ამიტომაც, შენიემ სრულიად არაფერი არ უნდა იცოდეს, რადგან ენა მაინც ზომასზე გრძელი აქვს...

ე-ეპ! ცუდია, ცუდი, პატიოსან ადამიანს რომ ამგვარად უწევს თავის გატანა! მძიმეა მსხვრპლად მიიტანო ყველაზე ძვირფასი, რაიც გაგაჩნია – საკუთარი ღირსება ასე უბადრუკად დაალაქავო! მაგრამ რა გინდა ქნა?! გრაფი ვერამონისთანა მუშტრის დაკარგვაც ვერაფერ სიკეთეს მოიტანს... მის გარდა განა რომელი გვაროვანი მომხმარებელი შერჩა? ისევ ისე უნდა იძუნძულოს შეკვეთების საშოვნელად, როგორც ოციან წლებში, თავის კარიერას რომ იწყებდა, ქუჩა-ქუჩა დაეხეტებოდა ხონჩით. ღმერთია მოწმე, ჯუხუბე ბალდინი, ყველაზე დიდი და ხეირიანად განლაგებული პარფიუმერიის მაღაზიის მუპატრონე, ახლა სახლში აკითხავს კლიენტებს ჩემოდნით ხელში! ეს კი მას სულაც არ ეპიტნავებოდა: უკვე სამოცსაა მიტანებული და რაღა დროს მარკიზებისთვის ასფურცელაზე დაყანებული ტუალეტის წყლის, ძმარ „ოთხი ყაჩაღისა“ თუ შაკიკის საწინააღმდეგო მაღამოს ქებაა! ამას გარდა, იმ მისაღებებში ყოველად უგვანი კონკურენცია მეფობდა: თუნდაც ის ქვეშევეშა ბნიბურე, დოფინის ქუჩიდან, რომ ამტკიცებს – ჩემთან პომადების ყველაზე დიდი არჩევანია მთელს ევროპაშიო; ანდა ის ვიღაცა კალტო, მოკონსეის ქუჩიდან, გრაფინია დ'არტუას პირად მომმარაგებლად რომ გაძვრა; ახლა კიდევ ეს თავკერძა პელისიე სენ-ანდრე-დუზ-არის ქუჩიდან, ყოველ წელს რომ რაღაც უცხო სუნამო შემოაქვს მოდამი და კეთილშობილთა თუ მდაბიორთ ერთნაირად აკარგვინებს ჭკუას...

ისიც ითქვას, ეს პელისიე მთელს საპარფიუმერიო ბაზარს ქაოსში აქცევდა. როდესაც რომელიმე სეზონში უნგრული მოდა დომინირებდა და ბალდინი, შესაბამისად, ლავანდს, ბერგამოტს, როზმარინს იმარაგებდა – პელისიე მუშკით უხვად გაჯერებულ რაღაც „განცხრომა“-ს გამოყრიდა გასაყიდად და ყველას უცებ შემოეჭდებოდა უმძაფრესი სურვილი მხოლოდ მისი სუნი ეფრქვია; ბალდინის აღარაფერი შეეძლო იმის გარდა, რომ როზმარინი თავის დასაბან წყლად გადაემუშავებინა, ხოლო ლავანდა საყნოსავ ტომსიკებში ჩაეყარა და ჩაეკერებინა. სამაგიეროდ, როდესაც შემდეგი წლისათვის შესაბამისი რაოდენობის მუშკს, ციბეტინს და კასტორიუმს შეუკვეთავდა, პე-

ლისიე საკუთარ ხუმტურზე ქმნიდა სუნამოს, რომელსაც „ველური ყვავილი“ ერქვა და ისიც წამიერად პოულობდა წარმატებას. ხანგრძლივი დამეული ცდების, ან წრეგადასული ხარჯებით ჯაშუშების დაქირავების ფასად, ბაღდადის ბოლოს და ბოლოს არკვევდა რისგან შედეგებოდა ეს „ყვავილი“ – პე-ლისიე კი ისევ ახალ კოზირს ჩამოდიოდა: „თურქულ დამეებს“, ანდა „ლისაბონის რიჟრაჟს“, ანდა „სამეფო კარის თაიგულს“ და ეშმაკმა უწყის კიდევ რას არა. ასეა თუ ისე, ეს კაცი, ამ თავისი დაუოკებელი გამოძგონებლობით, მთლიანად მენელსაცხებლეთა ამქარს უთხრიდა ძირს. აბა როგორ არ უნდა დაგნანებოდა, რომ ამქრული უფლებების მკაცრი დრო წარსულს ჩაბარდა! ამისთანა წამგლეჯი, მეტიჩარა, გაქნილი საქმოსანი, დახვეწილი გემოვნების დაკნინების ხარჯზე რომ მდიდრდება, მართლა იმის ღირსია, ყველაზე დრაკონული ზომები მიუსადაგო! პატენტიც უნდა წაართვა, პარფიუმერიის საქმეებში ჩარევა ხომ საერთოდ უნდა აუკრძალო... ჯერ ამ თაღლითმა რაღაც-რაღაცეები მაინც ისწავლოს! განათუ განსწავლული პარფიუმერია და მეხელთათმანე, ეს პელისიე! მამამისიც ერთი უბრალო ძმრის მხდელი იყო, და პელისიეც ძმრის მხდელია და სხვა არაფერი! იმითი მიეჭმანა ჭეშმარიტ მენელსაცხებლეთა წრეს, ძმრის მხდლელებს უფლება რომ მიეცათ სპირტის პროდუქტებზეც იმუშაონ, და ფათურობს ახლა აქ ვირთხასავით! ერთი მითხარით, რა საჭიროა ყოველ სეზონზე სულ ახალ-ახალი სუნამო გამოაგდო ბაზარზე? ვის რაში სჭირდება? ადრე საზოგადოება სავსებით კმაყოფილდებოდა იის წყლითა და ნაირნაირი ყვავილების ნაყენის უბრალო შერევით, და მათი შემადგენლობაც ოღნავ თუ იცვლებოდა სადღაც ათ წელიწადში ერთხელ. ბოლოს და ბოლოს, ათასწლეულობით კმაყოფილდებოდა ხალხი ბაღზამითა და სურნელოვანი ფისით, საკმეველით, ზეთებითა და გამხმარი სუნელებით... და მას შემდეგაც კი, როცა კოლბებისა და სახდელი აპარატების გამოყენებით გამოხდილი წყლის მიღება ისწავლეს, ხოლო წყლის ორთქლის დახმარებით – ბალახებისათვის, ყვავილებისათვის, სხვადასხვა სახის მერქანისათვის მათი სურნელოვანი სულის წართმევა – ეთერული ზეთების სახით, მუხის პრესების მეშვეობით მისი გამოწურვა ხილის თესლებიდან, კურკებიდან თუ კანიდან, ანდა გულმოდგინედ გაფილტრული ცხიმების საშუალებით მისი გამოყვანა ყვავილების ფურცლებიდან, მათი რაოდენობა ჯერ კიდევ შემოსაზღვრული იყო. იმ ზნეკეთილ დროებაში, ისეთი ტიპის გამოჩენა, როგორიც პელისიეა, სრულიად შეუძლებელი იქნებოდა: იმხანად უბრალო პომადის მოსამზადებლადაც კი ისეთი ნიჭიერება იყო საჭირო, რაგვარსაც ეს მეძმარე ოცნებითაც ვერ შესწვდებოდა. საჭირო იყო არა მხოლოდ გამოხდის ტექნოლოგიის ცოდნა, არამედ ერთდროულად უნდა ყოფილიყავი მენელსაცხებლე და აფთიაქარი, ალქიმიკოსი და ხელოსანი, ვაჭარი, მწიგნობარი და მებაღე ერთდროულად; უნდა გაგერჩია ცხვრის თირკმლის ქონი ხბოს ქონისაგან, ხოლო ია „ვიქტორია“ – პარმის იისაგან; უნდა გცოდნოდა, როდის მწიფდება პელიოტროპი და როდის ყვავილობს ბალბიფოთლა და რომ ჟასმინის ყვავილი, მზის ამოსვლის მერე, თავის სურნელს სრულიად კარგავს... მსგავს რამეებზე ხომ პელისიეს მსგავს სუბიექტებს წარმოდგენაც არა აქვთ! იქნება და ის არც არასოდეს გაშორებია პარიზის კედლებს და არც აყვავებული ჟასმინი უნახავს ოდესმე?! მას ალბათ სიზმრადაც არ მოლანდებია, რაოდენი შავი სამუშაოა საჭირო, ასი ათასი ჟასმინის ფურცლისაგან კონკრეციის პაწაწინა ბურთულა, ან რამოდენიმე

წვეთი სუფთა ესენცია რომ მიიღო! მისთვის ჟასმინი მხოლოდ და მხოლოდ პატარა ფლაკონში ჩასხმული, დაწურული მუქი ყავისფერი სითხე თუა, რომელიც ცეცხლგამძლე ყუთში უდევს სხვა ფლაკონებთან ერთად და რომლითაც ის თავის სუნამოებს აზავებს... არა, ბატონო ჩემო, იმ კეთილ ძველ დროებაში, როცა ხელობას პატივს სცემდნენ, ამისთანა ქარაფშუტა ვინმეს არც გააბედვინებდნენ პარფიუმერების მარაქაში გარეკას! ჯერ ერთი, არავითარი მონაცემები მას არ გააჩნია: არც მტკიცე ხასიათი, არც განათლება, არც მორიდება, არც ამქრული ზემდგომ-ქვემდგომის გაგება... ყველა თავს წარმატებას მხოლოდ და მხოლოდ იმ აღმოჩენას უნდა უმაღლოდეს, რომელიც ორასი წლით ადრე მოახდინა გენიალურმა მაურიციო ფარჟიპანიმ – ისიც იტალიელი გახლდათ, სხვათა შორის – რომ არომატული ნივთიერებები ღვინის სპირტში იხსენება! მერე შეურია ეს არომატული ფხვნილები ალკოჰოლში და ამით მათი სურნელი აქროლად სითხეზე გადაიტანა – გაანთავისუფლა სუნი მატერიისაგან, სული ჩაუდგა მას, გამოიგონა სუნი – როგორც ნელსურნელება, მოკლედ: შექმნა სუნამო. რამხელა საქმეა! არა, ეპოქალური გამოგონებაა – ამას ადამიანთა მოდგმის მხოლოდ უმაღლეს მიღწევებს თუ შევადარებთ: ასირიელების მიერ დამწერლობის შექმნას, ევკლიდესეულ გეომეტრიას, პლატონის იდეებს ან ბერძნების მიერ ყურძნის ღვინოდ გადაქცევის ამბავს! ჭეშმარიტად, პრომეთეს გმირობაა, მაგრამ რამდენადაც გონის ყოველ დიად გამობრწყინებას არა ოდენ სინათლე, არამედ ჩრდილიც მიირქმევს და კეთილდღეობასთან ერთად, მწუხარება და სიმწარეც მოაქვს, ასევე ფირჟიპანის აღმოჩენას, საუბედუროდ, უარყოფითი შედეგებიც მოჰყვა: როგორც კი ადამიანებმა ყვავილებისა და ბალახების, და ხეების, ფისებისა თუ ცხოველთა სეკრეციის სულის გამოლოცვა ისწავლეს და მათი გამომწვევდა თავდაცობილ ფლაკონებში, არომატიზაციის ხელოვნება ხელიდან გაუსხლტათ ყოვლისმოდენე, იშვიათ ოსტატებს და გზა გაეხსნათ რა გინდა რა ცრუმარქვიებს, რომლებმაც მხოლოდ სარფიანი საქმეების გაჩარხვა იციან – ამ ვირთხა პელისიესავით! იმაზე თავისაუტკივებლად, თუ როდის და როგორ წარმოიშვა მისი ფლაკონების ჯადოქრული შემცველობა, მას ახლა შეუძლია უბრალოდ კოჭი უგოროს საკუთარი ყნოსვის ხუშტურებს და ერთმანეთში ათქვიფოს ყველაფერი, რაც თავად მას, ანდა მყიდველს მოეპრიანება...

ამ გარეწარმა პელისიემ, სულ რაღაც ოცდათხუთმეტი წლის ასაკში, ალბათ უფრო მეტი ქონება მოაქუჩა, ვიდრე მან, ბალდინიმ დააგროვა მისი ოჯახის სამი თაობის მძიმე, შეუპოვარი შრომით. თანაც, ეს პელისიეს ქონება ყოველდღიურად მატულობს, ხოლო მისი, ბალდინისა, ყოველდღიურად დნება. ასეთი რამ საერთოდ ვერ მოხდებოდა ძველ დროებაში! ყველასგან პატივცემული ოსტატი და დარბაისელი კომერსანტი რომ იძულებული ხდება, ლამის საკუთარი არსებობისათვის იბრძოლოს – ასეთი რამ სულ ახლახან, რამდენიმე ათეული წლის წინ დაიწყო! მას შემდეგ რაც ყველგან და ყოველგან გადაიგრიალა სიახლეების ამ ციებ-ცხელებამ, საქმოსნობის ამ შეუკავებელმა ფადარათმა, ექსპერიმენტატორობის გამხეცებულმა სიმშაგემ, ამ განდიდების მანიამ ვაჭართა, მოგზაურთა, მეცნიერთა წრეში!!!

ანდა თუნდაც ეს სიჩქარეებზე გადარევა! რაში დასჭირდათ უამრავი ახალი გზის გათხრა? რისთვის მართავენ ახალ-ახალ ხიდებს? რისთვის? რომ ლიონამდე ერთ კვირაში ჩააღწიო? მერედა, რა ჭკუა აქვს ამას? ვისთვისაა ეს სასარგებლო, რას სერავენ თავქუდმოგლეჯილნი ამ ალტანტიკას? რომ ერთი თვის შემდეგ ამერიკაში აღმოჩნდნენ?! კი მაგრამ, ადამიანები ხომ საუკუნეების განმავლობაში ამ კონტინენტის გარეშეც მშვენივრად გრძნობდნენ თავს! და საერთოდ, რა ესაქმება ცივილიზებულ ადამიანს პირველყოფილ ტყეში, ინდიელებთან და ზანგებთან?! ანდა ლაპლანდიაში, ჩრდილოეთით, სადაც მუდმივი ყინულია და სადაც ველურები ცხოვრობენ და უმ თევზს მიირთმევენ? ესეც ეცოტავათ — ახალი, კიდევ ერთი კონტინენტის აღმოჩენა მოისურვეს — სადღაც სამხრეთის ზღვებშიო, ამბობენ. რისთვის უნდათ ეს სისულელე? სხვებიც ასევე იქცეოდნენო — შერეკილი ესპანელები, გაფუყული ინგლისელები, უტიფარი ჰოლანდიელები — რომლებთანაც, სხვათა შორის, მერე ბრძოლა მოგვიწია და რისი უფლებაც საერთოდ არ უნდა მიგვეცა საკუთარი თავისთვის... 300.000 ლივრი ნაღდი — აი, რა ჯდება ერთი სამხედრო ხომალდი, ის კიდე ხუთ წუთში იძირება ზარბაზნის ერთი გასროლით და გადასახადებიდან აკრეფილი ფულიც წავიდა ზღვის ფსკერზე!... ბატონი ფინანსთა მინისტრი ახლა უკვე მთელი ათი პროცენტის გადახდას მოითხოვს შემოსავლიდან, რაც სრული გადატაკებაა, ჩემმა ღმერთმა! მაშინაც კი, თუ ნაწილ-ნაწილ, ან სულაც არ გადაიხდი არაფერს, ასეთ ზნედაცემულ გარემოში მაინც ვერაფერ ხეირს ნახავ...

დიახაც, ბატონო ჩემო, ადამიანის ყველა უბედურება იმისაგანაა, რომ არავის სურს სახლში წყნარად ჯდომა — იქ, სადაც მათი ადგილია. ასე ამბობდა პასკალი. მაგრამ პასკალი ხომ დიადი ადამიანი იყო, ასე ვთქვათ, ფრანჟიზანის თავის საქმეში, ე. ი. ნამდვილი ოსტატი; ასეთებზე კი ახლა მოთხოვნილება აღარაა. ახლა ისინი ჰუგენოტების ან ვიდაც ინგლისელების წამქეზებლურ ტრაქტატებს კითხულობენ, ანდა წიგნებს წერენ, ან ეგრეთწოდებულ დიად სამეცნიერო ნაშრომებს, სადაც ყველაფერი და ყოველივე კითხვის ქვეშა აქვთ დაყენებული. თითქოს უკვე აღარაფერი ჭეშმარიტი აღარ არსებობს და ყველაფერი შეიცვალა. ჭიქა წყალში თურმე, პაწაწინა ცხოველები დაცურავენ, რომლებსაც ადრე ვერავენ ამჩნევდა; ათამანგი ჩვეულებრივი ავადობა ყოფილა და არა ღვთის რისხვა; ღმერთს თურმე, სამყარო შვიდ დღეში კი არა, მილიონობით წლების განმავლობაში შეუქმნია, თუ ეს ღმერთიც არსებობდა საერთოდ; ველურები ისეთივე ადამიანები არიან, როგორც ჩვენ; ბავშვებს არასწორად ვზრდით; დედამიწა უკვე მრგვალი კი აღარაა, როგორც ადრე იყო, არამედ ზემოდან და ქვემოდან შებრტყელებულია, ნესვივით — თითქოს მხოლოდ ამაშია საქმე! ყველა, ვისაც არ ეზარება, კითხვებს იძლევა, და თხრიან, და იკვლევენ, და ჩხრეკენ, და რაზე აღარ ატარებენ ექსპერიმენტებს! ახლა ცოტაა თქვა რა და როგორ, კეთილი ინებე და დაამტკიცე, წარმოადგინე მოწმეები, ჩამოალაგე ციფრები, ჩაატარე რაღაც სულელური ცდები... ვიდაც დიდროებმა, და დალამბერებმა, და ვოლტერებმა, და რუსოებმა, და სხვა მწერლუკებმა, ვინც არ უნდა იყვნენ — მათ შორის სასულიერო პირებიც ყოფილან თურმე და კეთილშობილი ბატონებიც — თავისას მიაღწიეს: საკუთარი მოუსვენრობა, ამ ქვეყანაზე ყველაფრის მიმართ დაუკმაყოფილებლობისა თუ უკმაყოფილების გარყვნილი ჩვეულება —

მოკლედ, მათ თავებში გამეფებული ეს უსაზღვრო ქაოსი, მოახერხეს და ახლა მთელს საზოგადოებას გადასდეს!

საითაც უნდა გაიხედო, ყველას რაღაც ციებცხელება შეყრია. ქალები წიგნების კითხულობენ, ღვთისმსახურები ყავახანებში ატუზულან... ერთხელ კიდევ, როდესაც პოლიცია ჩაერია და ამ გველაძეუა არამზადებიდან რომელიღაცა ვირის აბანოში ჩააყუდა, გამომცემლებმა ერთი ყალილა ატეხეს, ზემდგომმა ბატონებმა და ქალბატონებმაც თავიანთი გავლენა გამოიყენეს და ისე მოხდა, ორი-სამი კვირის შემდეგ გაათავისუფლეს კიდევ... თუ საზღვარგარეთ გაუშვეს, სადაც ყოველგვარი დაბრკოლების გარეშე განაგრძობდა პამფლეტების ჯღაბნას. სალონებში მხოლოდ კომეტებზე და ექსპედიციებზე ლაყბობენ, ბერკეტის ძალასა და ნიუტონზე, არხების მშენებლობაზე, ორგანიზმში სისხლის მიმოქცევასა და დელამიწის დიამეტრზე.

მეფემაც კი ნება დართო, მის წინაშე რაღაც ახალმოდური სიბრიყვის ჩვენება მოეხდინათ – რაღაცა ხელოვნური ქუხილივით, ელექტრობა ეწოდებოდა: მთელი სამეფო კარის თანდასწრებით, კაცმა ბოთლი ბოთლზე გაახაზუნა და ნაპერწკლები გადმოცვივდა და მის უდიდებულესობაზე, როგორც ამბობენ, ამან დიდზე-დიდი შთაბეჭდილებაც მოახდინაო. წარმოდგენელია რომ მის დიდ პაპას, იმ მართლაც რომ დიდ ლუდოვიკოს, რომლის ძლევა მოსილ მმართველობასაც, ბალდინი, მისდა საბედნიეროდ, კიდევ შეესწრო, მსგავსი სისულელის დემონსტრაცია მოეთმინა საკუთარ კარზე! მაგრამ სწორედ ასეთია ამ ახალი დროების სული და ძან ვეჭვობ, ყოველივე ეს კეთილად დამთავრდეს.

ვინაიდან, თუ უკვე დასაშვებია ყოვლად უსირცხვილო მეთოდებით, ყოვლად თავხედურად, ღვთის ეკლესიის ავტორიტეტის შელახვა; თუ არანაკლებ ღვთიურ მონარქიასა და ღვთივკურთხეული მეფის პერსონას განიხილავენ როგორც ცვლად პოზიციას, მმართველობის სხვა ფორმებთან ერთად, რაღაც ერთიან კატალოგში, საიდანაც საკუთარი გემოვნებისა და მიხედვით ნებისმიერი შეგიძლია აირჩიო; თუ ბოლოს და ბოლოს იქამდე დავეშვით, რომ თავად ყოვლისმემძლე უფალს ზედმეტად აცხადებენ და ყოვლად თავდაჯერებულად ამტკიცებენ, წესრიგი, ზნეობა და ბედნიერება მის გარეშეც შესაძლებელიაო, რომ ყოველივე ამისათვის თავად ადამიანის თანდაყოლილი გონიერებაც სრულიად საკმარისია... ღმერთო დიდებულო! მაშინ, ყოველ შემთხვევაში, რაღაა გასაკვირი, თუ ყველაფერი ყირამალა მიდის და ზნე-ჩვეულებანი გადაგვარდა და კაცობრიობამ თავს დაიტეხა სასჯელი მისგან, ვისაც თავადვე უარყოფს და ყოველივე ეს ძალიან-ძალიან ცუდად დამთავრდება... 1681 წლის დიდი კომეტა, რომელსაც ისინი უბრალოდ ვარსკვლავების გროვად თვლიდნენ და ატრიზავენდნენ, სწორედ რომ უფლის გამაფრთხილებელი ნიშანი იყო, რადგან მან – ახლა მაინც ზომ ცნობილია – სწორად გვიწინასწარმეტყველა ლპობა სულიერი, საუკუნე გარყვნილებისა, პოლიტიკური, რელიგიური ჭაობისა, რომელიც კაცობრიობამ თავადვე შექმნა საკუთარი თავისთვის და რომელშიც, ადრე თუ გვიან, თავადვე ჩაიძირება და სადაც მხოლოდ ისეთი აყროლებული და საზიზღარი ჭაობის ყვაილები იფურჩქნებიან, როგორც ეს პელისია!..“

ბებერი ბალდინი ფანჯარასთან იდგა და არაფრისმთქმელი თვალებით გადაჰყურებდა მზის ცერა სხივებქვეშ გაწოლილ მდინარეს. ხიდის ქვემოდან გამოყვინთავდნენ ხოლმე სატვირთო ნავეები და ნელა მისრიალებდნენ დასავლეთით, ახალ ხიდსა და ლუვრის მისადგომებისკენ. არცერთი მათგანი არ მოყვებოდა ზემოთ, დინების საწინააღმდეგოდ. ისინი მდინარის მეორე ტოტში უხვევდნენ, კუნძულის იქითა მხარეს, აქ კი მხოლოდ ქვემოთ მიცურავდნენ, ცარიელი და დატვირთული გემები, ნიჩბებიანი ნავეები და მეთევზეთა ბრტყელძირა ნუშები, ჭუჭყისაგან გაყავისფრებული წყალი და წყალი – მზისაგან ოქროსფერი რომ გადასდიოდა. ყველაფერი დაბლით მიისწრაფვოდა – ნელა, ფართოდ, შეუკავებლად, ხოლო როდესაც ბალდინი ძირს იყურებოდა – სახლის კედლის გაყოლებაზე, სულ ეჩვენებოდა, თითქოს ხიდის ბურჯებს დინება იწოვსო და თავბრუ ესხმოდა.

ხიდზე სახლის ყიდვა შეცდომა იყო... ორმაგად შეცდომა იყო სახლის ყიდვა დასავლეთის მხარეს, და ახლა მუდმივად თვალწინ უდგას მდინარე, რომელიც სადღაც შორს მიედინება, და მუდმივად ეჩვენება, რომ მის სახლსაც და მის მიერ ათეულობით წლების მანძილზე ნაგროვებ ქონებას ასევე მიატივტვებს ეს მდინარე, და თვითონაც უკვე საკმარისად ბებერია და მისუსტებული, რომ ამ მდინარეებამ არ ჩაიყოლოს. ხშირად, საქმეებზე მარცხენა ნაპირზე გადასული, სორბონთან მდებარე უბნიდან, ან წმ. სულპიცისის ტაძრის შემოგარენიდან, სახლში ბრუნდებოდა არა სენ-მიშელის ხიდით, არამედ კუნძულის გავლით, ახალი ხიდით, უფრო გრძელი გზით, რადგან ამ ხიდზე სახლები არ იდგა. ჩერდებოდა ხოლმე აღმოსავლეთის მხარის მოაჯირთან და ზევიდან დაყურებდა დინებას, რათა ხანდახან მაინც დაენახა როგორ მოისწრაფვის ყველაფერი მისკენ, მის შესახვედრად; და მიეცემოდა ხოლმე ტკბილ ოცნებებს იმაზე, რომ საქმე უდუღს და გადმოუდის, რომ ოჯახობა განცხრომაშია, რომ ქალები გასაქანს არ აძლევენ და ქონებაც, იმის მაგივრად რომ ხელში ადნებოდეს, სულ უძრავლდება და უძრავლდება...

მაგრამ შემდეგ, როდესაც მზერას ოდნავ ზემოთ მიაპყრობდა, სულ რაღაც ასი მეტრის მანძილზე ხედავდა თავის სახლს, რომელიც მაღლა, ზარაფთა ხიდზე იდგა, დაყანთრული და ვიწრო; ხედავდა საკუთარი კაბინეტის ფანჯრებს მეორე სართულზე და საკუთარ თავს, ფანჯარასთან მდგომს და დაბლით, მდინარეზე მიჩერებულს, მზერით რომ აცილებდა ქვემოთ მიმდინარე წყალს – ისევე, როგორც ახლა. აქ კი ლამაზი სიზმარი მთავრდებოდა და ახალ ხიდზე მდგარი ბალდინი სახლში ბრუნდებოდა, უფრო მეტად დათრგუნული ვიდრე მანამდე, უფრო დათრგუნული, ვიდრე ახლა, როცა ფანჯარას ზურგი აქცია, მივიდა საწერ მაგიდასთან და სავარძელში ჩაჯდა...

მის წინ ფლაკონი იდგა, პელისიეს სუნამოთი. ოქროსფერდაკრული ყავისფერი სითხე, მზის სინათლეზე მოციმციმე, გამჭვირვალე იყო და შემღვრევის ყოველგვარ კვალს მოკლებული, სრულიად უმანკოდ გამოიყურებოდა, ჩაის თხელი ნაყენივით – ოღონდაც შეიცავდა ოთხ მეხუთედ სპირტსა და ერთ მეხუთედ იმ იდუმალ ნაზავს, მთელი ქალაქის აღზნება რომ შეეძლო. თავად ეს ნაზავიც სამი, ან იქნებ ოცდაათი სხვადასხვა ნივთიერებისაგან შედგებოდა, რომლებიც სრულიად განსაზღვრულ (შესაძლებელთა უსასრულო

რიცხვიდან) მოცულობაში იმყოფებოდნენ ერთმანეთთან მიმართებით და სწორედ ეს იყო სუნამოს სული – თუკი, რაღა თქმა უნდა, მართებულია ამ სიტყვის ხმარება, როდესაც პელისიეს ნაწარმზე ლაპარაკობ, და ახლა მისი შემადგენლობის გამორკვევადა იყო საჭირო.

ბალდინიმ გულმოდგინედ მოიხოცა ცხვირი და ოდნავ ჩამოუშვა ფარდები ფანჯარაზე, რადგან ბირდაპირი მზის სინათლე მავნებელია ნებისმიერი სურნელოვანი ნივთიერებისა და ნებისმიერი, ცოტად თუ ბევრად ნატიფი კონცენტრაციის სურნელებისათვის. საწერი მაგიდის უჯრიდან თეთრი, მაქმანე-ბიანი, გატკიცინებული ცხვირსახოცი ამოიღო, ამასთანავე თავი უკან გადასწია და ნესტოებსაც თითები მოუჭირა – ღმერთმა ნუ ქნას და ყნოსვითი შთაბეჭდილება ნაჩქარევად, პირდაპირ ბოთლიდან მიიღოს! ყოველი სუნამო თავისუფალ, აქროლად მდგომარეობაში უნდა შეიყნოსო და არა – კონცენტრირებულში... რამდენიმე წვეთი ქსოვილს დააკურა, მერე ერთი-ორჯერ ჰაერში გააქნია სპირტის სულის გასანიავებლად, და ფრთხილად მიიტანა ცხვირთან. სამი ძალიან მოკლე, მკვეთრი შესუნთქვით შეიწოვა არომა, თითქოსდა რაიმე ფხვნილი ყოფილიყო, უცებ ამოისუნთქა, ხელით ჰაერი თავისი ცხვირისაკენ მოდენა, კიდევ ერთხელ დაყნოსა, საბოლოო, ღრმა შესუნთქვაც გააკეთა და ახლა უკვე აუჩქარებლად, მრავალჯერადი შეყოვნებით ამოისუნთქა... ყოველივე ამის შემდეგ ცხვირსახოცი მაგიდაზე დააგდო და სავარძლის საზურგეზე გადაწვა.

სისაზიზღრემდე კარგი იყო ეს ოხერი! ამ უბადრუკმა პელისიემ, საუბედუროდ, მაინც იცოდა თავისი საქმის ყადრი. ღმერთო, რა ოსტატია – თუნდაც ათასგზის უსწავლელი იყოს... ბალდინის სურვილმა მოუარა, „ამური და ფსიქა“ მისი ნამოქმედარი ყოფილიყო. ამ სუნამოში ვულგარულობის ნიშან-წყალიც კი არ იგრძნობოდა – სრულიად კლასიკური არომა, სრულყოფილი, ჰარმონიული და ამავე ღროს, სრულიად ახალი. სიახლე იყო, მაგრამ არა მომაბეზრებელი. ყვაეილოვანი, მაგრამ არა დაშაქრული. ტევადობა ჰქონდა, ბრწყინვალე, მიშხიდველი, დიდებული, მუქ-ყავისფერი სიღრმე – ამასთანავე არც გადატვირთული იყო და არც მაღალფარდოვნების კვალი აჩნდა...

ბალდინი ლამის მოწიწების შეგრძნებით წამოდგა და კიდევ ერთხელ მიიტანა ცხვირსახოცი სახესთან. „შესანიშნავია, შესანიშნავი...“ – ბუტ-ბუტებდა და ხარბად ყნოსავდა. – “ხალისი იგრძნობა და მშვენიერია, როგორც კონტრაქტული! განწყობილებას გიმაღლებს... არა... რა სისულელეა!” – გაშმაგებით მოისროლა ცხვირსახოცი, შებრუნდა და კაბინეტის ყველაზე შორეულ კუთხეში გადაგა, თითქოს საკუთარი აღფრთოვანებისა შერცხვავო. სასაცილოა მსგავსი, სრულიად უადგილო მჭევრმეტყვევებები – *მელოდია. სიმშვენიერე. მხიარულება. ამაღლებული განწყობა...* – სისულელეა! ბავშვური ტიტინი! წამიერი შთაბეჭდილება, ძველი ცოდვა – ტემპერამენტის საკითხი. იქნებ, იტალიური ხასიათი. არასოდეს განსაჯო პირველი შთაბეჭდილებით! ოქროს წესი! ბალდინი, შე ბებერო ვირო! როდესაც ყნოსავ – დაყნოსე, განსჯით კი მერე განსაჯე! კი ბატონო, ეს „ამური და ფსიქა“ არცთუ ჩვეულებრივი სუნამოა. ფრიად შესანიშნავი ნამოქმედარი. ოღონდაც, მარჯვედ შეთითხნილი ნაკეთობა, თუ სიყალბეს არ ვიტყვით. არადა, ისეთი კაცისაგან, როგორც პელისიეა, სიყალბის გარდა რას უნდა

ელოდე! ისედაც ცხადია, პელისიესთანა ტიპი არც დაიწყებს ჩვეულებრივი, უფერული სუნამოს დიდი რაოდენობით წარმოებას. თაღლითს შეუძლია თვალებში ნაცარი შეგაყაროს, სურნელის ვითომდა სრული ჰარმონიულობით ყნოსვა ავირიოს... ბატკნის ტყავში გამოხვეული მგელი, კლასიკურ ხელოვნებაში გამძვრალი ეს გაიძვერა — მოკლედ, ნამდვილი ეშმა, ოღონდ ნიჭიერი, და ეს უარესია, ვიდრე ვინმე უნიჭო და უცოდინარი, რომელსაც თავისი უვიცობა ვერც კი შეუცვნია!..

ფრთხილად, ჯუხეპე, შენ მაინც ნუ მისცემ ნებას, ასე გაგაცურონ! შენზე ხომ მხოლოდ თავდაპირველად იმოქმედა ცრუ შთაბეჭდილებამ... ვინ იცის, რა მოუვა ამ სურნელს, ვთქვათ, ერთი საათის შემდეგ, როდესაც ქროლვადი სუბსტანციები აორთქლდება და მისი ძირგული არსი გამოვლინდება! ანდა დღეს საღამოს, როდესაც გაიგებ იმ მძიმე, მუქი კომპონენტების სურნელს, ჯერ-ჯერობით ბინდბუნდში რომ იმალებიან, სასიამოვნო ყვავილოვანი საფანელის ქვეშ? ჯერ შეიცადე, ბალდინი — ჯერ შეიცადე!

რიგით მეორე წესი გვაუწყებს: სუნამოები დროში ცოცხლობენ; მათ აქვთ თავიანთი სიყრმე, ახალგაზრდობა და სიბერე. თუ სამივე ხანს თანაბრად საამო სურნელს გამოსცემენ, მაშინდა მივიჩნევთ მათ ღირსეულად — განა არა, რამდენჯერ მომხდარა, ჩვენივე მომზადებული ნაზავი პირელ გასინჯვაზე მშვენიერ, ნორჩ სურნელს ავრცელებდა, ცოტა ხნის შემდეგ — დამპალი ხილისას, და საბოლოოდ, სრულიად აუტანელს — ეულ ციბეტინის სუნს... ეს იმიტომ, რომ უნებურად დოზას გადავამეტეთ... ციბეტინთან, საერთოდ, დიდი სიფრთხილეა საჭირო! ერთ ზედმეტ მისხალსაც კი შეუძლია დამანგრეველი შედეგი მოგვცეს. მუდმივი შეცდომა. ვინ იცის — იქნება პელისიემაც ვერ მოზომა ციბეტინი? საკლებით შესაძლებელია, საღამოთი ამ თქვენი ნაქები სუნამოდან მხოლოდ კატის შარდის ნაკვალევი დარჩეს! ვნახოთ, ვნახოთ.

ოღონდ ჯერ ისევ დავყნოსოთ. როგორც ბასრი ნაჯახი ჩეხავს ხის ნამორს პაწაწა ნაფოტებად, ისე ჩვენი ცხვირი დაშლის მას შემადგენელ ნაწილებად... აი, მაშინ აღმოჩნდება, რომ ეს ვითომდა ჯადოსნური სურნელი სრულიად ჩვეულებრივი, ძველთაგანვე ცნობილი ხერხითაა მიღებული. არ დაგავიწყდეთ, ბატონებო — მთელი ჩვენი ბალდინთა გვარი, შთამომავლობითი მენელსაცხებლები ვართ! ცინცხლად გავარკვევთ ამ მეძმარე პელისიეს ამბავს! ნიღაბს ჩამოვგლეჯთ მის ამაზრზენ სახეს და ამ ვითომც ნოვატორს დავუმტკიცებთ, რისი გაკეთება ძალუძს ძირძველ ხელობას! ჩვენ მის მოდურ სუნამოს გადავიღებთ, ჩვენივე ხელით შევქმნით მის ზუსტ ასლს, თანაც ისეთი სრული სინუსტით, რომ თვითონაც ვერ გამოარჩიოს საკუთარი ქმნილებისაგან... არაფერიც, ესეც არაა საკმარისი! ჩვენ უკეთესს შევქმნით. ჩვენ გამოვიკვლევთ მის შეცდომებს, და გამოვასწორებთ, და ამით აუწვევთ ყურს მაგ პელისიეს! დიახაც, ბ-ნო პელისიე, ბ-ნო შარლატონო, შე ვირთხა შენა, პარფიუმერობაც არ მომინდომა ამ მეძმარიათ?!

ახლა კი საქმე, ბალდინი! აბა შენ იცი, ცხვირი გაისუფთავე და ყნოსე, ყნოსე ყოველგვარი სანტიმენტების გარეშე! ხელოვნების ყველა წესის დაცვით დაშალე ეს ნაზავი და საღამომდე ფორმულაც ჩვენი იქნება!...

ბაღდინი ისევ საწერ მაგიდას მიეჭრა, უჯრიდან ქაღალდი, მელანი და სუფთა ცხვირსახოცი ამოალაგა, წინ დაიწყო ეს ყველაფერი და ანალიტიკურ ჯაფას შეუდგა; მთელი სამუშაო ის იყო, რომ ცხვირის წინ გაიტარებდა სუნამოთი დანამულ ცხვირსახოცს და მის ცხვირწინ ჩაქროლებული სურნელოვანი აურიდან ამა თუ იმ შემადგენელი ნაწილის ყნოსვით გამორჩევას ესწრაფვოდა; ამასთანავე, სურდა თავიდან აეცილებინა სუნის მთლიანობაში აღქმა – ცხვირსახოცს წამსვე სახიდან შორს იჭერდა გაწვილი ხელში და ახლად აღმოჩენილი ინგრედიენტის ქაღალდზე აღნუსხვას ცდილობდა. შემდეგ ისევ უნდა გაექნია ცხვირსახოცი, ჩასჭიდებოდა სურნელის სხვა ფრაგმენტს და ასე შემდეგ... ისევ და ისევ.

13.

თითქმის ორი საათი მუშაობდა ბაღდინი, შეუსვენებლად, უფრო და უფრო ენერგიული ხდებოდა მისი მოძრაობები, კალმის წრიპინი ქაღალდზე – სულ უფრო ნეკრასთენიული, სუნამოს დოზები, ცხვირსახოცს რომ აფრქვევდა და ცხვირთან მიჰქონდა – სულ მეტი და მეტი...

საქმე იქამდე მივიდა, უკვე სურნელებასაც ვეღარ არჩევდა. კარგა ხნის გაბრუებული იყო ეთერული სუბსტანციებით – იყნოსავდა, მაგრამ ვერც კი შეიგრძნობდა – არადა დასაწყისში ხომ ირწმუნა, შეუცდომლად გამოკვეთდა ყოველ მათგანს... უკვე ხვდებოდა, ყოველი შემდგომი მცდელობა უნაყოფო იყო. ვერასოდეს მიხვდება, რას წარმოადგენს ეს ახალმოღერი სუნამო, ყოველ შემთხვევაში, დღეს მაინც ნამდვილად ველარაფერს გაიგებს; კაცმა რომ თქვას, ვერც ხვალ გაიგებს ვერაფერს, თუნდაც, ღვთის წყალობით, მანამდე ყნოსვაც გაუწიავდეს... არადა, ვერა და ვერ ისწავლა ეს გამოყნოსვა, ყოველთვის ეზარებოდა ეს საქმე – არომატის დაშლა. ბოლოს და ბოლოს, რა ჰქვია ამას – მთელის დანაწილება, ანუ ასე თუ ისე იღბლიანად შედგენილი მთლიანის დაშლა უბრალო ფრაგმენტებად? არა, გმადლობთ, ვერაფერი სიკეთეა... ყოველ შემთხვევაში, ჩემგნით მაინც სრულიად საკმარისია, სრულიად საკმარისი.

ოღონდაც მისი ხელი მექანიკურად აგრძელებდა ათასჯერ გავარჯიშებული, ნატიფი ჟესტით მაქმანიანი ცხვირსახოცის სუნამოთი დანამვას, აქეთ-იქით ქნევასა და სახესთან გატარებას, თან ყოველ გაფრიალებაზე ასევე მექანიკურად ისრუტავდა არომატით გაჟღენთილი ჰაერის პორციას, რათა ხელოვნების ყველა წესის დაცვით, ჯერ შეეკავებინა სუნთქვა და შემდგომ, გახანგრძლივებული ამოსუნთქვით, ნარნარად გამოეშვა ნასუნთქი. ბოლოს და ბოლოს, თავად ცხვირმა გაათავისუფლა ამ წამებისაგან – ალერგიამ მოუარა და დაიბუშტა, გამოიტენა, თითქოს ფიჭით დაიცოო და ბაღდინის არა თუ რაიმეს დაყნოსვა, სუნთქვაც კი უჭირდა – აი ისე, მძიმე სურდოს დროს რომ იცის ხოლმე და თვალების კუთხეებშიც ცრემლი უდგებოდა. მადლობა ღმერთს! ახლა კი შეუძლია დამშვიდებული სინდისით შეწყვიტოს მუშაობა.

თავისი მოვალეობა ხომ შეასრულა, მოიმოქმედა ყველაფერი, რისი ძალაც შესწევდა, ხელოვნების ყველა წესის დაცვით და დამარცხდა, როგორც ეს უკვე არა ერთხელ მომხდარა. *Ultra fosse nemo obligatur.** ბასტა. ხვალე დილით პელისიესთან გააგზავნის ვინმეს ახალი ფლაკონისათვის, დააპკურებს გრაფ ვერამონის ბიუვარს და შეკვეთაც შესრულებული იქნება. მერე აიღებს ძველმოდური პომადებით, ნელსაცხებლებით, მალამოებით, საპნის ნაჭრებით სავსე თავის პატარა ჩემოდანს და წავა ვიღაც ბებრუხანა მარკიზებისა და მათი მეუღლეების სალონების შემოსავლელად; და ერთხელაც, უკანასკნელი გადამღძვალი მარკიუხასაც მიაბარებს სულს უფალს და ბალდინიც თავის უკანასკნელ კლიენტს დაკარგავს; და თავადაც გადაბერებული მოხუცი იქნება უკვე და ალბათ, საკუთარი სახლის გაყიდვა მოუწევს – პელისიესა თუ რომელიმე სხვა ახლადგამოჩეკილი ვაჭრუკანასათვის. დიდი-დიდი, აქედან რამდენიმე ათასი ლივრი დარჩეს; და წაიყოლებს თან რამდენიმე ჩემოდანსა და თავის ბებრუცანა ცოლს, თუ მანამდე ისიც არ მიიცვალა, და იტალიაში გაემგზავრება; ხოლო თუ ეს ხანგრძლივი მოგზაურობა გადაიტანა, იყიდის პატარა სახლს სოფელში, მესინას ახლო, სადაც ცხოვრება გაცილებით იაფია ვიდრე აქ; და იგი, ჯუშეპე ბალდინი, ოდესღაც პარიზის რჩეული პარფიუმერი, თუკი ამაზეც ღვთის ნება იქნა, საბოლოოდ მაინც სიღატაკეში განუტყევებს სულს... ასე რომ, ყველაფერი უკეთესობისკენ მიდის.

თავი დაუცო ფლაკონს, გადადო კალამი და უკანასკნელად მოიწმინდა ოფლი დანამული ცხვირსახოცით. მხოლოდ აორთქლებული ალკოჰოლის სიგრილე შეიგრძნო, სხვა არაფერი.

ბალდინი წამოიძვრა, ფარდები გადაწია და გახევებული მიაჩერდა დაისის სისხლისფერ ზოლს ლუერის გადაღმა და მის მქრქალ ანარეკლს კრამიტის სახურავებზე. ქვემოთ მდინარე ლაპლაპებდა, გემები კი გამქრალიყვნენ. მერე, ეტყობა, ქარმა დაუბერა, რადგან მდინარის ზედაპირს ჭავლი მოედო, ქერცლით დაიფარა, აქა-იქ აბრჭყვიალდა, სულ უფრო და უფრო ახლოს; თითქოსდა უზარმაზარმა ხელმა წყალზე მილიონობით ლუიდორი დააპნია და მდინარემაც, გეგონებოდათ, უკუღმა იწყო დენა – ბაჯალლო ოქროს მბრწყინავი ნაკადი ახლა ბალდინის მხარეს მოსრიდებდა...

რამოდენიმე ხანს ჩუმად იდგა; იდგა და ამ დიდებულ სურათს შეჰყურებდა სევდანარევი მზერით; მერე უეცრად გამოაღო ფანჯარა, დააფათა დარაბები და პელისიეს ფლაკონი, სუნამოს ნარჩენიანად, ქვევით მოისროლა. უყურებდა, როგორ დაებერტყა ფლაკონი წყალზე და წამიერად როგორ გაგლიჯა მზინვარე ხალიჩა...

ოთახში სუფთა ჰაერი შემოიჭრა. ბალდინიმ სული მოითქვა, შეიცადა, ვიდრე გასიებული ცხვირი მოუგრძნობიერდებოდა, ფანჯარა დახურა და თითქმის იმავე წამს დამეც ჩამოდგა. ოქროსფრად აბრჭყვიალებული მდინარე უცებ ფერფლისფერ-ნაცრისფერ სილუეტად გაიყინა. ოთახშიც ჩამობნელდა.

* ვერავის დაავალბ მის შესაძლებლობებზე მეტს (ლათ.)

ბაღდინი ისევ იმ პოზაში იდგა და ისევ მდინარეს მისჩერებოდა უძრავი მზერით. „არავისაც არ გავაგზავნი ხვალ პელისიესთან, – წარმოთქვა და ორივე ხელით ჩაეჭიდა სკამის სახურვეს, – არავის. არც სალონების შემოსავლელად წავალ. ხვალვე ნოტარიუსთან მივალ და სახლსა და სავაჭროს გავყიდი... დიახაც!“.

სახეზე ჯიუტი, ჭირვეული გამომეტყველება გაუჩნდა და უეცრად თავი ლამის ბედნიერად იგრძნო. ის ახლა ისევ ახალგაზრდა ბაღდინი იყო და ბედს გაბედულად ესროდა გამოწვევას – მერე და რა, რომ მოცემულ შემთხვევაში, ეს გამოწვევა უკან დახევას ნიშნავდა მხოლოდ – თუნდაც ასე იყოს! სხვა მაინც არაფერი დარჩენია. ეს ბრიყვეული დროება გამოსავალს აღარ უტოვებს. კეთილიცა და ავი დროებაც უფლის ნებითაა, მაგრამ მას სურს, რომ ცუდ დროებაში კი არ ვწუწუნებდეთ, კი არ მოვთქვამდეთ, არამედ ვიქცეოდეთ ისე, როგორც შეჰფერის კაცსა კაცობა... აკი მიმანიშნა – ეს სისხლისფერ-მოოქროსფერო მირაჟი ნაღდად გაფრთხილება იყო: მიდი, ბაღდინი, იმოქმედე, სანამ გვიან არაა! ჯერ კიდევ მტკიცეა სახლი შენი, ჯერ კიდევ საგსე გაქვს საკუჭნაობები, ჯერ კიდევ მოგცემენ რიგიან საფასურს შენი დაცემისაკენ მიმავალი საქმის საფასურად; გადაწყვეტილების მიღება ჯერ კიდევ შენზეა – მართალია, განა მესინას შეხიზნული სიბერე იყო შენი ცხოვრების მიზანი, მაგრამ ეგ მაინც უფრო ღირსეულია, ვიდრე პარიზში გადატაკება! დაე, იზეიმონ მათ – ყველა ამ ბრუე, კალტო და პელისიეებმა – დიახ, ჯუზეპე ბაღდინი ტოვებს ბრძოლის ველს, ოღონდ სჩადის ამას თავისი ნებით და ქედმოუხრელად!

ახლა ლამის ამაყობდა საკუთარი თავით და უკიდვანო შევებასაც გრძნობდა. პირველად მრავალი წლის განმავლობაში, ნაძალადევი თავზიანობის კრუნჩხვებმა, მუდმივად რომ უძაბავდა კეფას, სულ უფრო და უფრო დამამცირებლად რომ ხრიდა წელში, როგორც იქნა თავი ანება მის ბებერ მალეებს და მრავალი წლის შემდეგ პირველად გასწორდა ძალადაუტანებლად, განთავისუფლებული და გალადებული... შესუნთქული ჰაერი ახლა თავისუფლად გაუდიოდა ცხვირის ძგიდეებში, ახლა უკვე მკაფიოდ შეიგრძნობდა „ამურისა და ფსიქეას“ სურნელს, რომლითაც გაჯერებული იყო ოთახი, ოღონდაც ამჯერად ეს მისთვის სრულიად არაფერს ნიშნავდა. ჯუზეპე ბაღდინის ეყო ნებისყოფა, მკვეთრად ეცვალა თავისი ცხოვრება – ახლა ის ავა ზემოთ, მეუღლესთან და თავის გადაწყვეტილებას ამცნობს; მერე გადავა მდინარის მეორე ნაპირზე, ან პარიზის ღვთისმშობლის ტაძარს მიაკითხავს, სანთელს დაანთებს და მადლს შესწირავს უფალს იმ წარმოდგენილი სულიერი სიმტკიცისათვის, რითაც მან იგი, ჯუზეპე ბაღდინი დააჯილდოვა. ლამის ახალგაზრდული დარდიმანდობით შეისწორა პარიკი მელოტ ქალაზე, ლურჯი სერთუკი მოიცვა, ხელი სტაცა შანდალს, მაგიდაზე რომ იდგა და კაბინეტის კარი გამოიხურა. ის-ის იყო, სანთელი აანთო ზემოთ, საცხოვრებელი სათავსოებისაკენ კიბის გასანათლებლად, როდესაც ქვემოთ, პირველი სართულზე, ზარმა გაიჟღერიალა. ეს არ იყო მაღაზიის მთავარი შემოსასვლელის მელოდიური, სპარსული ზანზალაკი, არამედ უსიამო წკარუნი უკანა, შიკრიკებისა და მსახურებისთვის განკუთვნილ კართან, რომელიც მუდამ უშლიდა ნერვებს. რა ხანია აპირებდა ამ საძაგლობის მოშორებას და ახ-

ალი, უფრო სასიამოვნო ხმის მქონე ზარის შექმნას, მაგრამ ამგვარ ზედმეტ ზარჯს მაინც ერიდებოდა. ახლა კი – გაიფიქრა ბალდინიმ და უცებ ხითხითი აუტყდა – ახლა მისთვის სულ ერთია, სხვამ იზრუნოს, თვითონ კი ამ მომბეზრებელ ჟღარუნს სახლთან ერთად გაყიდის...

ზარმა ისევ გაიწკარუნა. ბალდინიმ მიაყურადა. შენეე, რა თქმა უნდა, უკვე წავიდა. ცხადია, არც მოახლე აპირებს დაბლა ჩასვლას. ბოლოს მაინც გადაწყვიტა, თავად გაეღო კარი.

ურდული გამოწია, მძიმე კარი გააღო და – ვერაფერიც ვერ დაინახა. გარეთ გამეფებულმა სიბნელემ სრულიად ჩაყლაპა სანთლის შუქი. მერე ძლივს გაარჩია ტანმორჩილი ფიგურა, ბავშვი, ანდა მოზარდი ბიჭუნა, ხელზე გადაკიდებული რაღაც ტვირთით.

– რა გინდა?

– მეტრ გრიძალმა გამომგზავნა, თხის ტყავები მოგიტანეთ, – თქვა ბიჭმა, უფრო ახლოს მოვიდა და ბალდინის იდაყვში მოხრილი ხელი გამოუწოდა, რომელზედაც ერთმანეთზე დაწყობილი დასტა ტყავები ეკიდა. სანთლის მერთალ სინათლეზე ბალდინიმ ბიჭუნას ეჭვიანად დადარაჯებული თვალები დალანდა; გვერდზე გადახრილი იდგა, თითქოს საკუთარ ხელს ეფარებო – ამ ბავშვივით, სულ რომ ელოდება, მცემენო.

ეს გრენუი იყო.

14.

თხის ტყავები, — გაიხსენა ბალდინიმ. რამდენიმე დღის წინ შეუკვეთა უთხელესი, ურბილესი ტყავი გრაფ ვერამონის ბიუვარისათვის, ცალი 15 ფრანკად. თუმცა ახლა აღარც სჭირდებოდა და შეეძლო ფული დაეზოგა. მეორეს მხრივ, თუ ტყავებს უკანვე დააბრუნებს... დაიწყებენ ყბელობას, ჭორი აგორდება: ბალდინი თურმე არასაიმედო გახდა, ბალდინის დამკვეთები აღარა ჰყავს... ეს კი ცუდია, ძალიან ცუდი; არა, მსგავსი ხმები სასტიკად დააგდებს მაღაზიის გასაყიდ ფასს! სჯობს, მაინც ჩავიბაროთ ეს უმაქნისი ტყავები. დროზე ადრე ვერავინ უნდა გაიგოს, ჯუზეპე ბალდინიმ თავისი ცხოვრება უკუღმა რომ დაატრიალა...

– შემო!

კარი გადარაზა და ისინი სახლის მეორე ნახევარში გავიდნენ, წინ – ბალდინი ანთებული სანთლით, უკან – გრენუი თხის ტყავებით მკლაფზე. გრენუი პირველად შედიოდა ისეთ ადგილას, სადაც სუნი ყოფის რაღაც დანამატი კი არ იყო, არამედ ალაღად იჩემებდა ყველაფრის მოთავებობას. რა თქმა უნდა, ყველა საპარფიუმერო თუ სააფთიაქო სავაჭრო იცოდა ქალაქში,

მთელი ღამეები იდგა ხოლმე ვიტრინების წინ, ცხვირით ეკვროდა კარებებში დარჩენილ ღრიჭოებს; იცოდა ყველა სურნელი, რითაც იქ ვაჭრობდნენ და ხშირად, თავის წარმოსახვაში, მათგან ქმნიდა საუკეთესო სუნამოებს. ასე რომ, ახალი მას აქ არაფერი ელოდა. მაგრამ ისევე, როგორც მუსიკალური ნიჭით დაჯილდოებული ბავშვი ოცნებობს, ახლოდან დაინახოს ორკესტრი, ანდა ეკლესიაში როგორმე ქორეღზე აძვრეს, ორღანის დაფარულ საბერველებთან, ისევე ეწადა გრენუის შიგნიდან ენახა იქაურობა და როგორც კი გაიგო, ბალდინისთან ტყავებია წასაღებო, ყველაფერი იღონა, მისთვის მიენდოთ ეს საპასუხისმგებლო საქმე.

და აი, დგას იგი ბალდინის მაღაზიაში, პარიზის ერთ ისეთ კუნჭულში, სადაც უმცირეს ფართობზე სურნელთა უდიდესი რაოდენობაა თავმოყრილი. სანთლის მკრთალ სინათლეზე ძალიან ცოტა რაიმეს თუ ხედავს და ისიც გაკვირით: დახლს და ზედ სასწორს, ყანჩებს შადრევნის თავზე, ღრმა სავარძელს კლიენტებისთვის, ღვნომუქ თაროებს კედლებზე, თითბრის ბზინვარე იარაღებსა და თეთრ ეტიკეტებს ჭიქებსა და ტიგელებზე. სურნელებაც ვერ შეიგრძნო იმაზე მეტი, რაც ქუჩიდანვე მოყნოსა. სამაგიეროდ, მაშინვე გაითავისა ის სერიოზულობა – ლამის წამოგვცდა, წმიდათაწმინდა სერიოზულობაო – რომელიც ამ კედლებში მეფობდა, ოღონდაც სიტყვა „წმიდათაწმინდა“ განათუ რაიმეს ნიშნავდა გრენუსათვის... მან რაღაც სხვა სერიოზულობა იგრძნო, ხელობის სიღინჯე, გამოზომილი თავდაჭერილობა, რომელიც ყოველი ნივთიდან, ავეჯის ყოველი ნაჭრიდან, ჭურჭლეულობიდან, და ბოთლებიდან, და ქოთნებიდან, და მენზურებიდან გამოსჭვიადა. და ვიდრე ბალდინის მიყვებოდა, ბალდინისავე ჩრდილში – ვინაიდან მეტრი სულაც არ იწუხებდა თავს, მისთვის გზა გაენათებინა – გრენუი იმ აზრმა შეიპყრო, რომ მისი ადგილი სწორედ აქაა და არა სხვაგან, რომ იგი დარჩება აქ, დარჩება სამუდამოდ, და მერე ყირამალა ააყირავებს მსოფლიოს!..

რადღა თქმა უნდა, ეს აზრი, პირდაპირ ვთქვათ, თავხედობამდე კადნიერი იყო. არათუ მიზეზი, საბაბიც კი არავითარი არ არსებობდა ეფიქრა ვინმეს, თითქოს შემთხვევით აქ მოხვედრილ, საეჭვო წარმოშობის, მფარველობამოკლებულ, არანაირი – თუნდაც მეტ-ნაკლებად მყარი მდგომარეობის მქონე დაბადის შეგირდს, მტკიცედ მოეკიდებინა ფეხი პარიზის ყველაზე ცნობილი მენელსაცხებლის მაღაზიაში; მით უმეტეს რომ, როგორც ჩვენთვის ცნობილია, ფირმის ლიკვიდაცია უკვე გადაწყვეტილი ამბავი იყო. ოღონდაც ლაპარაკია არა იმედზე, რომელიც გრენუის არცთუ თავმდაბალ აზრებში გამოიხატა, არამედ შედეგის გარდუვალობაზე – იცოდა, რომ მხოლოდ ერთხელ დასტოვებდა აქაურობას, რათა გრიმალისაგან თავისი ერთი ხელი ტანსაცმელი წამოეღო და მეტად – აღარასოდეს: ტკიპამ სისხლის სუნი იგრძნო. წლობით იმალებოდა საკუთარ მყიფე ჯავშანში გამოკეტილი და იცდიდა; ახლა კი მოსწყდა და ეცემა – ყოველგვარი იმედისმომცემი ინფორმაციის გარეშე. მაგრამ მით მეტი იყო მისი თვითდაჯერება.

ბალდინიმ უკანა სათავსოს კარი გამოადლო, მდინარის მხარეს რომ გადიოდა და საკუჭნაოს, სახელოსნოსა და ასე ვთქვათ, ლაბორატორიის მოვალეობას ერთდროულად ასრულებდა – ანუ სადაც საპონიც იხარშებოდა,

პომადებიც ითქვიფებოდა და მუცელგაბერილ ბოთლებში საყნოსავი სითხეების შერევაც ერთდროულად ხდებოდა.

– აქეთ! – თქვა და ფანჯარასთან მდგარ დიდ მაგიდაზე მიუთითა. — აგერ, აქ დააწყე!

გრენუიმ უჩუმრად გადაფინა ტყავები მაგიდაზე, სწრაფად დაიწია უკან და კარებთან აიტუხა. ბალდინი ცოტა ხანს გაუნძრევლად იდგა. სანთელი ოდნავ გვერდზე ჰქონდა გაწეული, რათა ცვილის არცერთი წვეთი არ დაცემულიყო მაგიდაზე და თითის წვერს ტყავის გარეთა პირზე ასრიალებდა. მერე გადააბრუნა და ახლა უკუღმა პირს გადაუსვა ხელი. *ძალიან კარგი ტყავია – გამრობისას თითქმის არც შეჯდება, და თუ სწორადაც გააუთოვებ, ასეთივე დამყოლი დარჩება და რბილი...*

მან ეს მაშინვე იგრძნო, როგორც კი ცერა და საჩვენებელ თითებში მოიქცია; ამ ტყავს შეეძლო ძალიან დიდხანს – ხუთი ან, შესაძლოა, ათი წელიც კი შეენახა სურნელი; იქნება ხელთათმანები გააკეთოს, მესინაში გასამგზავრებლად, სამი წვეტილი თავისთვის, სამიც მეუღლისათვის...

ხელი უკან წაიღო და გრძობამორეულმა მაგიდას გადახედა – ყველაფერი რიგით-რიგზე ეწყო: მინის პატარა აბაზანა არომატიზაციისათვის, მინისავე საშრობი ფირფიტა, როდინები ტინკტურის ასარეკად, ფილთაქვები, ფუნჯი, მაკრატელი. იფიქრებდით, ნივთებმა მხოლოდ მიიძინეს, სიბნელის ჩამოდგომასთან ერთად, დილით კი ისევ გაიღვიძებნო. იქნებ ეს მაგიდა წავვეყოლებინა მესინაში? და ზოგიც ყველაზე აუცილებლელი ხელსაწყო... გემრიელი ნამუშევარია – მუხის სქელი ფიცრებისგანაა დამზადებული – ჩარჩოც, უჯრებიცა და ფეხებიც... ამ მაგიდაზე არაფერი არ ქანაობდა და არ იქცეოდა, არ ეშინოდა არავითარი მჟავების, არავითარი ზეთებისა თუ ღანის დაკერის... გადავიტანოთ მესინაში? კარგა ძვირი კი დაგვიჯდება – თუნდაც ზღვით გააგზავნო! და ამიტომაც გაიყიდება ეს მაგიდა, ხვალვე გაიყიდება და ყველაფერი, რაც მასზეა, რაც მასშია, და რაც მის გვერდითაა, ასევე გაიყიდება! იმიტომ და რადგანაც, რომ ჩვენ, მეტრ ბალდინის, გულჩვილობის მიუხედავად, ხასიათი მაინც მტკიცე გვაქვს! და შევასრულებთ კიდევ ჩვენს გადაწყვეტილებას, რაოდენ მძიმეც უნდა იყოს ეს ჩვენთვის; თვალცრემლიანნი ვიტყვით უარს ყველაფერზე, მაგრამ მაინც ვიქმთ ამას, რაკილა ვიცით, რომ ეს ერთადერთი – დიახ, ერთადერთი სწორი გამოსავალია – დია-ახ!

ბალდინი წასასვლელად შეტრიალდა და მაშინღა შეამჩნია ეს წელში მოხრილი, კარებში გაჩხირული კაცუნა, რომლის არსებობა თითქმის გადაავიწყდა კიდევც.

– ძალიან კარგი, – თქვა მან. – შენს ოსტატს გადაეცი, ტყავი ძალიან კარგია და უახლოეს დღეებში შემოვივლი საფასურის გადასახდელად.

– გადაცემ, – უპასუხა გრენუიმ, – მაგრამ ადგილიდან არ დაძრულა, იდგა კარებში და გზას უღობავდა ბალდინის, რომელიც უკვე სახელოსნოს

დატოვებს ეპირებოდა. ბალდინი სახტად დარჩა, მაგრამ ყოველგვარი ეჭვის გარეშე. გრენუის მოქმედება მოკრძალებად მიიღო და არა თავხედობად.

– რაშია საქმე? – დაეკითხა, – კიდევ უნდა გადმომცე რამე? კარგი, ამოალაგე!

გრენუი თავდახრილი იდგა და შუბლსქვემოდან შეჰყურებდა დაძაბული, დადარაჯებული მხერით.

– თქვენთან მინდა ვიმუშაო, მეტრ ბალდინი. თქვენთან, თქვენს მაღაზიაში მინდა ვიმუშაო...

ეს თხოვნა კი არა, უფრო მოთხოვნას ჰგავდა, და არა წარმოთქმულს, არამედ გველის სისინივით გადმონთხეულს, მაგრამ ბალდინიმ გრენუის ეს დამზაფრავი თავდაჯერებულობა ახლაც ბავშვურ უმწეობად მიუთვალა და ალერსიანად გაუღიმა.

– შენ მეტყავის მოწაფე ხარ, შვილო ჩემო, მე კი ამგვარი სამუშაო არაფერი მაქვს. თანაც, საკუთარი შემწეები მყავს და შეგირდიც არა მჭირდება.

– აპირებთ ეს ტყავები სუნამოთი გაჟღინთოთ, მეტრ? ეს ტყავები, მე რომ მოგიტანეთ, გინდათ სუნამოთი გაჟღინთოთ? – გაიშრიალა გრენუიმ, ისე, თითქოს ბალდინის პასუხი არც გაუგიაო.

– კი, ასეა... და რა მერე?

– ჰელისიეს სუნამოთი? – ჩაიკითხა გრენუი და კიდევ უფრო დახარა თავი.

ბალდინის რაღაც კრუნჩხვისდაგვარმა დაუარა ტანში. არა იმიტომ, რომ თითქოს ეაზროს, საიდან იცის ამან ყველაფერი, არამედ იმიტომ, რომ ის საძულველი სუნამო გაახსენეს, რომლის შემადგენლობის გამორკვევასაც სწორედ ამ დილით ამოიღ ეცადა.

– და შენ გინდა თქვა, თითქოს მე ვიყენებდე იმ... სხვის სუნამოს, რათა...

– სუნი აგლით, - დაისისინა გრენიუმ. – შუბლზე გაცხიათ, და სერთუკის მარჯვენა ჯიბეში დანამული ცხვირსახოცი გიდევთ. არაფრად ვარგა, ეგ „ამური და ფსიქეა“, ძალიან ბევრი ბერგამოტი აქ, უფრო მეტი როზმარინი და მეტიმეტად ცოტა ვარდის ზეთი.

– აჰაა, – თქვა ბალდინიმ, ცოტათი დაბნეულმა, – კიდევ რა?

– ფორთოხლის ყვავილი, ტკბილი ლიმონი, მიხაკი, მუშკი, ჟასმინი, ღვინის სპირტი და კიდევ რაღაცა, სახელი არ ვიცი, ოღონდ აგერ გიდევთ, იქ – იმ ბოთლში! – და თითი გაიშვირა. ბალდინიმ შანდალი მიუმარჯვა ბნელ კუთხეს და მხერა ბიჭის საჩვენებელ თითს გააყოლა თაროსკენ, სადაც მონაცრისფრო-მოყვითალო ბალზამით სავსე მუცელგაბერილი ბოთლი იდგა.

– სტირაქსის ზეთი?

გრენუიმ თავი დაიქნია.

– დიახ, იქ, არი, შიგნით. სტირაქსის ზეთი, – ბნელიანივით მოიკაკვა და სულ ცოტა ათჯერ მაინც ჩაიბუტბუტა თავისთვის – *სტირაქსი – სტირაქსი – სტირაქსი – სტირაქსი...*

ბალდინიმ სანთელი მიუახლოვა ამ ადამიანის მსგავს არსებას და გაიფიქრა: ეს ან შეპყრობილია, ან მასხარა, ან თვითნაბადი ნიჭი... ვინაიდან არათუ სავარაუდო, უეჭველიც კია, რომ მისგან დასახელებული ნივთიერებიდან, სწორი შეთავსების შემთხვევაში, სავსებით შესაძლებელია იმ ავადსახსენებელი სუნამოს გამოყვანა! ვარდის ზეთი, მიხაკი და სტირაქსი – მთელი დღევანდელი დღე სწორედ ამ სამ კომპონენტს ეძებდა თავადაკლული; კომპოზიციის დანარჩენი ნაწილები კიდევ – და მას ეჩვენებოდა, რომ ისინი თავადაც გამოიცნო – ისე ესადაგებოდნენ ერთმანეთს, როგორც სალუქი, მრგვალი ტორტის სეგმენტები. მხოლოდ იმის გამოკვლევა იყო საჭირო, რა თანაფარდობით უნდა შეგეზავებინა. ამისთვის ბალდინის რამდენიმე დღე მოუწევდა ცდების ჩატარება – საზარელი სამუშაოა, გაცილებით უფრო ცუდი, ვიდრე შემადგენლობის იდენტიფიკაცია. საჭირო იყო აწონვა, და გაზომვა, და ჩაწერა, და თან სატანურად ყურადღებიანი უნდა ყოფილიყავი, ვინაიდან სულ უმცირეს გაუფრთხილებლობასაც კი – საწვეთურის აკანკალებას, ერთი ზედმეტი წვეთის ჩაღვრას – ყველაფერი წყალში შექმლო ჩაეყარა. არადა ყოველი ცდა, თუნდაც ფუჭი, დამზაფრავად ძვირი ჯდება. ყოველ ნახავს ერთი მოძვრო ქონების ფასი ადევს... და მას პატარა კაცუნას გამოცდა მოუნდა, მოუნდა გამოეკითხა მისთვის პელისიეს სუნამოს ზუსტი ფორმულა. თუ ის ამას მილიგრამის სიზუსტით გამოიცნობს, მაშინ ნამდვილად თაღლითია, როგორღაც რომ გამოსტყუა პელისიეს რეცეპტი, რათა ახლა მისი, ბალდინის ნდობა მოიპოვოს და მასთან მოეწყოს სამუშაოდ; ხოლო თუ დაახლოებით ამოიცნობს, მაშინ მართლა ყნოსვის გენიოსია და, როგორც ასეთი, მისი, ბალდინის, პროფესიონალურ ყურადღებას იმსახურებს. არათუ ბალდინი აპირებს ეჭვისქვეშ დააყენოს საკუთარი გადაწყვეტილება საქმიდან ჩამოშორების თაობაზე – ლიტრობითაც რომ იშოვოს ეს სუნამო, ბალდინი არც იფიქრებს იმითი გრაფ ვერამონის ბიუვარის გაჟღენთვას, მაგრამ... იმისათვის ხომ არ ხდება კაცი პარფიუმერი, იმისათვის ხომ არ ახავებს მთელი ცხოვრება სუნამოებს, ერთ წამში დაკარგოს მთელი თავისი პროფესიული ჟინი! ახლა მას იმ წყეული სუნამოს ფორმულის შეცნობის სურვილი არ აძლევდა მოსვენებას და უფრო მეტიც — ამ უცნაური ბიჭის ნიჭიც სურდა გამოეკვლია, უნდოდა გაეგო, რა იმალებოდა ყოველივე ამის უკან... უბრალო ცნობისმოყვარეობის ამბავია, სხვა არაფერი.

– კარგა მახვილი ყნოსვა გქონია... – წარმოთქვა მას შემდეგ, რაც გრენუიმ ეს თავისი სისინი შეწყვიტა და უკანვე შებრუნდა სახელოსნოში, რათა შანდალი ფრთხილად დაედგა თავის ადგილას.

– საუკეთესო ყნოსვა მაქვს მთელს პარიზში, მეტრ ბალდინი, – ამოიქმინა გრენუიმ. – ყველა სურნელი ვიცი, ყველა, რაც კი პარიზშია, ოღონდ

ზოგიერთების დასახელება არ ვიცი, მაგრამ შემიძლია ვისწავლო, სუყველა – ბოლოს და ბოლოს, რამდენი იქნება, რამდენიმე ათასი, ყველას ვისწავლი, ამ ბალზამის სახელიც აღარ დამავიწყდება – სტირაქსი; ამას ჰქვია სტირაქსი, სტირაქსი...

– ჩუმად! – შეუყვირა ბალდინიმ, – როცა გელაპარაკები, ნუ მაწყვეტილებ! თავხედი ხარ და ჭიფხია – არა ადამიანმა არ შეიძლება იცოდეს ყველა სურნელი მათი დასახელების მიხედვით. მეც კი არ ვიცი ათასი დასახელება, მხოლოდ რამდენიმე ასეული, რადგან ჩვენს ხელობაში მაგაზე მეტი არცაა; ყველა დანარჩენი სუნი კი არა – სიმყრალეა!

გრენუი, რომელიც თავისი მჭევრმეტყველების ამ მოულოდნელი ამოფრქვევის დროს ლამის წელში გასწორდა და აღელვებული, ხელების ქნევასა და ჰაერში წრეების გამოხაზვას მოჰყვა, რათა ეჩვენებინა როგორ იცის „სუყველაფერი ყველაფერი ყველაფერი“ – როგორც კი ბალდინის მკვახე პასუხი გაიგონა, წამსვე თავი ჩაღუნა, მოიბუზა, პატარა, შავ გომბე-შოდ იქცა, უძრავად გაიყინა ზღურბლთან და შეეცადა, საკუთარი მოუთმენლობა დაეფარა.

– თავად მე, – თავისას განაგრძობდა ბალდინი, – რაღა თქმა უნდა, ადრევე მიეხვდი, რომ „ამური და ფსიქეა“ სტირაქსის, ვარდის ზეთის, მიხაკის, ბერგამოტის, როზმარინის ექსტრაქტისაგან შედგება. ამის დასადგენად, როგორც იტყვიან, მახვილი ყნოსვა უნდა გქონდეს. სრულიად შესაძლებელია, ღმერთმა შენც დაგაჯილდოვა ამ ნიჭით, როგორც ბევრი, ბევრი სხვა შენს ასაკში; ოღონდ ჭეშმარიტი პარფიუმერისთვის – აქ მან თითი იშვირა ჭერისკენ და გაიბრიქა – ეს ღირსება სრულიადაც არაა საკმარისი! მისთვის აუცილებელია წლობით ნაგარჯიშევი, შეუმცდარად მომუშავე ყნოსვითი ორგანო, რომელიც ნებას მისცემს, უყოყმანოდ გამოიცნოს ყველაზე რთული არომაც კი – მისი შემადგენლობა და წილთა შეფარდებები, და ამასთანავე, სურნელთა სრულიად ახალი, უცნობი ნაზავებიც შექმნას... ასეთი ცხვირი – და მან ახლა საკუთარ კეხზე მიიკაკუნა თითი – თავისით არ მოგეცემა, ყმაწვილო! ამგვარი ცხვირი მუყაითობით და მოთმინებით უნდა გამოწვრთნა; იქნება შევიძლია აქვე, ახლავე დამისახელო ემაგ სუნამოს ზუსტი ფორმულა? აბა – შესძლებ?

გრენუი არ პასუხობდა.

– იქნებ დაახლოებით მაინც? – ჩაეძია ბალდინი და კისერი წაიგრძელა. – თუნდაც მიახლოებით, ზოგადი სახით? აკი საუკეთესო ყნოსვა მაქვს მთელს პარიზშიო!

გრენუი ისევ ჩუმად იდგა.

– აი, ხომ ხედავ, – ჩაილაპარაკა ბალდინიმ კმაყოფილებითა და თან, მცირეოდნავ, იმედგაცრუებით, – არ იცი, რა თქმა უნდა, არ იცი! ან საიდან უნდა იცოდე... მხოლოდ ერთი იმათგანი ხარ, ვინც სადილის დროს არკვევს რა არის კერძში – ოხრაზუში თუ სხვა რამ საკმაზი. რას იზამ, ეგეც რამეა.

მაგრამ მზარეულობისაგან ჯერ შორსა ხარ. ყოველ ხელოვნებაში და ხელობაშიც – კარგად დაიმახსოვრე ეს, ვიდრე აქედან წახვალ – ნიჭი თითქმის არაფერს ნიშნავს, მთავარია გამოცდილება, რომელსაც მხოლოდ თავმდაბლობითა და მუყაითობით იძენს კაცი!

ის უკვე შანდლის ასაღებად გაიწია, როდესაც კარების მხრიდან გრენუის ხმამ გაიშრიალა:

– არ ვიცი რას ნიშნავს *ფორმულა*, მეტრ; ეგ მე არ ვიცი, სხვა – რაც გნებავთ...

– ფორმულა – მკაცრად გაეპასუხა ბალდინი, – ესაა ნებისმიერი სუნამოს ალფა და ომეგა, ესაა მითითება, როგორი თანაფარდობით უნდა შევაზავოთ სხვადასხვა შემადგენლები იმ ერთადერთი, განუმეორებელი, სასურველი სურნელის მისაღებად – აი რა არის ფორმულა, ანუ იგივე რეცეპტი – თუკი ეს სიტყვა უფრო ნაცნობია შენთვის.

– ფორმულა, ფორმულა, – ხრინწიანი ხმით ჩაილაპარაკა გრენუიმ, – არ მჭირდება მე არავითარი ფორმულა. თუ გნებავთ, შეგიზავებთ. გნებავთ, მეტრ? შევაზავო?

– ეგ როგორ?! – იმაზე ხმამაღლა წამოიძახა ბალდინიმ, ვიდრე შეეფერებოდა და უნებლიე მკვეთრი მოძრაობით სანთელი სახესთან მიუტანა, – როგორ თუ – შევაზავო?

გრენუის, პირველად ამ საღამოს, წარბიც არ შეუხრია.

– ისინი ხომ სულ აქ არიან, ის სურნელები, რაც კი საჭიროა; ისინი ყველანი აქ არიან, ამ ოთახში, – და მან კიდევ ერთხელ ატაკა თითი სიბნელეს. – ვარდის ზეთი ეგერაა, იქ კი – ფორთოხლის ყვავილი! აი იქ – მიხაკი! იქით კიდევ – როზმარინი!

– რა თქმა უნდა აქაა, ბრიყვო! – იკვილა მოთმინებაგაღეულმა ბალდინიმ, – ყველა აქაა! მაგრამ რა ხეირი, თუ ფორმულა არ იცი!

– აგერ ჟანსმინია! აგერ ღვინის სპირტი! აგერ – სტირაქსი! – ჩახლეჩილი ხმით განაგრძობდა ჩამოთვლას გრენუი და ყოველი სახელწოდების დასახელებზე ოთახის ამა თუ იმ კუთხისაკენ იშვერდა ხელს, იქ კი ისეთი სიბნელე იდგა, ბოთლებით სავსე თაროების კონტურიც ძლივას მოჩანდა.

– ახლა არ მითხრა, სიბნელეშიც კატასავით ვხედავო, – ლამის წყობიდან გამოვიდა ბალდინი, – შენ არა მარტო ყველაზე მახვილი ყნოსვა გქონია, ყველაზე მახვილი მხედველობაც მთელს პარიზში, ეგრუა? თუ ამასთან ერთად კარგი სმენაც გაქვს, მაშინ ყურები ცქციტე და ერთ რამეს გეტყვი: პატარა კი არაა, დიდზე-დიდი ცრუპენტელა ყოფილხარ. ალბათ რაღაც დასცინცლე პელისიეს, რაღაცა დაუნახე, ასეა? და თვლი, რომ ახლა შეგიძლია მეც თითზე დამიხვიო?

ამჯერად გრენუი სრულიად გამართული იდგა კარებში, სრულის სიმაღლით, ასე ვთქვათ, და ოდნავ ფეხებგადგმული, ხელებგაშლილი, რაღაც გიგანტურ შავ ობობას გავდა, კარის ჩარჩოს ჩაბლაუჭებულს...

– მომეცით ათი წუთი, – ახლა უკვე დინჯად წარმოთქვა მან. – და დაგიმზადებთ მაგ სუნამოს. პირდაპირ ახლა, აქ, ამ სათავსოში.

– შენა გგონია, უფლებას მოგცემ ჩემს სახელოსნოში იტრიალო? ეგ ესენციები, რომ უყურებ, მთელი ქონება ღირს!

– ვიცი, – თქვა გრენუიმ.

– ოპო-პო! – ბალდინის მოულოდნელობისაგან სუნთქვაც კი შეეკრა, მერე ერთი ღრმად ამოისუნთქა, სული მოითქვა და ამ უბედურს ხანგრძლივი, დაფიქრებული მზერა მიაპყრო. “არსებითად, განა სულერთი არაა? – ფიქრობდა იგი, – ასე თუ ისე, მაინც ყველაფერი მორჩა და გათავდა! რა თქმა უნდა, ეს ღვთის გლახა ვერაფერსაც ვერ შეახავებს, მსგავს რამეს თვით დიადი ფარფიპანიც კი ვერ შესძლებდა... მაგრამ რატომ თავადვე არ დავრწმუნდე? ერთიც ვნახოთ და მესინაში რომ ვიქნები, ეჭვი გამიჩნდეს (მოხუცებს ხანდახან უცნაური ეჭვები უჩნდებათ ხოლმე), რომ ჩემი შანსი გავუშვი ხელიდან, ვერ შევიცანი ვუნდერკინდი, გენიოსი, ღვთივმადლცხებული არსება... არა, გამორიცხულია. საღი გონებით თუ განვსჯით – სრულიად გამორიცხული... მაგრამ სასწაულებიც ხომ ხდება? უდავოდ ხდება და სასიკვდილო სარეცელზე ამ ფიქრმაც ხომ შეიძლება გამტანჯოს: იმ საღამოს, პარიზში, სასწაული მოგვევლინა, ჯუზეპე – შენ კი თვალები დახუჭე! უმჯობესია ამ სულელმა მაგიდაზე რამოდენიმე წვეთი ვარდის ზეთი თუ მუშკის ნაყენი დაღვაროს – შენც ხომ დაღვრიდი, ბოლოს და ბოლოს – ჯერ კიდევ რომ გაინტერესებდეს პელისიეს სუნამოები... ან რას ნიშნავს რამდენიმე წვეთი – დიან, ძვირია, ძალიან, ძალიან ძვირი – მაგრამ განა ცოდნის საიმედოობასა და მშვიდ სიბერესთან შედარებით!”

– მისმინე! – წარმოთქვა განგებ გამკაცრებული ხმით. – მისმინე! მე... მართლა, რა გქვია?

– გრენუი, ჟან-ბატისტ გრენუი.

– აჰა, – თქვა ბალდინიმ, – მაშ ასე, მისმინე, ჟან-ბატისტ გრენუი! გადავიფიქრე. შესაძლებლობას გაძლეე ახლავე, დაუყოვნებლივ, საქმით დამიდასტურო ის, რასაც სიტყვით ამტკიცებ. ამასთანავე, ამით საშუალება მოგეცემა, სამარცხვინო მარცხის გზით ისწავლო თავმდაბლობა – ანუ ღირსება, შენს ნორჩ ასაკში ჯერ განუვითარებელი, ოღონდაც უცილობელი წინაპირობა მომავალი შესაძლო წარმატებისათვის – როგორც საზოგადოების წევრის, როგორც ადამიანის, როგორც კეთილი ქრისტიანის! ჩემდათავად, მზადა ვარ საკუთარ ხარჯზე მოგცე ეს გაკვეთილი, რადგან მიზეზთა გამოსსხვათა და სხვათა, ახლა გულუხვობის გამოსაჩენად ვარ განწყობილი და ვინ იცის, იქნებ ოდესმე ამ ამბის მოგონებამ კიდევ გამახალისოს... ოღონდ ნუ იფიქრებ, თითქოს ჩემი გაცურება მოახერხე! ბებერი ბალდინის ცხვირს

ყნოსვა ჯერ კიდევ მახვილი აქვს, საკმარისად მახვილი, რათა სულ უმცირესი განსხვავებაც კი გამოყნოსოს შენს ნაცოდვილარსა და ამ პროდუქტს შორის!
– ჯიბიდან პელისიეს სუნამოთი გაჟღენთილი საკუთარი ცხვირსახოცი ამოაძვრინა და გრენუის ცხვირწინ დაუქნია, – ერთი აქეთ მობრძანდი, მაგი-
დასთან მობრძანდი და გვიჩვენე, რისი მაქნისი ხარ! ოღონდ იცოდე, არაფერი
გადამიყირავო აქ და არ გამიტეხო! და საერთოდ, უჩემოდ ხელიც არ ახლო
არაფერს... ჯერ მეტ სანთლებს დავანთებ, ჯერ ჩვენ პატარა ილუმინაციას
მოვაწყობთ ამ პატარა ექსპერიმენტის საპატივცემლოდ, ასე არ ჯობია?

ამ სიტყვებით მუხის მაგიდიდან ორი შანდალი აიღო და სანთლები აანთო.
შანდლები მაგიდის თავსა და ბოლოში განალაგა, შემდეგ ტყავები მისწი-
მოსწია და შუაგული გაათავისუფლა. მშვიდი, მაგრამ ამავე დროს სწრაფი
მოძრაობებით პატარა თაროდან ჩამოიღო ცდისათვის საჭირო ხელსაწყოები:
ღიპიანი ბოთლი, მინის ძაბრი, საწვეთური, პატარა და დიდი საწყაო და ყვე-
ლაფერი ეს წინ, მუხის ხის ზედაპირზე, სანიმუშო წესრიგით ჩამოიმწკრივა...

ბალდინის მთელი ამ მაღალფარდოვანი მონოლოგიდან გრენუიმ მხოლოდ
თანხმობა გაიგო, მხოლოდ ნებართვა და იმ ბავშვის შინაგანი ზეიმით, რო-
მელმაც თავისი სიჯიუტით რაღაც დათმობას მიაღწია, და რომელსაც
მიუფურთხებია ამ თანხმობასთან დაკავშირებული შეზღუდვების, პირობებისა
თუ რაღაც გაუგებარი დიდაქტიკური შეგონებისათვის, პოზაც თავისუფალი
გაუხდა, მოძრაობაც – შეუზღუდავი; პირველად დაემსგავსა პირუტყვზე
მეტად – ადამიანს. გულთან ახლოსაც არ გაატარა ბალდინის მონოლოგში
ჩართული ჭკუისსწავლება – მიხვდა, სძლია მას და ვერაერთარ წინააღმდე-
გობას იგი უკვე ვერ გაუწევდა.

ვიდრე ბალდინი მაგიდას უტრიალებდა, გრენუი ძვირფასი ესენციებით,
ზეთებითა და ბალზამებით დატვირთულ თაროებთან გასხლტა, საკუთარი
ცხვირის ურყევ ყნოსვას მიჰყვა და თაროებიდან სასწრაფოდ ჩამოხვეტა
მისთვის საჭირო ფლაკონები – რიცხვით ცხრა: ფორთოხლის ყვავილის ეს-
ენცია; ლიმონის ზეთი, მიხაკის ზეთი და ვარდის ზეთი; ჟანსმინის, ბერგა-
მოტის, როზმარინის ექსტრაქტები და სტირაქსის ბალზამი; ბოლოს კი მთელი
ბოცა მაღალპროცენტიანი ღვინის სპირტი მოათრია. მერე დადგა ბალდინის
ზურგს უკან (ის ჯერ კიდევ თავშეკავებული პედანტურობით აწყობდა სუნა-
მოს მოსამზადებლად საჭირო ჭურჭელს მაგიდაზე – ოდნავ გვერდზე
გასწევდა ერთ ჭიქას, ოდნავ მოსწევდა მეორეს – რათა ყველაფერს კეთილი,
ძველთაგანვე შემოდებული მართლწესრიგი დატყობოდა და რაც შეიძლება
შთამბეჭდავად ებრჭყვიალა სანთლების შუქზე) და მოუთმენლობისაგან
კანკალატანილი ელოდა, თავად მოხუცი როდის გაიწევდა გვერდზე და რო-
დის დაუთმობდა ადგილს.

– ესეც ასე, – როგორც იქნა, აღმოთქვა ბალდინიმ და განზე გადგა – აქ
ყველაფერია, რაც შეიძლება დაგჭირდეს შენი... თავაზიანობის გამო, მოდი
მას „ექსპერიმენტი“ ვუწოდოთ – არაფერი გამიტეხო, არაფერი დამიღვარო!
გაითვალისწინე: ეს სითხეები, ახლა რომ უფლება გეძლევა ისარგებლო,
ისეთი იშვიათობაა თავისთავად, ასეთი ნაჯერი სახით მათ ხელში ვედარა-
სოდეს მოიგდებ!

– რამდენი გაგიკეთოთ, მეტრ? – ისევ შეაწყვეტინა გრენუმი.

– რამდენი – რა? – დაეკითხა ბალდინი, ეგონა რაღაც მომეყუარო.

– რამდენი სუნამო? – ხრინწიანი ხმით უპასუხა გრენუმი. – რამდენი გჭირდებათ? გნებავთ პირამდე გაგივსებთ აკერ იმ მათარას? – და მან დაახლოებით სამი ლიტრის ტევადობის შესარევ ჭურჭელზე მიუთითა.

– გაგიჟდი? – წამოიყვირა შეძრწუნებულმა ბალდინიმ, და ამ ყვირილში ის შიშით იყო, ისევე ღრმად ფესვგადგმული, როგორც თაობებით შთანერგილი შიში მფლანგველობის წინაშე – შიში საკუთრებასა ზედა... მაგრამ შემდეგ, თითქოს ამ მამხილებელი ყვირილისა შერცხვაო, ჩაახველა და ჩაიბურტყუნა:

– ნუ მაწყვეტინებ-მეთქი სიტყვას! – მერე თავი დაიწყნარა და ხმაში ოდნავ ირონიარეულმა გააგრძელა:

– რაში გვჭირდება ჩვენ სამი ლიტრი სუნამო, რომელსაც არცერთი არ ვაფასებთ? არსებითად, ნახევარი მენზურაც კი საკმარისია, ხოლო რადგანაც ასე მცირე რაოდენობის შერევა გარკვეულ სიმჩელეებთანაა დაკავშირებული, ნებას გაძლევ ეგ ჭურჭელი, ვთქვათ, ერთ მესამედამდე შეავსო.

– როგორც მიბრძანებთ, მეტრ, – თქვა გრენუმი. – ოღონდ ამას ჩემებურად გავაკეთებ. არ ვიცი როგორ კეთდება ეს წესის მიხედვით, მე წესები არ მისწავლია, ჩემებურად კი გავაკეთებ.

– შენი ნებაა! – დაეთანხმა ბალდინი. იცოდა, ამ საქმეში არ არსებობს „ჩემებურად“ და „შენებურად“, არსებობს მხოლოდ ერთი, ერთადერთი სწორი ხერხი: იცი ფორმულა და სუნამოს მოცემული რაოდენობიდან გამომდინარე, აუცილებლად უნდა გააკეთო შესაბამისი გამოთვლები და სხვადასხვა ესენციებიდან კონცენტრატის მკაცრად განსაზღვრული რაოდენობა დაამზადო, რომელიც შემდგომში, ზუსტი პროპორციით, რაც ჩვეულებრივ ერთი/ათთან და ერთი/ოცთან შორის მერყეობს, ალკოჰოლს უნდა შეურიო, ვინემ საბოლოო პროდუქტამდე. არავითარი სხვა ხერხი, მან ეს ზედმიწევნით იცოდა, არ არსებობდა. სწორედ ამიტომ, ის რაც იხილა და რასაც შეეყურებდა ჯერ დაცინვითა და უნდობლობით, შემდეგ კი ძრწოლვით და საბოლოოდ, მხოლოდ უილაჯო გაოცებით, მას მხოლოდ სასწაულად ეჩვენა და ეს სცენა ისე ჩაედამლა მახსოვრობაში, სიცოცხლის ბოლომდე არ დავიწყებია.

ჯერ იყო და გრენუიმ სპირტიან ბოცას მოხდა საცობი; ძლივ-ძლივობით ასწია თითქმის თავის სიმაღლეზე, მინის ძაბრიან შესაზავებელს უსწორა და ალკოჰოლი ყოველგვარი მენზურის გარეშე, პირდაპირ ჩაუშვა შიგ. ბალდინის ლამის წონასწორობა დააკარგვინა ამ ყოვლად აღმაშფოთებელმა უძწეობამ: იმას გარდა, რომ ყმაწვილმა ყირამალა დააყენა მენელსაცხებლეთა მთელი მართლწესრიგი – ანუ დაიწყო გამხსნელი საშუალებიდან, როდესაც ჯერ მზად არ ჰქონდა განზავებას დაქვემდებარებული კონცენტრატი – მას სულ უმცირესი ფიზიკური მონაცემებიც კი არ გააჩნდა! დაძაბულობისაგან სახეწა-მოჭარხლებული გრენუის შემხედვარე ბალდინი განწირულივით ელოდა, მძიმე ჭურჭელი აგერ-აგერ დაეხეთქება მაგიდის კიდეც და ყველაფერს დაამსხვევს და დაფანტავს, რაც კი ზედ ალაგიაო. “სანთლები, – ფიქრობდა – უფალო, ოღონდ ეგ სანთლები არ გადაუყირავდეს! ააფეთქებს აქაურობას, მთელ სახლს გადამიწვავს!” — უკვე მაგიდასთან მივარდნას აპირებდა, ამ შეშლილისათვის ჭურჭლის წაგლეჯა უნდოდა ხელიდან, რომ გრენუიმ თავადვე შშვილობიანად დაუშვა იატაკზე და თავიც დაუცო. შესაზავებელ ჭურჭელში მსუბუქი, გამჭირვალე სითხე ლივლივებდა – წვეთიც არ ასცდენია ძაბრს. რამდენიმე წამს გრენუი ისეთი კმაყოფილი სახით ითქვამდა სულს, თითქოს ყველაზე მძიმე სამუშაო უკან დარჩაო. და მართლაც, მერე ისეთი სისწრაფით აკეთებდა ყველაფერს, ბალდინი ძლივს ასწრებდა მანიპულაციათა რიგითობის, ან თუნდაც საერთო თანამიმდევრობის შემჩნევას, ხოლო თავად პროცესის გააზრებაზე ხომ – ლაპარაკიც ზედმეტია.

ისეთი შთაბეჭდილება რჩებოდა, გრენუი ალაღბედზე ტაცებდა ხელს ამა თუ იმ ესენციიან ფლაკონს, მინის საცობს აძრობდა, ერთი წამით მიიტანდა ცხვირთან, შიგთავს დაყნოსავდა, მერე გამობერტყავდა ერთიდან, ჩამოაწვეთებდა მეორედან, გადმოღვრიდა მესამედან მინისავე ძაბრში... საწვეთურს, სინჯარას, კოვზს, შემრევს – ყველა იმ სამარჯვე მოწყობილობას, რომელიც საშუალებას აძლევს ნებისმიერ მენელსაცხებლეს, შეზავების რთულ პროცესს დაეუფლოს, გრენუი ერთხელაც არ მიკარებია. იმ ბავშვივით ერთობოდა, წყალს, ბალახ-ბულახსა და ტალახს რომ ეჩალიჩება, და ატყვლაპუნებს, და აჭყაპუნებს, და ამხაპუნებს, მოკლედ – რაღაც საზიზღრობას თითხნის და მერე ამაყად აცხადებს – შეჭამანდი მოვაშხადეო. “დიახ, დიახ, სწორედ რომ ბავშვივით!” — ფიქრობდა ბალდინი — “დაკორძილი ხელების, ნაიარევი-ნაყვავილარი სახისა და ბებრულად გაბუშტული ცხვირის მიუხედავად, მაინც ბავშვურად გამოიყურება; ადრე უფრო ასაკოვანი მეჩვენა, ახლა კი გაცილებით უმცროსი მგონია; თითქოს ორდება, ან სამდება, როგორც ის მიუწვდომელი, შეუცნობელი, ჭირვეული პატარა არაკაცები, რომლებიც თითქოსდა ყველა ქვენა ზრახვების გარეშე, მხოლოდ საკუთარ თავზე ფიქრობენ, ოღონდ სურვილი კი აქვთ, ყველა და ყველაფერი დაიმორჩილონ ამქვეყნად! და შესძლებენ კიდევაც, თუ მათი განდიდების მანია არ შეზღუდე, თუკი უმკაცრესი აღმზრდელივითი ზომების წყალობით სრულფასოვანი ადამიანების თავმოთოკილ არსებობას არ მიაჩვიე. სწორედ ასეთი პატარა ფანატიკოსი უნდა ბუღობდეს ამ კაცუნაში: დგას მაგიდასთან, თვალვანთებული, ყველაფერი დავიწყებია გარშემო, ვერც ამჩნევს, მის გარდა კიდევ

ვინმე თუა სახელოსნოში, მასსა და იმ ფლაკონებს გარდა, რაღაც მარდი მოუხეშავობით რომ მიაქვს ძაბრთან, რათა ეს თავისი ბრიყვეული თხლე შეაზავოს, მერე კიდევ ეჭვმიუტანლად ამტკიცოს და თავადაც დაიჯეროს, რომ ნატიფი სუნამო შექმნა...” – სანთლების მოციმციმე სინათლეზე ხედავდა ბალდინი, როგორ ცინიკურად და თავდაჯერებით მოქმედებდა ეს კაცუნა და ზიზღისაგან ჟრუნტელი უვლიდა. “მაგისტანები, – გაიფიქრა მან და ისევ ის ძველი წუხილი და უიმედობა დაეუფლა – მაგისტანები ადრე არ იყვნენ; ადამიანთა მოდგმის რაღაც სრულიად ახალი ეგზემპლარია... ასეთნი მხოლოდ სრული დამყაყების, მოდუნებულ, მიხრწნილ ეპოქაში შეიძლება იშვან... მაგრამ ჭკუა მაინც ხომ უნდა ვასწავლოთ ამ ლაწირაკს! ოღონდ, ჯერ მორჩეს... მერე კი იცოცხლე, მიიღებს საკადრისს! ეგ აქედან ოთხზე გაფოფხდება, არარაობა ეგა! დღესდღეობით საერთოდ არ შეიძლება ვინმესთან საქმე დაიჭირო, ვინდა არ ირევა გარშემო!” – ბალდინი იმდენად იყო გულგასიებული ჟამთა სიავის გამო, უცბად ვერც კი იაზრა, რატომ დაუცო გრენუიმ ყველა ფლაკონს თავი, რატომ ამოიღო შესარევიდან ძაბრი, ხოლო თავად ბოთლს ხელი სტაცა ყელში, მარცხენა ხელისგული დააფარა და კარგად შეანჯღრია. მხოლოდ მაშინ, როდესაც მისი ძვირფასი შემადგენლობა ლიმონათივით გაქანდა მუცლიდან ყელისაკენ და ისევ უკან, ბალდინის მრისხანებისა და შეძრწუნების რაღაც ხავილი აღმოხდა: „გეყო, გეყო-მეთქი!” – და ხრინწიანი ხმით დააყოლა – “საკმარისია, საკმარისი – ახლავე დადგი ბოთლი მაგიდაზე და ხელი აღარაფერს ახლო, აღარაფერს! ვატყობ, სულ დავკარგე ჭკუა, შენს სულელურ ლაყობას რომ ავყევი! დიახაც, ნივთებთან მოპყრობის შენეული მანერა, უხეშობა, შენი პრიმიტიული სიბრიყვე გვიჩვენებს, რომ საერთოდ არაფერი გესმის ამ საქმეში, ბარბაროსი ხარ და უვიცი, და ამასთანავე, გვარიანი თავხედიც! უბრალო ძირტკბილას ნაყენის კეთებაც კი არ უნდა მოგანდოს კაცმა! კმაყოფილი, და გახარებული, და მადლობელი უნდა იყო, შენი პატრონი რომ სათრიმლავ სითხეებთან მაინც გიშვებს!..“

ამას გაიძახოდა ბალდინი, და ვიდრე მორჩებოდა, ჰაერი მის გარშემო რაღაც ნაცნობი სურნელით გაივსო...

გრენუიმ დადგა ბოთლი, სველი ხელი კი ქურთუკის კალთაზე შეიწმინდა. ერთი, მერე ორი ნაბიჯი უკან, უხერხული თავის დაკვრა, ბალდინის ლანძღვა-თათხვის სეტყვის ქვეშ და ჰაერი საკმარისად შეირხა, რათა ახლახანს შექმნილ სურნელს ყოველ კუთხე-კუნჭულში გაედწია. თუმცა ბალდინი ჯერ კიდევ ბობოქრობდა, და ჩიოდა, და ილანძღებოდა, ყოველ შესუნთქვაზე სიმმაგე სულ უფრო ნაკლებ საკვებს პოულობდა მისი სულის სიღრმეში: ზვედობოდა, რომ დამარცხდა და ამის გამო სიტყვის დასასრულს ცარიელი პათოსილა შერჩა; საბოლოოდ, როცა დადუმდა, აღარც დასჭირვებია გრენუის თქმა: „მზადაა, მეტრა!“ – აკი თავადაც მიხვდა ყველაფერს.

ამისდა მიუხედავად, და მიუხედავად იმისა, რომ მთელი ოთახი სწორედ იმ ავადსახსენებელი სუნამოთი იყო გაჯერებული, მაინც მივიდა ძველ მუხის მაგიდასთან, სინჯის ასაღებად. სერთუკის მარცხენა ჯიბიდან ახალი, თეთრი, მაქმანიანი ცხვირსახოცი ამოიღო, გაასწორა და წესისამებრ, რამოდენიმე წვეთი დააპკურა ზედ; მერე ერთი-ორჯერ გააქნ-გამოაქნა გასანიავებლად, ხელის ნაჩვევი, ნატიფი მოძრაობით გაიტარა ცხვირთან და სურნელი შეის-

რუტა. გრძელი, ნაწყვეტ-ნაწყვეტი ამოსუნთქვის შემდეგ, იძულებული გახდა იქვე, სამფეხა სკამზე დაშვებულიყო. ჯერ კიდევ წუთის წინ აალებული სახე ახლა უეცრად ტილოსავით გადაუთეთრდა.

– შეუძლებელია, – ჩუმად, თავისთვის ჩაიბუტბუტა. – დემრთმანი, შეუძლებელია... – კვლავ და კვლავ მიჰქონდა ბატისტის თეთრი ნაჭერი ცხვირთან და ყნოსდა, და თავს აქნევდა, და ბუტბუტებდა: „შე-უძლებელია, შეუძლებელი“... ეს სწორედ პელისიეს სუნამო იყო, და თანაც ყოველგვარი მინარევის გარეშე! სურნელთა ის საძულველი ნარევი, ისეთი სიზუსტით გადაღებული, თავად პელისიეც ვერ განარჩევდა საკუთარი ნამოქმედარისაგან. „შეუძლებელია“...

წელში მოკუნტული, სახეგაფითრებული იჯდა ჯუზეპე ბალდინი, პაწია ცხვირსახოცით ხელში, გამუდმებით რომ ცხვირზე ეკრავდა სურდოთი შეპყრობილი ქალიშვილივით, და საცოდავად აცეცებდა თვალებს. წუთიერად, მეტყველების უნარიც კი დაკარგა. შეჰყურებდა შესარევი ჭურჭლის შიგთავსს, თავს აქიცინებდა და მონოტონურად ბუტბუტებდა: „მ-მ, მ-მ, მ-მ... შე-შე... შე...“. მერე გრენუი მიუახლოვდა, უჩუმრად, აჩრდილივით.

– არაა ეს კარგი სუნამო, – თქვა მან. – ცუდადაა შედგენილი.

– შე-შე... – უპასუხა ბალდინიმ, გრენუი კი თავისას განაგრძობდა:

– თუ ნებას დამრთავთ, მეტრ, გავაუმჯობესებ. ერთი წუთი მიდროვით, მართლა კარგ სუნამოდ გადავაქცევ!..

ბალდინიმ თავი დააკანტურა. არა იმიტომ, თანხმობა გაეცხადებინა – უბრალოდ, ესღა იყო ერთადერთი, რაც ამ აპათიურ მდგომარეობაში შეძლო. ჩარევაც არ უცდია, როცა გრენუი ხელახლა შეუდგა საქმიანობას, მეორედ გადმოსახა სპირტი იმავე ბოციდან შესარევი ჭურჭელში – გამოურეცხავად, პირდაპირ ნარჩენებში ჩაუშვა! ახლაც, თითქოსდა ალაღებდნენ, ყოველგვარი რიგითობისა და გათვლილი შეფარდებების გარეშე გადაუშვა ძაბრში ფლაკონების შიგთავსი. მხოლოდ მთელი ამ პროცედურის დასასრულს – ამჯერად გრენუის აღარ შეუნჯდრევია ბოთლი, მხოლოდ ოდნავ შეაქანა, კონიაკით სავესე სასმისივით, შესაძლოა ბალდინის მგრძნობარობას გაუწია ანგარიში, შესაძლოა იმიტომ, რომ ნაზავი ამჯერად უფრო ძვირფასად ეჩვენებოდა, – მოკლედ, მხოლოდ ახლა, როდესაც მზა სითხე უკვე ჭურჭელში ლივლივებდა, ბალდინი გამოერკვა, ნელ-ნელა წამოიმართა სკამიდან. თეთრი ნაჭერი ჯერ კიდევ ცხვირზე ჰქონდა მიკრული, თითქოს ფარად უნდა იხმაროს მის ნატიფ ყნოსვაზე ახალი შეტევისაგან თავდასაცავად.

– მზადაა მეტრ. – შეაგება გრენუიმ, – ამჯერად არცთუ ისე ცუდი გამოვიდა.

– კი, ჰო, კარგია... – პასუხობდა ბალდინი და მარცხენა, თავისუფალ ხელს უმწეოდ იქნევდა განზე.

– არ გნებავთ სინჯი აიღოთ? – ჩაიკრუტუნა გრენუიმ. – მეტრ, ნუთუ მართლა არ გასინჯავთ?

– სხვა დროს, სხვა დროს, ახლა რაღაც განწყობაზე ვერა ვარ... სინჯის ასადებად... ახლა მაგისთვის არა მცალია. აქეთ წამო!

შანდალი აიღო და სავაჭროში გასავალი კარისაკენ გაბლაყუნდა. გრენუი უკან მიჰყვა. ვიწრო დერეფნით გააღწიეს უკანა, შიკრიკებისათვის განკუთვნილი შემოსასვლელისაკენ. მოხუცი ფრატუნით მიუახლოვდა დაბალ კარს, ურდული გააღო. შემდეგ გვერდზე გადავა, ბიჭუნა რომ გაეტარებინა.

– ახლა შემიძლია თქვენთან ვიმუშაო, მეტრ? შეიძლება? – დაეკითხა უკვე ზღურბლზე მდგარი გრენუი, ძველებურად წელში მოხრილი და დადარაჯებული.

– არ ვიცი, – თქვა ბალდინიმ, – ვიფიქრებ. წადი ახლა!

და გრენუი უეცრად გაქრა, თითქოს ჩაიყლაპაო, ისე დაიკარგა ბნელში. ბალდინი კარგა ხანს იდგა გაშტერებული, მარჯვენა ხელში შანდალი ეჭირა, მარცხენაში ცხვირსახოცი – იფიქრებდით, ეს-ესაა ცხვირიდან სისხლი წასკდაო, – და რაღაც შინაგანი ძრწოლით მისჩერებოდა სიბნელეს. მერე უცბად გამოერკვა, სწრაფად მიხურა კარი, ურდული გაუყარა და სავაჭრო ოთახის გავლით, სახელოსნოში დაბრუნდა.

იქ კიდევ ღვთიური სურნელი იდგა. ლამის ცრემლი მოაწვა ბალდინის, არაფრად სჭირდებოდა სინჯის აღება, უბრალოდ იდგა მუხის მაგიდის წინ და ანაოროთქლს იყნოსავდა. ბრწყინვალე სუნამო გახლდათ – მასთან შედარებით „ამური და ფსიქეა“ იგივე იქნებოდა, რაც ქუჩის ვიოლინოს წრიპინი – სიმფონიური ორკესტრის ხმიანობასთან. თვალეები მილულა და უნებურად, მასში უტკბილესმა მოგონებებმა გაიღვიძა. თავი ჯერ ნეაპოლში, საღამოს პირს ზღვის სანაპიროზე მოსეირნე ახალგაზრდა კაცად წარმოიდგინა, მერე – შავთვალა ლამაზმანის მკლავებში მონებვირედ... ლამის ნიავის დაქროლვაზე აფრიალებული ფარდის უკან ვარდების კონას მოჰკრა თვალი ფანჯრის რაფაზე, გაიგონა დამფრთხალი ჩიტების ჭიკჭიკი და შორეული მუსიკის ხმაც მოესმა ლამის ქულბაქიდან; სულ ახლოს, ყურთან, ჩურჩული გაიგონა: *მიყვარხარ...* სიამოვნებისგან წამოიკვნესა და თვალეები გაახილა. არა, ეს სუნამო არ იყო უბრალოდ საპკურებელი სითხე, რაღაც ტუალეტის საგანი – ეს იყო სრულიად თავისებური, უცხო რამ, რომელსაც საკუთარი შიგთავსიდან სულ სხვა, ჯადოსნური სამყაროს ამოშვება შეეძლო, ყოველი ჭირი კაცს უმაღლე ავიწყდებოდა და თავსაც ისეთ მდიდრად, ისეთ სვებენიერად, ისე კარგად იგრძნობდა, რომ...

ახლა ბალდინის სრული სულიერი სიმშვიდე ეწვია. თხის ტყავების დასტიდან ერთი გამოაძრო, მაგიდის კიდეზე გადაფინა, დანა აიღო, ნაჭერს წვერები მოუსწორა, მინის აბაზანაში ჩადო და ახალი სუნამო დაასხა. შემდეგ აბაზანას მინისავე ფირფიტა დააფარა, ნარჩენი სუნამო ორ ფლაკონში გადაასხა, ეტიკეტები მიაკრა და ზედ სახელწოდებაც წააწერა –

„ნეპოლიტანური ღამეები“. მერე სანთლები ჩააქრო და სახელოსნოდან გავიდა.

ვანხმობისას არაფერი უთქვამს ცოლისთვის; არაფერი წამოსცენია იმ ღამის საბედისწერო გადაწყვეტილებაზე, დაისის ჟამს რომ მიიღო. არც ცოლს უთქვამს არაფერი, რადგან შეამჩნია, როგორ უბრწყინავდა თვალები და ამით ფრიად კმაყოფილი დარჩა... არც ნოტრ-დამს წასულა, ღვთისათვის მაღლის შესაწირად – ეგ კი არა და ამ დღეს ძილისპირული ლოცვის წარმოთქმაც გადაავიწყდა.

16.

მეორე დღით პირდაპირ გრიმალისას გაემართა. ჯერ ტყავების საფასური გადაიხადა; თან გადაიხადა სრულად, არც დაუწუწუნია და ერთხელაც არ შევაჭრებია. მერე სამიკიტნოში ერთ ბოთლ თეთრ ღვინოზე მიიპატიჟა ოსტატი და გრენუი გამოისყიდა. თქმა არ უნდა, არც წამოსცდენია, რისთვის სჭირდებოდა ბიჭი. მოჭორა რაღაც დიდ შეკვეთაზე, რის შესასრულებლადაც ერთი უსწავლელი მუშა სჭირდებოდა შემწედ: ვთქვათ, მცირე მოთხოვნილებების მქონე ვინმე ყმაწვილი, უბრალო დავალებების შესასრულებლად – ტყავი დაეჭრა და სხვა წვრილმანი საქმეც ეკეთებინა... მერე კიდევ ერთი ბოთლი ღვინო მოითხოვა და გრიმალს ოცი ლივრი შესთავაზა – ასე ვთქვათ, იმ უხერხულობის სახედაურად, რაც მას გრენუის წამოსვლით მიადგებოდა. ოცი ლივრი გვარიანი თანხა იყო და გრიმალიც მაშინვე დათანხმდა. ბოლოს სათრიმლაგ სახელოსნოში დაბრუნდნენ, სადაც გრენუი, როგორ უცნაურადაც არ უნდა მოგეგვენოთ, უკვე შეკრული ფუთით ელოდებოდა; ბაღდინიმ ფული გადაიხადა და იმ აზრით გამსჭვალულმა, ცხოვრებაში საუკეთესო გარიგება გაეჩარხეო, გრენუი მაშინვე წაიყვანა თავისთან.

გრიმალი, ასევე დარწმუნებული, რომ ხეირი მისი იყო, ნაცნობ ქულბაქს ეწვია, მირთმეულს კიდევ ორი ბოთლი დააყოლა; შემდეგ, შუადღისათვის, სხვაგან გადაბარგდა, სენის მეორე ნაპირზე და საბოლოოდ ისე გამოიბრუჟა, გვიან საღამოს, როდესაც შინ აპირებდა დაბრუნებას, ჟოფრუა დ'ანესა და ნონენდიერის ქუჩები ერთმანეთში აერია; ამის გამო, იმის მაგივრად რომ მარის ხიდზე მოხვედრილიყო, როგორც თავად აპირებდა, საბედისწერო ცდომილებით თელების სანაპიროზე მოხვდა და იქიდან ისე ჩაენთხლა წყალში, როგორც საკუთარ საწოლში სჩვეოდა ხოლმე. მაშინვე დაიდრჩო, ოღონდაც მდინარეს კიდევ საკმაო დრო დასჭირდა, რათა იგი თავთხელიდან სიდრმეში, უფრო სწრაფი დინებისაკენ ჩაეთრია. მხოლოდ გამთენიისას, დაბადი გრიმალი, ანუ უკეთ რომ ვთქვათ, მისი გაბიჟინებული გვამი, ნელ-ნელა დაცურდა ქვემოთ, დინების გაყოლებაზე, დასავლეთით.

სწორედ იმ დროს, როდესაც ზარაფთა ხიდის თაღებქვეშ მიტივტივებდა, უჩუმრად, ისე რომ ხიდის ბურჯებს არც გასდებია, მის თავზე, ოციოდ

მეტრით მაღლა, ჟან-ბატისტ გრენუი დასაძინებლად ემზადებოდა. ბალდინის სახელოსნოს კუთხეში, პირადად მისთვის, გარანდული ფიცრის ტახტი დადგეს და იმჟამად დაწოლას ეპირებოდა, მაშინ როდესაც მისი ყოფილი პატრონი გრიმალი, წყალზე განთხზმული, ქვემოთ მიცურავდა, ცივ სენაში. გრენუი სიამით მოიკუნტა და ტკიპასავით დაპატარავდა; რული ერეოდა, სულ უფრო და უფრო იძირებოდა ზმანებებში და ბოლოს ტრიუმფალური სვლით მიაღდა თავის შინაგან ციხე-სიმაგრეს, სადაც ფარულად იდღესასწაულებდა ყნოსვითი შეგრძნებების სრულ გამარჯვებას: სიტყვაუწვდენი ორგია – საკმევლის სქელი კვამლითა და სურნელოვანი ფისის ანაორთქლით გაჯერებული — პირადად მისდა საპატივცემულოდ.

17.

გრენუის შეძენამ სათავე დაუდო ჯუხუბე ბალდინის ფირმის აღზევებასა და სახელის დაგდებას როგორც ქვეყნის, ისე ევროპული მასშტაბით. სპარსული ზარების წკარუნი კარს ზემოთ თითქმის აღარ წყდებოდა და არც ყანჩები წყვეტლენ შადრევნების გადმოშხეფებას მის მაღაზიაში, ზარაფთა ხილზე.

პირველსავე ჯერზე, „ნეაპოლიტანური ღამეების“ კარგა მოზრდილი ბალდინის დამზადება მოუხდათ: ოთხმოცი ფლაკონი იმ დღესვე გაიყიდა, სუნამოს ქება-დიდება კი საკვირველი სისწრაფით ვრცელდებოდა ქალაქში. შენიეს თვალები აუჭრელდა, იმდენი ფულის დათვლამ მოუწია და ზურგიც წამოსტკივდა ამდენი დახრითა და თავის დაკვრით. ხოლო ერთხელაც კარი ყურამდე მოფრიალდა და გრაფ დ'არჟანსონის ლაქია შემოვარდა ღრიალ-ღრიალით, როგორც ეს მხოლოდ ლაქიებს სჩვევიათ — სურდა, მიედო ხუთი ფლაკონი ახალი სუნამო, და შენიე, მისი წასვლის შემდეგ, საათის მეოთხედი მაინც კიდევ ცახცახებდა კრძალვა-ფეთებისგან, რაკილა გრაფ დ'არჟანსონი სამხედრო მინისტრი და ინტენდანტი გახლდათ მისი უდიდებულესობისა, და ასევე, ერთი უგავლენიანეს პიროვნებათაგანი მთელს პარიზში.

ვიდრე შენიე მარტოდმარტო იგერიებდა მყიდველების შემოტევას დახლთან, ბალდინი, თავის ახალ შეგირდთან ერთად, სახელოსნოში გამოკეტილიყო. ამ ვითარების გასამართლებლად შენიეს მან სრულიად ფანტასტიური თეორია წარუდგინა, „რაციონალიზაციისა და შრომის განაწილების“ სახელწოდებით. ანუ, როგორაც თავად ბრძანა, იგი დიდხანს და მოთმინებით შეჰყურებდა, თუ როგორ ართმევდნენ კლიენტებს პელისიე და მისი მსგავსი სუბიექტები, აგდებით რომ ეკიდებოდნენ ძირძველ ამქრულ ტრადიციებს და ლაფში უთხვრიდნენ ფირმის რეპუტაციას; მაგრამ ახლა მისი — ბალდინის — მოთმინება ამოიწურა, ახლა იგი იღებს მათს თავხედურ გამოწვევას და ამ მეტიჩარა წინამასწარებს მათივე მოგონილი ხერხით გაუსწორდება: ყოველ სეზონზე კი არა, ყოველ თვეს და, თუ აუცილებელი გახდა — ყოველ კვირასაც კი, ახალ სუნამოს გამოუშვებს, და თანაც როგორს! ახლა ის სრულად გახსნის საკუთარი შემოქმედებითი პოტენციის ოქროს ძარღვს!

ხოლო ამისათვის საჭიროა, რომ მან – მხოლოდ და მხოლოდ ერთი უსწავლელი შეგირდის დახმარებით – მთლიანად და მარტოოდენ ნელსურნელებათა წარმოებას მიჰყოს ხელი, მაშინ როდესაც შენიემ მათი გაყიდვისათვის უნდა გადადოს თავი. ეს უთანამედროვესი მეთოდი, შეაგონებდა იგი თავის პარტნიორს, სრულიად ახალ ფურცელს გადაშლის პარფიუმერიის ხელოვნების ისტორიაში; სრულად გაანადგურებს კონკურენტებს და ჩვენც გაგვამდიდრებსო – დიახ, იგი შეგნებულად და ხაზგასმით წარმოთქვამდა – „ჩვენ“, რადგანაც განზრახული ჰქონდა, ამ განუზომელი სიმდიდრიდან თავის ძველი, ერთგული თანაშემწისთვისაც ებოძებინა გარკვეული წილი!

ჯერ კიდევ რამდენიმე დღის წინ, შენიე თავის პატრონის ასეთ სიტყვებს მოხუცებულობის მარაზმის საწყის ნიშნად მიიღებდა. „ა, ეგ უკვე მომწიფდა შარიტესთვის“*, – გაიფიქრებდა იგი. – ცოტაც კიდევ და საბოლოოდ გარეკავს...“

ოღონდ ამჟამად ის არაფერსაც არ ფიქრობდა; უბრალოდ, თავს ვედარ აბამდა ფიქრებს – იმდენი სამუშაო ჰქონდა, საღამოობით ძლივსდა ახერხებდა გადაჭედილი სალაროს დაცლასა და კუთვნილი წილის მითვლას. არც არასოდეს დაეჭვებულა ამ ფულის მართალი გზებით მოსვლაში: ბალდინი ხომ ლამის ყოველ მეორე დღეს რაღაც ახალი სუნამოთი ხელდამშვენებული გამოდიოდა სახელოსნოდან!

და რა სურნელები იყო, აღარ იკითხავთ?! არა ოდენ უმაღლესი, უ-უმაღლესი ხარისხის სუნამოები, არამედ ასევე, სულ ნაირ ნაირი ნელსაცხებლები, და ფერუშარილები, და საპნები, და თმის ლოსიონები, და მაღამოები... და საერთოდ, ყველაფერი, რასაც საამო სურნელი უნდა სდიოდეს, სდიოდა კიდევ და სდიოდა სულ ახლებურად და სულ სხვაგვარად; გაცილებით შესანიშნავად, ვიდრე რაიმე ადრინდელ ნაწარმს; და ყველაფერს, სრულიად ყველაფერს, თვით არომატიზირებულ თმების სარჭსაც კი, რომელსაც ბალდინის ჭირვეულმა განწყობილებამ შექმნა ერთხელ, საზოგადოება მოჯადოებულებით იტაცებდა და ფასსაც არ დაგიღვედა ვინმე – წარმატება ჰქონდა ყველაფერს, რასაც კი ბალდინი ქმნიდა. ეს საოცარი წარმატება იმდენად გამაოგნებელი იყო, შენიე აღიქვამდა მას როგორც რამ ზებუნებრივ მოვლენას და მის მიზეზებს აღარ იკვლევდა. ხოლო ამ ახალ მოწაფეს, მოუხეშავ ჯუჯას, ძალღივით რომ შეფარებოდა სახელოსნოს და რომელსაც ხანდახან თუ მოკრავდით თვალს შენობის სიღრმეში, სინჯარების რეცხვისა და ფილთაქვების წმენდის დროს, თუკი ამ სრულ არარაობას რაიმე კავშირი შეიძლებოდა ჰქონოდა ფირმის საარაკო აღზევებასთან – შენიე არ დაიჯერებდა, ვინმეს წვრილადაც რომ დაეფქვა მისთვის ყველაფერი.

არადა ჯუჯას, რაღა თქმა უნდა, უშუალო კავშირი ჰქონდა ყველაფერ ამასთან, უშუალო და პირდაპირი კავშირი: ყველაფერი, რაც ბალდინის გამოჰქონდა დახლზე და შენიეს უტოვებდა გასაყიდად, მხოლოდ მცირე ნაწილი იყო იმისა, რასაც გრენუი ამზადებდა დახურული კარის მიღმა. ბალდინის

* მოხუცთა და უპოვართა თავშესაფარი (მთარგმ. შენ.)

ხომ დიდი ხნის წინათ უდალატა ყნოსვამ და ხშირად ნამდვილ სულიერ ტანჯვას განიცდიდა, როცა გრენუის დამზადებულ საოცრებათაგან ერთ-ერთი უნდა ამოერჩია. ამ ჯადოსან შეგირდს სრულიად საფრანგეთის მენელსაცხებელთა მთელი არმიის მომარაგება შეეძლო საუკეთესო რეცეპტებით, ისე რომ არასოდეს განიმეორებდა ერთსა და იმავეს, არასოდეს დაამზადებდა არაფერს, თუნდაც რაღაცით კინის, მდაბალზე რომ არაფერი ვთქვათ. თუმცა, რეცეპტები გინდა ფორმულები აქ არაფერ შუაშია – გრენუი თავის სურნელთა კომპოზიციებს იმ ქაოტური და სრულიად არაპროფესიონალური ხერხებით ადგენდა, რომლებმაც თავიდან ასე დაზაფრა ბალდინი. კერძოდ: თითქოსდა ალალებდნენ, უაზროდ და უწესრიგოდ ურევდა ერთმანეთში სხვადასხვა შენაერთებს. ერთხელ, არა იმიტომ რომ შეემოწმებინა, არამედ იმისთვის, რათა იქნებ ამ სიგიჟის აზრი გაეგო, ბალდინიმ გრენუის მოსთხოვა – რომების შედგენისას მუდამ სასწოროთ, საწვეთურითა და მენზურით ესარგებლა; თანდათანობით მიჩვეოდა იმას, რომ ღვინის სპირტი სურნელის მიმცემი კი არა, გასახსნელი საშუალებაა და რომ ის ნაზავს სულ ბოლოს უნდა დაემატოს; და საერთოდ, ცოტა ხელა იმუშაოს, საფუძვლიანად, ვითარცა ჭეშმარიტ მენელსაცხებელთა შორისაა მიღებული...

გრენუიმ ყურად იღო მოთხოვნა და ბალდინის პირველად მიეცა საშუალება, დაენახა და ჩაეწერა ამ ჯადოქრობის ცალკეული ოპერაციები. კალმითა და ქაღალდით ჩამოჯდებოდა ხოლმე გრენუის გვერდით, მუდმივად მოუწოდებდა სიღინჯისკენ და იწერდა – რამდენი მისხალი, რამდენი მწიკვი, რამდენი წვეთი ესა თუ ის ჩავიდოდა შესარეე ჭურჭელში. აი, ასეთი უცნაური მეთოდით ახერხებდა ბალდინი უკვე დასრულებული პროცესის ანალიზს და, საბოლოო ჯამში, სინთეტიკურ რეცეპტებს იღებდა. ის, თუ როგორ შეეძლო გრენუის ასეთი რეცეპტის, ან ფორმულის გარეშე მიეღო თავისი სუნამოები და ნაზავები, ბალდინისათვის სასწაულებრივ გამოცანად რჩებოდა; მაგრამ ახლა მან, ყოველ შემთხვევაში, ეს სასწაული ფორმულამდე დაიყვანა და საკუთარი პარფიუმერული სამყაროს აღქმა სრული განადგურებისაგან იხსნა.

ბალდინიმ ახალშედგენილ სურნელთა სულ უფრო და უფრო მეტი რეცეპტი დასტყუა გრენუის და საბოლოოდ აუკრძალა კიდევ რაიმე ახალის შექმნა, ვიდრე იგი, ბალდინი, არ გამოცხადდებოდა კალმითა და ქაღალდით ხელში, რათა არგუსივით ეთვალთვალა პროცესისათვის და ნაბიჯ-ნაბიჯ აღენუსხა ყოველივე.

თავის რეცეპტებს – სულ მალე ათეულობით დაუგროვდა – ბეჯითად გადაიწერდა ხოლმე ორ სხვადასხვა წიგნაკში, რომელთაგან ერთი ცეცხლგამძლე კარადაში ჰქონდა ჩარაზული, ხოლო მეორეს დღისით თან დაატარებდა, დამ-დამობით კი ბალიშის ქვეშ ჰქონდა ამოდებული და ესეც გარკვეულ თვითრწმენას ანიჭებდა. ახლა თუ დასჭირდებოდა, თავადვე შეეძლო გრენუის სასწაულების გამოკრება და იმედი ჰქონდა, მისი ჩაწერილი ფორმულების კოლექციის წყალობით წინ აღდგომოდა იმ საზარელ შემოქმედებით ქაოსს, ნაკადივით რომ იფრქვეოდა მისი მოწაფის ქვეცნობიერი სამყაროდან. ხოლო ის ამბავი, რომ იგი, უბრალოდ გაოგნებული კი აღარ იწერდა ყველაფერს, არამედ თვალთვალისა და აღნუსხვის საშუალებით თავადაც მონაწილეობდა შემოქმედებით პროცესში, დამაწყნარებლად მო-

ქმედებდა ბალდინიზე და მის თვითდაჯერებას განამტკიცებდა. გარკვეული დროის შემდეგ თავადაც ირწმუნა, რომ ფრიად არსებითი წვლილი ჰქონდა შეტანილი ფაქიზ ნელსურნელებათა შექმნაში. საბოლოოდ, უკვე ეჭვიც აღარ ეპარებოდა, რომ ფორმულები მისი სრული და კანონიერი საკუთრება გახლდათ.

ერთი გამორჩენა გრენუისაც ჰქონდა ამ დისციპლინარული პროცედურიდან, რომელიც ბალდინიმ მოახვია თავს. თავად მას, მართალია, ამის საჭიროება არც უგრძნია – არასოდეს დაჭირვებია ძველი ფორმულის დამოწმება რათა რამოდენიმე კვირის, ან თვის შემდეგ რომელიმე სუნამოს შემადგენლობა აღედგინა, რადგან არც არასოდეს ავიწყდებოდა. მაგრამ მენზურებისა და სასწორების სავალდებულო გამოყენების შედეგად პარფიუმერიის ენა შეისწავლა და ინსტინქტურად გრძნობდა, ეს ცოდნა კიდევ გამოადგებოდა. ორიოდე კვირის თავზე, გრენუიმ არა მარტო ყველა იმ სურნელოვანი ნივთიერების სახელწოდება იცოდა, რომელიც კი ბალდინის სახელოსნოში მოიპოვებოდა, არამედ ისწავლა, როგორ ჩაეწერა თავისი სუნამოების ფორმულები და პირიქითაც, სხვისი ფორმულებისა და ინსტრუქციების მიხედვით სუნამოები თუ სხვა რამ სურნელოვანი ნივთიერებები შეექმნა. მეტიც, უკვე შეეძლო საკუთარი პარფიუმერული იდეების გრანებში და წვეთებში გამოხატვა, შეეძლო, ყოველგვარი შუალედური სინჯების გარეშე ემოქმედა. როდესაც ბალდინი ახალი სურნელის შექმნას ავალებდა, ვთქვათ – ცხვირსახოცების გასაჟღერთად, ან მშრალი სუნამოსა თუ ფერუმატილის დასამზადებლად, გრენუის უკვე აღარ სჭირდებოდა ფლაკონებისა და ფხვნილებისათვის ხელის მოკიდება: უბრალოდ, მაგიდას მიუჯდებოდა და მაშინვე ჩამოწერდა ხოლმე საჭირო ფორმულას; ისწავლა, ფორმულის მომზადების ხარჯზე, საკუთარი შინაგანი ყნოსვითი წარმოდგენებიდან მზა ნაწარმამდე სავალის გავლა, თუმცა მისთვის ეს მაინც შემოვლითი გზა გახლდათ. საერთოდ კი, მიღებული შეხედულების მიხედვით, ესე იგი – ბალდინის შეხედულების მიხედვით, ეს წინგადადგმული ნაბიჯი იყო. გრენუის საოცრებები საოცრებებად რჩებოდა, მაგრამ რეცეპტურა, რითაც ის ამ საოცრებებს ასახულებდა, მჩხიბაობის დამთრგუნველ ეფექტს აცლიდა მათ და ამასაც თავისი უპირატესობა ჰქონდა. რაც უფრო უკეთ ითვისებდა გრენუი პროფესიულ ხერხებსა და მეთოდებს, რაც უფრო გასაგებად იძლეოდა ახსნა-განმარტებებს პარფიუმერიის პირობით ენაზე, მით უფრო ნაკლებად იზაფრებოდა და ნერვიულობდა მისი პატრონი. ბოლოს და ბოლოს, ბალდინი მას ახლა მეტად ნიჭიერ ადამიანად თვლიდა სუნის შეგრძნების თვალსაზრისით, მაგრამ არა მეორე ფარეზიანად და, რაღა თქმა უნდა, არც შემზარავ ჯადოქრად, ხოლო ყველაფერი ეს გრენუის წისქვილზე ასხავდა წყალს. მას მშვენიერ ნიღბად ემსახურებოდა ხელოსნური ჟარგონი და ჩვევები; პირდაპირ მიაძინებდა ხოლმე ბალდინის წესების სამაგალითო დაცვით, შენარევების ზუსტი აწონვით, შესაზავებელი ჭურჭლის შენჯღრევითა თუ საცდელი თეთრი ცხვირსახოცის ნამვით; მერე კიდევ, პატრონის წაბაძვით, ისევე მანერულად, ისევე ელეგანტურად იტარებდა ცხვირთან, მოსაყნოსად... ხოლო შესაფერის დროს, გამოზომილი პერიოდულობით, შეცდომებსაც უშვებდა, ბალდინის დასანახად: დაავიწყდებოდა რაიმეს გაფილტვრა, არასწორად დააყენებდა სასწორს, ფორმულაში რისამე შემცველობის უაზროდ მაღალ

პროცენტს ჩაწერდა — საბაბს მისცემდა იმისთვის, რომ შეცდომაზე მიეთითებინათ და შემდეგ გულმოდგინედ ასწორებდა ამ ვითომ შეცდომას. ასე შეძლო მან ბალდინის დარწმუნება, რომ ყველაფერი, საბოლოო ჯამში, წესისა და რიგის დაცვით მიდიოდა. გრენუის არ აწყობდა მოხუცის გაანჩხლება — რაც მართალია, მართალია, მას მართლა სურდა ზოგი რამის შესწავლა; არა სუნამოების შედგენა, არა ამა თუ იმ სურნელის შემადგენელთა ზუსტი წყობა — არამც და არამც! ამ მხრივ არაფერი იყო ქვეყნად, ვინც მას რაიმეს ასწავლიდა; და საერთოდ, ის ინგრედიენტები, რაც ბალდინის სახლში მოიპოვებოდა, გრენუის წარმოდგენით სრულიად არ იყო საკმარისი მართლაც რომ ბრწყინვალე ნესლურნელებათა შესაქმნელად. ყველაფერი ის, რასაც იგი ბალდინისთან ქმნიდა, ბავშვური გასართობი იყო იმასთან შედარებით, რასაც იგი საკუთარ თავში ატარებდა და რის ხორცშესხმასაც ოდესმე, მომავალში აპირებდა. მაგრამ ამისთვის, და მან ეს კარგად უწყობდა, ორი უცილობელი წინაპირობა იყო საჭირო: პირველ რიგში, შედარებით ასატანი არსებობა, თუნდაც შეგირდის მდგომარეობაში, რაც საშუალებას მისცემდა დაუოკებლად მისცემოდა საკუთარ ვნებებს; მეორე — ხელობის იმ ხერხების ცოდნა, რომელიც საშუალებას მისცემდა დაემზადებინა, გამოეყო, დაეწურა და დაეკონსერვებინა სურნელოვანი ნივთიერებანი, ამით პირად განკარგულებაში მიეღო ისინი და რაღაც სხვა, ზეგარდმო მიზნისათვის გამოეყენებინა—რაღვან, თუმცა გრენუის საუკეთესო ყნოსვა გააჩნდა ქვეყნად და მისი ყნოსვა იმდენადვე ანალიტიკური იყო, რამდენადაც აღქმითი, სურნელთა ფიზიკურად ფლობა ჯერ კიდევ მაინც მის შესაძლებლობათა მიღმა რჩებოდა...

18.

მაშ ასე, გრენუი ნებსით ემორჩილებოდა ბალდინის ინსტრუქციებს, ეუფლებოდა ღორის ქონიდან საპნის გამოხარშვის, ნატისაგან ხელთათმანების კერვის, ზორბლის ფქვილის, დანაყული ნუშისა და იის დაფქვილი ფესვებისაგან — პუდრის მიღების ხელოვნებას. სურნელოვან სანთლებს მერქნის ნახარშის, გვარჯილისა და სანდალოზის ხის ნაქლიბიდან ასხამდა; პრესავდა აღმოსავლურ პასტილებს მურის, ბენზოლის ფისისა და ქართვის ფხვნილისაგან; ურევდა ცომში საკმეველს, შილაქს, ვეტევიარიას, დარიჩინს, და მათგან საკმეველ ბურთულებს ასორსოლებდა; ცრიდა და ფითხით ქნიდა დანაყილი ვარდის ფურცლების, ლავანდის ყვავილებისა და კასკარას ქერქისაგან შემდგარ Poudre Imperial-ს; ხარშავდა გრიმს, თეთრსა თუ ნაჯერ ცისფერს; ამზადებდა ჩხირებს — სისხლისფერ-წითელ პომადებს ტუჩებისათვის; წყალში ხსნიდა ფრჩხილებზე წასასმელ, უწმინდესად გაცრილ ფხვნილებს, პიტნის გემონარევი ცარცს კბილებისათვის... ადგენდა პარიკების დასახვევი სითხეებს, წვეთებს მეჭეჭებისა და კოჟრების მოსაშორებლად; აქეთ — მათეთრებელი სახე-კანისთვის და ბელადონას ნაჟური — თვალებისათვის, იქით — მარიამულას საცხი კავალრებისთვის და ჰიგიენური ძმარი ქალბატონებისთვის... გრენუი ნაირ-ნაირი ღოსიონების, ფხვნილების, კოსმეტიკური საშუალებებისა და, ამას გარდა — ჩაის ნაყენების, სუნელების, და ლიქიორების, და

მარინადების, და სხვათა მსგავსთა დამზადებაშიც ასევე გაიწაფა. მოკლედ, სრულად აითვისა ის განსწავლულობა, რაიც ბალდინის შექმნილი მისთვის გაეზიარებინა; მართალია, განსაკუთრებული ინტერესის გარეშე, მაგრამ უჩივლელად და სრული წარმატებით. სამაგიეროდ, გასაოცარ გულმოდგინებას იჩენდა მაშინ, როცა ბალდინი მას ათასგვარი ტინქტურების, ნაწურებისა თუ ესენციების დაყენებას ასწავლიდა. მოუღლელოდ ჭყლეტდა ხრახნიან პრესში მწარე ნუშის ლებნებს, ნაყავდა ჯავზის მარცვლებს, ანდა საკეპავი დანით თლიდა ამბრის ნაცრისფერ გორგალს, ანდა სულაც იის ფესვებს ძენდავდა ხოლმე, რათა სპირტის დამატებით, მათგან ნაყენი დაეყენებინა. ისწავლა დასანაწილებელი ძაბრით სარგებლობა — სუფთა ზეთის გამოსაწურად; ბალახებისა და ყვავილების გაშრობაც ისწავლა — ცხაურებზე, ჩრდილში თუ სითბოში, და შრიალა ფოთოლ-ყლორტების დაკონსერვებაც — ფიჭით დალუქულ ქოთნებსა თუ ყუთებში...

ისიც სათქმელია, ბალდინის სახელოსნო არ იყო გათვალისწინებული დიდი რაოდენობით მცენარეული ზეთების გამოხდისათვის, მაგრამ ხანდახან, როდესაც იაფად შეიძლებოდა როზმარინის, პიტნის და სალბის, ან ანისულის თესლის ყიდვა ბაზარზე, ან როდესაც საკმაოდ დიდი პარტიებით შემოდებოდა ზამბახის ბოლქვები, ანდა ბალდრიანის ფესვები, კვლიავი, ჯავზის კაკალი თუ მიხაკის გამხმარი ყვავილი, ბალდინიში ალქიმიკოსი იღვიძებდა; გამოათრევდა ხოლმე თავის უზარმაზარ, სპილენძისაგან დამზადებულ სახდელ ქვაბს, ზედ წამომხობილი გასაცივებელი ლაპოტით, რომელსაც იგი „მავრის თავს“ ეძახდა და ამაყობდა კიდევ, რომ ამ ორმოციოდე წლის წინათ, ლიგურიის სამხრეთ კალთებზე, ტრიალ მინდორში, ამ ქვაბის მეშვეობით ლავანდის დისტილაციას ახდენდა, და ვიდრე გრენუი გამოსახდელად გამიხნულ მასალას აქუცმაცებდა, ბალდინი ცხროიანი სისწრაფით — ვინაიდან გადამუშავების სისწრაფე ანი და ჰოე გახლავთ ამა საქმისა — ქვის ღუმელში ცეცხლს აჩადებდა, სადაც ზემოხსენებული სპილენძის ქვაბს დგამდა, წყლით სანახევროდ სავსეს; შემდეგ ყრიდა შიგ ნაწილებად დაჩეხილ მცენარეს, აფარებდა თავზე ორმაგკედლიან სახურავს — „მავრის თავს“ — და უერთებდა ორ შლანგს, შემავალი და გამომავალი წყლისათვის. ეს დახვეწილი კონსტრუქცია კონდენსატის გაციებისათვის — გზადაგზა უხსნიდა იგი გრენუის — მან უფრო გვიან ჩაამატა, რადგან თავის დროზე, მინდორში მუშაობისას, გაცივების ეფექტს უბრალოდ ქარის დახმარებით აღწევდა. ყოველივე ამის შემდგომ ცეცხლის შენთების დროც დგებოდა.

ქვაბის შიგთავსი ნელ-ნელა იწყებდა დუდილს. რამოდენიმე ხნის შემდეგ, ჯერ წვეთ-წვეთად, მერე კი ძაფივით წვრილი ნაკადით, დისტილატი ახლა უკვე „მავრის თავის“ სადინარიდან ბალდინის მიერ შედგმულ ფლორენციულ მათარაში მოედინებოდა. დასაწყისითვის ეს გამონახადი ვერაფერი სანახავი იყო — რაღაც წყალწყალა, მღვრიე სითხე; მაგრამ მას შემდეგ, რაც ერთ მათარას მეორე ცვლიდა და ავსებული კიდევ გვერდზე გაიდგმებოდა, ეს დურდო ორ ნაწილად იყოფოდა ხოლმე: ქვემოთ რჩებოდა ყვავილებისა თუ ბალახების წყალი, ზემოთ კი ზეთის სქელი ფენა ლივილივებდა. შემდეგ მხოლოდ ერთი რამ იყო საჭირო: მათარის ქვედა, სწორედ ამისათვის დატანებული ყელიდან ფრთხილად ჩამოესხათ კეთილსურნელოვანი წყალი და

სასრულად მიეღოთ სუფთა ზეთი, ესენცია, ანუ – მცენარის მძაფრარომიანი არსი.

გრენუი მოხიბლული იყო ამ პროცესით. თუკი ცხოვრებაში რაიმე იწვევდა მასში აღტაცებას – რა თქმა უნდა, გარეგნულად არაფრით გამოხატულ, ფარულ, ცივი ალით აალებულ აღტაცებას – ზუსტად ეს ხერხი: ცეცხლის, წყლის, ორთქლისა და ეშმაკეული მანქანის დახმარებით წაერთმიათ ნივთიერებისთვის მათი კეთილსურნელოვანი სული; და ეს ეთერის ზეთიც საუკეთესო რამ იყო, ერთადერთი, რაც საერთოდ აინტერესებდა მათში. უხამსი ნარჩენები: ყვავილები, ჩენჩო, ნაყოფი, ფერები, სილამაზე, სიცოცხლე და სხვა ეგეთი ნაყარნუყარი მას არ ადარდებდა. ეს მხოლოდ გარსი იყო, ბალასტი. ეს ყველაფერი იყრებოდა...

დროდადრო, მაშინ როდესაც ნახადი მთლად წყალწყალა-გამჭვირვალე ხდებოდა, ჩამოდგამდნენ ქვაბს ცეცხლიდან, ხდიდნენ სახურავს და ლექს გადმოღვრიდნენ. სითხე უფერო იყო, როგორც დამლბალი თივა, როგორც გადახარშული ბოსტნეული; მკრთალი და ბოჭკოვანი, ჭყაპივით, ძლივს საცნობი, საზიზღარი ლექსი და თავად – სუნს მოკლებული. ყოველივე ამას ფანჯრიდან მდინარეში მოისროდნენ, შემდეგ იღებდნენ ახალ მცენარეებს, ყრიდნენ ქვაბში, წყალს ამატებდნენ და ქვაბს ისევ ცეცხლზე დგამდნენ. ისევ იწყებოდა ქვაბში დუდილი, ისევ იღვრებოდა მცენარეების სიცოცხლის წვენი ფლორენციულ მათარებში. მსგავსი ქმედება ხშირად მთელი დამე გრძელდებოდა. ბალდინი ღუმელს უთვალთვალედა, გრენუი თვალს არ აცილებდა ჭავლს – სხვა საქმე, მათარის გამოცვლის დრომდე, მაინც არაფერი ჰქონდა. მოუქნელ აგრეგატს მიჯაჭვულები, ცეცხლთან ახლო, სამფეხა სკამებზე ისხდნენ; ორივენი მოხიბლულები, ოღონდაც სულ სხვადასხვა მიზეზით. ბალდინი ცეცხლის წვითა და სპილენძის ქვაბზე მისი ათინათით ტკბებოდა; სიამოვნებდა შეშის ტკაცუნა და სახდელი აპარატის ბუებუევი, იმიტომ რომ ყველაფერი ისე იყო, როგორც ადრე, ძველ კარგ დროს... მოიტანდა ხოლმე დახლიდან ერთ ბოთლ ღვინოს, და სხვადასხვა ამბების მოყოლას იწყებდა, დაუსრულებელ ისტორიებს ყვებოდა იმაზე, თუ რა და როგორ იყო წინათ. ომზე ესპანეთის მემკვიდრეობისთვის, რომლის დასასრულზეც პირადად მან, ჯუზეპე ბალდინიმ მოახდინა მნიშვნელოვანი გავლენა, რადგანაც აუსტრიელების წინააღმდეგ იბრძოდა; პარტიზანებზე, ვისთან ერთადაც შიშის ზარს სცემდა სევენას, ერთი ჰუგენოტის ქალიშვილზე, რომელიც ესტერლეში დანებდა მას, ლავანდის სურნელით დამთვრალი; ტყის ხანძარზე, რომელიც კინაღამ გააჩაღა და რომელიც, ალბათ, მთელს პროვანსს გადაწვავდა – ღმერთმანი, გადაწვავდა – ვინაიდან უბედური მისტრალი ქროდა მაშინ... და ყვებოდა დისტილაციასზე, ისევ და ისევ, თუ როგორ იყო მაშინ, დამე, გამლილ მინდორში, საესე მთვარისას... ღვინოზე, ციკატების ჭრიჭინზე, ლავანდის ზეთზე, რომელიც მაშინ გამოხადა, თან ისეთი და იმგვარი გამოხადა, რომ თავის წონა ვერცხლზე უცვლიდნენ; მისი სწავლის პერიოდზე გენუაში, ხეტილის წლებზე და ქალაქ გრასზე, სადაც იმდენი ნაღდი პარფიუმერია, რამდენიც სხვაგან ფინაჩები, და მათ შორის იმდენად მდიდრებიც არიან, რომ თავადებივით ცხოვრობენ დიდებულ სასახლეებში – დაჩრდილული ტერასე-

ბითა და ბაღებით და მუხით მოპირკეთებულ სასადილო ოთახებში მიირთმევენ საქსონური ფაიფურის თეფშებიდან, ოქროს დანა-ჩანგლით...

აი, ამგვარ ისტორიებს ყვებოდა მოხუცი ბალდინი ჭიქა ღვინოზე, და ლოყები უხურდა ღვინისაგან, ცეცხლისაგან, და საკუთარი თხრობით თვრებოდა. ოღონდაც, ჩრდილში მიმჯდარი გრენუი ყურს არ უგდებდა – არავითარი ძველი ისტორიები მას არ აინტერესებდა. აინტერესებდა მხოლოდ ის, რაც მის თვალწინ ხდებოდა; თვალმოუშორებლად მიჩერებოდა „მავრის თავის“ ხვიმრს, საიდანაც ნახადი სითხე მოედინებოდა. ამ დროს თავად წარმოიდგინდა ხოლმე თავს ასეთ გამოსახდელ აპარატად, სადაც ყველაფერი დუღს, და ჩუხჩუხებს, და საიდანაც ასეთივე ნაჟური მოედინება, ოღონდ გაცილებით უკეთესი, ახალი, უჩვეულო – იმ ნატიფი მცენარეების დისტილატი, რომლებიც თავად გაახარა საკუთარ თავში, რომლებიც ყვაოდნენ იქ, სადაც მხოლოდ მისი ყნოსვისთვის იყვნენ მისაწვდომნი და რომლებსაც შემდლოთ სურნელოვან ედემად ექციათ მთელი სამყარო, სადაც არსებობა – ყნოსვითი თვალსაზრისით მაინც – უფრო ასატანი იქნებოდა; ანუ ყოფილიყო ერთი უზარმაზარი გამოსახდელი ქვაბი, საიდანაც მის მიერ შექმნილი სურნელები მთელს სამყაროს მოეფინებოდა – აი, ასეთ უცნაურ ოცნებებს ეძლეოდა გრენუი!..

მაგრამ ღვინით შეხურებული ბალდინი თუ უფრო და უფრო იბურდებოდა საკუთარი თხრობის ხლართებში, გრენუიმ მალე აუკრძალა თავს დაუოკებელ ფანტაზიებში გადავარდნა. დასაწყისისთვის დიდი გამოსახდელი აპარატის ხატება ამოიგდო თავიდან და მერე იმის გათვლა დაიწყო, ეს ახლახან შექმნილი ცოდნა უახლოესი მიზნებისთვის როგორ მიესადაგებინა.

19.

სულ ცოტა დრო დასჭირდა გრენუის, გამოხდის ხელობაში დაოსტატებულიყო. აღმოაჩინა – და ამაში ბალდინის რჩევა-შეგონებებზე უფრო საკუთარი ცხვირი დაეხმარა – რომ მისაღები დისტილატის ხარისხზე ცეცხლის სიმხურვალე გადამწყვეტ გავლენას ახდენს: ანუ ყოველი მცენარე, ყოველი ყვავილი, ხის ყოველი ჯიში და ყოველი ნაყოფი, განსაკუთრებულ მიდგომას საჭიროებს: ხანდახან ძლიერი აორთქლების გამოწვევაა საჭირო, ხანდახან – ზომიერი დუდილი, ხოლო ზოგიერთი ყვავილი მხოლოდ მაშინ იძლევა საუკეთესო სურნელს, როდესაც დაბალ ცეცხლზე იორთქლება.

არანაკლებ მნიშვნელოვანი იყო თავად მოშხადების პროცესი: პიტნისა და ლავანდის დამუშავება დიდი კონებით შეიძლებოდა, ანდრესა კი კარგად უნდა გარჩეულიყო, გაჩეჩილიყო, დაჩეხილიყო, დაკეპილიყო, დანაყილიყო, ფქვილივით უნდა მოქცეულიყო, ვიდრე სპილენძის ქვაბში ჩაეშვებოდა. ზოგიერთი მასალა კიდევ, და გრენუიში ეს ლამის პიროვნულ წყენას იწვევდა, საერთოდ არ ემორჩილებოდა გამოხდას.

რაკი დარწმუნდა, რა თავდაჯერებულად ექცეოდა გრენუი აპარატურას, ბაღდინიმ გამოსახდელი ქვაბი სრულ განკარგულებაში გადაულოცა და გრენიუსაც არ დაუყოვნებია ამით ესარგებლა. მთელი დღეები ქმნიდა სუნამოებს, ამზადებდა სხვადასხვა ნელსაცხებლებს, ხოლო ღამდამობით მხოლოდ გამოხდის იდუმალი ხელოვნებით იყო დაკავებული. უზურში ერთი რამ ჰქონდა – დაემზადებინა სრულიად ახალი სურნელოვანი ნივთიერებები და უკვე მათი დახმარებით გამოეყვანა თუნდაც რამდენიმე იმ აურაცხელ არომათაგან, საკუთარ შეგრძნებებში რომ ატარებდა. საწყის ეტაპზე მან გარკვეულ წარმატებებსაც მიაღწია: შესძლო დაემზადებინა ზეთი ჭინჭრისაგან და კრეს-სალათის თესლებისაგან, ტუალეტის წყალი ანწლის ახლადშემოხდილი ქერქისა და ურთხელის ნაზი ყლორტებისაგან...

მართალია, მიღებული გამონახადი სურნელის მხრივ ვერაფრით მოგაგონებდნენ პირველად მასალას, მაგრამ მაინც, გარკვეულწილად, ინტერეს-მოკლებულნი არ იყვნენ შემდგომი გადამუშავებისთვის. მერე აღმოაჩინა ნივთიერებები, რომელთათვის ეს მეთოდი სრულიად მიუღებელი იყო: მაგალითად, სცადა მინის სუნის დისტილირება – გლუვი მინის გრილ-თიხოვანი სუნის, რომელსაც ჩვეულებრივი ადამიანი სრულებით ვერ აღიქვამს. დაამტვრია ფანჯრის მინა ჯერ დიდრონ ნატეხებად, მერე ნამსხვრევებად და ბოლოს დაფხვნილ მდგომარეობაშიც გამოსცადა, ოღონდ სრულიად უშედეგოდ! სცადა გამოეხადა თითბერი, ფაიფური, ტყავი, ზორბალი და ხრეში; უბრალო მიწა, სისხლი და ხე, ახალი თევზი... საკუთარი თმაც კი. ბოლოს წყალიც გამოხადა – სუნის წყალი, რადგან საჭიროდ მიაჩნდა მისი განსაკუთრებული სუნის შენახვა; ეგონა, გამოსახდელი აპარატის დახმარებით შესძლებდა ამ ნივთიერებებისათვის გამოეცალა მათი სული, როგორც აცლიდა ფურისულას, ლავანდს თუ ზირას ნაყოფს. აბა, საიდან უნდა სცოდნოდა, რომ გამოხდა სხვა არა არის რა, თუ არა ნივთიერებათა დაშლა აქროლად და მყარ შემადგენლებად? ხოლო იმ სუბსტანციებისთვის, რომელთაც ეთერული ზეთები არ გააჩნიათ, გამოხდის ეს მეთოდი, რაღა თქმა უნდა, სრული უაზრობაა. თანამედროვე ადამიანისათვის, ვისაც ქიმიკა თუნდაც სკოლაში მაინც უსწავლია, ეს იმთავითვე იქნებოდა გასაგები, მაგრამ გრენუი ამ აზრამდე უზარმაზარი ძალისხმევის, იმედის გადამწურავი ცდების გრძელი რიგის გადავლით მივიდა: თვეობით, მთელი ღამეების განმავლობაში იჯდა სპილენძის ქვაბთან და ყველა შესაძლო საშუალებით ცდილობდა სრულიად ახალ სურნელთა გამოვლენასა და გამოყოფას – ანუ იმ არომებისა, რომლებიც, დისტილირებული სახით, ბუნებაში აროდეს არსებულან. ოღონდაც ყველაფერ ამისაგან სულ რამოდენიმე, ისიც შესაბრალისი ხარისხის მცენარეული ზეთის გარდა, არაფერი გამოვიდა... საკუთარი წარმოსახვის უღრმესი, უმდიდრესი ჭიდან მან ვერცერთი წვეთი ესენცია ვერ ამოიღო. ყოველივედან, რაც მის ფანტასტიურ ყნოსვას ეზმანებოდა, მან ვერცერთი სურნელის მატერიალიზება ვერ მოახერხა.

და როცა შეიგნო რა მარცხიც განიცადა, ისე დაავადდა, ერთი პირობა კინადამ ფეხებიც გაჭიმა.

ჯერ ძლიერი სიცხეები დაეწყო და ერთხანობა, ოფლდენაც დიდი ჰქონდა, მაგრამ მერე კანის ფორებმა უმტყუნა, ნასიცხი შეუგუბდა და მთელს ტანზე ჩირქოვანი ნახეთქები გაუჩნდა; ალაგ-ალაგ ნამდვილი ფურუნკულები გამოებერა, კრატერებივით რომ გადაიხსნებოდნენ ხოლმე, და საიდანაც ლავასავით მოედინებოდა სისხლნარევი ჩირქი და ამაზრზენი, თეთრ-მოყვითალო ლიმფა. სულ მალე გრენუი წამებულს დაემსგავსა, თითქოსდა შიგან ქვებით განტვიწულსა და ათობით ჩირქმდენი იარით დამდულდრულს.

ბალდინი, რა თქმა უნდა, ფრიალ შემფოთებული გახლდათ. არაფრად აწყობდა ამგვარი შეგირდის დაკარგვა – მითუმეტეს ახლა, როცა საქმის გაფართოებასა და ვაჭრობის არა მარტო ქალაქს გარეთ, არამედ სამეფოს საზღვრების მიღმა გაშლასაც კი აპირებდა. ისიც სათქმელია, შორეული პროვინციებიდან თუ მთლად უცხოეთიდან, და ასევე, სამეფო კართან დაახლოებულ პირთაგან სულ მეტი და მეტი შეკვეთები მოდიოდა იმ ახალმოდურ ნელსაცხებლებზე, პარიზელებს რომ ჭკუიდან შლიდა. ბალდინის, ამ მოთხოვნათა დასაკმაყოფილებლად, სენ-ანტუანის გარეუბანში ფილიალის დაარსების იდეა უხიციანებდა – ნამდვილი პატარა მანუფაქტურის, საიდანაც ყველაზე გასავლიანი ნელსურნელებანი, ასე ვთქვათ, en gros* შეზავებულნი, მშვენიერ პატარა ფლაკონებში ჩამოსხმულნი და მშვენიერი პატარა გოგონების მიერ ლამაზად შეფუთულნი, ჰოლანდიას, ინგლისსა თუ გერმანიის იმპერიაში დაიგზავნებოდა. მართალია, მსგავსი წამოწყება არცთუ მთლად კანონიერი იქნებოდა პარიზში დაფუძნებულ პარფიუმერისტისთვის, მაგრამ ამ თავისი დახვეწილი სუნამოების წყალობით მას ხომ, ბოლო ხანებში, ძლიერი მფარველები გამოუჩნდნენ... არა მარტო მისი აღმატებულება ინტენდანტი – ისეთი გავლენიანი პიროვნებებიც, როგორც პარიზის საბაჟოს ზედამხედველი, ანდა სულაც, სამეფოს ფინანსური კაბინეტის წევრი, ეკონომიკურად აღმაკავალი საწარმოების ყოველმხრივ წამქეზებელი და მხარდამჭერი ბ-ნი ფეიდო დე ბრუ... ეს უკანასკნელი სამეფო პრივილეგიის მინიჭებასაც კი ჰპირდებოდა ნართაულად – საუკეთესო რამ, რაზედაც კი შეიძლება მეწარმე კაცმა იოცნებო: საშუალება გექლევა, გვერდი აუარო ყველა სახელმწიფო თუ შიდა ამქრული წინააღმდეგობების, რაც საქმის გართულებისა და ათასგვარი სანერვიულოს თავიდან აცილებას ნიშნავს და მყარ, ვინძლო სამარადჟამო კეთილდღეობასაც კი მოასწავებს!

და კიდევ ერთ გეგმას ელოლიავებოდა ბალდინი: ეს უკვე თავისებური ანტიპოდი იყო საწარმოს გახსნის იდეისა სენ-ანტუანის გარეუბანში – არც მთლად მდაბიორთათვის განკუთვნილი, მაგრამ მაინც თვითოეულისა და ნებისმიერისათვის ხელმისაწვდომი...

და ერთიც კიდევ – სურდა ექსკლუზიური, პერსონალური სუნამოები შეექმნა მაღალი და უმაღლესი რანგის რჩეულ მომხმარებელთათვის: ისეთი სუ-

* ერთიანად, ბითუმად (ფრანგ.)

ნამოვების, თარგით შეკერილი ტანისამოსივით მხოლოდ ერთი პიროვნებისთვის რომ იქნებოდა განკუთვნილი; მხოლოდ ამ პიროვნებას ექნებოდა უფლება ესარგებლა ამ სუნამოთი, თავის სახელი მიენიჭებინა მისთვის. წარმოდგენაში ეხატებოდა სუნამოები: „მარკიზ დე სერნეი“, „მარშალი დე ვიარი“, „ლუკა დ'ეგიონი“... ეზმანებოდა სუნამო „მარკიზა დე პომპადური“ და ასევე, თქვენ წარმოიდგინეთ, „მისი უდიდებულესობა მეფე-ხელმწიფე“ – დახვეწილ, აქატის ქვის დაწანანაგებულ ფლაკონში, ჭედური ოქროთი მოპირკეთებულსა და ფსკერის შიდა ზედაპირზე ამოტვიფრული სადა წარწერით: „ჯუზეპე ბალდინი. მენელსაცხებლე“. ხელმწიფისა და მისი სახელი – ერთსადაიმდევე საგანზე... აი, ასეთ მწვერვალებს მოედო ბალდინის ფანტაზია! გრენუი კი დაავადდა. ეს ოხერი გრიძალი კიდე – ღმერთმა აცხონოს მის სული – ზომ ფიცულობდა და იღმერთებოდა, ბიჭი არასოდეს ავადმყოფობს, მისთვის ყველა სენი იოლია, შავი ჭირიც ვერას ავენებსო... ახლა, რომ აიღოს და მოკვდეს?! საშინელებაა! ოცნება ოცნებად დარჩება – მანუფაქტურაზე, მშვენიერ პატარა გოგონებზე, პრივილეგიებზე, სამეფო სუნამოზე...

ბალდინიმ გადაწყვიტა, ყოველი ღონე ეხმარა მოწაფის ძვირფასი სიცოცხლის გადასარჩენად. ბრძანება გასცა, გრენუი მაღლა აეყვანათ და სუფთა ლოგინში ჩაეწვინათ; უბრძანა, საწოლზე დამასტის თეთრეული გადაეფარებინათ, პირადად გამოიღო ხელი ვიწრო ტახტის ზედა სართულზე ატანაში, მიუხედავად იმისა, რომ გული ერეოდა ბებერების, ჩირქოვანი იარებისა და ძირმაგარების შემხედვარეს. ცოლი აიძულა, ღვინოში დამბალი წიწილის ბულიონი მოეშხადებინა ავადმყოფისათვის. იმ უბნის საუკეთესო ექიმიც მიიწვია – ვინმე პროკოფი, რომელიც მხოლოდ მაშინ თანხმდებოდა ავადმყოფის მონახულებას, თუ ფულს – ოც ფრანკს! – წინასწარ უხდიდნენ.

ექიმი მოვიდა, გრძელი, ცვილისფერი თითებით ზეწარი გადასწია, მხოლოდ თვალი შეავლო გრენუის სხეულს, რომელიც მართლა ისე გამოიყურებოდა, თითქოს ასი ტყვია ერთად დაახალესო, და ისე დასტოვა ოთახი, არც კი გაუხსნია ჩანთა, მუდმივად თან რომ დაათრევდა კუდში მიმყოლი მისი თანაშემწე. სრულიად ეჭვმიუტანელი შემთხვევაა – განუცხადა მან ბალდინის. ლაპარაკია შავი ყვავილის ათამანგურ სახესხვაობაზე, in duo* ჩირქოვან წითელასთან, stadio ultimo.** მკურნალობა უსარგებლოა თუნდაც იმიტომ, რომ შეუძლებელია წესისამებრ სისხლის გამოშვება; გამწოვი მილი არც გაჩერდება ამ ხრწნად სხეულში, რომელიც გვამს უფრო წააგავს, ვიდრე ცოცხალ ორგანიზმს და მიუხედავად იმისა, რომ ამ ავადმყოფობისთვის დამახასიათებელი შავი ჭირის სუნი ჯერ არ იგრძნობა – რაც თავისთავად საოცარია და, მეცნიერული თვალსაზრისით, გარკვეულად კურიოზულიც – ეჭვი არაა, უახლოეს ორმოცდარვა საათში დაავადებას ლეტალური შედეგი ექნება. ეს ისევე უეჭვოა, როგორც ის, რომ მას ექიმი პროკოფი ჰქვია. შემდეგ ექიმმა დიაგნოზის დასმითვის კიდევ მოითხოვა ჰონორარი, ისევ ოცი ფრანკი, მათგან ხუთის დაბრუნებას დაპირდა იმ შემთხვევაში, თუ გვამს მის განკარგულებაში გადასცემდნენ – კლასიკური სიმპტომატიკის დემონსტრირე-

* დუეტში, წყვილად (ვულგ. ლათ.)
** ბოლო სტადია

ბის მიზნით – და მოვალეობააღსრულებულსახიანი ესკულაპი ღირსეული თავის დაკვრით დაემშვიდობა ვაჭარ-მენელსაცხებლეს.

გიჟს დაემგვანა ბაღდინი. უაზროდ მოთქვამდა სასოწარკვეთილი, კენესოდა და თითებს იჭამდა, თავის სვე-ბედზე გულარძნილი. უმნიშვნელოვანეს, შეიძლება ითქვას, საეტაპო წარმატების მთელი იმედები წყალში ჩაეყარა... არადა, სულ აგერ, ხელის გაწვდენაზე იყო იღბალი! თავის დროზე მას პელისიემ და მეტისმეტად ლიბერალმა ამქართა საძმომ უშალა ხელი; ახლა კი ამ ბიჭმა, ახალ-ახალ სურნელთა ამ უძირო ქვევრმა, ამ უსახლკარო ნაბიჭვარმა, მისივე წონა ოქროშიც რომ არ გაიცვლება, მოახერხა – ზუსტად ახლა, როცა ასეთი პერსპექტივები გაჩნდა – ხელი გამოეკრა რაღაც ყვავილოვანი ათაშანგისა და ჩირქოვანი წითელასათვის, და ისიც როგორაო? – *ინ სტადიო ულტიმო!* რატომ ორი წლის შემდეგ არა? ან სულ ერთი წლის შემდეგ მაინც? იმ დრომდე ხომ შეიძლებოდა მისი ძირისძირამდე ამოხაპვა, ვერცხლის მადაროსავით გამოთხრა, ოქროს ვირივით... მერედა მომკვდარიყო, წყნარად და მშვიდად. გეგო-ნოს! ის ახლა კვდება, აგერ, ორმოცდარვა საათში ჩაძაღვლებო!

ერთი პირი ისიც გაიფიქრა – მდინარის გაღმა, ნოტრ-დამს გადასულიყო, ელოცა, სანთელი დაენთო და ღვთისმშობლისათვის გრენუის გამოჯანმრთელება ეთხოვა, მაგრამ მერე უარყო ეს აზრი, ვინაიდან დრო მოჭრით ჰქონდა. მოარბებინა ქაღალდი, მელანი, მოიმიზეზა – თავად ვიმორიგეებო – და ცოლი ავადმყოფის ოთახიდან გაისტუმრა. სკამზე ჩამოჯდა საწოლთან, მუხლებზე დასტა ქაღალდები დაიწყო და უკვე მელანში ჩაწობილი, მზაკალმით ხელში შეეცადა გრენუი პარფიუმერული აღსარებისკენ მიედრიკა. ნუსდუმს, ღმერთმანი, ნუ ჩაიტანს საფლავში ამ განძს, საკუთარ თავში რომ დაატარებს! ისედაც ხანმოკლე სიცოცხლის ამ უკანასკნელ საათს ნუ წაიწყმიდავს ახალი ცოდვით – ანდერძივით უნდა გადასცეს ცოდნა ღირსეულს, რათა შთამომავლობას არ წაართვას ეს დიდებული არომატები! იგი, ბაღდინი, საუკეთესოდ წარმართავს ამ ანდერძის აღსრულებას, აძაღვლებულ სურნელთა ფორმულების ამ ზედწერილ ფიცარს! მსოფლიოს აზიარებს! ხოლო თავად გრენუის სახელს – უკვდავყოფს, და უკვდავყოფს სამარადისოდ! ყველა წმინდანს ფიცავს, მის სუნამოთაგან საუკეთესო თავად ხელმწიფის ფერხითი აღმოჩნდება – ჭედური ოქროთი მოსევადებული აგათის ფლაკონი, ზედ ამოტვიფრული მიძღვნით: „პარიზელი მენელსაცხებლის, ჟანბათისტ გრენუისაგან“... ასე ლაპარაკობდა, უფრო სწორედ, ეჩურჩულებოდა ბაღდინი გრენუის ყურს, სულმოუთქმელად ეფიცებოდა, ეკვდრებოდა, ამუნათებდა და ეპირფერებოდა.

ოღონდ ამო იყო ყველაფერი ეს. არაფერი ამოსდიოდა გრენუის, მოთეთრო ლორწოსა და სისხლნარევი ჩირქის გარდა. ჩუმად იწვა დამასტის ზეწარზე, ამ საზიზღარ სითხეს ადენდა და არა თავის განძს, არა იმ ფარულ ცოდნას. არა ფორმულა არ დასცდენია, არცა რეცეპტი. ბაღდინი მზად იყო მოეხრჩო, მზად იყო მისი უძღური სხეულიდან ამოეგლიჯა ძვირფასი საიდუმლო – იოტისოდენა იმედი მაინც რომ ჰქონოდა... ან მთლად ასე ბირდაბირ წინააღმდეგობაში არ ყოფილიყო მოყვასისადმი ქრისტიანული სიყვრულის მცნებასთან!

და ასე, მთელი ღამის განმავლობაში, ენას უჩლექდა და ბუღბუღივით უგალობდა ბაღდინი. გულზიდვის მომგვრელ ზიზღს არ ეპუებოდა და ფუს-ფუსებდა ცოცხალ-მკვდარი შეგირდის გარეშემო. სველ ტილოებს უფენდა ოფლით დაცვარულ შუბლზე და საპნით გაპოხილს – მფეთქავ იარებზე; კოვზით ასმევედა ღვინოს, რათა ავადმყოფს ენა გაექანებინა – სულ ამაოდ! განთიადისას ბაღდინი მოტყდა. ოთახის კუთხეში, სავარძელში მიესვენა და თავის უილაჯობას მოსთქვამდა. თვალმოუშორებლად შეჰურებდა საწოლს, სადაც კვდებოდა გრენუის პატარა სხეული, რომლის არც გადარჩენა შეეძლო და არც გაძარცვა – კვდომის პროცესის ცქერადა შეეძლო მხოლოდ. თავს იმ კაპიტანივით გრძნობდა, რომელსაც თვალწინ ეღუპება გემი და მთელი მისი სიმდიდრეც ზღვის უფსკრულში მიაქვს...

უეცრად მომაკვდავმა ტუჩები განახვნო და ჩუმი, ოღონდ მტკიცე, მკაფიო ხმით იკითხა:

– ნუთუ, მეტრ, გამოწურვისა და გამოხდის გარდა, სხვა არა საშუალება არაა სურნელის მისაღებად?

ბაღდინიმ იაზრა, ამ სიტყვებმა მხოლოდ ჩემს წარმოსახვაში, ან სულაც მიღმიერ სამყაროში გაიჟღერაო და მექანიკურად უპასუხა:

– კი, არის, როგორ არა...

– მაგალითად? – ისევ გაიხშიანა კითხვამ და ამჯერად ბაღდინიმ გრენუის ტუჩების მოძრაობას შეასწრო თვალი. „აი, მორჩა – გაიფიქრა – აგონია თუ ეწყება უკვე...“ წამოდგა, საწოლთან მივიდა და მომაკვდავისაკენ დაიხარა. გრენუი თვალახელილი იწვა და ისეთივე დადარაჯებული შხერით შეჰურებდა, როგორც იმ პირველ შეხვედრისას.

– რომლები? – ისევ იკითხა გრენუიმ.

ბაღდინი გამოფხიზლდა, შეეცადა მოწოლილი ბოლმაც ჩაეცხრო – ბოლოსდაბოლოს, ხომ არ შეიძლება მომაკვდავს მის უკანასკნელ თხოვნაზე უთხრა უარი – და მშვიდად უპასუხა: სამი ასეთი ხერხია, შვილო ჩემო – *enflourage a chaud, enflourage a froid, enflourage a l'huile** – ესენი გამოხდაზე გაცილებით უკეთესია და მათ უნახესი სურნელის მისაღებად იყენებენ...

– სად?

– სამხრეთში, – იყო პასუხი, – ქალაქი გრასი საერთოდ მაგითაა ცნობილი.

– კარგით, – უპასუხა გრენუიმ.

და თვალეები დახუჭა. ბაღდინი ნელ-ნელა წამოდგა, მოხიკა ცარიელი საწერი ფურცლები და სანთელი ჩააქრო. გარეთ უკვე ალიონი მომდგარიყო.

* ცხელი, ცივი და ზეთოვანი ანფლურაჟი (ფრ.)

მღვდლის გამოძახება იქნება საჭიროო – გაიფიქრა, უნებურად პირჯვარი გადაიწერა და ოთახიდან გავიდა.

გრენუი, ოღონდაც, არ მომკვდარა. მხოლოდ ღრმად ეძინა, ძალიან ღრმად, უსიზმროდ და უშფოთველად. იარები თანდათანობით შეუშრა სხეულზე, ჩირქოვანმა კრატერებმა აპკის გადაკვრა იწყეს, მუწუკებმა – პირის შეკვრა. ერთი კვირის თავზე სრულიად საღსალამათი ჩავიდა ქვევით.

21

ახლა ის სამზრეთისკენ გამგზავრებაზე ოცნებობდა – იქით, სადაც შესაძლებელი იქნებოდა იმ ახალი ტექნიკის შესწავლა, რომელზედაც მოხუცი უკვებოდა; ოღონდ ამის ხმამაღლა თქმაც კი არ ღირდა: ის ჯერ მხოლოდ მოწაფე იყო – ანუ, არარაობა. პირდაპირ რომ გითხრა, – ეუბნებოდა ბალდინი, რომელსაც მისი მკვდრეთით აღდგომით გამოწვეული სიხარულის შეტევა უკვე გადაეტანა, – არარაობაზე ნაკლებიც ხარ, ვინაიდან წესიერ მოწაფეს ყოველად უზადო წარმოშობა უნდა ჰქონდეს, კანონიერ ქორწინებაში მყოფი მშობლები და ამქარში ჩენილი ნათესავ-ახლობლებიც ყავდეს, ოსტატთან წესითა და რიგით გააფორმოს ხელშეკრულება სწავლების თაობაზე, შენ კი არაფერი მსგავსი არ გაგაჩნია... თუ იგი, ბალდინი, ერთ მშვენიერ დღეს მაინც დათანხმდება დაეხმაროს მას შეგირდად გახდომაში, ამას მხოლოდ მისი გარკვეული ნიჭიერების გამოისობით გააკეთებს და ისიც მხოლოდ იმ შემთხვევაში, თუ გრენუი შემდგომაც სანაქებოდ მოიქცევა. თუმცა იგი, ბალდინი, ბევრჯერაც გატანჯულა ამ თავისი უსაზღვრო გულკეთილობის გამო, არადა ხასიათის შეცვლის ძალაც რომ არ შესწევს!..

რად თქმა უნდა, მის სიკეთეს, დაპირების შესასრულებლად, საკმაო ხანი დასჭირდა – კერძოდ, მთელი სამი წელიწადი. ამ დროის განმავლობაში ბალდინიმ საკუთარი ოცნებების განხორციელებაც შესძლო: დააარსა მანუფაქტურა სენ-ანტუანის გარეუბანში, თავისი ბრწყინვალე სუნამოებით სამეფო კარის პარფიუმერის წოდებასაც გამოჰკრა ხელი და სამეფო პრივილეგიებიც მიითვალა. მისი ნატიფი ნელსაცხებლები თუ სუნამოები სადღა არ სადღებოდა: პეტერბურგში, პალერმოში, კოპენჰაგენში... მუშკზე დამზადებული ერთი მათგანი დატაცებაზე იყო კონსტანტინოპოლში, იქ კი, ღმერთია მოწმე, საკუთარი ნაწარმი არ აკლდათ. ლონდონის სიტის ელეგანტურ კანტორებში მისი სუნამოების სურნელი ისევე მტკიცედ იდგა, როგორც პარმის სასახლეში; ვარშავის ციხე-დარბაზი ისევე გაეჟღინთათ, როგორც გრაფ ფონ-უნდ-ცუ ლიპე-დეტმოლდის კარ-მიდამო და საერთოდ, სამოცდაათი წლის ბალდინი, უკვე შერიგებული იმ აზრს, რომ სიდატაკეში აღმოხდებოდა სული სადღაც იქ, მესინას ახლო, ახლა, სიბერეში, ევროპის უცნობილესი მენელსაცხებლისა და პარიზში უმდიდრესი ბურჟუას მდგომარეობას ეწია.

1756 წლის დასაწყისში – ამ დროისათვის ძველი სახლის გვერდით კიდევ ერთი სახლი მიიშენა, რომელიც მხოლოდ საცხოვრებლად იყო გაწყობილი, რადგან ძველი სხვენამდე გახლდათ გამოვსებული ათასგვარი არომატული ნივთიერებებითა და სუნელებით – მან გრენუის აუწყა, რომ თანახმაა გაუშვას იგი, ოღონდ სამი წინაპირობით: ერთი რომ, მას უფლება არ ჰქონდა დაემზადებინა ბალდინის ჭერქვეშ შექმნილ სუნამოთაგან თუნდაც რომელიმე და არც მათი რეცეპტის გადაცემა შეეძლო მესამე პირისთვის; მეორე – უნდა დაეტოვებინა ქალაქი პარიზი და ბალდინის სიცოცხლეში ფეხიც არ შემოედგა იქ; და მესამე – სრული დუმილი უნდა დაცვა პირველ ორ პირობაზე. დაე, ყველა წმინდანი, მშობელი დედის საბრალო სული და საკუთარი ღირსება დაიფიცოს, რომ...

გრენუიმ, რომელსაც არც ღირსება გააჩნდა, არც წმინდანებისა სწამდა რამე და არც საკუთარი დედის საბრალო სულისა, უყოყმანოდ დაიფიცა სამივე. ყველაფერსაც დაიფიცავდა, სიტყვაშეუბრუნებლად მიიღებდა ბალდინის ყველა პირობას, რადგან უსიკვდილოდ სჭირდებოდა შეგირდის მოწმობა – ეს შესაძლებლობას მისცემდა შეუმჩნეველად ეცხოვრა, შეუფერხებლად ემოგზაურა და სამუშაოზეც მოწყობილიყო. დანარჩენს მისთვის განა რა მნიშვნელობა ჰქონდა? პარიზში არ დაბრუნდეს? რაში სჭირდება ეს პარიზი! ქალაქი მას უკვე უკანასკნელ კუთხამდე აქვს მოყნოსილი, იგი მუდამ მასთანაა, ყველა მისი სურნელითა თუ სიმყრალით... არ დაამზადოს ბალდინის მოდური სუნამოები? ვინმეს არ გადასცეს ფორმულები? თითქოსდა ათასობით ახლის დამზადება არ შეეძლოს! უკეთესებისაც კი – ოღონდ მოინდომოს! მაგრამ რომ არ უნდა? რაში სჭირდება კონკურენცია გაუწიოს ბალდინის, ან ვინ გინდა სხვა ამ ბურჟუა პარფიუმერებს! სულაც არ აპირებს ფული იშოვოს თავისი ხელოვნებით. საცხოვრებელი ფულის გამოშვებებაც კი არ უნდოდა, თუკი სხვა გზით მოახერხებდა რამეს... გრენუის მხოლოდ თავისი შინაგანი „მე“ სურდა გამოეხატა, საკუთარი თვითობა, რომელსაც უფრო მნიშვნელოვნად თვლიდა, ვიდრე ყველაფერ სხვას, რაც კი გარე სამყაროს შეეძლო მიენიჭებინა მისთვის. ამიტომაც, ბალდინის პირობები არაფრად უღივრდა.

გაზაფხულზე, მაისის ადრიაანი დილით გაუდგა გზას. ბალდინისაგან მიიღო პატარა ზურგჩანთა, ერთი ხელი პერანგი, წყვილი წინდა, ძეხვის დიდი ხეულა, ცხენის არალი ღამით შიგ გამოსახვევად და ფულად ოცდახუთი ფრანკი. “ეს დაწესებულზე გაცილებით მეტია” – უთხრა ბალდინიმ. გრენუი ხომ განათლებას ეზიარა მასთან, რისთვისაც გროშიც არ გადაუხდია. ამქრული წესებით ორი ფრანკის მიცემაა გათვალისწინებული საგზაოდ და მეტი არაფერი. მაგრამ მას, ბალდინის, საკუთარი სიკეთე ვეღარ მოუთოკავს. წარმატებას უსურვებს მომავალში და კიდევ ერთხელ მოუწოდებს, არ დაივიწყოს ფიცი! – ამ სიტყვებით მიაცილა უკანა კარამდე და ქვეყნის ოთხივე კუთხით დაულოცა გზა.

ხელი არ გაუწვდია მისთვის. საერთოდ, მუდამ ერიდებოდა მასთან მიკარებას. მუდამ ზიზღისმაგვარი მოწიწების გრძნობა ჰქონდა მის მიმართ, თითქოს უფროთხორდა რაიმე არ გადასდებოდა. თითქოსდა ეშინოდა თავი არ წაეხილწა.

ამიტომაც დაემშვიდობა სწრაფად და მოკლედ. გრენუიმ თავი დაიქნია და შე-
ბრუნდა, და გაეცალა. ქუჩაში სულიერის ჭაჭანება არ იყო.

22.

ბალდინი გაჰყურებდა გრენუის, ვიდრე იგი კუნძულისაკენ მიჩლახუნობდა
ხიდზე. პატარა, მხრებში მოხრილი, ზურგჩანთამოკიდებული – მიხრწნილ
კუზიან ბებერს წააგავდა. მდინარის გაღმა ნაპირზე, პარლამენტის შენობას-
თან, ქუჩის შესახვევში, ბალდინიმ იგი მხედველობიდან დაკარგა და უღრმესი
შვებაც იგრძნო.

არასოდეს მოწონდა ეს ყმაწვილი, არასოდეს! ახლა ხომ შეეძლო საკუთარ
თავს მაინც გამოსტეხოდა ამაში. მთელი იმ დროის მანძილზე, რაც თავის
ჭერქვეშ ითმენდა და თან, მარტივად რომ ვთქვათ, მარცვავედა, სულიერი წო-
ნასწორობა მუდამ დარღვეული ჰქონდა. ბალდინის ახლა უმწიკვლო ზნეობის
ადამიანად ესახებოდა თავი, ვინც სჩადის რაღაც აკრძალულს, რომელიც
ბინძურ თამაშს ეწევა აკრძალული საშუალებებით, სადაც მხილების რისკი
უმნიშვნელოა, ხოლო წარმატების საწინდარი – უზარმაზარი, მაგრამ ასევე
ბევრია სანერვიულო და დიდია სინდისის ქენჯნა. და მართლაც, მთელი ამ
წლების განმავლობაში დღეც არ ყოფილა, უსიამო განცდა არ აღევენებოდა –
ასე თუ ისე, მას მაინც მოუწევს ზღოს ის ცოდვა, ამ ადამიანს რომ დაუ-
კავშირდა. „ოღონდ ჩაიაროს, – შიშნულად ლოცულობდა ისევ და ისევ, –
ოღონდ კი საშუალება მომცეს ამ გარიგების შედეგებით ვისარგებლო და
ბოლოს უზარმაზარი პროცენტების გადახდა არ მომიხდეს სარფიდან! ოღონ-
დაც კი ყველაფერი კარგად დამთავრდეს! დიახ, ცუდად ვიქცევი, მაგრამ
უფალი ამაზე თვალს დახუჭავს, რა თქმა უნდა და შემინდობს, რაღა თქმა
უნდა, და... მთელი ჩემი ცხოვრების მანძილზე ხომ ზშირად მცდიდა – და ან
რას მერჩოდა ნეტავი, ასე რომ სრულ სამართლიანობას გამოიჩენს, თუ ამ-
ჯერად მაინც შემიწყნარებს! თანაც რაშია ჩემი დანაშაული, თუ ეს საერთოდ
დანაშაულია? უმეტესად იმაში, რომ ოდნავ დაგარღვიე ამქრული წესი, ვიღაც
უბირის ზეგარდმო ნიჭი გამოვიყენე და მისი წარმატებები ჩემს წარმატებებად
გავასაღე... და განა ეს დანაშაულია? სხვები მთელი ცხოვრება იტყუებიან, მე
კი ოდნავ თუ გადაუხვვიე იმავე ამქრული ზნეობის კანონს და ისიც სულ რამ-
დენიმე წლის განმავლობაში... და ისიც მხოლოდ იმიტომ, რომ ამისთანა დაუ-
ჯერებელი შემთხვევა მომეცა. იქნებ ეს არც იყო შემთხვევითი – იქნება და
თავად უფალმა მომიგზავნა სახლში ვიღაც მჩხიბავი, რათა იმ დამცირებისთ-
ვის დავეჯილდოვებინე, რაც პელისიესა და მისი დამქაშებისაგან მქონდა
ნაწვნევი. ღვთის სამსჯავრო იქნებ სულაც პელისიეს ელის და არა მე!
სრულიად და სავსებით შესაძლებელია! ან რითი შეეძლო უფალს პელისიეს
დასჯა, თუ არა ჩემი აღზევებით? აქედან გამომდინარე, ჩემი ბედნიერება
ღვთის ნააზრევის იარაღია და არათუ უფლება მაქვს, ვაღდებულებ ვარ
მივიღო ის როგორც ასეთი, ყოველგვარი ყალბი რიდისა და მონანიების გა-
რეშე!“

ბოლო წლებში სულ უფრო ხშირად ფიქრობდა ამას ბალდინი. დილაობით, როდესაც ვიწრო კიბით დახლისაკენ ეშვებოდა, საღამოობით, როდესაც ზემოთ მიემართებოდა სალაროს შიგთავსით და შემდგომაც, როდესაც ოქროსა და ვერცხლის მძიმე მონეტებს ითვლიდა ზარდახშაში; ღამდამობით, ცოლის მხვრინავი ჩონჩხის გვერდით რომ იწვა და დაძინების ძალაც კი არ ეღვა კარს მომდგარი ბედნიერების რიდით...

ოღონდაც ახლა უკვე ამ შავბნელ აზრებს ქარი წაიღებს. საზარელი სტუმარი გაემგზავრა და აღარასოდეს დაბრუნდება, ხოლო სიმდიდრე დარჩა და მომავალიც უზრუნველყოფილია. ბალდინიმ მკერდზე დაიდო ხელი და სერთუკის ნაჭრის ქვეშ პატარა წიგნაკი მოისინჯა. წიგნაკში ექვსასი ფორმულა იყო ჩაწერილი – გაცილებით მეტი იმაზე, რის გასაღებასაც მენელსაცხე-ბლეთა რამდენიმე თაობა შეძლებდა. დღესაც რომ დაკარგოს ყველაფერი, ამ საოცარი წიგნაკის დახმარებით სულ რაღაც ერთი წლის თავზე ისევ გამდიდრდება. ჭეშმარიტად, განა რა შეიძლება ამაზე მეტი ითხოვო ღვთისგან?!

დილის მზე სხივებს ფენდა მეზობელი სახლების სახურავებს, ირეკლებოდა იქიდან და მის სახეს თბილ, მოყვითალო ნათელს ადებდა. ბალდინი ჯერ კიდევ იმ ქუჩას გაჰყურებდა, რომელიც სამხრეთით, პარლამენტის შენობისაკენ იყო გაჭიმული – და მადლიერების გრძნობა ავსებდა. გადაწყვიტა, დღესვე წავიდოდა სალოცავად მეორე ნაპირზე, ნოტრ-დამში. ოქროს მონეტას ჩააგდებს ეკლესიის ყულაბაში, სამ სანთელს დაუნთებს და მუხლმოყრილი, უფალს მადლს შესწირავს, ამოდენა ბედნიერება რომ არგუნა წილად და შურისგებისაგან კი დაიფარა.

მაგრამ მერე ისევ რაღაც ბრიყვულად შეეშალა ხელი. ნაშუადღევს, უკვე მზად რომ იყო ეკლესიაში წასასვლელად, ჭორი გავრცელდა ქალაქში, ინგლისმა ომი გამოუცხადა საფრანგეთსო. თავად ამ ხმებმა იგი არცთუ ძალიან ააღელვა, მაგრამ რადგანაც სწორედ იმ დღეებში სუნამოების მთელი პარტიის გაგზავნას აპირებდა ლონდონს, ეკლესიაში წასვლა მაინც გადასდო. ამის მაგივრად, ქალაქში გავიდა ამბის გასაგებად, იქიდან კი თავის მანუფაქტურაში, სენ-ანტუანის გარეუბანში, რათა ლონდონში საქონლის გაგზავნა დროებით შეეჩერებინა. ღამით, საწოლში, დაძინების წინ, გენიალური აზრი გაუჩნდა: ახალი სამყაროს კოლონიებისათვის გამართულ მომავალ საბრძოლო მოქმედებებთან დაკავშირებით მოდაში შემოედო უახლესი სუნამო „კვებეკის სიამაყე“, მძაფრი ჰეროიკული სურნელით, რომლის კომერციული წარმატება – და ეჭვიც არ ეპარებოდა ამაში – სრულად აუნაზღაურებდა ინგლისთან ჩაშლილი შეთანხმების ზარალს. ამ ტკბილი-ნეტარი აზრებით გათანგული, მეტრ ბალდინი შვებით მიეყრდნო ბალიშს, სიამით შეიგრძნო ბალიშის ქვეშ ამოდებული ფორმულებიანი წიგნაკის სიმკვრივე და მიიძინა, რათა აღარასოდეს გამოღვიძებულიყო.

საქმე ისაა, რომ ღამით მცირე მასშტაბის ადგილობრივი კატასტროფა მოხდა, რომელმაც – რასაკვირველია, სათანადო დროის გასვლის შემდეგ – მეფეს საბაბი მისცა ბრძანება გაეცა, რათა პარიზის ყველა ხიდზე ჯერი-ჯერზე აეღოთ იქ მდგარი საცხოვრებელი შენობები: ყოველგვარი ხილული მიზეზების გარეშე ჩაიშალა ზარაფ-მეკერმეთა ხიდი – დასავლეთის მხრიდან

მესამე და მეოთხე ბურჯებს შორის. საოცრად სწრაფად ჩამოვარდა მდინარეში ორი სახლი, ისე რომ მაცხოვრებელთა გადარჩენის არავითარი შესაძლებლობა აღარ იყო. საბედნიეროდ, მხოლოდ ორი ადამიანი დაიღუპა, კერძოდ – ჯუზეპე ბალდინი და მისი მეუღლე ტერეზა. მსახურები ღამეს სახლში არ ათევენ – ზოგი საკვირაოდ დაითხოვეს, ზოგიც თვითნებურად იყო გასული. შენიემ, რომელიც მხოლოდ დილით, ოდნავ ნასვამ მდგომარეობაში დაბრუნდა შინ – უფრო ზუსტად, სურდა დაბრუნებულიყო, სახლი კი აღარ დახვდა – მძიმე ნერვული შოკი გადაიტანა. ოცდაათი წელი ელოლიავებოდა იმედს, რომ ბალდინი, რომელსაც არც შვილები ჰყავდა და არც ნათესავეები, ანდერძს მის სასარგებლოდ შეადგენდა. და ყოველივე მეყვსეულად გაქრა – მთელი მემკვიდრეობა, სახლი, ფირმა, ნედლეული, სახელოსნო, თვითონ ბალდინი – და თავად ანდერძიც კი, რომელშიც, სავარაუდოა, უცილობლად შეტანილი იქნებოდა პუნქტი მანუფაქტურის საკუთრების შესახებ...

პოვნით ვერაფერი იპოვნეს. ვერც გვამები, ვერც ფულიანი ზარდახმა, ვერც წიგნაკი იმ ექვსასი ფორმულით. ერთადერთი, რაც ჯუზეპე ბალდინის, ევროპის წარჩინებულ მენელსაცხებლისაგან დარჩა – მუშკის, ძირას, ძმრის, ლავანდისა თუ ათასი სხვა ნივთიერების შერეული სურნელი იყო, რომელიც კიდევ მრავალი კვირის მანძილზე მიჰყვებოდა სენის დინებას, პარიზიდან ვიდრე ჰავრამდე.

პარი II

23.

გრენუი უკვე ორლეანის გზას ადგა, ჯუზეპე ბალდინის სახლი რომ ჩამოშვავდა; უკან ჩამოიბოვა დიდი ქალაქის ანაორთქლების არე და ყოველ ნაბიჯზე, რაც უფრო შორდებოდა პარიზს, ჰაერი სულ უფრო და უფრო სუფთა, კამკამა, გამჭვირვალე ხდებოდა. აღარც უწინდელივით გაჯერებული იყო და ყოველ ფეხის გადადგმაზე ასობით, ათასობით სხვადასხვა სუნის მიერ ურთიერთგანდევნაც შეწყდა. ის ცოტა კი, რაც დარჩა – შარავზის მტკრის, მდელიობის, ნიადაგის, მცენარეების, წყლის სუნი – გრძელი ჩრდილებივით იყო გაფენილი მიწაზე, ალაგ-ალაგ იბურცებოდა, ოდნავ ლივლივებდა და თითქმის არსად წყდებოდა ისე მკვეთრად, როგორც იქ, ქალაქის შუკებში.

გრენუი ხსნასავით აღიქვამდა ამ ბუნებრივ უბრალოებას. ყნოსვას ელამუნებოდა ეს უშფოთველი არომები. აღარ აძალებდა თავს, ყოველ ჩასუნთქვას დაკვირვებოდა, რათა რაიმე უსიამო, მოულოდნელი, მტრული არ ეკრა, ან

სულაც რაიმე საამური არ გამოჩნებოდა. პირველად შეძლო ესუნთქა თითქმის თავისუფლად და დაძაბულად აღარ მოეწონა ყოველი კუთხე. „თითქმის“ ვთქვით, რადგან ჭეშმარიტად თავისუფლად, თავისებური ფილტრაციის გარეშე, გრენუის ცხვირში ვერაფერი შეაღწევდა. მაშინაც კი, როცა არავითარი საბაბი ამისათვის არ არსებობდა, ინსტინქტური სიფრთხილე მაინც ფხიზლობდა მასში, მუდამ ძირისძირამდე განჩხრეკდა ხოლმე იმას, რაც გარე სამყაროდან მოდიოდა და რაც საკუთარი თავის შიგნით უნდა შეეშვა. ოღონდაც ეგაა, მისი პიროვნებისათვის დამახასიათებელი ამ შეზღუდულობის მიუხედავად, რაც უფრო შორდებოდა პარიზს, მით უფრო უკეთ გრძნობდა თავს: სულ უფრო და უფრო იოლად სუნთქავდა, უფრო სწრაფად მიაბიჯებდა და ხანდახან წელშიც კი სწორდებოდა; ცდილობდა, გამართულად ევლო — მოკლედ, შორიდან ლამის ერთი ჩვეულებრივი შეგირდით გამოიყურებოდა, ანუ როგორც სრულიად ჩვეულებრივი ადამიანი... ხალხისაგან მოშორება მეტი თავისუფლების გრძნობას ანიჭებდა, პარიზში კი ხალხი უფრო მჭიდროდ ცხოვრობდა, ვიდრე დელამიწის ნებისმიერ სხვა ქალაქში: ექვსასი, შვიდასი ათასი კაცი მაინც დაფუთფუთებდა ქუჩებსა და მოედნებზე, სახლები სარდაფებიდან სხვენამდე იყო გამოტენილი, ნებისმიერი კუთხე-კუნჭული — ადამიანების ჯგროთი ამოვსებული და ნებისმიერ ქვას, მიწის ნებისმიერ ნაგლეჯს, ადამიანების სიმყრალე სდიოდა.

მხოლოდ ახლა, ნელ-ნელა რომ გასცილდა იქაურობას, გრენუი მიხვდა, ამ თვრამეტი წლის მანძილზე როგორ ხუთავდა, როგორ მძიმედ, ჭეჭეა-ქუხილისწინა ჰაერივით აწვა ქალაქის ქოთი. აქამდე ეგონა, სამყარო საერთოდ ასეთია და მისგან თავის დაფარვაა საჭირო, საკუთარ თავში ჩაფლობა, გამოკეტვა, გვერდზე გადაგომა; თურმე ეს სამყაროს ბრალი არ ყოფილა — ადამიანების ბრალი იყო. ახლა ეჩვენებოდა, რომ ასეთ სამყაროსთან — სამყაროსთან, სადაც სულიერი არ ჭაჭანებდა — სავსებით შესაძლო იყო შერიგება...

მოგზაურობის მესამე დღეს, გრენუი ქალაქ ორლეანის სუნთა არეში მოხვდა. დიდი ქალაქის სიახლოვის რაიმე ნიშნების გამოჩენამდე კარგა ხნით ადრე მოეწონა ადამიანის არსებობის კვალის გამძაფრება ჰაერში და ახლა გადაწყვიტა, ადრინდელი სურვილის საწინააღმდეგოდ, ორლეანისათვის გვერდი აეველო: არ სურდა, ასე ჩქარა მოსწყდომოდა სუნთქვის ახლახან შეძენილ თავისუფლებას, ისევ ჩაფლულიყო ადამიანების გარემოცვის ყროლში. დიდი წრე დაარტყა, შემოუარა ქალაქს, შატო-ნეფის შორიანლო გამოვიდა ლუარასთან და სოფელ სიულისთან გადალახა მდინარე. სიული მას ძეხვის სუნით შეეგება. გრენუიმ ერთი ხვეულა ძეხვი იყიდა, მდინარის კალაპოტს ზურგი აქცია და ქვეყნის სიღრმეში შეუხვია.

შემდგომ უკვე არა მხოლოდ ქალაქებს, სოფლებსაც გაურბოდა. სულ უფრო გამჭვირვალე, ადამიანებისაგან სულ უფრო უკარები ჰაერით მთვრალი. რომელიმე დასახლებას, ან ცალკე მყოფ მოსახლეს მხოლოდ იმისთვის თუ მიადგებოდა, სურსათის მორიგი მარაგი მიეღო, შეიძენდა პურს და ისევ ტყეში იკარგებოდა. რამდენიმე კვირის თავზე, სოფლებს შორის გზებზე კანტიკუნტად შემოყრილი მგზავრების სუნიც კი აღიზიანებდა. ვეღარ იტანდა ვერც გლეხების სუნს, მდელოებზე ლორთქო ბალახს რომ თიბავდნენ;

შიშნაკრავივით გაურბოდა ყოველ ცხერის ფარას — არა ცხერების გამო, არამედ რათა მეცხვარეების სუნს გასცლოდა. გრენუი განურჩევლად მიაბიჯებდა პირდაპირ ველეებზე, ოღონდ დიდ წრეს არტყამდა, როგორც კი შეიყნოსავდა რეიტარების ესკადრონს სუნს — ცხენოსანისთვის რამდენიმე საათის სავალზე. სულაც არ ეშინოდა, სხვა შეგირდებისა და მაწანწალებით, რომ საბუთებს შეუმოწმებდნენ და სამხედრო სამსახურში უკრავდნენ თავს — ისიც არ იცოდა, რომ ომიანობა იყო — უბრალოდ, მხედრების სუნი ეზიზღებოდა. ასე, თავისთავად და განსაკუთრებული მიზეზების გარეშე, მისი მიზანი — რაც შეიძლება სწრაფად მიეღწია გრასამდე, ნელი-ნელ გაფერმკრთალდა. ეს გეგმა, ისევე როგორც მისი სხვა მსგავსი გეგმები თუ სურვილები, ასე ვთქვათ, თავისუფლებაში განზავდა: გრენუი აღარც მისწრაფვოდა საითმე — მხოლოდ შორს ადამიანებისაგან, და რაც შორს, მით უკეთესი...

ბოლო დროს მხოლოდ ღამიანობით იწყო გადაადგილება; დღისით ტყისპირში შეძვრებოდა ხოლმე, ბუჩქის ქვეშ ეძინა ან ლელიანში იმალებოდა, ყველაზე მიუდგომელ ადგილებში. მოიკუნტებოდა ცხოველივით, თავსა და ტანზე ცხენის არალს იფარებდა, პირს მიწისაკენ იხამდა და ცხვირს მოხრილ იდაყვში ჩაფლავდა ხოლმე, რათა არც ერთი, სულ ოდნავი უცხო სუნიც არ შეჭრილიყო მის ზმანებაში... დაისის ჟამს იღვიძებდა, მოყნოსავდა ყველაფერს გარშემო და მხოლოდ როცა დარწმუნდებოდა, ყველაზე მუყაითმა გლეხმაც დატოვა მინდვრები და ბოლო თავზეხელაღებულმა მოგზაურმაც — ანუ სიბნელის დადგომასთან ერთად ჭერიცა და საყუდარიც ორივემ გამოჩანაო, გამოძვრებოდა საკუთარი თავშესაფრიდან და სვლას აგრძელებდა. გზის გაგნებისთვის სინათლე მაინც არ სჭირდებოდა: მაშინაც კი, როცა დღისით-მზისით მიალაჯებდა, თვალები ხშირად მილულული ჰქონდა, საათობით, და ყნოსვასღა იყო ხოლმე მინდობილი. ფერადოვანი ლანდშაფტი, სანახების სიმკვეთრე თვალს სჭრიდა. მთვარის სინათლე უფრო მოსწონდა — უფერული იყო და მხოლოდ მკრთალად აჩენდა არემარეს მნათობი თალხ ფერს აკრავდა დედამიწას და მთელი ღამით ხუთავდა სიცოცხლეს: თითქოსდა თუჯით ჩამოსხმული სამყარო, მისივე სულის მსგავსი, სადაც არა იძროდა რა ქარის გარდა, ჩრდილივით რომ დაეცემოდა ხოლმე ფერფლისფერ ტყეს, და სადაც მხოლოდ ბუნების ათიათასგვარი სურნელი იდგა — ერთადერთი სამყარო, მისივე სულიერი სამყაროს ანარეკლი...

და ასე მიიწევდა იგი სამხრეთის მიმართულებით. დაახლოებით მაგ მიმართულებით, რადგან არა ჩვეულებრივი მაგნიტური, არამედ საკუთარი ყნოსვის კომპასით ვიდოდა და ეს საშუალებას აძლევდა გვერდი აევლო ყოველი ქალაქის, სოფლის, თუ დაბა-დასახლებისათვის. კვირეები გავიდა ისე, სულიერს არ გადაჰყვია არსად. ლამის ირწმუნა კიდევ, სრულიად მარტო იყო ამ ჩამუქებულ, მთვარის ცივი ათინათით მოფენილ სამყაროში, მის ამ უზუსტეს ხელსაწყოს რომ არ მიენიშნებინა რაღაც უკეთესის არსებობაზე!

ადამიანები ღამითაც ხომ არსებობდნენ, ოღონდაც თავ-თავიანთ მოხერხებულ სოროებში იმალებოდნენ ვირთხებივით და ეძინათ. გარემო არ იწმინდებოდა მათგან, ვინაიდან ისინი ძილშიაც გამოსცემდნენ სუნს, მათი სამყოფელის ღია ფანჯრებიდან და ხვრელებიდან გარეთ რომ ჟონავდა, და ერთის

შეხედვით, საკუთარ თავს მინდობილ დედა-ბუნებას წამლავდა; და რაც უფრო ეჩვეოდა გრენუი დაწმენდილ ჰაერს, მით უფრო აწვალებდა ადამიანის სუნი, რომელიც სრულიად მოულოდნელად, უეცრად შეეეროდა ზოლმე გარემოს, თხის სიმყარაღესავით სახიზლარი და მწყემსების თავშესაფრის, მენახშირის ქოხისა თუ ყაჩაღების ქვაბულის არსებობას ამცნობდა... და გრენუიც მით უფრო მგრძობიარედ რეაგირებდა ამ ცოცხალი ლემის სუნზე, სულ უფრო და უფრო შორს იღტვოდა, და ასე მიჰყავდა საკუთარ ცხვირს ქვეყნის დასა-ლიერზე, სულ უფრო აშორებდა ადამიანებს, სულ უფრო გამიზნულად მიაქანებდა უკიდურესი მარტოობის პოლუსისაკენ.

24.

და ეს პოლუსი, ანუ ამ ერთ ცალკე აღებულ სახელმწიფოში ადამიანებისა-გან ყველაზე დაშორებული წერტილი — ოვერნის ცენტრალურ მასივში, კლერმონიდან დაახლოებით ხუთ მილზე, სადაც ორი ათასი მეტრის სიმაღ-ლეზე, ვულკან პლონ-დიუ-კანტალის მწვერვალი გახლდათ.

თავად ვულკანი უზარმაზარ კონუსს წარმოადგენდა, მონაცრისფრო-ტყვიისფერი ქანებისაგან შედგებოდა და დაუსრულებელი, უღიმღამო ზეგნე-ბით იყო გარშემორტყმული, რომლებიც მხოლოდ აქა-იქ იფარებოდა რუხი ხავსითა და ასევე რუხი, მიწაზე განრთხმული ბუჩქნარით. ზოგან კიდევ ყავ-ისფერი კლდეები ამოჩრილიყო დამპალი კბილებივით, და ხანძრებით შერუ-ჯული ხეები. ეს მხარე მზიან დღეებშიც კი ისე უსიცოცხლოდ და ნაღვ-ლიანად გამოიყურებოდა, ამ ლატაკი პროვინციის ყველაზე გაღლეთილი მეცხვარეც კი არ გამოჩეკავდა აქეთ თავის ფარას; ხოლო ღამ-ღამობით, მთვარის ფერმკრთალ ნათელში, ეს ღვთისაგან მივიწყებული ადგილი მთლად საიქიოსავით გამოიყურებოდა. მთელს სამეფოში ძებნილმა ყაჩაღმა ლებრენ-მაც კი სევენაში გაჭრა არჩია — სადაც დაიჭირეს კიდევ და ოთხში ამოიღეს ცოცხლად — აქ, პლონ-დიუ-კანტალში დამალვას, სადაც მას, მართალია, ვერავინ იპოვიდა, მაგრამ სამუდამო მარტოობაში უცილობელი კვდომა კი მოელოდა და რაც, ეტყობა, უარეს უბედურებად მიაჩნდა.

გარშემო, მრავალი მილის მანძილზე, ვერც ადამიანს ნახავდით სადმე და ვერც სხვა რამ თბილსისხლიან ცხოველს — იქ მხოლოდ ღამურების გუნდი, ზოჭოები და გველგესლები სახლობდნენ, თავად მწვერვალზე კი ათწლეულო-ბით არავინ ასულა.

სწორედ ამ მთას მიაღდა გრენუი 1756 წლის აგვისტოს ღამეს. გან-თიადისას წვერზე ავიდა. ჯერ კიდევ არ იცოდა, რომ ეს იყო მისი მოგ-ზაურობის ბოლო; ჯერ კიდევ ეგონა, რომ ეს მხოლოდ ერთი მონაკვეთია უფრო სუფთა ჰაერისაკენ მიმავალ გზაზე. ჩიკორივით ტრიალებდა და ყნოს-ვით ეცნობოდა ამ ვულკანური წარმოშობის უდაბნოს სანახებს: აღმოსავ-ლეთით, სადაც სენ-ფლიურის ფართო ზეგანი და მდინარე რიუს ჭაობიანი

ნაპირები გადაჭიმულიყო; ჩრდილოეთით, საიდანაც თავად მოვიდა, სადანაც მრავალი დღის განმავლობაში მოფოფხავდა კარსტულ ქედებზე; დასავლეთით – იქიდან დილის ნიავს მხოლოდ ქვისა და ხმელი ბალახის სუნი მოჰქონდა; და ბოლოს, სამხრეთით – ტრიუიერის ბნელ ხეობებამდე, საითაც, მრავალ მილზე, პლონ-დიუ-კანტალის განტოტებები იშლებოდა – ერთნაირი უკაცრიელობა მეფობდა ყველა მიმართულებით, და თუნდ ერთი ბიჯის წადგმა ერთ ან მეორე მხარეს, უკვე ადამიანებთან მიახლოებას ნიშნავდა. გრენუის კომპასის ისარმა აიწყვიტა თითქოს, წრეშიდა ტრიალებდა. აღარავითარი ორიენტირი არ არსებობდა: მან მიაღწია დასახულ სამანს, ოღონდ ხაფანგში კი მოხვდა.

როდესაც მზე ამოიწვერა, იმავე ადგილზე იდგა და ქარის მონაბერს ყნოსავდა: ცდილობდა, გაერკვია, საიდან შეიძლებოდა მოსწვდომოდა ადამიანის სუნი და ის მიმართულება, საითაც ასეთ შემთხვევაში უნდა გაქცეულიყო. თუ მანამდე მუდამ და ყველგან, ნაფლეთ-ნაფლეთ მაინც სწვდებოდა ხოლმე მის ყნოსვას ეს გამაცოფებელი სუნი, აქ, სადაც ახლა იდგა, სრულიად არაფერი იგრძნობოდა. სუნთა სრული აუძღვრეველობა – თუ შეიძლება, ასე ითქვას... გარშემო მხოლოდ უსულო ქვების, რუხი მცოცავი ბუჩქნარისა და ხმელი ბალახის წყნარი შრიალის მსგავსი, ერთფეროვანი სურნელი იდგა.

გვარიანი დრო დასჭირდა, ადამიანთა სუნის არმყოფობა რომ გაეაზრებინა. ერთხანობა, ამან დააბნია კიდევ: მისი უნდობლობა მისსავე შეგრძნებებს უწევდა წინააღმდეგობას. მერე, გამთენიისას, მხედველობა მოიხმო საშველად, მოათვალიერა ცისკიდური – ადამიანის არსებობის თუნდაც რაიმე კვალს ეძებდა – ქოხის სახურავს, ბუხრის კვამლს, ღობეს, ხიდს ან მთის კალთებზე შეფენილ ფარას. ხელიც მიიტანა ყურთან და ცდილობდა, გაერჩია ცელის ზრიალი, ანდა ძაღლის ყეფა, ან ბავშვის ტირილი. მთელი დღე იჯდა მწვერვალზე, თაკარა მზის ქვეშ და თუნდაც უმცირეს რამ ნიშანს ფუჭად ელოდა. მხოლოდ მზის ჩასვლისას დაუთმო მისმა უნდობლობამ რაღაც ალტკინების მსგავს ადფროვანებას: როგორც იქნა, მართლა გაეცალა საძულველ სიმყრალეს! მარტოდმარტოა – ერთადერთი სულიერი დედამიწაზე!

ზეიმობდა გრენუი – იმ ტანჯულივით, გემის დაღუპვის შემდეგ, ზღვაში მრავალკვირიანი ხეტიალის ბოლოს, შლეგივით რომ ესალმება პირველსავე დასახლებულ კუნძულს; გრენუი კი ახლა მარტობის მთაზე დამკვიდრებას ზეიმობდა. ზურგჩანთა, ჩულო და საბიჯგელი მოისროლა, ფეხებს მიწაზე აბაკუნებდა და ხელებს ცისაკენ აპყრობდა, როკავდა ველურად, ოთხივ მხრით გაიძახოდა თავის სახელს, თითებს მუშტავდა – ფეხქვეშ გადაშლილ ქვეყანას ემუქრებოდა და ჩამავალ მხეს და თავის გამარჯვებას დღესასწაულობდა გვიან ღამემდე...

შემდგომი რამდენიმე დღე იმას დაახარჯა, საცხოვრებლად მოწყობილიყო ამ მთაზე – მისთვის ცხადი გახდა, ამ საოცარ ადგილს კიდევ კარგა ხანს არ დატოვებდა. დასაწყისისთვის ისევ ყნოსვა-ყნოსვით დაუწყო წყალს ძებნა და იპოვა კიდევ დაბლა, ნაპრალში, თხელი აპკივით რომ გადმოედინებოდა კლდეზე. ცოტა მოდიოდა, ძალიან ცოტა, მაგრამ ერთი საათის განმავლობაში მოთმინებით ლოკავდა, და სითხის მთელი დღის მოთხოვნილებაც დაიკმაყოფილა. საკვებიც მოძებნა – პატარა სალამანდრები და გველები, რომლებსაც თავებს აწყვეტდა და მთლიანად ყლაპავდა, ტყავიან-ძვლებიანად. შემდეგ კი გამხმარ ლიქენს, რაღაც ბალახ-ბულახს და შტომს აყოლებდა. სრულიადაც არ ეხამუშებოდა, ჩვეულებრივი ადამიანური თვალსაზრისით, ყოველად მიუღებელი ამგვარი რაციონი. ბოლოს და ბოლოს, რახანია არ ეგემა ადამიანის ხელით დამზადებული საკვები: პური, ძეხვი, ყველი... შიმშილი რომ შეაწუხებდა, ჭამდა ყველაფერს, რაც კი რამ შესაჭმელს გადააწყდებოდა. პირის გემოთი ისედაც არასოდეს გამოირჩეოდა და ერთადერთი ნეტარი განცდა მისთვის სუფთა, ცინცხალი, სხეულის სუნით შეურყვნელი სურნელით ნეტარება გახლდათ. არც განცხრომაზე ჰქონდა რაიმე წარმოდგენა და შიშველი ქვის საწოლითაც დაკმაყოფილდებოდა, თუმცა ისევ რაღაც უკეთესს კი მიაგნო.

წყაროს შორიახლოს, ბუნებრივი ვიწრო ეხი აღმოაჩინა, რომელიც კედლის სიღრმეში მიიკლავებოდა და ოცდაათ მეტრში ნაშალით თავდებოდა. აქ, ეხის ბოლოში, ისეთი სივიწროვე იყო, გრენუის მხრები ძლივს ეტეოდა ღიობში და ისეთი დაბალი, დგომა მხოლოდ მოხრილს შეეძლო; სამაგიეროდ შეეძლო დაჯდომა და თუ მორგავით დაეხვეოდა – წოლაც. ეს კი სრულად აკმაყოფილებდა მის მცირედ მოთხოვნილებებს. ასეთ ადგილს ერთი დაუფასებელი უპირატესობა ჰქონდა: გვირაბის ბოლოს, დღისითაც კი, უკუნითი ღამე იდგა, მკვდრული სიჩუმე და ჰაერი მომლაშო, ნესტიანი სიგრილით სუნთქავდა. გრენუიმ იმთავითვე იგეშა – ამ გამოქვაბულში აროდეს არც ერთი ცოცხალი არსება არ ყოფილა და როდესაც თავად დაიკავა ეს ადგილი, რაღაც ღვთიური მოკრძალების მსგავსი გრძნობა დაეუფლა; ფრთხილად გაშალა მიწაზე ცხენის არალი, თითქოს საკურთხეველს გადააფარაო და დაწვა. ნეტარება გრენუი – როგორც საკუთარ კუბოში, ისე იწვა საფრანგეთის ყველაზე ეული მთის წვერიდან კარგა ორმოცდაათი მეტრის სიღრმეზე და მანამდე არასოდეს ეგრძნო თავი ასე დაცულად – დედის საშოს თუ არ ჩათვლით, და მთელი მსოფლიო რომ გადამწვარიყო გარშემო, ის აქ ვერაფერს შეიგრძნობდა. მერე ატირდა, ჩუმად, თავისთვის... არც იცოდა, ამ განუსაზღვრელი ბედნიერების საზღაურად ვისთვის აღევლინა ლოცვა.

შემდგომში მხოლოდ იმისთვის გამოდიოდა გარეთ, ნაკადულიდან წყალი აელოკა, სასწრაფოდ განთავისუფლებულიყო შარდისა და განავლისაგან და ხვლიკებზე თუ გველებზე ენადირა. დამ-დამობით მათი დაჭერა ადვილი იყო – მუდამ ან ქვების ქვეშ, ან პატარა სოროებში იმალებოდნენ, სადაც უტყუარი ყნოსვით აგნებდა ხოლმე.

პირველი კვირების განმავლობაში ჯერ კიდევ ადიოდა მწვერვალზე, დასალიერის მოსაყნოსად, მაგრამ მალე ეს რაღაც ჩვეულ ქცევად უფრო ექცა და არა აუცილებლობად, რადგან სახიფათო არც ერთხელ არაფერი შეუყნოსავს. მერე ეს გასვლებიც შეწყვიტა; ამიერიდან მხოლოდ იმას ცდილობდა, სიცოცხლის შენარჩუნებისათვის აუცილებელი ექსკურსების შემდეგ, რაც შეიძლება სასწრაფოდ დაბრუნებოდა თავის აკლდამას, რადგან ცხოვრებით აკლდამაში ცხოვრობდა მხოლოდ — ანუ, დღე-ღამეში ოცი საათი იჯდა სრულ სიბნელესა და სიჩუმეში, გვირაბის ბოლოს, ჩამოქცეულ კლდის ნაშალს ზურგმიყრდნობილი და თვითმკმარი.

არის ხალხი, მართლობას რომ ეძიებს: მომნაწიე ცოდვილები, უიღბლოები, წმინდანები თუ წინასწარმეტყველნი — ისინი არჩევენ უდაბნოში დაეყუდონ, სადაც ძალაუნებურად მარხულობენ. ზოგიერთი უდაბურ კუნძულზეც ცხოვრობს, ან ხეობებსა თუ გამოქვაბულებში, ზოგი კიდევ ზის — თან ოდნავ კეკლუცობს კიდევ — ტოტებზე ჩამოკიდებულ, ან მაღალ ბოძებზე მიმაგრებულ გალიაში: ამას თავიანთ ღმერთთან მისაახლებლად აკეთებენ: მართლობა მათ ხორცის მოკვდინებისა და მონანიებისათვის სჭირდებათ, იმის რწმენით სჩადიან, რომ ღვთისნიერ ცხოვრებას ეწევიან; თვეობით და წლობით ელოდებიან ღვთიური ჭეშმარიტების გაცხადებას, რათა ამის შესახებ მერე სასწრაფოდ ამცნონ დანარჩენ კაცობრიობას.

არაფერი მსგავსი გრენუის თავს არ ხდებოდა. ღმერთზე წარმოდგენაც არ ჰქონდა, არც ინანიებდა რაიმეს და არც ზეგარდმო ჭეშმარიტების გარდმოვლენას ელოდა. საკუთარი სიამოვნებისთვის გაეცალა ადამიანებს — მხოლოდ იმისთვის, საკუთარ თავს მიახლოებოდა. საკუთარ, სრულიად შეუზღუდავ არსებობაში ნეტარებდა და სავსებით კმაყოფილიც იყო საკუთარი თავით. მთელი დღე ამ აკლდამაში იწვა, სიპ ქვაზე განთხზმული, შენელებულად სუნთქავდა, თითქმის არ ესმოდა თავისივე გულისცემა და მაინც, ქვეყნად არაფერს ცხოვრობდა გრენუისავით ნაჯერი და გარყვნილი ცხოვრებით...

26.

ამ გარყვნილების ასპარეზი მისი შინაგანი საბძანებელი იყო, სადაც იმთავითვე ფლავდა ყოველი სურნელის ანაორთქლს, რომელსაც კი ოდესმე გადაჰყრია; და ახლა, შესაბამის განწყობაზე მოსასვლელად, ჯერ ყველაზე ადრეულ, ყველაზე შორეულ მოგონებებს გამოიწვევდა ზოლმე: აი, ვთქვათ, მაღამ გაიარის საძინებლის მტრული, დახუთული ჰაერი; მამა ტერიეს მომჟავო-მოდძრო სუნთქვა; მეძუძური ჟანას ცხელი, მძალე ოფლის სუნი, კირ-მოუყრელი გვაშების სუნი უმანკოდ გვემულთა სასაფლაოზე, აქოთებული თევზის სუნი — დედის ხსენებაზე... და ნეტარებდა ზიზღითა და სიძულვილით, და თმები ყალყზე უდგებოდა ამ ტკბილვნიებიანი უხამსობისაგან.

ხანდახან საზიზღრობების ეს ნარევიც არასაკმარისი აღმოჩნდებოდა ხოლმე და მაშინ, შესახურებლად, მცირე ყნოსვით ექსკურსიას აწყობდა გრი-მალის სადაბალოში: იყნოსავდა ნესტიან, ხორცის ნაფლეთებით მოფერილი ტყავებისა და ტყავის გამოსაყვანი წამლების ყროლს; ან ერთად წარმოიდგენდა ექვსასი ათასი პარიზელის სხეულთა ანაორთქლს თაკარა ზაფხულის აეხორც ხვატში...

ამ დროს, უეცრად – და მთელი ეს საშხადისიც, სწორედ, ამისთვის იყო საჭირო – დაგროვილი სიძულვილი ორგაისტული სიძლიერით გამოხეთქავდა ხოლმე გარეთ; მეხვიით შეიფოფრებოდა ამ სუნების თავზე, რომლებსაც მისი ნატიფი ცხვირი შეურეცხვოთ და ისე დააცხრებოდა მათ, როგორც სეტყვა ჯეჯილიან მინდორს; აცხრებოდა, როგორც გრიგალი, მტვრად აქცევდა და დისტილატის განმწმენდ წყალუხვობაში ძირავდა. სამართლიანი იყო მრისხანება მისი და დიდებული – შურისგება! აჰა, ისიც – ამადლების წამი და გრენუი, ეს პატარა ადამიანი, აღვზნებისაგან კანკალებდა, თავსაც კი სცემდა ხოლმე ქვას, მერე ნელ-ნელა მოდუნდებოდა და იწვა, გამოფიჭული და სულის სიდრემედე ნაამები. ამაზრზენ სუნთა ამოფრქვევის ეს აქტი, მართლაც რომ მეტისმეტად კმასაყოფელი, მის წარმოსახვაში არსებულ რაღაც მსოფლიო სცენისათვის განკუთვნილ დადგმაში გამორჩეული იყო, ვინაიდან დამსახურებული მოთენთილობის უშესანიშნავეს გრძნობას ანიჭებდა, რითაც მხოლოდ ჭეშმარიტად დიდებულ, გმირულ სახეთა წარმოსახვა ჯილდოვდება ხოლმე. ახლა უკვე მცირე ხნით დასვენების უფლებასაც აძლევდა თავს: გადაწვებოდა ქვის საწოლზე – ფიზიკურად იმდენად, რამდენადაც ადგილი ყოფნიდა ბნელ ეხში; სამაგიეროდ, შინაგანად, საკუთარი სულის საგულდაგულად განწმენდილ მიდამოში, მთელი ტანით იშლებოდა, სრულად იწვართებოდა და დახვეწილ სურნელთა გარემოცვაში ნებივრობდა: ვთქვათ, გაზაფხულის მდელოების, ან წიფლის მწვანე ფოთლებში მოთამაშე ნიავის, ანდა, სულაც, ზღვაურის დამარილებული ნუშივით მწკლარტე სურნელს გა-მოიწვევდა ხოლმე...

გრენუი მხოლოდ საღამოს პირს წამოდგებოდა – პირობითად ასე ვთქვათ, თორემ რა თქმა უნდა, არ იყო არავითარი საღამო, არც დილა, არც შუადღე: არ იყო არც წყვდიადი, არც ნათელი, და არ იყო არც გაზაფხულის მდელოები, და არც წიფლის მწვანე ფოთლები... საერთოდ, გრენუის შინაგან სამყაროში არავითარი ნივთიერი რამ არ არსებობდა, იყო მხოლოდ მათი სურნელი (სწორედ ამიტომ, ერთადერთი შესაბამისი და ამავე დროს, ერთადერთი შესაძლებელი *facon de parole** არის ის, რომ ამ სამყაროზე ვილაპარაკოთ როგორც ლანდშაფტზე, ვინაიდან ჩვენი ენა ყოვლად გამოუსადეგარია ყნოსვით შემეცნებათა რეალიების აღსაწერად). ასე რომ, საღამოხანს, გრენუის სულში ჩნდებოდა ის მდგომარეობა და დგებოდა ისეთი დრო, სამზრეთში სიესტის დამთავრებას რომ წააგავს, როდესაც ნაშუადღევის მოთენთილობა ნელა სცილდება გარემოს, მოდუნებული ცხოვრება მზადაა ისევ გამოცოცხლდეს; აალებული სიცხე – ნატიფი არომების მტერი – ახლა

* აქ: ლაპარაკის ფორმა (ფრანგ.)

უკან იწევდა და საძაგელი დემონების ხროვაც განადგურებული გახლდათ. შინაგანი ბრძოლის გლუვი, რბილი მდელოები გამოღვიძების ზანტ სიწყნარეს ეძლეოდნენ და ელოდნენ, მეუფის ნება-სურვილი როდის გარდამოვიდოდა მათზე. და წამოიმართებოდა გრენუი, და ძილბურანს ჩემოიბერტყავდა; დგებოდა დიდებული, სხვა გრენუი: გოლიათივით წამოიმართებოდა, მთელი თავისი ბრწყინვალეობით და დამათრობელი იყო ცქერა მისი (ლამის ვწუხვარ კიდევ, რომ არავინ იყო მისი მხილველი!) და თავის წილხვედრ ქვეყანას მედიდურად ავლებდა მზერას.

ჭეშმარიტად, ეს მისი სამეფო იყო – გრენუის შეუწონავი იმპერია! მის მიერ ქმნილი და დაპყრობილი, აოხრებული, განადგურებული და ხელახლა აღშენებული მისივე ჟინით, უსაზღვროებამდე გაფართოებული და ჩუგლუგით ცეცხლოვანით დაცული ყოველგვარი ხელყოფისაგან. მხოლოდღა მისი ნება-სურვილი ბატონობდა აქ, და წარსულის მიაზმთა მოსპობის შემდგომ, მის სამფლობელოში მარტოოდენ კეთილსურნელებას უნდა ეფრქვია, და ახლა ის ძალამოსილი მიაბიჯებდა ახლად მოხნულ ყამირზე და ნაირ-ნაირ სუნებსა სთესდა, სად – უხვად და სად – ძუნწად; უსასრულოდ ფართო ველებსა თუ მომცრო ბაღების კუთხეებში, ხან პეშვით ისროდა თესლს, ხან კი სათითაოდ ფლავდა მათ უშენ, მოფარულ ადგილებში. იმპერიის უშორეს პროვინციებს მოიხილავდა ხოლმე დიდი გრენუი, მებაღე უშრეტი და მალე არცა მდელო დარჩა და არცა კორდი, რაიმე სურნელის მარცვალი რომ არ ჩაეგდო შიგ.

... და იხილა მან ნელსურნელება კეთილი, ქვეყანა მისი გაჟღენთილი ღვთიური თესლით, და იმჟამს მიუშვა მასზე წვიმა მსუბუქი და მიწყვივი, ღვინის სპირტისა მსგავსი, და იზრდებოდა ნათესი და უხარებდა გულს, მოსავალი დელავდა ველად, მეუდრო ბაღებში წვენით ივსებოდნენ ღეროები და კოკრები სკდებოდნენ გასაფურჩქად. მხოლოდღა შემდგომად ამისა სწვეტდა გრენუი წვიმას – ღიმილის მზეს მოუვლენდა ქვეყანას, ხოლო პასუხად, მილიონობით უცხო ყვავილი ერთსულოვნად იძლებოდა და მთელს იმპერიას, კიდით-კიდემდე, მირიადობით ძვირფას სურნელთაგან გამოქსოვილი ხალიჩით ფარავდა; და ითნევდა დიადი გრენუი ყოველს კეთილად, და ახლა საკუთარი სუნთქვის ნიავს შთაბერავდა ქვეყანას, და ამ ალერსში ყვავილები მირიადობითვე თავიანთ სურნელს აერთებდნენ და ყოველი ფერით მოკიაფე ერთიან, გარნა მუდმივცვალებად, სამყაროულ არომებად ერთიანდებოდნენ მისი დიდების საკმევლად ქვეულნი – ბრწყინვალე, დიდებული, განუმეორებელი გრენუისა – და ისიც, ოქროვანი ნელსურნელების ტახტზე წამოჭიმული, უკანვე შეისუნთქავდა სუნთა სამყაროს და მისდამი აღვლენილი მსხვერპლშეწირვის სუნიც უამებდა ყნოსვას; და გარდამოდიოდა ამ სიმაღლიდან, რათა ქმნილება თავისი დაელოცა, და შექმნილიც მადლს უხდიდა აღტყინებით, ზეფრენითა და ახალ-ახალ სურნელთა ფრქვევით...

ამასობაში სადამოვდებოდა კიდევ, ნელსურნელებანი სულ უფრო და უფრო მეტი სასწაულითა და ნიშითა დიდ-დიდითა ენივთებოდნენ ღამის ბნელს. წინ იყო ნელსურნელებათა ბრწყინვალე მეჯლისი – ძვირფასქვებ-სურნელოვანი ფეიერვერკით!..

თუმცა, ამ დროისთვის გრენუის გენია ოდნავ მოიღლებოდა ხოლმე, დაამთქნარებდა და იტყოდა: „აი, აღვასრულე საქმე დიადი და კმაყოფილი ვარ სრულად; მაგრამ ესეც, ვითარცა ყოველი სრულყოფილი, მოსაწყენი ხდება. ახლა მსურს გავასრულო ეს ჯაფით აღსავსე დღე და კიდევ ერთი სიხარული მივანიჭო საკუთარ თავს“.

ასე იტყოდა გრენუი, და როს ქვემოთ ერთი უბრალო, კეთილსურნელოვანი საზოგადოება ზეიმობდა და როკავდა, იგი, ოქროს ღრუბლიდან გარდამოსული, ფართოდ გაშლილი ფრთებით ირავს კრავდა საკუთარი სულის ბნელ სამეფოზე და შინ – გულის გულში – მიეშურებოდა...

27.

და რა საამო იყო საკუთარ თავთან დაბრუნება! ეს ორმაგი მანტია – სამყაროს შემქმნელისა და შურისმგებლის – ლამის ქანცს აცლიდა და შესაქმის ღვთიური მოვალეობითა და აღსრულებით გათანგული გრენუი ახლა ოჯახურ მეუღროებას ესწრაფვოდა.

მეწამული ციხე-დარბაზი ერთ ქვიან უდაბნოს ედგა; დიუნები, ჭაობიანი ოაზისი და ქვის შვიდი კედელი ერტყა გარს. ათასობით საუკუნაო თუ სარდაფი ჰქონდა, და ამდენივე ბრწყინვალე დარბაზი, მათ შორის ერთი – უბრალო, სისხლისფერი ტახტით, რომელზედაც გრენუის, უკვე არა დიდებულ გრენუის, არამედ სრულიად კერძო პირს – უბრალოდ ძვირფას ჟანბატისტს – მძიმე დღიური შრომის შემდეგ უყვარდა მოსვენება.

ციხე-დარბაზის საწყოებში კი მაღალი, თითქმის ჭერამდე ასული თაროები ასვეტილიყო, მათზე განლაგებული ყველა იმ სუნიტ, რაც კი გრენუის შეეგროვებინა სიცოცხლის მანძილზე – ანუ რამდენიმე მილიონი; ხოლო სარდაფებში კასრებით ინახებოდა მისი ცხოვრების საუკეთესო ნელსურნელებანი, და როდესაც დრო მოუწევდათ, მათ ბოთლებში გადაიდებდნენ ხოლმე და კილომეტრობით ამწკრივებდნენ გრილ, ნესტიან ღერეფებში, დამზადების წლებისა და ადგილის მიხედვით. ბოთლი იმდენი იყო, თითოეულის დასაჭამნიკებლად, ერთი სიცოცხლე ნამდვილად არ იყო სამყოფი.

და როცა ჩვენი ძვირფასი ჟანბატისტი, ბოლოს და ბოლოს ბრუნდებოდა *chez soi*^{*}, მეწამულ დარბაზში წამოწვებოდა მეწამულ ტახტზე, მბრძანებლურად ტაშს შემოჰკრავდა და მსახურთ უხმობდა – უხილავთ და შეუგრძნობელთ, უპირველეს ყოვლისა – ყნოსვით უგრძნობელთ, ანუ სრულიად წარმოსახვით მსახურებს და აგზავნიდა მათ საუკუნაოებში, რათა სურნელთა უკიდევანო ბიბლიოთეკიდან ესა თუ ის ტომი მიერთმიათ მისთვის, და უბრძანებდა, სარდაფში ჩასულიყვნენ და მისთვის სასმელიც მიეტანათ; და ეს

* საკუთარი კუთხე/თავისთან (ფრანგ.)

წარმოსახვით-წარმოდგენითი მსახურები უმაღლესი მისწრაფვოდნენ მისი სურვილის აღსასრულებლად და გრენუის სტომაქი ეკუმშებოდა მტანჯავი მოლოდინის კრუნჩხვებისაგან: უეცრად ეუფლებოდა დახლთან მდგომი ლოთის შეგრძნება, რომელსაც შიში იპყრობს, ვაითუ რაიმე მიზეზის გამო შეკვეთილი სირჩა არაყი თუ ჭიქა ღვინო აღარ დაუდგან... ვთქვათ, და სარდაფი დაიცალა? ან იქნება, კასრებში ღვინო ამძარდა? ამდენხანს რატომ ალოდინებენ? რატომ არ ჩანან? სასმელი მას ახლავე სჭირდება, ამ წუთს, კაცი იხრჩობა წყურვილისაგან, ლამის სულს დაფავს...

კარგი ერთი, ჟან-ბატისტ! ნეტა რას შფოთავ – ახლავე მოვლენ, ციმციმი მოგართმევენ ყველაფერს! აგე, უხილავი ლანგრით მოაქვთ სურნელთა სარჩევი, თეთრ თათმანებში გამოწკვიპილ უხილავ ხელებს ძვირფასი ბოთლები უპყრათ, უფროთხილესად გილაგებენ წინ, თავს გიკრავენ და ქრებიან.

ბოლოს და ბოლოს, კვლავ მარტო დარჩენილი ჟან-ბატისტი ხელს სტაკებს სანუკვარ სურნელებს, პირველ ბოთლს გახსნის და პირამდე ავსებს სასმისს, პირთან მიაქვს და სულმოუთქმელად ცლის: 1752 წლის სურნელი – საღამო ხანს, ბინდბუნდში, სამეფო ხიდზე რომ ჩაავლო, რომელშიც არეული იყო ზღვის, ტყისა და ნაპირზე გამოთრეული, ახლადგაფისული ნავების სულ ოდნავ საგრძნობი სუნი. ეს ის პირველი, დასასრულისაკენ მიწურული ღამე გახლდათ, რომელიც მან გრიძალის ნებართვის გარეშე, პარიზის ქუჩებში, ზეტილში გაატარა. ეს იყო მომავალი დღის, თავისუფლებაში გატარებული პირველი განთიადის სურნელი, რაღაც ახალი ცხოვრების წინათგრძნობა. სათუთად ინახავდა, მაგრამ თითქმის დღეყოველ, სულ მცირეოდნავ აგემოვნებდა.

მეორე ჭიქის შემდეგ ქრებოდა ყოველგვარი ნერვიულობა, ტახტის რბილ ბალიშზე გადაწოლილი, წიგნს გადაშლიდა და იწყებდა კითხვას თავისი ბავშვობის დღეებზე: თავშესაფრის, ქალაქის ქუჩებისა და შუკა-ჩიხების, ადამიანთა სხვადასხვა სუნზე და იმ დროს, იმ აუტანელ, აწ უკვე წარსულ სუნთა წყებას წყევლიდა. ინტერესითა და ზიზღით კითხულობდა გრენუი წიგნს, და როდესაც ზიზღი სჯაბნიდა სურვილს, ტყლაშუნით ხურავდა მას, გადადებდა და ახლა სხვა წიგნს იღებდა ხელში.

გზადაგზა მუდმივად მიჰქონდა ტუჩებთან კეთილშობილი არომატები. თავისუფლების სურნელიანი ბოთლის შემდეგ, 1744 წლის ბოთლს ხსნიდა, რომელიც მადამ გაიარის სახლთან დაყრილი მორების თბილი ანაორთქლით იყო სავსე; შემდეგ სვამდა სუნამოსა და ყვავილების ბლანტი სურნელით სავსე არომას, სენ-ჟერმენ-დე-პრეს პარკის განაპირას რომ მიაგნო, 1753 წლის ზაფხულის ერთ საღამოს...

მისი სხეული სულ უფრო ივსებოდა ნელსურნელებით, მძიმედ აწვებოდა ბალიშებს, სული კი ჯადოსნურად იბინდებოდა. და მაინც, ამით არ მთავრდებოდა მისი ნადიმი: მართალია, თვალებიც მოედალა და წიგნიც რა ხანია გავარდნოდა ხელიდან, ოღონდ სურდა კიდევ ერთი, ყველაზე საუცხოო ბოთლისთვის აეხსნა ხუფი – ეს იმ გაღმაქუჩელი გოგონას სურნელი იყო...

გრენუი მას მოკრძალებით სვამდა და ბალიშებზეც კი წამოიწვედა ხოლმე ამისათვის, თუმცა უკვე ყველაფერი ქანაობდა ირგვლივ, და მაინც სვამდა პატარა გრენუი თავისი სულის სარდაფების ამ უძვირფასეს სურნელს, სასმისს სასმისზე ცლიდა და სულ უფრო მეტი მწუხარება ეუფლებოდა — გრძნობდა, ზედმეტი მოუვიდა და მაინც სვამდა, სვამდა ბოლომდე: მიდიოდა ბნელი გასასვლელით ქუჩიდან ეზოსკენ, მიდიოდა სინათლისაკენ, სინათლის წრეში კი იჯდა გოგონა და ქლიავს ჩურჩავდა. ფეიერვერკის ტკაცუნის მოისმოდა შორიდან.

ბოლოს, გადადგამდა სასმისს და იჯდა ჭარბი გრძნობებისა და სიმთვრალისაგან გაქვავებული; იჯდა თვალგაშტერებული, ვიდრე დალეულის გემო სრულად არ გაუქრებოდა ენიდან. მერე, უეცრად, მისი ტვინი ისევე ცარიელდებოდა, როგორც ბოთლები. მაშინ გადაგორდებოდა ტახზე, გარდიგარდმო და წამიერად იძირებოდა გამომათავყვანებელ ძილში.

ამ დროისათვის გარეგანი გრენუიც იძინებდა თავის ჩულოზე. ძილი მისი ისევე უძიროდ ღრმა იყო, როგორც შინაგანი გრენუისა, ვინაიდან ერთის ჰერკულესისებრი გმირობანი არანაკლებ თენთავდა მეორესაც — ბოლოს და ბოლოს, ისინი ხომ მაინც ერთნი იყვნენ.

მართალია, როდესაც იღვიძებდა, იღვიძებდა არა ჭაობებითა და შვიდი კედლით გარშემორტყმულ სისხლისფერი ციხე-კოშკის სისხლისფერ დარბაზში და არც მისი სულის მდელოებზე, არამედ თავის ქვის თავშესაფარში ეხის ბოლოს, სრულ სიბნელებში. შიმშილისა და წყურვილისაგან გული ელეოდა, სხეულშიც სტეხდა და აჟრიალებდა, როგორც ლოთს — ლოთიანად გატარებული ღამის შემდეგ და ისიც ფოფხვით, ოთხზე გამოძვრებოდა ხოლმე ეხიდან.

გარეთ დღე-ღამის რომელიმე ჟამი იდგა — ღამის დასაწყისი ან დასასრული, მაგრამ შუაღამეც რომ ყოფილიყო, ვარსკვლავების შუქიც კი თვალს სჭრიდა. ჰაერი მტვრიანი ეჩვენებოდა, მძიმე, ფილტვებს რომ უხევდა, ლანდშაფტიც უხეში ეჩვენებოდა და ნაზი სურნელებაც კი უწვავდა ამ სამყაროს გადაჩვეულ ცხვირს. ტკიპა გრენუი ისეთი მგრძნობიარე ხდებოდა, როგორც ჯავშნიდან გამოძვრალი კიბორჩხალა, შიშველი რომ დახეტილობს ზღვისპირზე.

ჯერ წყაროსაკენ გასწევდა. კლდიდან ლოკავდა წყალს, კარგა ერთი-ორი საათის განმავლობაში და იტანჯებოდა — დრო თითქოს გაუთავებლად იწვლებოდა აქ, რეალურ სამყაროში. მერე მოგლეჯდა ქვებიდან ბლუჯა ხავსს და პირში იტენიდა. ჩაიმუხლებდა ქვებზე, კუჭშიც გადიოდა და ჭამდა კიდევ იმავედროულად — ყველაფერი სწრაფად, სწრაფად, სწრაფად უნდა მომთავრებულიყო — და პაწია ცხოველივით, რომლის თავს უკვე ძერები დასტრიალებენ, თავქუდმოგლეჯილი გარბოდა თავის ეხში, გვირაბის ბოლოს, სადაც ჩულო ჰქონდა დაფენილი. აქ, მხოლოდ აქ გრძნობდა თავს უხიფათოდ, და მისი სულის თეატრშიც ახლა ახალი სპექტაკლი იდგმებოდა.

28.

ასე მიყვებოდა დღე დღეს, კვირა კვირას, თვე თვეს. ასე გავიდა მთელი შვიდი წელიწადი.

გარე სამყაროში კი ომი მეფობდა. ომობდნენ სიღვრიასა და საქსონიაში, ჰანოვერსა და ფლანდრიაში, ბოჰემიასა და პომერანიაში. მეფის ჯარისკაცების ძვლები ლაგდებოდა ჰესენში, ვესტფალიაში, ბალეარის კურძულებზე, ინდოეთში, მისისიპის ნაპირებსა თუ კანადაში – რა თქმა უნდა, ვინც ტიფით არ იხოცებოდა გზაშივე. მილიონობით ჯარისკაცს სიცოცხლის ფასად დაუჯდა ეს ომი, საფრანგეთის მეფეს – კოლონიების დაკარგვად, ხოლო ყველა ხელგამოღებულ ქვეყანას – ისეთ წონა ოქროდ, რომ ბოლოს და ბოლოს, გულის წუხილის მიუხედავად, მის შეწყვეტაზეც შეთანხმდნენ.

სწორედ ამ დროს, ზამთარში, , თავისდა შეუმჩნეველად გრენუი, კინაღამ გაიყინა. ხუთი დღე წაწყობილად იწვა ალისფერ საწოლში და როცა გამოფხიზლდა, განძრევაც კედარ შეძლო. სასწრაფოდ დახუჭა თვალები იმის იმედით, ძილში მოკვდებო, მაგრამ ღვინის დრო დამდგარყო უკვე, გამოთბა და ამან გადაარჩინა.

ერთხელაც, იმდენი თოვლი ჩამოყარა, ძალა არ ეყო, გაეთხარა და შტოშის ბუჩქებამდე მიეღწია. მაშინ ქვებზე მიყინული ღამურებით იკვებებოდა. როგორღაც კიდევ, ეხის პირს მკვდარი ყვავი იპოვა და შეჭამა. ამ შვიდი წლის განმავლობაში მხოლოდ ეს მოვლენები აკავშირებდა რეალობასთან, დანარჩენი დრო თავის ციხე-დარბაზში ცხოვრობდა, საკუთარი სულის თვითმპყრობელურ სამეფოში. იქვე დარჩებოდა კიდევ სიკვდილამდე, ის კატასტროფა რომ არ მომხდარიყო, რომელმაც იგი ეხიდან გამოაძევა და გარე სამყაროში გამოაგდო.

29.

ეს კატასტროფა არც მიწისძვრა იყო, არც ტყის ხანძარი, არც ზვავი და არც მისი ეხის ჩამონგრევა; და საერთოდ, იგი შინაგანი იყო და არა გარეგანი, და სწორედ იმიტომაც გასტანჯა, რომ მის მიერ შერჩეული გაქცევის გზა გადაუკეტა. ყველაფერი კი ძილბურანში მოხდა, უფრო სწორად, ზმანებებში, კიდევ უფრო სწორად – ოცნებებსა და ზმანებებში, ანუ, წარმოსახვაში...

სისხლისფერ ტახტზე იწვა გრენუი და სისხლისფერ დარბაზში ეძინა. მის გარშემო ცარიელი ბოთლები მოფანტულიყო. ბევრი დაღია, ძალიან ბევრი, მერე კიდევ ორი ბოთლი იმ წითურთმიანი გოგონას სურნელიც დააყოლა; ეტყობა, სწორედ ამან მოუღო ბოლო. მაინც რა იყო ის ბოლო ჭიქა... მოეჩვენა, დამპალი ჭაობის შუაგულში დგას, ხოლო ჭანჭყობიდან ნისლი მოიწვეს, ნელ-ნელა ადის მაღლა და თავით-ფეხებამდე ფარავს გრენუის,

ჟღინთავს მის სხეულს და მალე, ამ ნისლიან სიმყრალეში, მის გარეშემო ერთი ყლუპი სუფთა ჰაერიც აღარ რჩება. ნისლის ჩასუნთქვა უწყვედა, რათა არ გაგუდულიყო. მერე ეს ნისლი სუნად იქცა. კარგად იცოდა, ვისი სუნიც იყო – მისი საკუთარი, მისივე საკუთარი სუნი! შემადრწუნებელი კი ის იყო, რომ არც ამ სუნის ატანა შეეძლო – ვერასდიდებით საკუთარ სუნს ვერ იყნოსავდა!

იაზრა, რა უბედურებაც სჭირდა და ისე შემზარავად დაიყვირა, იფიქრებდით, ცოცხლად სწავებნო. ყვირილმა გაანგრია სისხლისფერი კედლები, ჩამოშალა ციხე-კოშკის ქვა; გულ-ღვიძლიდან ამოგლეჯილმა, თხრილებსა და ჭაობებს გადაუქროლა, უდაბნოებს, გადასერა მისი სულის ბნელი სანახები, ცეცხლის გრიგალივით გამოვარდა მისი ყელიდან და ეხის ტეხილებით გარეთ გაექანა გამაღებელი, ღია ქვეყნისკენ და სენ-ფლუს გორაკებზე გაიშალა — თითქოს თავად მთა ყვიროდა და გრენუიც, გამოღვიძებული, რაღაცის მოგერიებას ცდილობდა, უნდოდა ეს აუტანელი და მახრჩობელა სიმყრალე, უკუეგდო, დაიზაფრა და მთელი სხეული უცახცახებდა მომაკვდინებელი შიშისგან. საკუთარ ყვირილს რომ არ გაერღვია ეს სიმყრალე. თავად ჩაიხრჩობდა შიგ... ამის გახსენებაზე შეაჟრჟოლა; და სანამ ასე იჯდა და ძრწოდა, ვიდრე ცდილობდა საკუთარი დაფეთებული, არეული გონების მოწესრიგებას, ერთი რამ მაინც მტკიცედ გაიაზრა: ახლა შეიცვლის თავის ცხოვრებას — შეიცვლის თუნდაც იმიტომ, რომ მეორედ ასეთი ზმანება აღარ იხილოს — მეორედ ამის მსგავსს ვერაფერს გადაიტანს!

ჩულო მხრებზე მოიგდო და გარეთ გამოძვრა. თებერვლის დასასრულის გვიანი დილა იყო, მზე ანათებდა. გარეშემო სველი ქვების, ხავსისა და წყლის სუნი იდგა. ეხის წინ, მიწაზე მჯდარი გრენუი მზეზე თბებოდა და ფართოდ პირდაფრენილი, სუფთა ჰაერს ყლაპავდა. ჯერ კიდევ აჟრჟოლებდა იმ სიმყრალის გახსენებაზე, სულ ახლახანს რომ დააღწია თავი, და აჟრჟოლებდა იმ დალოცვილი სითბოსაგან, ზურგზე რომ ეფინებოდა. ეს გარე სამყარო მაინც არსებობდა, თუნდაც გასაქცევად; შემადრწუნებელი ის იქნებოდა, გვირაბიდან გამოსულს, ვერავითარი ქვეყანა ვერ აღმოეჩინა — მხოლოდ საზარელი სიმყრალე შიგნით, გარეთ, და ყოველგან!..

თავზარმა ნელ-ნელა გადაუარა. შიშის მარწუხებმა მოუშვა და ცოტა უფრო თავისუფლად ამოისუნთქა. შუადღისთვის ჩვეული, ცივისსხლიანი არსების თავდაჭერაც აღიდგინა. ცხვირზე იფარებდა ხელს და თითებს შუა ისუნთქავდა ნოტიო, ფრინტების სუნით გაჟღენთილ გაზაფხულის ჰაერს. ოღონდ თავად თითებს არავითარი სუნი არ ასდიოდათ. მტევანი მოაბრუნა და ხელისგული დაეწოსა. ხელის სითბო შეიგრძნო, სუნი კი ვერა. დაფლეთილი სახელო აიკაპიწა და ცხვირი იდაყვში ჩარგო. არავითარი სუნი — არავითარი სუნი ილღიებში, ფეხებზე, არავითარი — სასირცხო ორგანოზე, რომელსაც, რამდენადაც შეეძლო, იმდენად მიუახლოვა ცხვირი... უცნაური ამბავი იყო, ღმერთმანი! გრენუი — კაცი, რომელსაც სხვისი სუნი რამდენიმე მილის მანძილზე სცემდა, საკუთარი სხეულის ნაწილის სუნს ვერ გრძნობდა რაღაც ერთადერთი მტკაველის დაშორებით! ამის მიუხედავად, ამჯერად ზაფრას მაინც არ აჰყოლია — ცივი გონებით განსაჯა და ასე მიმართა საკუთარ თავს: „საქმე ის კი არაა, რომ მე არ ამდის სუნი — სუნი ყველაფერს ასდის — არა-

მედ ის, რომ თავად ვერ ვიყნოსავ, ვინაიდან დაბადებიდანვე ვიყნოსავ მას და ამიტომაც ვერ გრძნობს ცხვირი ჩემი ჩემივე სხეულის სუნს. აი, რომ შემეძლოს დროებით მაინც მოვიცილო სუნი ჩემი, ან ნაწილი მისი, ცოტა გადავჩვიო და შემდგომ ხელახლა ისევ მოვყნოსო, ეჭვი არ არაა, მაშინ კი შევიგრძნობდი მის სუნსაც და – რაც იგივეა – საკუთარი თავისაც“...

ჩულო მოიძრო და სამოსი გაიხადა, უფრო სწორად, ის რაც სამოსიდან დარჩა. გაიხადა ძონძები, შვიდი წლის განმავლობაში ტანზე რომ არ გაუძვრია – ისინი ხომ მაინც იქნებოდნენ მისი სუნით გაჟღენთილი, და გროვად დაყარა ქვაბულის წინ. მერე, ბოლო შვიდი წლის განმავლობაში პირველად, ისევ ავიდა მთის მწვერვალზე. იქ ზუსტად იმ ადგილზე დადგა, სადაც მაშინ, აქ მოსვლის დღეს რომ იდგა, ცხვირით დასავლეთისკენ მიტრიალდა და ქარს მიუშვირა დედიშობილა სხეული. უნდოდა იმდენად განიავებულიყო, იმდენად განწმენდილიყო დასავლეთის ქარით – ანუ ზღვისა და ნესტიანი მდელოების სურნელებით გაჟღენთილიყო, რომ ახლა ამ ქარს გადაეძალა მისივე სხეულის სუნი, რათა ხაფანგი გაეშრათ მასსა და მის ტანსაცმელს შორის, და აი მაშინ ნაღდად ჩაავლებდა საკუთარ სუნს... დაიძაგრა, წინ გადაიხარა, კისერი ქარის საწინააღმდეგოდ გაიწვინა და ხელებიც გან-გან გაშალა.

ამ უცნაურ პოზაში იდგა რამდენიმე საათი ზედიზედ, ისე რომ მზეს გადაჩვეული, მატლივით თეთრი კანი გაუწითლდა, თუმც მზე ჯერ მაინც არც ისე მწველი იყო. საღამო ხანს ისევ ეხისაკენ დაეშვა. შორიდანვე დაინახა თავისი ტანსაცმლის გროვა. რომ მიუახლოვდა, ცხვირზე მოიჭირა ხელი და მხოლოდ მაშინ გაუშვა, როცა უშუალოდ ტანსაცმელთან მიიტანა. ჯერ ჭამნიკი უნდოდა აედო, როგორც ეს ბალდინისაგან დაისწავლა: შეისუნთქა ჰაერი და ნაწყვეტ-ნაწყვეტ იწყო მისი გამოშვება. თანაც, ორივე ხელისგული ზარივით დააფარა ტანსაცმელს, ხოლო ცხვირი ზარის ენასავით ჩაყო შიგ, მაგრამ მაინც არაფერი გამოუვიდა. იქ ათასობით სხვა სურნელი იყო: ქვის, ქვიშის, ხავსის, ფისის, ყვავის სისხლის – იმ ძეხვის სუნიც კი, მრავალი წლის წინათ სიულის შორიახლოს რომ იყიდა – ისიც კი სრულიად მკაფიოდ იგრძნობოდა. უკანასკნელი 7-8 წლის დღიური იყო ეს ტანსაცმელი, და მხოლოდ მისი სუნი, ვინაც მთელი ეს დრო გაუხდელად ატარა – ტანსაცმელს არ აჩნდა.

აი აქ კი, ცოტა არ იყოსდა, ისევ მოეძალა შიში. მზე ჩასულიყო. იდგა შიშველი, ეხის წინ, რომლის შავბნელ ბოლოშიც მთელი შვიდი წელი გაეტარებინა. ცივი ქარი ქროდა და ვერც კი ამჩნევდა, რომ გაითოშა, რადგან შიგანიდან საპასუხო სიცივე მოიწვედა – შიშის სიცივე... ეს შიში არ იყო ის, სიზმარში რომ განიცადა, საკუთარ თავში ჩახრჩობის შიში, რომელსაც შეგიძლია თავი დააღწიო; რასაც ახლა გრძნობდა, საკუთარი თავის ვერშეცნობის შიში იყო, იმ წინა შიშის სრულიად საწინააღმდეგო რამ, ამას ვერსაით გაექცეოდა, მისი პირისპირ დახვედრა იყო საჭირო და იმის – რამდენადაც მწარეც არ უნდა აღმოჩნდეს ეს – საბოლოოდ გარკვევა, ჰქონდა თუ არა მას საკუთარი სუნი... და უნდა გაერკვია ეს სასწრაფოდ, ახლავე, ალაგობრივ!

ისევ ეხში შებრუნდა. უკვე რამდენიმე მეტრის შემდეგ სრულ სიბნელეში აღმოჩნდა, მაგრამ ისევე კარგად იგნებდა გზას, როგორც კაშკაშა სინათლეში.

მრავალ ათასჯერ გაუვლია ეს გზა, ყოველი ნაბიჯი და ყოველი მოხვეული იცოდა, ყოველ სტალაქტიდს, ყოველ შვერილს გრძნობდა. გზის გაკვლევა მისთვის სულაც არ იყო ძნელი — ძნელი იმ უსაზარლესი კლასტროფობიული ზმანების წინააღმდეგ ბრძოლა გახლდათ, მოქცევის მსგავსად რომ სულ უფრო მაღალ-მაღალ ტალღებად ევლებოდა თავზე. უკან მაინც არ იხევდა. არცოდნის შიშით სძლია ცოდნის შიშს და გაიმარჯვა კიდევ, ვინაიდან არჩევანი არც ჰქონდა. ეხის ბოლოს, ნაშალთან, შიში უკუიქცა. იგრძნო რომ მშვიდადაა, გონება ნათელი აქვს და ცხვირიც სამართებელივით ალესილი... ჩაჯდა, თვალეზზე ხელი აიფარა და იქაურობა მოყნოსა. აქ, ქვეყნისგან მოცილებულ ამ ქვის სამარეში გაატარა შვიდი წელი. თუ სადმე უნდა იყოს მისი სუნი, მხოლოდ აქ. ნელა ისუნთქავდა. გულდასმით ამოწმებდა. მეოთხედი საათი მაინც იყო ასე ჩაცუცქული. შეუმცდარი მახსოვრობა ჰქონდა და ზუსტად ახსოვდა როგორი სუნი დახვდა ეხში შვიდი წლის წინათ: ქვისა და მარილიანი სივრცის, და სისუფთავის, რაც იმას ნიშნავდა, რომ არც ერთ ცოცხალ არსებას აქ ფეხი არ დაედგა... ამჟამადც ზუსტად ისეთივე სუნი იდგა.

ცოტა ხანს კიდევ იჯდა, სრულიად წყნარად, მხოლოდ ოდნავ აქნევდა თავს. მერე ადგა, შებრუნდა და გასასვლელისაკენ გაემართა. ჯერ მხრებში მოხრილი, ხოლო როდესაც შესაძლებლობა მიეცა, წელგამართული — გარეთ, თავისუფლებისაკენ.

ეხის გარეთ რომ გამოაღწია, ჩამოიფხატა თავისი ძონძები (წაღები ჯერ კიდევ რამდენიმე წლის წინ დაუღპა), ბეჭებზე ჩულო მოიგლო, იმავე დამეს დატოვა პლონ-დიუ-კანტალი და სამხრეთისაკენ გაემართა.

30.

გარეგნულად საშინელი შესახელი იყო: თმები მუხლებამდე ჩამოზრდოდა, მეჩხერი წვერები — ჭიპამდე. ფრჩხილები ჩიტის ბრჭყალებს მიუგავდა, ძონძებიდან დახეთქილ-დაქერცლილი კანი მოუჩანდა.

შემხვედრი ხალხი — გლეხები, რომლებიც მინდვრებში მუშაობდნენ ქალაქ პიერფორის შორიანლო, მის დანახვაზე კვილით გარბოდნენ. ქალაქში ხომ მთლად გადარია ყველა: ასეულობით მორბოდნენ მის სანახავად. ზოგიერთს გაქცეული კატორღელი ეგონა, სხვები ამტკიცებდნენ — ადამიანი კი არაა, ადამიანისა და დათვის ნაჯვარია, ტყის ბინადარიო. ერთი ხმელეთს შერჩენილი მეზღვაური იმასაც გაიძახოდა, ველური ინდიელია, ოკეანის გაღმა მდებარე კაიენიდანო. ბოლოს მერთან წაიყვანეს. იქ, დამსწრეთა გასაოცრად, გრენუიმ სიგელი ამოიღო, პირიც დაადო და მართალია საკმაოდ არეულად და ენაბრგვილად — ეს ხომ მისი პირველი სიტყვები იყო ბოლო შვიდი წლის განმავლობაში — მაგრამ მაინც გასაგებად უამბო, რომ ის მოხეტიალე შეგირდია, რომ მას ყაჩაღები დაესხნენ თავს, სადღაც გამოქვაბულში წაათრიეს და იქ

შვიდი წელი გაატარა ტყვეობაში. რახანია არც მზის შუქი უნახავს და არც ვინმე ადამიანი. იკვებებოდა კალათიდან, რომელსაც უხილავი ხელი უშეგებდა სიბნელეში და, ალბათ, იმავე ხელმა თუ გაათავისუფლა დაწნული კიბის საშუალებით, და რომ ვერაფერი გაიგო ვერც თავის მომტაცებლებზე და ვერც გამათავისუფლებელზე. მთელი ეს ისტორია იმიტომ მოჩმახა, სი-მართლესე დამაჯერებლად მიაჩნდა და დაიჯერეს კიდევ, რადგან მსგავსი ყაჩაღური თავდასხმები ხშირი იყო ოვერნის, ლანგედოკისა და სევენის მთებში. ყოველი შემთხვევაში, მერმა სრული ნდობით შეიტანა მისი მონათხრობი ოქმში და კიდევაც მოახსენა ამის შესახებ მარკიზ დე ლა ტაიად-ესპინასს, პარლამენტის წევრს ტულუზიდან.

ამ მარკიზმა ჯერ კიდევ ორმოცი წლის ასაკში დაკარგა ყოველგვარი ინ-ტერესი სამეფო კარის ცხოვრებისადმი, ვერსალი მიატოვა, თავის მამულში დაბრუნდა და მეცნიერებას უძღვნა თავი. მის კალამს ეკუთვნოდა მნიშვნელოვანი ნაშრომი ე.წ. *დინამიური ეროვნული ეკონომიკის* შესახებ, რომელშიც წინადადებას იძლეოდა, გაეუქმებინათ ყოველგვარი გადასახადი მიწათმფლობელობასა და სასოფლო-სამეურნეო ნაწარმზე, ოღონდ აღედგინათ პროპორციული სამშემოსავლო გადასახადი, რათა ხალხი აქძულვებინათ, უფრო აქტიურად განევითარებინათ საკუთარი ეკონომიკა. მოგვიანებით, ბროშურის წარმატებით აღფრთოვანებულმა, დაწერა ტრაქტატი თემაზე, თუ როგორ უნდა აღეზარდოთ გოგონები და ბიჭუნები ხუთიდან ათ წლამდე. შემ-დეგ ექსპერიმენტებმა გაიტაცა სოფლის მეურნეობაში შეჯვარებების განხრით და შეეცადა, ბუდის სპერმის სხვადასხვა ბალახებზე გადატანის შედეგად, რაღაც მოსაწველი ყვავილის მსგავსი ცხოველურ-მცენარეული პროდუქტი გამოეყვანა – რძის მისაღებად. დასაწყისისთვის გარკვეულ წარ-მატებასაც მიაღწია, რამაც საშუალება მისცა, ამ ბალახეული რძისაგან ყველი დაეშაადებინა, ლიონის მეცნიერებათა აკადემიის მიერ შეფასებული, როგორც „გემოთი თხის ყველის მსგავსი, ოღონდაც რამდენადმე მწარე“. ამის მიუხედავად, ცდების შეჩერება მოუხდა, რადგან უზარმაზარი თანხები ეხარ-ჯებოდა ბუდის სპერმაზე, ჰექტოლიტრობით რომ ასხურებდნენ მინდვრებს. და მაინც, აგრარულ-ბიოლოგიური პრობლემების კვლევა იგი არა მარტო ნიადაგის, არამედ, საერთოდ, მიწისა და ბიოსფეროსთან დამოკიდებულების საკითხთან მიიყვანა.

სარძევე-საწველი ყვავილის გამოყვანაზე ცდებს რომ მორჩა, ახლა შეუ-რყვეველი თავგამოდებით მისდგა დიდი თხზულების წერას, მიწასთან სიახ-ლოვისა და ვიტალურობის ურთიერთდამოკიდებულების თაობაზე. თეზისად ის ჰქონდა, რომ სიცოცხლე მიწისაგან მხოლოდ განსაზღვრულ მანძილზე დაშორებისას შეიძლება განვითარდეს, რადგან მიწა მუდმივად გამოყოფს ლპობის აირს — ესაა ეგრეთწოდებული *fluidum letale*, რომელიც ვიტალურ ძალებს თრგუნავს და ადრე თუ გვიან, მათს სრულს პარალიზებასაც ახდენს. ამიტომაც არის, რომ ყველა ცოცხალი არსება, ზრდის საშუალებით ცდილობს, გასცილდეს მიწას — ე. ი. მისგან ზემოთ იზრდება და არა მასში;

* მომაკვდინებელი აირი (ლათ.)

ამავე მიზეზით მიაქვთ ზემოთ თავისი ყველაზე ფასეული ნაწილები: ხორბალს – თავთავი, ყვავილს – კოკორი, ადამიანს – თავი. და ამიტომაც არის, რომ როდესაც სიბერე მოხრის მათ და ისევ მიწისაკენ მიდრეკის, ისინი უცილობლად ამ ლეტალური გაზის გაკლენის ქვეშ ხვდებიან და ბოლოს და ბოლოს, ზრწნის პროცესის წყალობით, იმავე გაზად გადიქცევიან სიკვდილის შემდეგ.

ცნობისთანავე, რომ პიერფორს მოეკლინა კაცი, რომელსაც შვიდი წელი ქვაბულში გაუტარებია, ზრწნის მთავარი ელემენტი – მიწით გარემოცულს, აღტკინებულმა მარკიზ დე ლა ტაიად-ესპინასმა წამსვე გადაწყვიტა, გრენუი სასწრაფოდ ჩემს ლაბორატორიაში უნდა გადავიყვანო და იქ დიდის ყურადღებითა და უახლესი მეთოდებით გამოვიკვლიო. მარკიზს მიაჩნდა, რომ გრენუი შესანიშნავი ნიმუში იქნებოდა ზემოხსენებული ლეტალური თეორიის დასამტკიცებლად; ამ სუბიექტზე *ფლუიდუმ ლეტალუს*-ს შემოქმედებას მისი ოცდახუთი წლის სხეული მოხუცებულის მიხრწნილობამდე მიეყვანა და სიკვდილისაგან მხოლოდ იმან გადაარჩინა – ყოველ შემთხვევაში, ასე მიაჩნდა თავად ტაიად-ესპინასს, რომ ტყვეობაში ყოფნისას, გრენუი მიწისაგან დაცილებული მცენარეებით იკვებებოდა – სავარაუდოა, პურითა და ხილით. ახლა, ირწმუნებოდა მარკიზი, ავადმყოფისათვის სრული ჯანმრთელობის დასაბრუნებლად, აუცილებელი იყო ფლუიდის სრულიად განდევნა მისი სხეულიდან, და ეს მხოლოდ მისი, მარკიზ დე ლა ტაიად-ესპინასის მიერ შექმნილი „ვიტალური ჰაერი“ გამნიავებელი აპარატის“ მეშვეობით იყო შესაძლებელი. ასეთი აპარატი მას მონპელიეში, თავისი სასახლის სხვენზე უდგას და თუ გრენუი დათანხმდება საკუთარი თავი სადემონსტრაციო ობიექტად ჩათვალოს, მარკიზი არამარტო დაიხსნის მას მიწის გაზით უიმედო მოწამვლისაგან, არამედ გვარიანი თანხითაც დააჯილდოვებს...

ორიოდ საათის შემდეგ, უკვე ეტლში ისხდნენ. ყოვლად აუტანელი გზების მიუხედავად, მონპელიემდე სამოცდაოთხი მილი სულ რაღაც ორ დღეში განვლეს, რადგან მარკიზი, ხანდაზმულობის მიუხედავად, შემთხვევას არ უშვებდა არ გაემოლტა ცხენები და ჟამი-ჟამ მეეტლევც მიეყოლებინა ზედ, ხოლო ხელნებისა და რესორების მრავალგზის დამტკრევის შემთხვევებში, პირადად მონაწილეობდა მათ შეკეთებაში – იმდენად იყო აღტაცებული თავის მონაპოვართ, ისე სწყუროდა, რაც შეიძლება მალე წარედგინა იგი განსწავლული საზოგადოებისათვის. სამაგიეროდ, კოფოდან ჩამოსვლის უფლება გრენუის ერთხელაც არ მისცეს: უნდა მჯდარიყო მეეტლის გვერდით თავის ძონძებში, თავით ფეხამდე სველი თიხითა და მიწით გათხვრილ ჩულოში გამოხვეული და მოგზაურობის მთელი ხნის განმავლობაში მხოლოდ ძირხვენებს აჭმევდნენ — მარკიზს იმედი ჰქონდა, მიწის ფლუიდით მოწამვლის ამ იდეალურ შემთხვევას ცოტა ხნით ასე მაინც დააკონსერვებდა.

მონპელიეში ჩასვლისთანავე, ბრძანება გასცა გრენუი სასწრაფოდ ჩემწყვდიათ სასახლის სარდაფში და მოსაწვევები დაუგზავნა სამედიცინო ფაკულტეტის, ბოტანიკური საზოგადოების, სასოფლო-სამეურნეო სკოლის, მასონთა ლოჟისა და სხვა სამეცნიერო საზოგადოებებს, რომელთა რიცხვი ქალაქში თორმეტზე არანაკლები იქნებოდა. რამდენიმე დღის შემდეგ კი – ზუსტად ერთი კვირის თავზე იმ დროიდან, რაც მან თავისი თავშესაფარი მია-

ტოვა მთებში – გრენუი მონპელიეს უნივერსიტეტის სააქტო დარბაზში, მრავალრიცხოვან მსმენელ-მაყურებელთა წინაშე წარსდგა. მოხსენებაში მარკიზ ტაიად-ესპინასმა იგი დაახასიათა, როგორც მიწის ლეტალურ ფლუიდთა თეორიის ჭეშმარიტების ცოცხალი დასაბუთება. ახსნა-განმარტებასთან ერთად, მარკიზი ნაჭურ-ნაჭურ აგლეჯდა გრენუის მონძებს: აი, ბატონებო, რა შემადრწუნებელ ეფექტს ახდენს გამხრწნელი გაზის ზემოქმედება სადემონ-სტრაციო ობიექტის სხეულზე; მიაქციეთ ყურადღება წყლულებსა და ნაწიბურებს; აი, აქ კი, მკერდზე, უზარმაზარი სისხლისფერ-წითელი კარცინომაა, იმავე გაზისაგან გამოწვეული; მთელი კანი დახეთქილია; სახეზეა აგრეთვე ხერხემლის ფლუიდალური გამრუდება კუზის სახით და ფეხის შეხორცებული თითები. შიდა ორგანოები: ელენთა, ღვიძლი, ფილტვები, ნაღვლის ბუშტი და საჭმლის მომნელებელი ტრაქტი – მძიმედაა დაზიანებული და ამას დამაჯერებლად ადასტურებს განავლის სინჯი. თვით სინჯი თასშია მოგროვებული და ობიექტის გვერდით ძეკს ფიცარნაგზე. ნებისმიერ მსურველს შეუძლია თავად განსაჯოს. ყოველივე ზემოთქმულიდან ის შეგვიძლია დავასკვნათ, რომ ვიტალური ძალების დამბლა, გამოწვეული fluidum letale tailade-ის შეიდწლიანი ზემოქმედებით, უკვე იმდენად პროგრესირებადია, რომ სუბიექტი – ვისი გარეგანი იერსახეც გადაგვარების მკაფიო ნიშნებს ატარებს – უნდა განისაზღვროს როგორც არსება, რომელიც უკვე, ფაქტიურად, სიკვდილთანაა წილნაყარი. ამისდა მიუხედავად, მომხსენებელი ეცდება ვენტილაციური თერაპიის მეშვეობითა და ვიტალური დიეტის გამოყენებით, რვა დღეში მიაღწიოს სრული გამოჯანმრთელების მკაფიო ნიშნებს. ყველა აქ დამსწრეს მოგიწოდებთ, კვირადღას შეიკრიბოთ, რათა პროგნოზის უტყუარობასა და მიწის ფლუიდის ჩვენეული თეორიის ურყეობაში პირადად დარწმუნდეთ!..

მოხსენებას უდიდესი წარმატება ხვდა წილად. განსწავლულმა საზოგადოებამ მქუხარე ტაშით დააჯილდოვა მეცნიერი, ხოლო შემდეგ იმ ფიცარნაგის გასწვრივ გამწკრივდნენ, გრენუი რომ იდგა. მისი ყოვლად ანტი-სანიტარიული მდგომარეობა, ჩირქოვანი იარები და მოტეხილობების ნაკვალევები იმდენად შემადრწუნებელ შთაბეჭდილებას ტოვებდა, ყველამ საბოლოოდ განწირულად ჩათვალა, თუმცა თავად კი გრძნობდა, რომ ჯანმრთელიც იყო და ჯანმოსულიც. სწავლულ ბატონთაგან ზოგიერთი საქმის ცოდნით უკაკუნებდა მკერდზე თითს, ზოგი ზომავედა და ზოგიც პირში ჩახედავდა ხოლმე, ან ქუთუთოებს უქაჩავდა ზევით; სხვები ესაუბრებოდნენ, ქვაბულზე ეკითხებოდნენ, ან იმაზე, თუ როგორ გრძნობდა თავს ამჟამად. გრენუი, მარკიზის დარიგებებისდა კვალად, მხოლოდ მოგუდული ხრიალით პასუხობდა და ორივე ხელით fluidum letale taillade-თი დაზიანებულ ხახაზე უთითებდა...

დემონსტრაცია რომ დამთავრდა, მარკიზმა ისევ შეფუთა ჩვენი გმირი და უკან გააგზავნა, თავისი სასახლის სარდაფში. იქ, სამედიცინო ფაკულტეტიდან მოწვეული რამდენიმე რჩეული ექიმის თანდასწრებით, ვიტალური ჰაერის გასანიავებელ აპარატში მოათავსა – ანუ ერთმანეთთან მჭიდროდ მორგებული ფიჭვის ფიცრებისაგან გაკეთებულ საკუჭნაოში. საკუჭნაო შემომწოვი მილისაგან შემოსული, ლეტალური გაზისაგან თავისუფალი ჰაერით ნიავე-

ბოდა, ხოლო უკვე გამოყენებული აირი კი იატაკში დატანებული ტყავის საქშენით გადიოდა. ეს საკმაოდ რთული დანადგარი მსახურების მთელ რაზმს მოჰყავდა მოქმედებაში და დღიან-ღამიანად ზრუნავდნენ, მიღში ჩაყოლებულ სანიავებლებს მუდმივად ეტრიალათ. ასე და ამგვარად, გრენუი განმწმენდი ჰაერის ნაკადით იყო გარემოცული, ხოლო კედელში ჩატანებული პატარა, ორფრთიანი კარიდან ყოველ საათში ერთხელ აწვდიდნენ მიწიდან დაცილებულ საკვებს: მტრედის ბულიონს, ტოროლის პაშტეტს, გარეული იხვის შეჭამანდს, მურაბას – აუცილებლად ხის კენწეროდან ჩამოკრეფილი ხილისაგან; განსაკუთრებული, მაღალი ჯიშის ხორბლიდან გამომცხვარ პურს, პირინეულ ღვინოს, არჩვის რძეს და სასახლის სხვენზე გამოზრდილი ქათმების კვერცხებისაგან ათქვეფილ ბეზეს...

მთელი ხუთი დღე გრძელდებოდა დეზინფექციითა და რევიტალიზაციით მკურნალობის კურსი. ამის შემდეგ მარკიზმა საქშენები გააჩერებინა და პაციენტი ახლა სააბაზანო ოთახში გადაიყვანა, სადაც რამდენიმე საათით ჩაალბეს შემთბარ წვიმის წყალში და ბოლოს მაღალმთიან ქალაქ პოტოსიდან ჩამოტანილ ნიგვზის ხეთზე დაყენებული საპნით განბანეს. ხელებზე და ფეხებზე ფრჩხილები დააჭრეს, დოლომიტის კირის წმინდა ფხვნილით გაუხეხეს კბილები, გაკრიჭეს, გაპარსეს, თმები დაუკულულეს და პუდრიც მოაყარეს. მოიყვანეს თერძი, მეწადე და გრენუიმ ცხოვრებაში პირველად იგემა საკუთარ თარგზე შეკერილი, გახამებულსახელოებიანი, თეთრჟაბოიანი პერანგი, აბრეშუმის წინდები, მაუდის შარვალი და ცისფერი ხავერდის ჟილეტი, რომ არაფერი ვთქვათ შავი ესპანური ტყავის ლამაზ, ბალთებიან ფეხსაცმელებზე, რომელთაგან მარცხენა, განსაკუთრებულად ნაკერი, მშვენივრად ფარავდა მის დამახინჯებულ ფეხის ტერფს. მარკიზმა საკუთარი ხელით გადაუსვა ფერუმარილი გრენუის დაკენკილ სახეს, ოდნავ წასცხო ჭიაფერი ტუჩებსა და დაწვებზე, ხოლო გამომწვარი ცაცხვის ფანქრით მის წარბებს ჭეშმარიტად კეთილშობილური მოხრილობა მისცა. შემდეგ მარტივი, სადა, იასამნის სუნამო მოასხურა, რამდენიმე ნაბიჯით უკან დაიწია და კარგა დიდხანს ეძებდა სიტყვებს საკუთარი აღტაცების გამოსახატად.

– ყმაწვილო, – წამოიწყო როგორც იქნა, – პირდაპირ აღფრთოვანებული ვარ საკუთარი თავითა და შეძრწუნებული – საკუთარი გენიალობით! თქმა არ უნდა, არასოდეს შემპარვია ეჭვი ჩემი ფლუიდალური თეორიის სისწორეში – არამც და არამც – ოღონდ თუ ასრერიგად დადასტურდებოდა პრაქტიკულ თერაპიაში, მეც არ მეგონა! ლამის ცხოველი იყავით და თქვენგან ადამიანი შევქმენი – ღვთიური შესაქმეა, ღმერთმანი! ბარემ ეს სიამეც მომანიჭეთ – მადით ერთი იმ სარკესთან და საკუთარ ანარეკლს შეავლეთ თვალი... პირველად შეიგრძნობთ, რომ ადამიანი ხართ – ვერ ვიტყვი, განსაკუთრებული ან რაიმეთი გამორჩეული, ან რითიმე აღმტაცებელი, მაგრამ მაინც, სრულიად ჩვეულებრივი ადამიანი! სარკესთან მიბრძანდით, სარკესთან! იხილეთ და გაოცდით იმ ჯადო-მისნობით, რაიც თქვენს მიმართ მოვიმოქმედე!

გრენუის აქამდე სარკეში არასოდეს ჩაეხედა და რა ჰკიდა თვალი მოხდენილ სამოსში, თეთრ ხალათსა და აბრეშუმის წინდებში გამოკვართულ ყმაწვილს, ჩვეულებისამებრ მოიხარა წელში, როგორც ყოველთვის იხრებოდა ამგვარად გამოწყობილი ბატონების წინაშე. მისდა გასაკვირად, ის გა-

მოწყობილი ბატონიც მოიხარა, ხოლო როდესაც გრენუი ისევ გასწორდა წველში, ბატონმაც იგივე გააკეთა და მერე ასე გაშტერებულნი იდგნენ და ერთხანობა ჯიქურ შესცქეროდნენ ერთმანეთს.

ყველაზე მეტად გრენუი სწორედ იმ ფაქტმა გააოცა, რომ მარკიზის თქმისა არ იყოს, მართლა ჩვეულებრივად გამოიყურებოდა: მასში ნამდვილად არაფერი იყო განსაკუთრებული – არც ხიბლიანი ჩანდა, მაგრამ არც ძალიან მახინჯი; საკმაოდ დაბალი, ოდნავ გვერდმოქცეული, უდიდამო სახით... მოკლედ, ისე გამოიყურებოდა, როგორც ათასობით სხვა – ქუჩაში რომ გაეგლო, არა კაცი არ მობრუნდებოდა თვალის გამოსაყოლებლად. აკი თვითონაც არ მიაქცევდა ყურადღებას ვინმე ასეთს, როგორც ახლანა, გზაში რომ შეხვედროდა თუნდაც პირისპირ. ალბათ მხოლოდ იმ შემთხვევაში, თუ შეიყნოსავდა, რომ ამ შემხვედრს მხოლოდ და მხოლოდ იის სურნელი ასდის, როგორც იმ ბატონს სარკეში, და როგორც ახლა თავად, სარკის წინ მდგომს...

არადა სულ ათი დღის წინ მისი დამნახავი გლეხები კვილით გარბოდნენ აქეთ-იქით. არც მაშინ გრძნობდა თავს სხვაგვარად ვიდრე ახლა, და ახლაც, თვალებს რომ დახუჭავს, სულაც არა გრძნობს თავს მაშინდელისაგან განსხვავებულად. გარსშემორტყმული ჰაერი შეიყნოსა და ყოვლად უვარგისი სუნამოს, და მაუდის, და თავისი ფეხსაცმლის ახალგამოყვანილი ტყავის სუნი შეიგრძნო, შეიყნოსა აბრეშუმის, პუდრის, პომადის სუნი, პოტოსური ზეთის მინავლებული სურნელი და უცებ მიხვდა, რომ მტრედის ბულიონი და რაღაც ვენტილატია კი არ იყო საჭირო მისგან ნორმალური ადამიანის შესაქმნელად, არამედ სწორედ ეს მოდური ჭინჭები, ვარცხნილობა და სულ მცირედი კოსმეტიკური ხრიკები!

თვალი მოჭუტა და მოეჩვენა, სარკეში მყოფმა ბატონმაც თითქოს თვალი ჩაუკრა და მისი ჭიაფერით შეღებილი ტუჩების კუთხეში ღიმილი გაკრთა — თითქოს უნდოდა ენიშნებინა, არც ისე საზარელი შესახედი ხარო. თავის მხრივ გრენუიმაც მიიჩნია, რომ ეს სარკეში მყოფი, ადამიანური სუნის არმქონე ფიგურა საკმაოდ სასიამოდ გამოიყურებოდა; ყოველი შემთხვევისთვის, ანარეკლს თავი დაუკრა და შეამჩნია, საპასუხო თავის დაკვრის დროს ისიც მალულად ბერავდა ნესტოებს...

31

მეორე დღეს – მარკიზი იმ დროს სავალდებულო პოზების დაჭერას, შესტებსა და საცეკვაო სვლებს ასწავლიდა – გრენუიმ თავბრუსხვევის პატარა შეტევა გაითამაშა და სულის ხუთვისაგან ვითომდა მთლად ძალაგამოცლილი, დივანზე გაიშლართა.

მარკიზი, ლამის იყო, ჭკუიდან გადავიდა. ჯერ მსახურებს დაუწყო ყვირილი, ითხოვა, სასწრაფოდ მოეტანათ დიდი მარაო, სანიავებლები და

როგორც კი მსახურები ბრძანების შესასრულებლად გასხლტდნენ, მუხლებზე დაეცა გრენუის გვერდით, თავისივე ცხვირსახოცით უნიავებდა, იის მძაფრი სურნელი რომ ასდიოდა, და აფიცებდა, მეტიც – ევედრებოდა, როგორმე ფეხზე წამომდგარიყო, მაინცა და მაინც ახლა არ მიებარებინა უფლისთვის სული, ან შესაძლებლობის ფარგლებში, ზეგამდე მაინც მოეთმინა, საფრთხეში არ ჩაეგდო ლეტალური ფლუიდური თეორიის ნათელი მოძავალი!..

გრენუი იკრუნჩხებოდა და იგრიხებოდა, ახველებდა, ხროტიხებდა, ორივე ხელით იცილებდა ცხვირსახოცს და საბოლოოდ, ფრიად დრამატულად გადმოესვენა დივანიდან, პარკეტზე გახოხდა და ოთახის შორეულ კუთხეში მოყუჩდა.

– ოღონდ ეგ სუნამო მომაშორეთ! – ისე წამოიხავლა, თითქოსდა უკანასკნელ ძალებს კარგავდა. — ეგაა რომ მკლავს!..

და მხოლოდ მაშინ, როდესაც ტაიად-ესპინასმა ცხვირსახოციც გადააგდო ფანჯრიდან და რატომღაც, კაშხოლიც ზედ მიაყოლა, გრენუიმ ეს მძაფრი შეტევა მოთოკა და მიმტკნარებული ხმით აუწყა რომ მას, მენელსაცხებლის შეგირდს, მისი პროფესიის ადამიანებისათვის დამახასიათებელი ფაქიზი ყნოსვა აქვს და ზოგიერთ არომატებზე მისი ორგანიზმი განსაკუთრებით მტკივნეულად რეაგირებს... ის ვითარება, რომ სწორედ იის სუნი – ია ზომ საამური ყვავილია – ასეთი აუტანელია მისთვის, მხოლოდ იმით შეუძლია ახსნას, რომ მარკიზის სუნამო გადამეტებით დიდი რაოდენობით შეიცავს იის ფესვს, ეს უკანასკნელი კი, თავისი მიწისქვეშა წარმოშობის გამო, ცუდ ზემოქმედებას ახდენს ლეტალური ფლუიდით ასეგვარად ჯანმრთეულ პიროვნებაზე... ჯერ კიდევ გუშინ, სუნამოს პირველად ხმარებისას იგძნო თავბრუსხვევა, ხოლო დღეს, განმეორებით რომ შეიყნოსა ნაყენი, თითქოს ისევ იქ აღმოჩნდა, იმ საზარელ დახუთულ ენში, სადაც შვიდი წელი გატარა... ახლა კი, მას შემდეგ რაც მარკიზის ხელოვნებამ სიცოცხლე აჩუქა ფლუიდებისაგან განწმენდილ ჰაერში, ურჩევნია ადგილზე მოკვდეს, ვიდრე კიდევ ერთხელ განიცადოს ამ საზიზღარი ფლუიდის ზემოქმედება! ახლაც კი გული ეკუმშება ფესვებისაგან დაშნადებული სუნამოს გახსენებაზე... სრულიად დარწმუნებულია – ძალები მაშინვე დაუბრუნდება, თუ მარკიზი ნებას მისცემს იის სუნის სრულიად გასაძევებლად თავადვე დაამზადოს საკუთარი სუნამო; წარმოიდგინეთ მიწისაგან დაცილებული ინგრედიენტების ძალზე მსუბუქი, ჰაეროვანი, ფიჭვის წიწვების ესენცია და ტანმადალი კვიპაროსის ზეთი! სულ რამდენიმე შხეფი ტანისამოსზე, რამდენიმე წვეთი ყელზე და დაწვებზე – და ის სრულიად დაზღვეული იქნება იმგვარი გამტანჯავი შეტევებისაგან, ახლახანს რომ გადაიტანა...

ის რაც ჩვენ ახლა, საქმის გასაიოლებლად, მოკლედ გადმოგვცით, სინამდვილეში კარგა ნახევარსაათიანი ენალვარჯნილობის ნიმუში იყო – ხრიკით, სლეკუნითა და სულის ხუთვის შეტევებით ბევრგზის განაწყვეტი – კრუნჩხვებით, ხელების ქნევითა და თვალების თეატრალურად ამოტრიალების თანხლებით. მარკიზი გაშრა – ტანჯვის სიმპტომებზე მეტად, მასზე გრენუის დამაჯერებელმა არგუმენტაციამ გაჭრა. რაღა თქმა უნდა, იის სუნამოს ბრალია ყველაფერი! მიწასთან ამაზრუნენად ახლოს მყოფი, მეტიც –

ფაქტიურად, შიგ მიწაში მზარდი პროდუქტი! უდავოა, უკვე თავადაც ექნება ევ სენი შეყრილი და ვერც კი ხვდება, რომ ეს სურნელი მეთოდურად უახლოვებს სიკვდილის დღეს! ის ნიკრისის ქარი რომ სჭირს, კეფა რომ უქვევდება, ასო რომ ჰკიდია ჩვარივით, და ბუასილი რომ აწუხებს, და ზმაური ყურებში, და დამპალი კბილები – ყველაფერი უთუოდ იის მყრალი ფესვებით მოწამვლის შედეგია! და ეს – ეს საცოდავი კაცუნა, ეს არარაობა, ოთახის კუთხეში რომ მიყუჟულა – მას ჭეშმარიტებას აუწყებს! გული აუჩუყდა მარკიზს. სურდა ახლოს მისულიყო, აეყენებინა და გულში ჩაეკრა, მაგრამ დროულად გაახსენდა – ჯერაც მძაფრად მდის იის სუნით, მსახურებს უხმო და უბრძანა გაექროთ ამ სუნამოთი სავსე ყველა ფლაკონი, გაენიავებინათ სასახლე, ვიტალური ჰაერის აპარატში დეზინფექცია ჩაეტარებინათ მთელი გარდერობისთვის, ხოლო გრენუი საკაცით მიეყვანათ ქალაქის პირველ პარფიუმერთან... სწორედ ამის მისაღწევად გაითამაშა გრენუიმ ზემოხსენებული შეტყეები.

ნელსაცხებლების დამზადებას მონპელიეში ძველი ტრადიციები ჰქონდა და იმის მიუხედავად, რომ ბოლო ხანებში, ქალაქ-კონკურენტ გრასთან შედარებით წარმოება ოდნავ დაკნინდა, ქალაქში მაინც დარჩა ორი-სამი კარგი პარფიუმერი და მეხელთათმანე. ყველაზე პატივცემულმა მათ შორის, ვინმე რუნელმა, გაითვალისწინა თავისი ფრიად სარფიანი საქმიანი ურთიერთობები მარკიზ დე ლა ტაიად-ესპინასის ოჯახთან, რომელსაც საპონს, საცხებს და ნელსურნელებებს აწვიდა და ამ სრულიად განსაკუთრებულ ნაბიჯს დასთანხმდა – ერთი საათით დაეთმო საკუთარი ატელიე უცნაური პარიზელი შევირდისათვის, საკაცით რომ მოაყენეს კარს. ამ უკანასკნელს არავითარი ახსნა-განმარტებებისათვის არ მიუგდია ყური, არც ის უკითხავს, სად რა ეწყო და პირდაპირ განაცხადა – თავად გაეარკვევ ყველაფერსო; ჩაიკეტა სახელოსნოში, სრული ერთი საათი გაატარა იქ, ხოლო რუნელმა და მარკიზის მოურავმა სამიკიტნოს მიაშურეს, სადაც, სულ რამდენიმე ჭიქა ღვინის ფასად, რუნელი იძულებული გახდა ესმინა, თუ რატომ და რა მიზეზით არა აქვს მის იის წყალს დე ლა ტაიად-ესპინასის საჯალაბოში არსებობის უფლება.

რუნელის ატელიე და სახელოსნო ვერ იყო მთლად ისე ბრწყინვალედ მოწყობილი, როგორც ბალდინის სურნელოვან ნაწარმთა მაღაზია პარიზში: რამდენიმე სახეობის ყვავილის ზეთი, ნაყენი თუ ნაზავი, რიგით მენელსაცხებლეს არავითარ გასაქანს არ მისცემდა, ოღონდაც გრენუისათვის კი ეს მასალაც სრულიად საკმარისი იყო. არავითარი დიდებული სურნელების შექმნას ის არ აპირებდა. არც ცდილა, განეზავებინა, როგორც თავის დროზე ბალდინისთან, რაღაც განსაკუთრებული, ბრწყინვალე სუნამო, რომელიც ათასი სხვა სურნელისაგან გამორჩეული იქნებოდა და საზოგადოებას გადაიყვანდა ჭკუიდან. ეკალიპტისა და კვიპაროსის ფოთლის ესენციებს მხოლოდ უნდა შეენიღბათ მთავარი არომა, რომლის დამზადებაც მან განიზრახა – ადამიანის, უბრალოდ – ადამიანის სუნი!.. უნდოდა მიეთვისებინა, დასაწყისისთვის თუნდაც უხარისხო სუროგატის სახით, ის სუნი, რომელიც თავად მას არ გააჩნდა. რა თქმა უნდა, ზოგადად ადამიანის სუნი არ არსებობს, ისევე როგორც არ არსებობს ზოგადად სახე – ყველა ადამიანს თავისებური სუნი

სდის და არც არავინ უწყობდა ეს გრენუიზე კარგად, ვინაც ათასობით სუნს სცნობდა, დაბადებიდანვე სუნით განარჩევდა ადამიანებს. და მაინც, პარფიუმერის თვალთახედვიდან გამომდინარე, იყო რაღაცა საერთო გამა მასში და საკმაოდ მარტივიც: ოფლისა და ქონის, ყველისა და სიმჟავის... მოკლედ, საკმაოდ მძაღე. ასე თუ ისე, იგი ყველა ადამიანისათვის იყო დამახასიათებელი და სწორედ ეს უნდა დასდებოდა საფუძვლად ინდივიდუალური არომის ძირითად თემას.

ოღონდაც ეს თემა, ეს ნაკადი, პირადი სუნის ეს განუქმეორებელი კოდი ადამიანთა უმეტესობისათვის შეუცნობელია. მათ არც არაფერი იციან იმისა, რომ მსგავსი რამ გააჩნიათ და ამას გარდა, ყოველთვის ცდილობენ ან ახალი ტანსაცმლით, ან ახალი, მოდური სუნამოთი შენიღბონ. კარგად ცნობენ მხოლოდ იმ მთავარ სუნს, იმ – უპირველეს და პრიმიტიულ – სხეულის ანაორთქლს, რომელშიც ცოცხლობენ და ყველანი, ვინც ამ სიმყრალეს გამოცემს, თავისიანად აღიქმებიან...

ამ დღეს გრენუიმ ფრიად უცნაური სუნამო მოაშხადა. ამაზე უცნაური ქვეყნად ჯერ არცერთი არ დამზადებულა: მითთვისა არა უბრალოდ სუნი, არამედ სუნი იმ ზოგადად ადამიანისა, სუნი რომ ასდის. ყველა, ვინც კი მას შეისუნთქავდა თუნდაც უკუნში, მაშინვე გაიფიქრებდა რომ აქ, სადღაც, კიდევ ვიღაც არის; თუ მას იპკურებდა ადამიანი, რომელსაც თავად ასდის ადამიანური სუნი, მოგეჩვენებოდათ, რომ აქ ორი ადამიანია, ან კიდევ უარესი, ჯადოქრული ორმაგი არსება, როგორც ხატება, რომელიც აღარ შეიძლება ერთმანად დააფიქსირო, რადგან მისი გარშემოხაზულობა არამკაფიოა, გადღაბნილი, როგორც წყლის ლივლივით დამახინჯებული ანარეკლი ტბის ზედაპირზე.

ამ სუნის ასლის გადასადებად – რაც მისი აღქმისთვის უხარისხო, მაგრამ სხვათა მოსატყუებლად მაინც საკმაო იქნებოდა – გრენუიმ რუნელის სახელოსნოში სხვებისთვის სრულიად გამოუსადეგარი, მოულოდნელი, შეიძლება ითქვას, არატრადიციული ინგრედიენტები გამოიქმნა.

კატის ჯერ კიდევ ნელდი განავალი, კარის ზღურბლთან რომ იპოვა – აიღო ნახევარი კოვზი და ჩასლო შესარევში მცირეოდენ ძმარსა და დანაყილ მარილთან ერთად; მაგიდაზე ყველის ნაფხზვენი აღმოაჩინა, რუნელს რომ მორჩენოდა ნავახშმევს და საკმარისად მძაფრ სუნს რომ გამოსცემდა; სავაჭროს უკან, კასრის სახურავიდან ჩამოფხიკა რაღაც, რასაც თევზის ნაწლავების სუნი უდიოდა, გადაურია ეს ყველაფერი ლაყე კვერცხს, სასაქმებელ ზეთს, ნიშადურს, მუსკატის დანაყილ კაკალს, დამწვარ რქას და ღორის ხიწიწს, დაუმატა დიდი რაოდენობით ციბეტინი, მერე ეს ნარევი სპირტით გააზავა და დალექვის საშუალება მისცა. შემდეგ გაფილტრა და ახლა სხვა ჭურჭელში გადაასხა. სუნი შემზარავი იყო – გახრწნის, კლოაკის, სიღამპლის შმორი სდიოდა, მაგრამ როდესაც მარაოს ერთი აქნევა ამ ანაორთქლს სუფთა ჰაერსაც შეურევდა, ისეთი შთაბეჭდილება გექმნებოდათ, თითქოს პარნიში, ოპერისა და ლანჟერის ქუჩების გადაკვეთაზე იდექით ზაფხულის ცხელ დღეს – იქ, სადაც თევზის რიგების, *უძანკოთა სასაფლაოსა* და გადაჭედილი სახლების სუნი ტრიალებს...

სწორედ ამ საზიზღრობას, რომელსაც გვამის სუნი უფრო სდიოდა, ვინემ ცოცხალი ადამიანის, არომატული ეთერული ზეთების მხოლოდ თხელი ფენა დაადო: წიწაკის, ლიმონისა და ევკალიპტისა და ყოველივე ეს შეარბილა, ოღნავ მიჩქალა კიდევ ყვავილების ნატიფი ზეთების თაიგულით: ნემსიწვერა, ვარდი, ფორთოხლის ყვავილი და ჟასმინი. სპირტით ხელმეორედ გაზავებითა და ცოტაოდენი ძმრის დამატებით ის უგვანი ფუძე, რაზედაც მთელი ეს ნარევი წარმოიქმნა, ყნოსვისათვის სრულიად მიუწვდომელი გახდა. ახალმა ინგრედიენტებმა შეუმჩნეველი გახადა ფარული სიმყრალე, ყვავილების სურნელმა შენიღბა არსი; მეტიც – საინტერესოც კი გახადა. ახლა შეუძლებელი იყო გაზრწინისა და სიღამპლის სუნის შეგრძნება, ის სრულიად გამქრალიყო და პირიქით, ისეთი შთაბეჭდილება იქნებოდა, რომ ეს სუნამო რა-რაც მაცოხლებელ, ფრთებისშემსხმელ სურნელს აფრქვევდა!

გრენუიმ ორ ფლაკონში გადაასხა ნაზავი, საცობები მჭიდროდ მოარგო და ჯიბებში შეინახა. შემდეგ საფუძელიანად გარეცხა შემრევები, ფილები, ძაბრები და კოვზები, მწარე ნუშის ზეთით გაწმინდა, რათა სუნის ყოველგვარი კვალი მოესპო და ახლა სხვა შემრევს დასწვდა. სწრაფად შეაზავა მეორე სუნამო, პირველის ასლის მსგავსი, რომელიც ასევე ეთერული ზეთებისა და ყვავილთა ნაყენებისაგან შედგებოდა, ოღონდ საფუძველად ის ჯადოსნური ნარევი აღარ ჰქონდა და სრულიად ჩვეულებრივ ინგრედიენტებს შეიცავდა — მუშკს, მურს, ცოტაოდენ ციბეტინსა და კვიპაროსის ზეთს. ამ ახალ სუნამოს სულ სხვაგვარი არომა ჰქონდა პირველთან შედარებით — არც იმდენად აგრესიული, უფრო მიაბიტი, ნაკლებად იდუმალი, — ვინაიდან სწორედ ის საფუძველი არ ჰყოფნიდა, ადამიანის სუნს რომ იმეორებს...

ამ სუნამოთიც გაავსო ფლაკონი, გაიხადა და დედიშობილა დარჩა. მერე აიღო ის, პირველი სუნამო, ტანსაცმელს მოაპკურა და თავადაც მიისხურა იღლიებში, ფეხის თითებს შორის, ლაჯებში და ყურებს უკან; გადაისვა თმებზე და კისერზე, მერე ისევ შეიმოსა და უჩუმრად გავიდა სახელოსნოდან.

32.

ქუჩაში რომ გამოვიდა, უეცრად შიში დაეუფლა — იცოდა, თავის არსებობის მანძილზე პირველად ასდიოდა ადამიანის სუნი. თუმცა, მისთვის რომ გეკითხათ — უბრალოდ ყარდა, ყარდა საზიზღრად. წარმოდგენაც კი არ შეეძლო, თუ სხვები სულაც არ აღიქვამდნენ მის სუნს, როგორც სიმყრალეს და ვერ შეებდა სამიკიტნოში, სადაც რუმელი და მარკიზის მოურავი ელოდნენ. ახალი სურნელის უჩუმრად გამოცდა ამჯობინა — ადგა და ყველაზე ვიწრო, ჩაბნელებული ჩიხებით დაეშვა მდინარისაკენ; იქით, სადაც დაბალებსა და მღებავებს თავიანთი სახელოსნოები ჰქონდათ გამართული და თავიანთ მყრალ საქმიანობას ეწეოდნენ. ვინმე შემხვედრის დანახვაზე, ან რომელიმე წინკართან, სადაც ბავშვები თამაშობდნენ და დედაბრები ჩამომსხდარიყვნენ, თავს აიძულებდა, ნაბიჯი შეენელებინა.

აკი ბავშვობიდანვე იყო შეჩვეული, რომ გვერდზე ჩავლილი ადამიანები არავითარ ყურადღებას არ აქცევდნენ; არა ზიზღის გამო – როგორც ადრე ეგონა, – არამედ საერთოდ ვერ ამჩნევდნენ მის არსებობას. მხოლოდ მაშინ, როდესაც პირისპირ შეეჩხებოდა ვინმეს, ბრბოში ან მოულოდნელად, ქუჩის კუთხეში, წარმოიქმნებოდა ხოლმე აღქმის ველში მეყვსეული ჩართვა და ჩვეულებრივ, შემხვედრი შერძრწუნებით გადაქანდებოდა ხოლმე უკან, რამდენიმე წამი უყურებდა მას, გრენუის, ისე როგორც არსებას, რომელსაც არსებობის არავითარი უფლება არ გააჩნია; არსებას, რომელიც უეჭველად იყო მის წინ და თან, როგორღაც, არც არსებობდა – სწრაფად შეტრიალდებოდა, გაშორდებოდა და იქვე მიივიწყებდა...

ოღონდ ახლა, მონპელიეს ჩიხებში, გრენუი ხედავდა და გრძნობდა – და ამჯერად სიამაყის მწვავე გრნობაც დაეუფლა – რომ ის რაღაცნაირ ზემოქმედებას ახდენს სხვებზე: ჭის კიბეზე გადახრილ ვიღაც ქალს ჩაუარა და შეამჩნია, სასწრაფოდ წამოსწია ქალმა თავი, შეათვალიერა და შემდეგ, ამკარად დამშვიდებული, ისევ თავის საქმეს მიუბრუნდა. ვიღაც მამაკაცი, რომელიც მისკენ ზურგით იდგა, შემობრუნდა და კარგა ხანს ცნობისმყვარედ ადევნებდა თვალს. ბავშვები, რომლებსაც ხვდებოდა, გზას უთმობდნენ – არა შიშით, არამედ პატივისცემით; და მაშინაც კი, როდესაც სახლის კარებიდან გამოვარდნილები უნებურად შეეჩხებოდნენ, ყოველგვარი შეკრთომის გარეშე გასლხტებოდნენ ხოლმე გვერდზე.

რამდენიმე ასეთი შეხვედრის გამოისობით ზუსტად შეიგრძნო თავისი ახალი აურას ძალა და უფრო თვითდარწმუნებული და თავხედიც კი გახდა. სწრაფად უახლოვდებოდა ადამიანებს, უნდოდა, რაც შეიძლება ახლოს ჩაეველო მათთან, მარცხენა ხელს იქნევდა და თითქოს შემთხვევით შეეხებოდა ხოლმე სხვის მკლავს. ერთხელ ისევ, ვითომდა შემთხვევით, ხელიც კი ჰკრა კაცს, როცა მის გადასწრებას ცდილობდა; გაჩერდა, ბოდიში მოუხადა და მან, ვინც ჯერ კიდევ გუშინ მის მოულოდნელ გამოჩენაზე მეხდაცემულივით გამშედებოდა, ისეთი სახე მიიღო, თითქოს არც არაფერი მომხდარა, მობოდიშება მიიღო, გაუღიმა კიდევაც და მხარზე ხელიც მოუტყაპუნა.

გრენუიმ თავი დაადწია ჩიხებს და წმ. პეტრეს ტაძრის წინ მდებარე მოედანზე გამოვიდა. ტაძარში ჯვრისწერის ცერემონია დასასრულს უახლოვდებოდა; ზარები რეკდნენ და თაღოვანი კარიბჭის ორივე მხარეს ხალხი იდგა. ყველას პატარძლის დანახვა სურდა. გრენუიც იქით გაიქცა, ბრბოს შეერია. იბიძგებოდა, ტრიალებდა ამ მასაში, ადამიანების ღურღოში – დაე, იდგნენ მჭიდროდ მის გარშემო, გრენუის სუნით გაიჟღინთონ! და ხელს კრავდა მოწოლილ სიმჭიდროვეს, ფართოდ შლიდა ფეხებს, ხალათის საყელოც მოიფლითა, რათა სუნი თავისუფლად წამოსულიყო სხეულიდან და უსაზღვრო იყო მისი სიხარული, როცა ნახა, რომ სხვები ვერაფერს ამჩნევდნენ, სრულიად ვერაფერს; რომ მთელი ეს ბრბო, კაცი თუ ქალი, და ბავშვები, რომლებიც ასე მჭიდროდ დგანან მის გარშემო, სრულიად იოლად აძლევენ თავის მოტყუების უფლებას და ისუნთქავენ მის სიმყრალეს – სწორედ იმას, კატის განაველის, ყველისა და ძმრისაგან რომ შეითთხნა, და მიირქმევენ როგორც თავისი მსგავსის სუნს, ხოლო მას, ნაბუშარსა და მაგიდის ქვეშ გაგდებულ გრენუის, ისე იღებენ თავიანთ წრეში, როგორც სწორნი სწორს...

უცებ იგრძნო, მუხლებთან ბავშვი ედგა, პატარა გოგონა, უფროსებს შორის ჩაჭვდილი. ლიქნიანი მზრუნველობით აიყვანა ხელში, რათა ბავშვს უკეთ დაენახა ყველაფერი. დედამისმა მადლობაც კი გადაუხადა, ბავშვი კიდევ, სიხარულით ჭყლოპინებდა.

და იდგა ასე, ბრბოს შუაგულში, დაახლოებით მეოთხედი საათი, ყალბი წმინდანობის ალტკინებით იკრავდა გულში უცხო ბავშვს და ვიდრე ჩაივლიდა ზარების გამაყრუებელი ჟღერითა და მოზეიმე ხალხით თანხლებული პროცესია, რომლის თავზეც წვრილი ხურდა ფულის წვიმა მოდიოდა, გრენუიში სულ სხვაგვარი ზეიმი ბობოქრობდა, შავი ზეიმი, მრუმე ზეობის გრძობა, ავხორცობასავით თრთოლვას რომ იწვევდა მასში, და თავს ძლივს იკავებდა, შხამ-ნადველასავით არ გადმოენთხია მთელ ამ ბრბოზე და პირში არ მიეხალა მათთვის – კი არ მეშინის თქვენი, თითქმის არც მძულხართ, ოღონდ მენიზღებით კია თქვენი მყრალი სიბრიყვისათვის, ამგვარი მოტყუებისა და გასულელების ნებას რომ მაძლევთ! და თითქოს მეტი დაცინვის მიზნით, უფრო მიიკრა ბავშვი მკერდზე, ფილტვები ჰაერით გაივსო და ამ ხალხთან ერთად დასძახა: „პატარძალს გაუმარჯოს, პატარძალს! ნეფედლოფალს გაუმარჯოს!“

როდესაც საქორწილო პროცესია გაეცალათ და ბრბომ დაშლა იწყო, ბავშვი დედას გადასცა, მერე კი ეკლესიას მიაშურა, აღვზნებისაგან ცოტა მაინც დასაცლელად. ჰაერი ტაძარში საკმევლის სუნით გაჟღენთილი დახვდა, საკურთხეველის ორსავე მხარეს ბოლქვებად რომ ამოდიოდა ორი სასაკმევლიდან და მქისე ზეწარივით ეფინებოდა სულ ახლახანს აქ მსხდომი ადამიანების უკვე მინავლებულ სუნს. გრენუი ქორედის ქვეშ ჩამოჯდა.

ანაზღად სრული კმაყოფილების გრძობა დაეუფლა: არა ისეთი ზარხოშული, როგორსაც ადრე, კლდის საშოში მარტოსული ორგიების დროს განიცდიდა – არა, პირიქით – ცივი, ფხიზელი კმაყოფილების, მხოლოდ და მხოლოდ საკუთარი ძლიერების შეგრძნება რომ ბადებს.. უკვე უწყოდა თავისი ნამდვილი მიზანი – საკუთარი გენიალურობის წყალობით, ყოვლად უგვანო საშუალებებისაგან შექმნა ადამიანის სუნი და შექმნა ისეთი სიზუსტით, ბავშვმაც კი მოატყუებინა თავი. ახლა გრძობდა, მეტის მიღწევაც შეეძლო: შეეძლო გაეუმჯობესებინა ეს სურნელი, შეეძლო არა უბრალოდ ადამიანის, არამედ ზეკაცის სუნის შექმნა; ანუ რაღაც ღვთაებრივი არომის, გამოუთქმელად მიმზიდველისა და ცხოველმყოფელის, რომლის შემყნოსავი, უბრალოდ, იძულებული იქნება, შეიყვაროს იგი, გრენუი – თავად ამ ჯადოსურნელის მატარებელი ზეკაცი!..

დაახ, სწორედაც აიძულებს რომ შეიყვარონ! როგორც კი მისი არომის გარემოში მოხვდებიან, იძულებულნი შეიქნებიან არამარტო აღიქვან, როგორც თანასწორი, არამედ შეიყვარონ კიდევ – სიშლეგემდე, თავდავიწყებით; აიძულებს, ითრთოლონ, იქვეითონ ნეტარებისაგან – შეიყნოსავენ თუ არა მის სუნს, უმაღლეს მთიყრიან, როგორც უფლის საკმევლის წინაშე! და სურდა, ნელსურნელებათა ყოვლისშემძლე ღმერთი გამხდარიყო – ისეთი, როგორიც ოცნებებში ეხატებოდა, ოღონდ ამჯერად – ყოფიერ სამყაროში და რეალურ ადამიანებსა ზედა... და იცოდა, შეძლებდა კიდევ, ვინაიდან ადა-

მიანებს უნარი აქვთ, დახუჭონ თვალი და არა დაინახონ სიდიადე, საშინელება, სილამაზე, ამოივსონ ყურები და არა უსმინონ არცა კაცსა და არცა სიტყვას მისას; ოღონდაც სურნელს კი ვერ აღწევენ თავს, ვინაიდან იგია სუნთქვის ღვიძლი ძმა – მასთან ერთად შეაღწევს იგი ადამიანებში და მათ თავის დაცვის საშუალებაც კი არ ექნებათ, თუ სიცოცხლე სურთ... სურნელი ყველაზე ღრმად აღწევს, შიგანამდე უწევს და იქ გამოაქვს დასკვნა ლმობასა თუ არად ჩაგდებაზე, ზიზღსა თუ სიამეზე, სიყვარულსა თუ სიძულვილზე. ადამიანის სულს ფლობს ის, ვინც მის სურნელს ფლობს...

წყნარად, მშვიდად იჯდა გრენუი ეკლესიის მერხზე და თავისთვის ჩუმიდ ხითხითებდა. ხალხის დამორჩილება რომ გადაწყვიტა, არც აღტკინების მაგვარი არაფერი განუცდია და არც თვალეში უღვიოდა შლეგის ცეცხლი და არც შემოიღვივით მანჭავდა სახეს. ოღნავადაც არ ბორგავდა. იმდენად ნათელ და მხიარულ განწყობაზე იყო, თავსაც კი ეკითხებოდა: მაინც და რისთვის მჭირდებაო ყველაფერი ეს? და აკი პასუხიც თავადვე გასცა: სჭირდება იმიტომ, რომ ბოროტებითაა გაჟღენთილი... და ამ დროს დიდის კმაყოფილებით ჩაიციხა კიდეც. სრულიად უმანკო გამომეტყველება კი ჰქონდა – როგორც ნებისმიერს იმ ადამიანთაგან, ვინც, უბრალოდ, ბედნიერია.

რამოდენიმე ხანს იჯდა ასე, გასუსული, და ღრმად ისუნთქავდა საკმეველით გაჯერებულ ჰაერს, მერე ისევ თავდაჯერებულმა ღიმილმა გადაუარა სახეზე. ისე, კაცმა რომ თქვას, ძან უბადრუკი სურნელებით კი კმაყოფილება ეს ჩვენი ღმერთი! სასაცილოც კია – რაც ამ საკმეველებიდან ბოლავს, ნამდვილი საკმეველიც კი არაა – უფრო რაღაც ნარევე-ნაზიზნი, რომელშიც ცაცხვის ნახშირი, დარიჩინი და გვარჯილაა შერეული. დიახ, დიახ – ღმერთი, უბრალოდ, ყარდა! ღმერთი ერთი პაწია, საბრალო მყარაა იყო; მას ატყუებდნენ, ამ ღმერთს, ან თავადვე იყო მატყუარა, ზუსტად ისეთივე, როგორც გრენუი – ოღონდ გაცილებით უგერგილოდ კი იტყუებოდა!

33.

მარკიზი დე ლა ტაიად-ესპინასი პირდაპირ აღფრთოვანებული დარჩა ახალი სუნამოთი. მისთვისაც კი, ლეტალური ფლუიდის აღმომჩენისათვის, გასაოცარი იყო იმაზე დაკვირვება, თუ რარიგ მოქმედებდა ინდივიდის საერთო მდგომარეობაზე იმგვარი მეორეხარისხოვანი და აქროლადი სუბსტანცია, ვითარცა სუნამოა: ყველაფერი იმაზეა დამოკიდებული, თუ რამდენად ახლოა მიწასთან ან რამდენადაა დაცილებული მიწას ზემოხსენებული სუბსტანციის ინგრედიენტები. სულ რამდენიმე საათის წინ, გადაფითრებული, გულისწასვლამდე მისული გრენუი ახლა ისევე საღად და ჯან-ღონით საკსედ გამოიყურებოდა, როგორც მისი ასაკის ნებისმიერი სხვა ჯანმრთელი ადამიანი; მეტიც, ისიც კი შეიძლება ითქვას, რომ – მისი წრის ხალხისთვის დამახასიათებელი ზოგიერთი თანდაყოლილი ნაკლულოვნებისა და სრული

გაუნათლებლობის მიუხედავად – რაღაც პირადი ინდივიდუალობის მსგავსიცი კი შეიძინა. ყოველ შემთხვევაში, იგი, ტაიად-ესპინასი, თავის უკვე გამოსაცემად მომზადებულ ტრაქტატში ლეტალური ფლუიდის თეორიის საკითხისათვის (ქვეთავი: *დიეტეოთიკა*) აუცილებლად აღწერს ამ შემთხვევას. ოღონდაც, ჯერ თავად მოიხმარს ამ სუნამოს – ასე ვთქვათ, მისი პრაქტიკული დანიშნულებისამებრ.

გრენუიმ ორივე ფლაკონი გადასცა მარკიზს, მარკიზმაც იპკურა და ეფექტით სავსებით კმაყოფილი დარჩა: ახლა მეჩვენება, – აღიარა კიდევ, – რომ ეს ამაზრზენი იის სუნი წლების მანძილზე ტყვიასავით მაწვებოდა მხრებზე, ახლა კი თითქოსდა ფრთები გამომესხა და იმ მარცხენა მუხლის ტკივილმაც მიკლო, და ხმაურმაც ყურებში და საერთოდ, მხნედ და ათი წლით გაახალგაზრდავებულად ვგრძნობ თავსო. მივიდა გრენუისთან, გადაეხვია და „ფლუიდალური ძმა“ უწოდა, იმ გაგებით, რომ მხედველობაში აქვს არა სოციალური, არამედ გონებაჭვრეტითი ურთიერთობა *in conspectu universalitatis fluidi letalis*, რის წინაშეც – და მხოლოდ მის წინაშე – ყველა ადამიანი თანაბარია; ამას გარდა, მას დაგეგმილი აქვს – და ამას ეუბნებოდა ძალიან მეგობრულად, ყოველგვარი ზიზღის გარეშე, თითქმის ისე, როგორც თანასწორს – უახლოეს ხანში დააწესოს უმაღლესი წოდების ლოჟა იმ მიზნით, რომ სრულად გადალახონ *fluidum letale*, რათა სასწრაფოდ *fluidum vitale* გაამეფონ ირგვლივ, და უკვე ახლავე აღუთქვამს გრენუის, რომ ის ამ ლოჟის პირველი მოქცეული წევრი იქნება. შემდეგ სუნამოს რეცეპტი დააწერინა, ფურცელი შეინახა და ორმოცდაათი ლუდორიც უბოძა.

პირველი მოხსენებიდან ზუსტად ერთი კვირის თავზე, უნივერსიტეტის სააქტო დარბაზში, მარკიზ დე ლა ტაიად-ესპინასმა მეორედ წარუდგინა გრენუი სწავლულ საზოგადოებას. უამრავი ხალხი მოზღვავდა: მოვიდა არა მარტო სამეცნიერო, არამედ მაღალი და უმაღლესი საზოგადოების ნაღებიც, და მათ შორის ბევრი მანდილოსანი, რომლებსაც უკვე საარაკოდ გამხდარი „ქვაბულის კაცი“ ნახვა სურდათ. იმის მიუხედავად, რომ ტაიად-ესპინასის მოწინააღმდეგეებმა – უმთავრესად, „უნივერსიტეტის ბოტანიკური ბაღის მეგობართა წრის“ და „აგროკულტურის წამახალისებელი გაერთიანების“ წევრებმა – თავის მომხრეების სრული მობილიზაცია მოახდინეს, ღონისძიებას უდიდესი წარმატება ხვდა წილად. რათა ყველასათვის შეეხსენებინა, როგორ გამოიყურებოდა გრენუი სულ რაღაც ერთი კვირის წინ, მისმა ბრწყინვალეებამ ჯერ ის ნახატები დაარიგა დარბაზში, სადაც ქვაბულის კაცი მთელი მისი გაუბედურებლობით იყო გამოსახული, შემდეგ კი ბრძანება გასცა, შემოეყვანათ ახალი გრენუი – ლურჯი მაუდის სერთუკსა და აბრემუმიის პერანგში გამოწყობილი, ლოყებმეგარდისფერებული, დავარცხნილი, კულულებდაპუდრული; და უკვე ის, თუ როგორ მოდიოდა, წელში გამართული, გამოზომილი ნაბიჯებით, თეძოების მოხდენილი რხევით, ღინჯად, საკუთარი ღირსების გრძნობით რომ ავიდა ფიცარნაგზე, და იმანაც ღიმილით რომ დაუკრა საზოგადოებას თავი იქით და აქეთ – ყველა ურწმუნო და კრიტიკანი აიძულა, ენა ჩაეგდოთ მუცელში. *უნივერსიტეტის ბოტანიკური ბაღის მეგობრებიც* კი გასუსულნი ისხდნენ. ცვლილება მეტისმეტად თვალმისაცემი იყო, მეტისმეტად, და განსაცვიფრებელი იყო სასწაული, რომელიც უეჭველად

მონდა: თუ სულ რაღაც ერთი კვირის წინ, გაველურებულ, ოთხზე მდგომ ცხოველს შეჰყურებდნენ, ახლა მის ადგილას სრულიად ცივილიზებული, ყოვლად ჩვეული აგებულების ადამიანი იდგა. დარბაზში თითქოს რაღაც მოკრძალებისდაგვარი განწყობა გავრცელდა, და როცა თავად მარკიზ დე ლა ტაიად-ესპინასი ავიდა კათედრაზე მოხსენების წასაკითხად, დარბაზში ბუზის გაფრენის ხმასაც კი გაიგონებდით. მისმა ბრწყინვალეებამ ერთხელ კიდევ შეახსენა მიწის ლეტალური ფლუიდის მისეული, უკვე საკმაოდ ცნობილი თეორიის არსი; შემდეგ ახსნა, თუ როგორი მექანიკური და დიეტური ხერხებით გააძევა ფლუიდი სადემონსტრაციო ობიექტის სხეულიდან, როგორ ჩაუნაცვლა იგი ვიტალური ფლუიდით და დასასრულს, ყველა დამსწრეს მოუწოდა – როგორც მეგობრებს, ისე მოწინააღმდეგეებს, მასთან – მარკიზ ტაიად-ესპინასთან ერთად – შერკინებოდნენ უარყოფით ლეტალურ ფლუიდს და ეღიარებინათ დადებით ვიტალური ფლუიდი. ამასთან ხელები გან-გან გაშალა და მხერა ზეცისკენ ადაპყრო, და მრავალმა სწავლულმა გვამმა გაიმეორა ეს ჟესტი, ხოლო ქალები ცრემლობდნენ...

ოღონდაც, პოდიუმზე მდგომი გრენუი მომხსენებელს ყურს არ უგდებდა – უდიდესი სიამოვნებით აკვირდებოდა სულ სხვა, გაცილებით რეალური ფლუიდის ზემოქმედებას: გაითვალისწინა რა სააქტო დარბაზის ზომები, საჭიროზე მეტი სუნამოც კი იპყურა და აქ ამოსვლისთანავე მისი სუნის აურამ ტალღებად იწყო გავრცელება დახურულ სივრცეში. იგი ხედავდა – დიახ, ხედავდა კიდევ – როგორ მოედო ის ჯერ წინა რიგებს, მერე უფრო შორს, დარბაზის ცენტრისკენ გადაიწია, ბოლოს უკანა რიგებსაც მიაღწია და ფოიეშიც გაიშალა; ყველა, ვისაც კი მოედო, თვალდათვალ იცვლებოდა. მისი არომის ზოლში მიხვედრილი ადამიანები თავისდაშეუმჩნეველად იცვლიდნენ გამომეტყველებას, იცვლიდნენ გრძნობებს, ქცევას... ის, ვინც დასაწყისში თავშეკავებული გაოცებით უმხერდა, ახლა გრძნობამორეული შეჰყურებდა; ვინც მანამდე სარგადაყლაპულივით იჯდა, შუბლს იჭვნეულად იჭმუნნიდა და ტუჩებსაც მრავალმნიშვნელოვნად ღრეცდა, ახლა წინ გადახრილიყო და სახეზე ბავშვურად მიმდობი გამომეტყველება აღბეჭდოდა; ყველაზე მფრთხალების, შეშინებულების, მგრძნობიარეების სახეებზეც კი – მათი, ვინც მანამდე ჯერ შეძრწუნების და მერე შესაფერისი ეჭვის გარეშე ვერ უყურებდა – მეგობრული, აშკარა თანალობის გამომხატველი გამომეტყველება გაჩნდა, როგორც კი გრენუის სუნი მისწვდათ.

მოხსენების დამთავრებისთანავე მთელი ეს აღფრთოვანებული საკრებულო ფეხზე წამოდგა. „დიდება ტაიად-ესპინასს! ვივატ – ვიტალური ფლუიდის თეორიას! ძირს ორთოდოქსული მედიცინა!“ – გაჰყვიროდა სამხრეთ საფრანგეთის უმნიშვნელოვანესი საუნივერსიტეტო ქალაქის, მონპელიეს სწავლული საზოგადოება და მარკიზ დე ლა ტაიად-ესპინასიც თავის ცხოვრების მწვერვალს ადგამდა ფეხს...

ხოლო გრენუიმ, რომელიც მშვიდად დაეშვა ფიცარნაგიდან და სრულიად შეუმჩნეველად შეერია ხალხს, ანაზღად გაიაზრა: ეს ოვაციები, კაცმა რომ თქვას, მას ეკუთვნოდა – მხოლოდ მას, ჟან-ბატისტ გრენუის – იმისდა

მიუხედავად, რომ დარბაზში მოხეიმეთაგან ეს ეჭვადაც არავის გაუვლია გულში.

34.

მონპელიეში კიდევ რამოდენიმე კვირა დარჩა. ახლა უკვე ცნობილ პიროვნებას, სალონებშიც კი პატივებდნენ, სადაც ერთთავად ქვაბულში ცხოვრებასა და მარკიზის შემწეობით განკურნებაზე ესაუბრეოდნენ. ისევ და ისევ უხდებოდა მის გამტაცებელ ყაჩაღებზე, კალათსა და გასაშლელ კიბეზე შეთხზული ისტორიის გამეორება; სულ უფრო და უფრო შელამაზებულად აღწერდა ყველაფერს და ახალ-ახალ წვრილმანებსაც უმატებდა. თანდათანობით ისევ დაეჩვია ლაპარაკს – მართალია, არც ისე გამართულად, რადგან ენა ადრეც არ უჭრიდა – და, რაც მისთვის უფრო მნიშვნელოვანი იყო, სიცრუის თქმასაც შეეთვისა. ღმერთმანი, – ფიქრობდა გრენუი, – ახლა ყველაფერი შეუძლია უთხრას ადამიანებს, ყველაფერი – რაც კი ენაზე მოადგება!.. თუ ერთხელ გენდნენ – მის მიმართ კი ნდობა პირველი შეყნოსვიდან უჩნდებოდათ – მერე ყველაფრისა სჯერათ... მოგვიანებით გარკვეული თავდაჭერაც გამოიძუშავა მაღალ საზოგადოებასთან ურთიერთობაში. გარეგნულადაც შეიცვალა: თითქოს გამაღლდაო, კუზიც თითქოსდა სადღაც გაქრა – წელში უკვე გამართულად იდგა. როდესაც ვინმე მიმართავდა, ოთხად აღარ იხრებოდა და მისკენ მიმართულ მხერას იოლად უსწორებდა თვალს. რა თქმა უნდა, ამ ხნის განმავლობაში არც სალონების მუდმივი სტუმარი გამხდარა და არც მაღალი საზოგადოების წევრი, ოღონდაც პირქუში მოუხეშავობა ჩამოეცალა და ისე იქცეოდა, რაც შეიძლებოდა გაეგოთ როგორც ბუნებრივი თავმდაბლობა ან თანდაყოლილი მოკრძალება და რაც გულისამაჩუყებელ შთაბეჭდილებას ახდენდა ზოგიერთ ბატონსა თუ ქალბატონზე – იმ ეპოქაში უმაღლესი საზოგადოება ხომ განსაკუთრებულ მიდრეკილებას იჩენდა „ბუნებრიობისადმი“ – ანუ, ასე ვთქვათ, გაურანდავი მომხიბლობისადმი.

მარტის დასაწყისში გრენუიმ მოხიკა თავისი ნივთები და წავიდა – ჩუმად, ადრინაი დილით, როგორც კი ქალაქის ჭიშკარი გაიღო. არც ისე თვალში საცემი, ყავისფერი ქურთუკი ეცვა – წინა დღეს შეიძინა მეძველმანესთან და გაცვეთილი ქუდი ეხურა, სახეს სანახევროდ რომ უფარავდა. არავის უცვნია, არავის დაუნახავს, არ შეუძნევიან, ვინაიდან ამ დღეს საგანგებოდ უარი თქვა თავის სუნამოზე და როდესაც ნაშუადღევს მარკიზმა მისი მოძებნა ბრძანა, დარაჯები იფიცებოდნენ და პირჯვარს იწერდნენ რომ, მართალია, ბევრი ხალხი გავიდა ქალაქიდან, მაგრამ მათ შორის ნამდვილად არ ყოფილა ის ყველასათვის ცნობილი ქვაბულის ადამიანი, რომელსაც უცილობლად შეიცნობდნენ, სადმე რომ გაეგლო. მაშინ მარკიზმა ხმა დააგდო, თითქოს გრენუი მისი თანხმობით წასულიყო პარიზს, ოჯახური საქმეების მოსაგვარებლად; არადა, დიდად განაწყენებული კი გახლდათ, რადგან განხრახული ჰქონდა, მთელ სამეფოში მოეწყო ტურნე გრენუისთან ერთად – რაღა თქმა უნდა, ისევ და ისევ თავისი ფლუიდური თეორიის მომხრეების შემოსაკრებად.

ისიც ითქვას, მარკიზმა მალევე დაიმშვიდა თავი, რადგან მისი სახელი და დიდება ყოველგვარი ტურნესა და მისი მხრივ განსაკუთრებული ძალისხმევის გარეშეც გავრცელდა: მალე „ჟოლნალ დე სავან“ და ასე განსაჯეთ, „კუდიელ დე ლ'ერონ“ ლამის ერთდროულად, გრძელ-გრძელი წერილებით გამოეხმაურა ამ მოვლენას და ქვეყნის ყველა კუთხიდან იწყეს დენა *ფლუიდეუმ ლეტალე ტაილად*-ით გაწამებულმა პაციენტებმა, მასთან სრული და საბოლოო განკურნების იმედით. 1764 წლის გაზაფხულზე მარკიზმა პირველი „ვიტალური ფლუიდის ლოჟა“ დაარსა, რომელსაც მონპელიეში 12 წვერი ჰყავდა და ფილიალებიც გახსნა მარსელსა და ლიონში. შემდეგ დედაქალაქს გადაწვიტა სწევოდა, რათა თავისი თეორიით ახლა იქიდან დაეპყრო მთელი დანარჩენი ცივილიზებული სამყარო, ოღონდ მანამდე, ამ ძლევამოსილი ლაშქრობის პროპაგანდისათვის ერთგვარი ფლუიდალური გმირობის ჩადენა ენება, რომელიც ქვაბულის ადამიანის გამოჯანმრთელებას თუ სხვა მსგავს ექსპერიმენტებსაც გადაჩრდილავდა – კერძოდ, დეკემბრის დასაწყისში კანიგუს პიკზე აეყვანა მამაც მიმდევართა მთელი ჯგუფი. მწვერვალი ესე პარაზის განედზე იყო წამომართული და იმ ხანებში პირენეების უმაღლეს მწვერვალად ითვლებოდა. და აი, ამ წიგნიერმა მოღვაწემ, უკვე სიბერის კარიბჭესთან მდგომმა, ბრძანა 2800 მეტრის სიმაღლის მწვერვალზე აეყვანათ და იქ სამი კვირის განმავლობაში ყველაზე ნამდვილი, ყველაზე სუფთა ვიტალური ჰაერის ზემოქმედებისათვის მიენდოთ, რადგან, როგორც თავად განაცხადა საყოველთაოდ, ამ სამი კვირის თავზე, ზედ შობა დღეს, 20 წლის ჯანმბარ ჭაბუკად აპირებდა დაბრუნებას...

მისმა მიმდევრებმა უკვე ვერნესთან, მთის ძირში მდებარე უკანასკნელ დასახლებასთან დაყარეს ფარხმალი, მარკიზის შეჩერება კი აღარაფერს შეუძლო. გამყინავ სიცივეში სამოსი შემოიძარცვა, საზეიმო ყიფინა დასცა და მარტოკამ განაგრძო სვლა: მასზე უკანასკნელ მოგონებად – ცისკენ ხელებაპყრობილი, თოვლის ქარბუქში სიმღერით გამქრალი სილუეტი დარჩა.

ტყუილად ელოდნენ შობის ღამეს მოწაფეები მის დაბრუნებას. არ გარდამოსულა იგი არც მოხუცად და არცა ახალგაზრდად. შემდეგი წლის გაზაფხულზე, როდესაც ყველაზე გამბედავები მის მოსაძებნად გაემგზავრნენ და კანიგუს პიკის ჯერ კიდევ თოვლიან მწვერვალზე ავიდნენ, ვერავითარ კვალს ვერ მიაგნეს – ვერც ტანსაცმლის ნაფლეთს, ვერც ხორცის ნაგლეჯს, ვერცა ძვლებს.

თქმა არ უნდა, ამას მისი სწავლებისათვის არავითარი ზიანი არ მოუტანია – პირიქით, მალე გავრცელდა ლეგენდა, რომ მთის უმაღლეს წერტილზე ის მუდმივ ვიტალურ ფლუიდს შეუნივთდა, მასში განაზავა საკუთარი სხეული და მას შემდეგ მარადჟამ ახალგაზრდა, ოღონდაც უხილავი, პირენეების მწვერვალებზე დასრიალებს; ხოლო ის, ვინც იქ ააღწევს, თანაუზიარება მას და ერთი წლის განმავლობაში განთავისუფლდება როგორც ყოველგვარი ავადობის, ასევე თვით დაბერების პროცესისაგანაც კი. რამდენიმე სამედიცინო კათედრა თითქმის XIX საუკუნის ბოლომდე იცავდა ტაიადის ფლუიდალურ თეორიას, ხოლო ბევრი ოკულტური საზოგადოება მას თერაპიული მიზნე-

ბისათვის იყენებდა. ჩვენს დღეებშიც კი არსებობს საიდუმლო ტაიადური ლო-
ჟები პირენეების ორსავე მხარეს, კერძოდ, პერპინიანსა და ფიგერასში – მათი
წევრები წელიწდეულად იკრიბებიან კანიგუს პიკზე ასასვლელად.

იქ ისინი უზარმაზარ კოცონს ანთებენ, ვითომდა — მზის ბუნიობის აღ-
სანიშნად, ანდა წმინდა იოანეს საპატივცემულოდ, სინამდვილეში კი — რათა
ღვთაებრივი პატივი მიაგონ დიდ მაგისტროსს, მარკიზ დე ლა ტაიად-
ესპინასს, მის პირმშოს — ფლუიდს, და თავადაც მარადისობას ეხიარონ...

პარი III

35.

თუ საფრანგეთში მოგზაურობის პირველი ეტაპისთვის გრენუის შვიდი
წელიწადი დასჭირდა, მეორე ეტაპი სულ შვიდ დღეში მოითავა. არავითარ
შემოვლებს აღარ აკეთებდა, გზას არ იმრუდებდა, აღარც ხალხმრავალ
ქალაქებს გაურბოდა. მას საკუთარი სუნი ასდიოდა, ფული ჰქონდა, თავდა-
ჯერებული იყო და თანაც, ეჩქარებოდა.

იმავე დღის მიმწუხრს, როცა მონპელიე დატოვა, პატარა საპორტო ქალაქ
გრო-დიუ-რუას ჩააღწია და კარჭაპით მარსელისკენ გაცურა. მარსელის
ნავსადგურში კი მაშინვე გამოძებნა გემი, რომელიც უფრო შორს, სანაპიროს
გაყოლებით მიემართებოდა აღმოსავლეთისაკენ. ორი დღის შემდგომ უკვე
ტულონში იყო, კიდევ სამი დღის შემდეგ — კანში. დანარჩენი გზა ფეხით
გაიარა. ქვეყნის სიღრმეში მიდიოდა, ჩრდილოეთისაკენ, მთიან ზეგანზე.

სრული ერთი კვირის თავზე გრენუის წინაშე და გარშემო, მრავალ მიღზე,
მდინარის აუზი იყო გადაშლილი, რაღაც უზარმაზარი ჯამივით, რომლის
კიდევებს მომრგვალებულთავიანი გორაკებისა და ციცაბო კლდეების მთელი
ჯაჭვი ქმნიდა, ხოლო შესართავთან ახლადგახსული მინდვრები, დამუშავე-
ბული ბაღები და ზეთისხილის კორომები გადაჭიმულიყო. სრულიად თავისე-
ბური, ლამის ინტიმური ატმოსფერო სუფევდა აქ: ზღვა, იმის მიუხედავად
რომ საკმაოდ ახლოს იყო და კარგ ამინდში ბორცვების წვეროებიდანაც კი
შეიძლებოდა მისი დანახვა, მაინცა და მაინც დიდ შთაბეჭდილებას ვერ
ახდენდა ჩვენს გმირზე. არავითარი უსახლგროება — მხოლოდ და მხოლოდ
ცის კიდურთან მიერთებული, მკრთალ-ცისფერი ზოლი... ჩრდილოეთით —
მაღალი მთები, რომლებზედაც ჯერ კიდევ იდო და ალბათ, კიდევ დიდხანს
იდებოდა თოვლი; არავითარი ველურობა ან სიმწირე, არავითარი სუსხი არ
იგრძნობოდა — გაზაფხულ აქ უფრო მოძალებულიყო, ვიდრე მონპელიეში.

მსუბუქი ნისლი ეფინებოდა მინდვრებს, ყვავილებს გადაეპენტათ ჭერძისა და ნუშის ხეები, თბილი ჰაერიც ნარგიზის სურნელს გაეჯერებინა.

ამ უზარმაზარი თასის გაღმა მხარეს, ორი-სამი მილის დაშორებით, კლდის ფერდობს ქალაქი აკვროდა. დიდად პომპეზურად სულაც არ ჩანდა: ყველა საცხოვრებელზე მაღლა წამომართული ტაძრის, ან პატარა ეკლესიის წვეთის მაგივრად ჭიპივით ამოზიდული სამრეკლო; არც არავითარი ძირძველი გალავანშემორტყმული სიმაგრე და არც რითიმე გამორჩეული შენობა. არც მისი კედლები ჩანდა მიუდგომელი და სახლებიც რაღაც თავიანთ ნებაზე განლაგებულიყვნენ შუკების გასწვრივ, რითაც თვალისთვის საამო ხედს ოდნავ აწეწილ იერს მატებდნენ. ისეთი შთაბეჭდილება გრჩებოდათ, თითქოს ეს ქალაქი ბევრჯერ დაეპყროთ და ამჟამად, კიდევ ერთხელ განთავისუფლებული, უარს აცხადებს წინააღმდეგობაზე მომავალი დამპყრობლების წინაშე – არა სისუსტის, არამედ გულგრილობის, ანდა სულაც, საკუთარი ძლიერების შეგრძნების გამო – აქაოდა, პატივმოყვარეობა არა მკლავსო; ჩემთვის ისიც კმარა, ამ მშვენიერ დაბლობს რომ გადავყურებ და ამითიც სრულიად თვითმკმარი გახლავართო.

ეს შეუხედავი და, იმავდროულად, თვითდარწმუნებული ქალაქი გრასად იწოდებოდა. ბოლო რამდენიმე ათწლეულის მანძილზე სწორედ ის ითვლებოდა სურნელოვანი ნივთიერებების, საპარფიუმერიო საქონლის, ზეთების წარმოებისა და გაყიდვის უეჭველ თავქალაქად. ჯუზზე ბაღდინი ყოველთვის აღტაცებითა და ოცნებით წარმოთქვამდა მის სახელს – *გრასსი!* – და ამტკიცებდა, რომ ეს ქალაქი ნელსურნელებათა რომია, აღთქმული ქვეყანა მენელსაცხებელთათვის, ხოლო იმას, ვისაც აქაური სკოლა არ გაუვლია, უფლებაც არ გააჩნია ასეთად იწოდებოდესო.

ოღონდაც, გრენუი სრულიად ფხიზელი თვალით გაჰყურებდა ქალაქს – არც აღთქმულ ქვეყანას ეძებდა და არც გული ასძგერებია ამ მაღალ კლდეებს აკრული მერცხლის ბუდის დანახვაზე. იმის გამო მოვიდა აქ, რომ იცოდა – ამ ქალაქში გაცილებით უკეთ, ვიდრე ნებისმიერ სხვა ადგილას, შესაძლო იყო შეგესწავლათ სურნელთ გამოზნის ათასგვარი იდუმალი საშუალებები; სწორედ ეს სურდა და ყველაფერი ეს საკუთარი მიზნებისთვის სჭირდებოდა. ჯიბიდან თავისი სუნამო ამოიღო, ზომაზე იპკურა და გზას დაადგა. საათნახევრის შემდეგ, ნაშუადღევს, უკვე გრასის კარიბჭეს მიაღწა.

ჯერ ქალაქის ზედა ნაწილში, ოზერის მოედანზე ერთ ფუნდუკში ისადილა. მოედანს მთელ სიგრძეზე ნაკადული კვეთდა, რომელშიც დაბაღები ტყავებს რეცხავდნენ, და შემდეგ ჭიმაღდნენ გასაშრობად. ისეთი მომაკვდინებელი სიმერალე იდგა, ზოგიერთ იქაურ მაცხოვრებელს ჭამის მაღაც ეკარგებოდა. ოღონდ გრენუი ამას არ დაგიდევდათ – კარგად ცნობდა ამ სუნს, და ყველა ქალაქში, პირველ რიგში დაბაღების უბანს მოძებნიდა ხოლმე. მერე უკვე, ამ სიმერალიდან გამოსული, როდესაც ქალაქის სხვა უბნებს გაიკითხავდა, თავს აღარავის წინაშე გრძნობდა უცხოდ.

თითქმის მთელი დღე, შუადღიდან საღამომდე ქალაქში დასუნსულებდა. ერთი ისიც ვთქვათ, საოცრად ბინძური ქალაქი გახლდათ, იმის მიუხედავად, ან, იქნებ, სულაც იმის გამო, რომ აქ ბევრი წყალი იყო, მეტისმეტად ბევრი, ათობით წყაროდან და შადრევნიდან მოჩხრიალებდა მოუვლელ რუებსა და ჩასადენ არხებში და ქუჩების ჩიხებს შლამით ავსებდა. ზოგიერთ უბანში სახლები ისე მჭიდროდ იდგა, კიბეებისა და გასასვლელებისთვის ერთი ადლის სიგანე ადგილია რჩებოდა, და ჩაბინძურებულ ქუჩებში მიმავალი გამველები, გვერდის ასავლელად, ერთმანეთს ეკვროდნენ; მოედნებსა თუ მცირეოდენ განიერ ქუჩებზეც კი ცხენშებმული ეტლები ძლივს შორიშორდებოდნენ და მთელი ამ სიბინძურის, და მთელი ამ შექუჩებისა და სიმჭიდროვის მიუხედავად, ქალაქი სწორედ ხელოსნების ფხიანობისაგან დულდა: საბოლოოდ გრენუიმ შვიდი საპნის სახარში, თორმეტამდე საპარფუმერიო და სახელთათმანე ატელიე, დისტილატების, პომადებისა თუ სხვა რამ სანელებლების დამამზადებელი უამრავი პატარა სახელოსნო და სურნელოვანი ნივთიერებების შვიდამდე დიდი სავაჭრო გადაითვალა.

აქ ისეთებიც იყვნენ, მართლა დიდ კანტორებს რომ ფლობდნენ არო-მატული ნივთიერებებით სავაჭროდ, ოღონდ მათი სახლების შემხედვარე, ამას ნამდვილად ვერ იტყოდა კაცი. ამ სახლებს სწორედაც ბურჟუაზიული თავმდაბლობით გამოჩნეული ფასადები ჰქონდათ, ხოლო რაც ფასადების მიღმა იყო – საწყობებში, საკუჭნაოებსა და სარდაფებში – ზეთით სავსე კასრები, სურნელოვანი საპნის თაკარები, ყვავილის ესენციანი ბოცები, ღვინოები, ნაყენები, სურნელოვანი ტყავის ზეულები, ტომრები, სკივრები... – სქელი კედლების მიუხედავად, გრენუი სრულად აღიქვამდა მათ სუნს და ყველაფერი ეს ისეთ სიმდიდრეს წარმოადგენდა, თავადებსაც რომ არ გააჩნდათ: ქუჩაში გამოძვავალი, უბრალო სავაჭრო თუ საწყობ-ნაგებობების მიღმა, ერთი შეხედვით, უბრალო სახლების შიდა მხარეს, საუცხოო აპარტამენტები გახლდათ განლაგებული. პაწია, მომხიბლავი ბაღების ირგვლივ, სადაც ოლეანდრები და პალმები ხარობდნენ და სადაც ყვავილნარით გარშემორტყმულ შადრევნებში წყლის ჭავლი ჟღურტულებდა, სამხრეთისკენ პირმოქცეული საცხოვრებელი სათავსოები გაეწყოთ: მზით სავსე, აბრეშუმის შპალერით გამოკრული საძინებლები სახლის ზედა სართულზე, ხის უცხო ჯიშების პანელებაკრული სასტუმრო ოთახები და ბაღში გამავალი სასადილო ოთახები; აქ მართლაც რომ, როგორც ბალდინი ყვებოდა, ფაიფურის თეფშებიდან მიირთმევდნენ საჭმელს და ოქროს ჩანგლებს, ვერცხლის დანებსა და მომინაქრებულ კოვზებს ხმარობდნენ. ბატონებს, რომლებიც ამ მორიდებული კულისების მიღმა ცხოვრობდნენ, ოქროსა და ძალაუფლების სუნი სდიოდათ, მყარი, საიმედო სიმდიდრის, და ეს სუნი გაცილებით ძლიერი იყო, ვიდრე ნებისმიერი სხვა, რაც კი გრენუის პროვინციაში მოგზაურობისას შეუყნოსია.

ერთ-ერთი ასეთი შენიღბული სასახლის წინ შეყოვნდა. სახლი დრუატის ქუჩის დასაწყისში იდგა – მთავარი ქუჩის, რომელიც მთელ ქალაქს დასავლეთიდან აღმოსავლეთისკენ კვეთდა. გარეგნულად ამ სახლში არაფერი იყო განსაკუთრებული, იქნებ, ოდნავ უფრო ფართო და მკვიდრად ნაგები ჩანდა გვერდზე მდგომ სხვა სახლებთან შედარებით, მაგრამ მაინც – არაფერი განსაკუთრებული. ჭიშკართან კასრებით სავსე საზიდარი გაეჩერებინათ: ამ საზი-

დარს ცლიდნენ და კასრებს ზედ მიდგმული ფართო ფიცრის საშუალებით აკორებდნენ დაბლა. ორიც თავის რიგს ელოდებოდა. ილიაში ქალაღდე-ბამორჩილი ვიღაც კაცი კანტორაში შევიდა, იქიდან კიდევ სხვა ვიღაცასთან ერთად გამობრუნდა და ჭიშკარში გაუჩინარდა. გრენუი ქუჩის გამოღმიდან შეპყურებდა ამ ფორიაქს — სიმართლე ითქვას, მისთვის საინტერესო იქ არაფერი ზდებოდა და მაინც რაღაც აკავებდა, ფეხს არ აცვლევინებდა ადგილიდან.

თვალეზი დახუჭა და გამორჩეულად ის სუნეზი შეიყნოსა, შენობიდან რომ აღწევდა: ძმრიანი და ღვინიანი კასრების სუნი, საწყობის ასობით ძიძიე სუნი, შემდეგ სიძლირის სუნი, ოქროს ოფლის ანაორთქლად რომ აღწევდა კედლე-ბიდან, და ბოლოს ბაღის სუნი, რომელიც, როგორც ჩანს, სახლის მეორე მხარეს იყო გაშენებული. ძნელი იყო ბაღის ნაზი სურნელების შეგრძნობა, რადგან სუნი რაღაც თხელი ზოლების სახით გადმოდირდა სახლის სახურა-ვიდან დაბლა, ქუჩაზე. გრენუიმ შეიყნოსა მაგნოლია, სუძბული, აბრეშუმი და დეკა... მაგრამ თითქოსდა იქ კიდევ იყო რაღაც, გულში ჩამწვდომად მშვენი-ერი. არასდროს ცხოვრებაში — თუმცა არა, ერთხელ, მხოლოდ ერთხელ აღიქვა მისმა ყნოსვამ ამგვარი ნატიფი სუნი...

ჯერ გაიფიქრა — იქნება და პირდაპირ ჭიშკრის გავლით შევადწიო კარ-მიდამოშიო, მაგრამ იქ იძღენი ვინმე ირეოდა, კასრების ჩამოღებითა და გას-ინჯვით გართული, აუცილებლად მიიპყრობდა ვიღაცის ყურადღებას. გადაწყვიტა, ქუჩის აყოლებაზე ისეთი ჩიხი ან გასასვლელი მოენახა, სახლს უკანა მხრიდან რომ მიუდგებოდა. მერე მარცხნივ შეუხვია, კედელს გასდია და მალევე ისევ შეიყნოსა ბაღის სუნი, ჯერ სუსტი, მინდვრების ჰაერთან შერეული, ხოლო ფეხის ყოველ გადადგმაზე — სულ უფრო და უფრო ძლიერი. და მაშინ მიხვდა, რომ ბაღი, რომელიც ქალაქის კედელს ეკვროდა, სულ ახლოს იყო, პირდაპირ მის წინ. ახლა კედლის მიღმა მდგარი ხეების წვეროებსაც კი ხედავდა.

ისევ დახუჭა თვალეზი და ამ ბაღის სურნელი ახლა ზეავივით დაატყდა თავს, ცისარტყელას ფერადი ზოლებივით ნათლად და მკაფიოდ შემოხაზული. და ის უძვირფასესიც — ის, ასე რომ იზიდავდა — მათ შორის იყო. ნეტარების აღმური მოედო გრენუის, სისხლი ისე აუვარდა თავში, როგორც ხელმრუდო-ბაში გამოჭერილ თაღლითს, შემდეგ სხეულის შუაგულში ჩაეწრიტა და ისევ აუვარდა, და ისევ, და ვერც ვერაფერი მოუხერხა ამას! მეტი სმეტად მოუ-ლოდნელი იყო სუნის ეს შემოტევა. ერთი წამით — ერთი ჩასუნთქვის მან-ძილზე თუ მთელი მარადისობით — მოეჩვენა, რომ დრო გაორდა, ან სულაც გაქრა, ვედარ იაზრებდა, იყო თუ არა ახლა — ახლა, ან აქ — აქ, თუ ახლა იყო მაშინ, ხოლო აქ — იქ, ესე იგი მარეს ქუჩაზე, პარიზში, 1753 წლის შე-მოდგომაზე: სურნელი, რომელიც ბაღიდან მოედინებოდა, სწორედ იმ ჟღალთ-მიანი გოგონასი იყო, მაშინ რომ მოაკვდინა; ესე იგი, ეს სურნელება სადღაც კიდევ არსებობდა ქვეყნად, კვლავაც იპოვა, და ამ შეგრძნებამ თვალეზი ნეტარი ბედნიერების ცრემლით აუესო — იმ ალბათობის გააზრებამ კი, ვინ-ძლო და ეს არც მომხდარიყო, ლამის დაზაფრა.

თავბრუ ეხვეოდა, ოდნავ ბარბაცებდა კიდევც, ბოლოს იძულებულიც გახდა, კედელს მიყრდნობოდა და მერე ნელ-ნელა ჩაცურდა იქვე, თხრილში. იქლა მოიკრიბა ძალა, თავი მოთოკა და საბედისწერო სურნელების მოკლე, ნაკლებ სახიფათო შესუნთქვებით შეეცნო. სწორედ მაშინ აღმოაჩინა, რომ კედლის იქიდან მომდინარე, თუმც კი ძალიან გავდა ჟღალთმიანი გოგონას სურნელს, მაგრამ მთლად იგივე მაინც არ იყო. უდავოდ, ეს სუნიც ჟღალთმიან გოგონას ასდიოდა – ყნოსვითი წარმოსახვით გრენუი სურათზე დახატულივით ხედავდა მას: იგი არ იღვანოდა ერთ ადგილზე, აქეთ-იქით დახტუნაობდა და ხან სცხელოდა, ხან ისევ დაგრილავდა, თითქოს რაღაც ისეთს თამაშობდა, რომლის დროსაც ან ძალიან სწრაფად უნდა იმოძრაო, ან ერთ ადგილზე გაშეშდე – თან ვიღაც მეორე ადამიანს ეთამაშებოდა, ვის სუნსაც, სიმართლე ითქვას, არც არავითარი მნიშვნელობა არ ჰქონდა; თეთრზე უთეთრესი კანი, მწვანე თვალები და ჭორფლი ეყარა სახეზე, ყელზე, მკერდზე... არადა – გრენუი წამით შეიხუთა, მერე ენერგიულად შეიყნოსა და მარეს ქუჩელი გოგონას სუნზე მოგონებების თავიდან მოცილებას შეეცადა – უფრო სწორად ამ გოგონას ჯერ არცა აქვს მკერდი, ამ სიტყვის სწორი გაგებით! მას ჯერ მხოლოდ ოდნავ შესამჩნევი ამონაბორცვები აქვს, უსასრულოდ ნაზი, ოდნავ სურნელოვანი, ჭორფლით დაფარული, შესაძლოა, რამდენიმე დღის, ანდა სულაც რამდენიმე საათის წინ რომ დაუწყეს ძუძუს კერტებმა დაბერვა: ერთი სიტყვით, ეს გოგონა ჯერ კიდევ ბავშვი იყო, მაგრამ – როგორი ბავშვი!!!

გრენუის ოფლმა დაასხა; იცოდა, პატარებს არ ასდით მკვეთრი სურნელი – როგორც მწვანე, ჯერ გაუშლელ ყვავილის კვირტებს, ოღონდ ეს ყვავილი, ეს ჯერ კიდევ შეკრული კვირტი კედლის გადაღმა, ეს-ესაა უშვებს პირველ სურნელოვან ფურცლებს და უკვე ისეთ ღვთაებრივ სურნელს ავრცელებს, რომ თმა ყალყზე გიდგება. ახლაც კი უკეთესი სუნი ასდის – გაიფიქრა გრენუმ – ვიდრე იმას, მარეს ქუჩიდან: არა ისეთი ძლიერი და ნაჯერი, ოღონდაც უფრო ნატიფი და გაცილებით ბუნებრივი. ორი, სამი წლის შემდეგ ეს სუნი მომწიფდება და ვერა ადამიანი – ვერც მამაკაცი, ვერც ქალი – მის მომწიფებას ძალას ვერ დაუდგება წინ! და ადამიანები – დამორჩილებულნი, განიარაღებულნი, უმწეონი შეიქნებიან მისი ჯადოსნობის წინაშე, და რადგანაც ბრევები არიან და საკუთარი ცხვირის გამოყენება მხოლოდ დასაცემინებლად შეუძლიათ, და ფიქრობენ, რომ ყველაფრის და ყოველივეს შეცნობა თვალებითაც შეიძლება, იტყვიან, რომ მისი სილამაზით, სინარნარითა და მომხიბვლელობით არიან დატყვევებულნი; თავიანთი გონებაშეზღუდულობის გამო მხოლოდ ამ გოგონას გარეგნულ მხარეს შეასხამენ ხოტბას – აშოლტილ ტანს, სახის უნაკლო ნაკვთებს, იტყვიან, რომ მას ზურმუხტით თვალები და მარგალიტით კბილები აქვს, ხოლო კანი – სპილოს ძვალივით გლუვი: იდიოტური შედარებების კორიანტელი. და ისინი მას ნარგიზთა დედოფლად აღიარებენ და რომელიმე ტუტუცი მხატვარი მის პორტრეტსაც დახატავს, და ყველა აღიარებს, რომ ის ულამაზესი ქალია მთელს საფრანგეთში. ყმაწვილები ღამეებს თეთრად გაათუნებენ მისი ფანჯრების ქვეშ, მანდოლინის ჟღერიალის თანხლებით. მდიდარი სქელუა ბიძიები მუხლებზე ხოხვით გამოსთხოვენ მის ხელს მამამისს... ნებისმიერი ასაკის ქალები მის დანახვაზე მწარედ ამოიხრებენ და ძილში იოცნებებენ, თუნდაც ერთი დღით

მისცეთ ღმერთმა ამგვარი მაცდური გარეგნობა!.. და ვერც ერთი მათგანი ვერც კი იეჭვებს, რომ არა მისი გარეგნობით, არა მისი თითქოსდა უზადო სილამაზით, არამედ მხოლოდ და მხოლოდ ამ შეუდარებელი, მეფური სურნელით იხიბლებიან! მარტო მას ეცოდინება ეს, მხოლოდ მას – გრენუის. აკი უკვე ახლავე იცოდა ეს... არადა, რა მწვავედ უნდოდა დაუფლებოდა ამ სურნელებას! დაუფლებოდა არა ისე უაზროდ, როგორც იქ, მარეს ქუჩაზე – იმ გოგონას სუნი მან უბრალოდ გადაყლაპა, ჩაუშვა საკუთარ სხეულში და ამით მოსპო, გაანადგურა... არა, ამ გოგონას სუნი სამუდამოდ უნდა მიეთვისებინა: უნდა გაეძრო იგი ტყავივით და საკუთრებად გაეხადა. ჯერ არ იცოდა, როგორ უნდა ექნა, ოღონდ არც უნდა ყოფილიყო იმაზე ძნელი, ვიდრე რომელიმე იშვიათი ყვავილის გაძარცვა და მისთვის სურნელების წართმევა იქნებოდა.

თითქმის მოწინებით წამოდგა, თითქოს წმინდანს ან მძინარეს ტოვებსო და წელში მოხრილი წამოვიდა, ფრთხილად, რათა არავის გაეგონა, არავის დაენახა, არავის მიექცია ყურადღება მისი უძვირფასესი ნაპოვნისათვის. ასე გაიბრინა ქალაქის კედლის გაყოლებით ქალაქის მეორე ბოლომდე, სანამ გოგონას სურნელება საბოლოოდ არ განიავდა ჰაერში. მერე ფენეანის საგუშაგოთი შებრუნდა ქალაქში და სახლების ჩრდილში შეჩერდა. ჩიხების მერალმა ბუღმა თავდაჯერება დაუბრუნა და დაეხმარა, ვნება ჩაეცხრო. ნახევარი საათის შემდეგ სრულიად დამშვიდდა. პირველ რიგში, ფიქრობდა გენური, იმ ბაღს აღარ უნდა მიუუახლოვდე, რაკი ასეთ ადგზნებას იწვევს ჩემში. ყვავილი მის გარემოც აყვავდება იქ, და როცა აყვავდება, ისედაც მშვენივრად გაიგებს. იგი უფლებას არ მისცემს თავს, დროზე ადრე დათვრეს ამ არომით. ჯერ უნდა გაიღრმავოს თავისი ცოდნა, თავაუღებელი იმუშაოს და საბოლოოდ დაიხვეწოს ოსტატობა, სრულად დახელოვნებული დახვედეს სამკალის მოწვევის ჟამს... მას ხომ კიდევ ორი წელი აქვს თადარიგში.

36.

ფენეანის საგუშაგოდან არც ისე შორს, დე-ლა-ლუვის ქუჩაზე, გრენუიმ პატარა საპარფუმერიო საწარმო აღმოაჩინა და სამუშაო გაიკითხა.

აღმოჩნდა, რომ მეპატრონე, ოსტატი-მენელსაცხებლე ონორე არნულფი, წინა ზამთარს გარდაცვლილიყო და მის ქვრივს, ოცდაათიოდე წლის შავთვალწარბა, მარჯვე ქალს, თავად მიჰყავდა საქმე ერთადერთი შეგირდის დახმარებით.

კარგა ხანს იწუწუნა მადამ არნულფიმ ვაგლახ დროებასა და საკუთარი ოჯახის მძიმე მატერიალურ მდგომარეობაზე, მაგრამ ბოლოს მაინც აღიარა რომ კიდევ ერთი შეგირდი სჭირდება, რადგან ძლიერ ბევრი სამუშაო დააწვა მხრებზე; ერთი ეგაა — ვერ დაუშვებს, უცხო ვინმე შეიფაროს თავის ჭერქვეშ, თუმცა, მეორეს მხრივ, ფრანცისკანელთა ეკლესიის მიღმა, ზეთისხ-

ილის ბაღში – სულ რაღაც ათი წუთის სავალზე აქედან – ქოხი უდგას, სადაც მორიდებული, ახალგაზრდა კაცი, გაჭირვების შემთხვევაში, დამის გათევას შეძლებს; თქმა არ უნდა, – განაგრძობდა ქალბატონი არნულფი, – იგი პატიოსანი მეპატრონეა და მზადაა, პასუხისმგებლობა იკისროს თავისი შეგირდების ფიზიკურ ჯანმრთელობაზე, ოღონდ იმის შესაძლებლობა სადა აქვს, ცხელი კერძი მიართვას დღეში ორჯერ! მოკლედ, მადამ არნულფი (და გრენუიმ ეს მაშინვე იყენოს) ფრიად უზრუნველყოფილი, საღად მოაზროვნე და საქმიანი ქალი გახლდათ. ვინაიდან თავად მას ფული სულ არ აინტერესებდა, კვირაში ორი ფრანკითა და სხვა მწირი პირობებითაც კმაყოფილი დარჩა და იქვე დაჰკრეს ხელი ხელს. მერე დაუძახეს პირველ შეგირდს, ერთ მოდელეზილ ყმაწვილს, სახელად დრუიოს, რომელთანაც მადამ არნულფი ჩვეული იყო სარეცლის გაზიარებას და მის გარეშე არც არავითარ საქმიან გადაწყვეტილებას არ იღებდა. იგი გრენუის ბირდაბირ დადგა, ფეხები განგან გააწყო, გარშემო სკერმის სუნის აურა გაავრცელა და ისეთი ჩაცმული მზერით ახედ-დახედა, თითქოს მასში რაღაც ქვენა ზრახვების, ანდა შესაძლო მოწინააღმდეგის აღმოჩენას ცდილობსო; მაგრამ მასთან შედარებით სასაცილოდ ტანმორჩილი გრენუის შემხედვარემ, მოწყალედ ჩაიცინა და თავის დაქნევით გამოხატა თანხმობა.

ასე რომ, ყველაფერი კეთილად მოგვარდა: გრენუიმ ხელის ჩამორთმევა, ცივი ვაზში და ქოხის გასაღები მიიღო – კაცმა რომ თქვას, ერთი უფანჯრებო ფარდული, სადაც ცხვრის გამოშშრალი კურკლისა და თივის არცთუ უსიამო სუნი იდგა და სადაც, ასე თუ ისე, თავშესაფარი ჰქონდა. დილაადრიანად კი უკვე შეუდგა მადამ არნულფისთან მუშაობას.

ახლა ნარგიზების მოწვევის დრო დამდგარიყო. მადამ არნულფის ყვავილების მცირე წილი თავის პატარა ნაკვეთებზე მოჰყავდა ქალაქის ფარგლებში, ნაწილს კი გლეხებისაგან ყიდულობდა და ყოველ კალათზე სულის ამოხდომამდე ევაჭრებოდა. ყვავილები უთენია მოჰქონდათ მასთან, ათეულ ათასობით გადმოყრიდნენ კალათებიდან და მოზრდილ, ბუმბულივით მსუბუქ, სურნელოვან გროვებად ახვავებდნენ საწარმოს ეზოში. ამ დროისათვის დრუიო საქონლისა და ღორის ქონს აცხელებდა უზარმაზარ ქვაბში; არა-ჟანივით სქელ სითხეში, რომელიც გრენუის განუწყვეტლივ უნდა ერია გრძელტარიანი ციცხვით, ნიჩაბმომარჯვებული დრუიო ახალდაკრეფილ ყვავილებს ყრიდა; ყვავილები, სასიკვდილოდ შეშინებულის თვალებივით, სულ ერთი წამით ყოვნდებოდნენ ზედაპირზე და, როგორც კი ციცხვი მოხვეტავდა და ცხელ ქონში ჩაძირავდა, წამიერადვე კარგავდნენ ფერს; თან ლბებოდნენ, ჭკნებოდნენ და ჩანს, მათი სიკვდილის ჟამი იმდენად სწრაფად დგებოდა, არავითარი არჩევანი აღარ ჰქონდათ იმის გარდა, უკანასკნელი სურნელოვანი ამონასუნთქი ზუსტად იმ გარემოსათვის გადაელოცათ, რომელშიც იძირებოდნენ, ვინაიდან – საკუთარ თავს ემსჯელებოდა გრენუი – რაც მეტი ყვავილი იძირებოდა ქვაბში, მით უფრო ძლიერი სურნელება ასდიოდა ქონს; არა, მკვდარი ყვავილები აღარაფერ შუაში იყო, ეს უკვე თავად ქონი ავრცელებდა სუნს – ქონი, რომელსაც ახლა ყვავილების სურნელი მიეთვისებინა.

ამასობაში სითხე კიდევ უფრო სქელდებოდა და მას სასწრაფოდ დიდ ცხაურში ატარებდნენ, რათა სველი გვამებისაგან განეწმინდათ და ახალი ყვავილების მისაღებად განეზავებინათ. მთელი დღე შეუსვენებელი ყრიდნენ, ურევდნენ, წურავდნენ, რადგან პროცესი დაყოვნების უფლებას არ იძლეოდა. საღამოსთვის ყვავილების ყველა გროვა გაივლიდა ქონიან ქვაბს; ნარჩენებს, რათა არაფერი დაკარგულიყო, მღუღარე წყალს ასხამდნენ და ესეც პრესში იწურებოდა, რაც ახლა სურნელოვან, ყვავილის ზეთს იძლეოდა. და მაინც, სურნელის საფუძველი, ზღვა ყვავილების სული, ქვაბშივე რჩებოდა, გამოკეტილი და საიმედოდ დაცული შეუხედავ, მონაცრისფრო-მოთეთრო ქონში, რომელიც ნელნელ იწყებდა გაცივებას.

მაცერაცია – ასე ეწოდებოდა პროცესს – მეორე დღესვე გრძელდებოდა. ქონს აცხელებდნენ და ადნობდნენ, რათა შიგ ახალი ყვავილები ჩაეყარათ და ასე გრძელდებოდა რამდენიმე დღის განმავლობაში. არცთუ ადვილი სამუშაო იყო – საღამოსკენ გრენუის ხელები ტყვიასავით უშმიძიდებოდა, ხელის-გულებზე ბებერები უჩნდებოდა, ზურგიც სტკიოდა, დაღლილობისაგან ფეხზე ძლივს იდგა და ერთი სული ჰქონდა, თავის ქონამდე მიფრატუნებულიყო. დრუიო, რომელსაც მასზე, ალბათ, სამჯერ მეტი ძალა მაინც ჰქონდა, ქონის მორევაში არასოდეს მიხმარებია, მხოლოდ ღინღლივით მსუბუქ ყვავილებს ყრიდა ქვაბში, ცეცხლს მიხედავდა ხოლმე ხანდახან და, როგორც კი დროს იხელთებდა, აქო და ცხელაო, ყელის გასასველებლად მიიპარებოდა. მაინც არ ჩიოდა გრენუი, დილიდან საღამომდე უდრტვინველად ურევდა ყვავილებს ქონში და თავად ამ დროს არავითარ დაღლილობას არ გრძნობდა, რადგან ისევ და ისევ ტკებოდა პროცესით, რომელიც მის თვალწინ, უფრო სწორად რომ ვთქვათ, მის ცხვირწინ ხდებოდა: ყვავილების უეცარი ჭკნობითა და მათი სურნელების შთანთქმით.

განსაზღვრული დროის შემდეგ, თუ დრუიო მიიჩნევდა, რომ ქონი უკვე გაჯერებულია და მეტ სურნელს უკვე ვეღარც შეიწოვს, ისინი კოცონს აქრობდნენ, კიდევ ერთხელ წურავდნენ ცხაურში მსუყე ნახარშს და მას ქვის ჭურჭლებში ათავსებდნენ. ეს ახალი ქონი ახლა სურნელოვან პომადად ცივდებოდა.

მერე უკვე მადამ არნულფის დროც დგებოდა – ამოწმება, ნომრავდა და ზუსტად ინიშნავდა ნაწარმის რაოდენობასა და ხარისხს. თავისი ხელით ხურავდა ჭურჭელს, ტვიფარს ადებდა და სარდაფის გრილ სიღრმეებში გადაჰქონდა. შემდეგ, ქერივის კაბასა და ხილაბანდში გამოწყობილი, ქალაქის ვაჭრებსა და საპარფიუმერიო ფირმებს შემოივლიდა, აუწერდა ამ ბატონებს მარტოხელა ქალის მდგომარეობას, მოუწოდებდა თანაგრძნობისკენ, ისმენდა მათ წინადადებებს, ადარებდა ფასებს, ოხრავდა და საბოლოოდ ყიდა, ან არ ყიდა თავის საქონელს. საპარფიუმერიო პომადა დიდხანს ინახება სიცივეში და, თუ ამჟამად ფასები არცთუ ხელსაყრელია, ვინ უწყის, შესაძლოა ზამთარში, ან შემდგომ გაზაფხულზე მაინც იმატოს ფასმა!.. ისიც საფიქრებელია, მიჰყიდოს საქონელი ამ წუწურაქებს თუ სხვა წვრილი მწარმოებლების მსგავსად, პომადა გენუაში გააგზავნოს გემით, ან სულაც ბოკერეს საშემოდგომო ბაზრობაში მიიღოს მონაწილეობა – სახლა-

ფორთო ამბავია, თქმა არ უნდა, მაგრამ წარმატების შემთხვევაში – დიდად სარფიანიც. მაღამ არნულფი ყურადღებით აწონ-დაწონიდა ხოლმე ამ შესაძლებლობებს, ერთმანეთს უნაცვლებდა მათ, ადარებდა, ხან კი სულაც ყველას ერთად იყენებდა: თავისი საუნჯის ერთ ნაწილს ყიდდა, მეორეს ინახავდა, მესამეთი – გაცვლა-გამოცვლას ეწეოდა. და თუ ისეთი შთაბეჭდილება შეექმნებოდა, რომ ბაზარი პომადებით იყო გადატვირთული და ახლო მომავალში მის საქონელზე მოთხოვნილების გაზრდას სასიკეთო პირი არ უჩნდა, ხილაბანდის ფრიალით მოვარდებოდა და ახლა მთელი პროდუქციის გადამუშავებას ბრძანებდა. მაშინ პომადა ისევ გამოჰქონდათ სარდაფიდან, ფრთხილად აცხელებდნენ დახურულ ქოთნებში, სუფთა სპირტს უმატებდნენ, თან საფუძვლიანად ურევდნენ და თქვეფდნენ. ეს ნარევი, სარდაფში დაბრუნებისთანავე, ძალიან სწრაფად ცივდებოდა; გაცივებულ ქონს სპირტი გამოეყოფოდა და შესაძლებელი ხდებოდა მისი ბოთლებში ჩამოსხმა. ეს უკვე რაღაც სუნამოს მსგავსი რამ იყო, ოღონდ მეტისმეტად ნაჯერი, ხოლო დარჩენილი გაცივებული პომადა სრულიად უვარგისი ხდებოდა. ასე და ამგვარად, გადადიოდა ყვაილების სურნელი კიდევ ერთ ახალ მდგომარეობაში. ოღონდ ამით ეს პროცედურა არ მთავრდებოდა: დოლბანდში საფუძვლიანად გაწურულ სითხეს დრუიო პატარა გამოსახნდელ კუბში ასხამდა და ძალიან დაბალ ცეცხლზე, ნელ-ნელა ხდიდა. სპირტის აორთქლების შემდეგ, ჭურჭელში უმცირესი რაოდენობის, ოდნავ შეღებილი სითხე რჩებოდა, ძალზე ნაცნობი გრენუისათვის; თუმცაღა ასეთი კრიალა, ასეთი ხარისხიანი მას არც ბალდინისთან და არც, ვთქვათ, ბრუნელისთან არ შეუყნოსავს: ეს იყო ერთიანი, უსუფთავესი, უშესანიშნავესი ყვაილოვანი ზეთის შიშველი სურნელი, ათასმაგად ნაჯერი — ე. წ. Essence Absolue. ამ ესენციას უკვე აღარ სდიოდა საამო სუნი: ავადმყოფურად მძაფრი სუნი ასდიოდა, ბასრი და მჭახე. და მაინც, საკმარისი იყო თუნდაც ერთი მისი წვეთი გაგეხსნათ ერთ ლიტრ სპირტში და ყვაილების მთელი მდელოს სურნელებას ადადგენდით!

რა თქმა უნდა, საბოლოო ნაწარმი მცირე იყო – მთელი სითხე სამ მომცრო ფლაკონს თუ გაავსებდა, ოღონდ ეს მთელ ქონებად ფასობდა აქაც კი, გრასში; და რამდენად ძვირდებოდა, როცა მას ლიონს, გრენობლს, გენუასა თუ მარსელს გზავნიდნენ! ამ პაწია ფლაკონების დანახვაზე მაღამ არნულფის თვალები მომხიბვლელად ებნიდებოდა, მზერით ეალერსებოდა მათ და როდესაც ბროლის თავსახურებს არგებდა, სუნთქვას შეიკავებდა ხოლმე, რათა ამ ძვირფასი შემცველობის არაფერი დაკარგულიყო, არ აორთქლებულიყო თუნდაც ერთი წვეთიც კი. სახურავებს ფიჭით ბეჭდავდა და ფლაკონის ყელზე მჭიდროდ მოკრულ თევზის ბუშტს აფარებდა. შემდეგ ფლაკონებს ბამბადატანებულებს აწყობდა ყუთში, სარდაფში მიჰქონდა და ცხრა კლიტეს ადებდა მუხის კარს.

აპრილში შოთხვის მაცერაციას ახდენდნენ და ფორთოხლის ყვავილისა, მაისში – ზღვა ვარდების, რომლის სურნელმა მთელი თვით უხილავ ტკბილ ბურუსში ჩაძირა ქალაქი. გრენუი თავაუღებელივ მუშაობდა. მოკრძალებით, თითქმის მონური მზადყოფნით ასრულებდა ყველა დამხმარე ოპერაციას, რომელსაც კი დრუიო დაავალებდა; მაგრამ ვიდრე, ერთი შეხედვით, ჩლუნგივით ურევდა და ხვეტავდა ყვავილებს, რეცხავდა ბოთლებს, სახელოსნოს გვიდა თუ შეშას დაათრევდა, მის ყურადღებას საქმის არც ერთი მნიშვნელოვანი მხარე, სუნთა არც ერთი მეტამორფოზა არ გამოჰპარვია. უკეთესად, ვიდრე ამას ოდესმე გააკეთებდა დრუიო, გრენუი, თავისი ცხვირის წყალობით, მიაცილებდა და იცავდა სურნელთა გადაადგილებას ყვავილის ფურცლებიდან – ქონისა და სპირტის გავლით – ძვირფას პატარა ფლაკონებში. იგი დრუიოზე გაცილებით ადრე გრძნობდა, როდესაც ცხიმი მეტისმეტად ცხელდებოდა, გრძნობდა, როდის უშვებდა ყვავილების მასა უკანასკნელ სურნელს, როდის გაჯერდებოდა ქონი, რა ხდებოდა შემრევების შიგნით და ზუსტად როდის იყო საჭირო გამოხდის პროცესის შეწყვეტა. თანაც ყოველთვის, თითქოსდა შემთხვევით, პირმოთნეობის ნიღბის მოუხსნელად ატყობინებდა ამას უფროს შეგირდს. “მე მგონი, – იტყოდა ხოლმე, – ახლა ქონი მეტისმეტად გაცივდება; თითქმის დარწმუნებული ვარ, რომ დროა ნაყენი ცხაურზე დაისხას; მეჩვენება, თითქოს სპირტი გამოსახდელ კუბში აორთქლებას იწყებს...” დრუიო ვერაფერი ჭკუის კოლოფი გახლდათ, მაგრამ სრული ყეყეცი არ იყო და გარკვეული დროის შემდეგ იაზრა, რომ საუკეთესო გადაწყვეტილებებს სწორედ მაშინ იღებდა, როდესაც აკეთებდა, ან თავად უბრძანებდა გაეკეთებინა ისე, როგორც ეს „მეჩვენებოდა“ გრენუის, რომელსაც „ისეთი გრძნობა ჰქონდა...“ და რადგან გრენუი არც ამავობდა და არც იბღინებოდა ამის გამო, და არასოდეს – მით უმეტეს, მაღამ არნულფის თანდასწრებით – ნართაულადაც კი არ აყენებდა ჩრდილს დრუიოს ატორიტეტსა და უფროსობას, ისიც მიზეზს ვერ ხედავდა, რატომ არ უნდა ესარგებლა მისი რჩევებით. უფრო მეტიც: მალე საერთოდ გადააბარა გადაწყვეტილებების მიღების პრივილეგია.

სულ უფრო ხშირად ხდებოდა ისე, რომ გრენუი არა მარტო ურევდა ქვაბს, არამედ ყვავილებსაც თვითონ ყრიდა შიგ, ცეცხლსაც თვითონ აჩაღებდა და პომადასაც თავადვე წურავდა, ხოლო დრუიო ჭიქა ღვინის გადასაკრავად „ოთხ უფლისწულს“ მიაშურებდა ხოლმე, ან სულაც ზემოთ, მაღამ არნულფისას ავიდოდა მისახედ-მოსახედად. დარწმუნებული იყო, გრენუი ყველაფერს თავად გაართმევდა თავს. ხოლო გრენუი, თუმც კი ახლა ორი კაციის სამუშაო უწევდა, მარტობით ტკბებოდა, ხელოსნობაში ოსტატდებოდა და, როცა კი დროს იხელთებდა, არც ცდების ჩატარებას ერიდებოდა. ბოლოს გაიხარა კიდევ, რაკიდა დაასკვნა — ჩემებურად მომზადებული პომადა გაცილებით ნატიფია, ხოლო Essence Absolue – გაცილებით სუფთა, ვიდრე დრუიოს გამოსდის ხელიდანო!.. ივლისის დასასრულს ჟანსინების დრო დადგა, ხოლო აგვისტოში – გიაციინტების. ორივე ეს მცენარე იმდენად ფაქიზსა და მყიფე სურნელს შეიცავდა, რომ მათი არა მარტო შხის ამოსვლამდე მოკრეფა, არამედ განსაკუთრებული, სათუთი გადამუშავებაც

იყო საჭირო. სიტბო მათ სუნის სიმძაფრეს აკარგვინებდა და ცხელ ქონში უცაბედად ჩაძირვას შეეძლო სრულიად დაეშალა იგი. ეს უკეთილშობილესი ყვავილები სულს ასე უბრალოდ არ თმობდნენ და საჭირო ხდებოდა ეშმაკობით გამოეტყუებინათ: სპეციალურად ამისთვის განკუთვნილ სათავსებში, ქონით დაფარულ ფიცრებზე ყრიდნენ, ანდა დაუტკეპნავად ახვევდნენ ზეთით გაჟღენთილ ტილოებში, სადაც ნელ-ნელა აძინებდნენ სიკვდილამდე. მხოლოდ სამი-ოთხი დღის მერე იწყებდნენ ისინი ჭკნობას და თავიანთ უკანასკნელ ამოსუნთქვას მეზობლად მყოფ ზეთს ან ქონს გადასცემდნენ... შემდეგ ფრთხილად ამოკრეფდნენ ხოლმე მათ და ახლა ახალ ყვავილებს ყრიდნენ. იმ დროისათვის, როდესაც პომადა იმდენად იჟღენთებოდა, რომ უკვე შესაძლებელი იყო მისგან სურნელოვანი ნივთიერების გამოწურვა, სექტემბერიც დგებოდა. ამ შემთხვევაში საბოლოო შედეგი რაოდენობრივად კიდევ უფრო ნაკლები იყო, ვიდრე მაცერაციის დროს; თუმცადა, ცივი ან-ფლერაჟის საშუალებით მიღებული ჟასმინის პასტა, ან ძველებური მეთოდით დამზადებული ტუბეროზის საპონი გაცილებით ახლოს იდგა პირველწყაროსთან, ვიდრე საპარფუმერიო ხელოვნების ნებისმიერი სხვა ნაწარმი. შთაბეჭდილება რჩებოდა, რომ ქონის ფილები სარკესავით ირეკლავდა ჟასმინის მოტებო არომას და სრულიად ბუნებრივად აღიქმებოდა, ოღონდაც – *Cum grano salis*,* რა თქმა უნდა; რადგან გრენუის ყნოსვა, ბუნებრივია, ჯერ კიდევ ამჩნევდა განსხვავებას ყვავილის სუნსა და მის კონსვერვირებულ არომას შორის: თხელი საფენით იწვა მასზე თავად (რაგინდარა უსუფთავესი) ქონის სუნი, რომელიც დედნის სურნელის მონახაზს არბილებდა, უფრო ზომიერს ხდიდა მის სიმძაფრეს და შესაძლოა, უფრო ასატანსაც – უცები ადამიანისთვის... ყოველ შემთხვევაში, ცივი ანფლერაჟი მაინც ყველაზე დახვეწილი და ქმედითი საშუალება იყო ნაზი სურნელების მისაღებად. ყოველ შემთხვევაში, უკეთესი არ არსებობდა. და თუმც კი მასაც არ შეეძლო გრენუის ცხვირის შეცდენა, იცოდა – ამ ჭეშმარიტად ყნოსვამოკლებულთა სამყაროში ეს მეთოდი სავსებით საკმარისი იქნებოდა ათას სხვათა გასაბრძენებლად.

როგორც მაცერაციაში, ისე სუნთა ამგვარ ცივად გაჯერებაშიც ძალზე ძალე მოიტოვა უკან თავისი მასწავლებელი – დრუიო და პირფერობის ნიღაბაფარებულმა, ეს გარკვეულწილად აგრძნობინა კიდევ. დრუიოც სიამოვნებით ავალებდა ქალაქში გასვლას, სასაკლაოზე ყველაზე შესაფერისი სახეობის ქონის ყიდვას, მის გაწმენდას, გადნობას, გაფილტვრასა და შენარევეების პროპორციების განსაზღვრას. თავად დრუიო ყოველთვის ჭირივით უფრთხოდა ამ საქმეს და დიდის დამაბულობითაც იქმოდა, ვინაიდან ქონს, რომელიც მთლად სუფთა არ იყო, ან მოიმწარებდა, ან ზედმეტად ასდიოდა ღორის, საქონლის თუ ცხვირის სუნი, შეეძლო საერთოდ გაეფუჭებინა ძვირფასი პომადა. ასევე გადაულოცა მან გრენუის არომატიზაციისათვის განკუთვნილ ოთახში ფირფიტებს შორის მანძილის განსაზღვრა, ყვავილების შეცვლის დრო, დაჟღენთვის ხარისხი... საჩქაროდ გადააბარა ყველა სარისკო გადაწყვეტილება, რომლებსაც ის, დრუიო, ისევე, როგორც ოდესღაც ბაღ-

* “შწიკვი მარილით”; აქ: *არცთუ უნაკლოდ* (ლათ.)

ინი, განუსჯელად, დაზუთხული წესების მიხედვით აკეთებდა, ხოლო გრენუი – გუმანით, ანუ საკუთარი ცხვირის წყალობით, რასაც დრუიო, რა თქმა უნდა, არც კი ეჭვობდა.

„მსუბუქი ხელი აქვს, – ამბობდა, – შიგანით გრძობს, რა და როგორ“. ხანდახან კი გაიფიქრებდა ხოლმე: „ვირიშვილი, ჩემზე ნიჭიერია, მაგისგან ასჯერ უკეთესი პარფიუმერი გამოვა...“. თუმცა ამავე დროს, მოთავებულ ბრიყვადაც თვლიდა, რადგან გრენუი, მისი აზრით, მცირე შემოსავალსაც ვერ მიითვლიდა თავისი ნიჭისათვის, მან კი, დრუიომ, უფრო მცირე შესაძლებლობებით უკვე ოსტატობასაც მიაღწია. გრენუიც ყველანაირად უმტკიცებდა ამ აზრს, გულმოდგინედ იბრიყვებდა თავს, პატივმოყვარეობის ნიშანსაც არ ამჟღავნებდა, ისეთ სახეს იღებდა, თითქოს საკუთარი უნარისა არაფერი ესმის და მხოლოდ მრავალნაცადი დრუიოს მითითებებს ასრულებს, ვის გარეშეც იგი, გრენუი, უბრალოდ, არც არაფრის მაქნისია.

მერე შემოდგომა დადგა და ზამთარიც მოვიდა. სახელოსნოში შედარებით სიწყნარე ჩამოვარდა. ფლაკონებში და ქოთნებში გამომწყვდეული ყვავილების ნელსურნელებანი სარდაფში ელაგა. დროდადრო მაღამ არნულფი ბრძანებას გასცემდა, შეემოწმებინათ ესა თუ ის პომადა, ან გამხმარი ბალახის რომელიმე ტომრისათვის მოეხსნათ თავი, გასანიავებლად. მაგრამ საქმე ცოტა იყო. ჯერ კიდევ შემოდლიოდა ზეთისხილი, კვირიდან კვირამდე, სავსე კალათებით (მათგან ზეთს წურავდნენ, ხოლო ნარჩენებს კარაქის სადღვეებს აბარებდნენ) და ღვინო, რომლის ნაწილსაც გრენუი სუფთა სპირტად ხდიდა.

დრუიო სულ უფრო იშვიათად შემოდლიოდა სახელოსნოში. თავის მოვალეობას ქ-ნ არნულფის საწოლში იხდიდა და თუ გამოჩნდებოდა, ოფლითა და სპერმით აქოთებულნი, მხოლოდ იმისათვის, ახლა ქულბაქ „ოთხ უფლისწულში“ გადაენაცვლებინა. თავად ქალბატონიც, ძირითადად, თავის ავლადიდების საკითხებს აგვარებდა და გარდერობს აახლებდა იმ დროისათვის, გლოვის წელიწადი რომ გავიდოდა. ხშირად გრენუი მთელი დღეების განმავლობაში ვერავის ხედავდა, ერთი მოსამსახურე ქალის გარდა, რომელსაც სადილად შეჭამანდი მოჰქონდა და ვახშმად – პური და ზეთისხილი. ქალაქში იშვიათად გადიოდა. ამქრულ ცხოვრებასა თუ საზეიმო მსვლელობებში შეგირდი ზუსტად იმდენად მონაწილეობდა, მისი ყოფნა-არყოფნა არავის სცემოდა თვალში. მეგობრები და ნაცნობები არ ჰყავდა, მაგრამ ბეჯითად ცდილობდა, თავკერძად ან განდგომილად არ ჩაეთვალათ. საკუთარი თავის გაუთლელ ტექტიად მოჩვენების დიდოსტატი იყო, ოღონდ არც იმდენად ცდილობდა, რომ მასზე ღვარძლიანად ეცინათ, ან უხეში ხელოსნური ზუმრობების მსხვერპლი გამხდარიყო. საბოლოოდ, იმდენი მოახერხა, ყველამ ანება თავი. მას კი მეტიც არაფერი უნდოდა.

მთელ დროს სახელოსნოში ატარებდა. დრუიოს უთხრა, ოდეკოლონიის ახალი რეცეპტი მინდა შევქმნაო, სინამდვილეში კი სულ სხვა რამ ჰქონდა უზურში. სუნამო, მონაპელიეში რომ დაამზადა, მომჭირნეობისდა მიუხედავად, უკვე გაუთავდა. მანაც აიღო და ახალი დაამზადა, ოღონდ ამჯერად ნაუცბათევადა კი არ შეთითხნა ადამიანის სუნის იმიტაცია – პირველსავე ხელთ მოხვედრილი მასალისაგან, არამედ მთელი თავისი პატივმოყვარეობა ჩააქსოვა პიროვნული, მეტიც – მრავალპიროვნული სურნელის შექმნაში...

დასაწყისისათვის შეუმჩნევლობის სუნი დაიმზადა, რაღაც თავისიფერი, ყოველდღიური სამოსელივით, რომელშიც ადამიანის დამახასიათებელი მომჟავო სუნი კი არსებობდა, მაგრამ სულ ოდნავ შესამჩნევად – თითქოს ბებერ, გამომშრალ კანზე შემოკრული სქელი შალის ტანსაცმელში გამოაღწიაო. ასეთი სუნით მოსახერხებელი იყო ხალხში გათქვეფა: საკმაოდ ძლიერი, რათა ყნოსვით დაგედასტურებინათ ზოგადად პიროვნების არსებობა, და ამავე დროს იმდენად მოუხელთებელი, რომ მის არსებობას ვერავინ ამჩნევდა. მისი დახმარებით გრენუი თითქოსდა არც იმყოფებოდა და მაინც, მოკრძალებულად კიდევ ამართლებდა თავის არსებობას – ეს კი მისთვის ზედგამოჭრილი იყო – როგორც მადამ არნულფისას, ისე ქალაქში გასასვლელად.

თუმცა, ზოგიერთ შემთხვევაში სადა სურნელი ხელისშემძლეელიც აღმოჩნდა. როდესაც დრუიოს დავალებით, საყიდლებზე მიდიოდა, ან როდესაც რომელიმე მოვაჭრისაგან ცოტაოდენი ციტებიტინი, ან რამდენიმე მარცვალი მუშკი სურდა შეეძინა, ისეც ხდებოდა რომ მისი შეუხედავი გარეგნობის გამო ან სრულიად ვერ ამჩნევდნენ და არ ემსახურებოდნენ, ან კი ამჩნევდნენ, მაგრამ სულ სხვა რამეს აძლევდნენ და ხან საერთოდაც ავიწყლებოდათ მისი მომსახურება. ასეთი შემთხვევებისათვის უფრო ღირსეული, ოღონდ ოფლის სუნიანი სუნამო დაამზადა, ზოგიერთი იმგვარი ყნოსვითი მოხაზულობითა თუ კუთხით, რომელიც უფრო უხეშ შესახედაობას აძლევდა და აიძულებდა ადამიანებს ეფიქრათ, რომ მას გადაუდებულ საქმეებზე მიეჩქარება; ამას გარდა, დრუიოსათვის დამახასიათებელი *aura seminalis* იმიტაციით – რომლის შექმნას გაქონილი ტილოს ნაჭრის, იხვის კვერცხებისა და მოხალული ხორბლის ფქვილის არომატიზაციის გზით მიაღწია და რაც მშვენიერ შედეგს იძლეოდა, თუკი მავანის ყურადღების მიპყრობა სურდა.

შემდეგი მისი არსენალიდან თანაგრძნობის გამომწვევი სუნი იყო, რაც შეუფერხებლად მოქმედებდა საშუალო ასაკისა და ხნიერ ქალებზე – წყალწყალა რძისა და გარანდული, რბილი ხის სუნი. მასში გრენუი – მაშინაც კი, როდესაც პირგაუპარსავი, დამჟავებული სახით შედიოდა სადმე და საწვიმარსაც კი არ იხდიდა – ერთი დარიბი, სისხლნაკლული ჭაბუკის შთაბეჭდილებას ახდენდა, რომელსაც ყველა პატიოსანმა კაცმა უნდა გაუწოდოს დახმარების ხელი. როგორც კი ბაზარში მის სუნს შეიყნოსავდნენ ვაჭრები, ისეთი მშვიერი და უძწეო ეჩვენებოდათ, უმაღლ ნიგოზსა და მსხლის ჩირს აჩეჩებდნენ ხელში; ყასაბის ცოლმა კიდევ, რომელიც განთქმული გახლდათ ავისი უკარებლობითა და სიძუნწით, ნება მისცა, თავად ამოერჩია და უფასოდ წაეღო სუნ-

დაკარული ხორცის ნარჩენები და ძვლები, ვინაიდან მისმა უმანკოების არო-
მატმა დედობრივი გრძნობები გაუღვიძა და გულიც აუჩუყა. სწორედ ამ ნარ-
ჩენებისგან, ალკოპოლით პირდაპირი დაჟღენთვის გზით, მიიღო იმ სუნის
მთავარი შემადგენელი, რომელსაც მაშინ ხმარობდა, თუკი მარტო მოესურვე-
ბოდა დარჩენა. ეს სუნი მის გარშემო წყნარი ზიზღის ატმოსფეროს ქმნიდა,
სიღამპლის მოყნოსვის შეგრძნებას, დილდილაობით რომ ცცემს ბებერი,
მოუვლელი პირიდან. ეფექტი იმდენად ძლიერი იყო, არცთუ მაინცა და მაინც
აზიზი დრუიოც კი უნებლიედ პირს იბრუნებდა ხოლმე. მისი რამდენიმე წვე-
თიც საკმარისი იქნებოდა კარიბჭეზე მისასხმელად, რათა ნებისმიერ დაუ-
პატიჟებელ სტუმარს, ადამიანი იქნებოდა თუ ცხოველი, ფეხიც აღარ შე-
მოედგა ეზოში.

ახლა უკვე სხვადასხვა სურნელთა დაცვის ქვეშ იმყოფებოდა, რომლებ-
საც ტანსაცმელივით იცვლიდა და რაც საშუალებას აძლევდა ადამიანების
გარემოცვაში არ გამორჩეულიყო. ახლა გრენუი თავის ვნებას აპყვავ – სუ-
ნებზე ნამდვილ ნადირობას მიჰყო ხელი, და ვინაიდან წინ დიადი მიზანი
ჰქონდა, ხოლო დრო – წელიწადზე მეტი, არა ცხროიანი თავგამოდებით, არა-
მედ უჩვეულო გეგმიურობითა და სისტემატურობით იწყო თავისი იარაღის
აღესვა, ახალ-ახალი ხერხების გამოძუშავება, მეთოდების ჯიუტად მიყვანა
სრულყოფილებამდე... ჯერ იმით დაიწყო, რაზედაც ბალდინისთან გაჩერდა –
ქვისგან, ლითონისაგან, ხისგან, მარილისაგან, წყლისაგან, ჰაერისაგან – ანუ,
მოკლედ რომ ვთქვათ, უსულო საგნებისაგან არომების მიღებით.

იმას, რაც მაშინ დისტილაციის უხეში მეთოდის გამო უბადრუკი წარუ-
მატებლობით დაუმთავრდა, ახლა ქონის აბსორბციის ძალის დახმარებით მი-
აღწია: ერთხელ, კარის თითბერის საკეტის ცივი, დაობებული სუნი იკრა და
რამდენიმე დღით საქონლის ქონი გადაუსვა – ახლა წარმოიდგინეთ მისი გაკ-
ვირვება, როდესაც ქონი ჩამოფხიკა და მას, მართალია ოდნავ, მაგრამ
ერთმნიშვნელოვნად თითბერის სუნი სდიოდა! სპირტით გამორეცხვის შემდე-
გაც კი დარჩა ეს სუნი; რა თქმა უნდა, სუსტი, შორეული, ღვინის სპირტის
ანაორთქლით დაბინდული და იქნებ, მთელ სამყაროში მხოლოდ გრენუის
ცხვირისათვის მისაწვდომი, და მაინც ის არსებობდა, ანუ პრინციპში მაინც,
ის უკვე მის ხელთ იყო!.. გრენუის რომ ათი ათასი ცალი საკეტი ჰქონოდა, და
ათასი დღე ზედიზედ ეფარა ისინი ქონით, ნამდვილად შესძლებდა პატარა
წვეთი *ესენს აბსოლუ* მიეღო, და მაშინ ყოველს და ნებისმიერს გაუჩენდა
ილუზიას – ცხვირწინ თითბერის საკეტი მიდევსო...

ზუსტად იგივე გამოუვიდა ფოროვანი კირქვის სუნთან, რომლის ნატეხიც
ბაღში, თავისი ქონის წინ იპოვნა. ნატეხის მაცერაცია ჩაატარა და პომადის
პატარა ბურთულა მიიღო, რომლის სუნი აუწერელ აღფრთოვანებას ანი-
ჭებდა; მერე იმავე ქონის მიდამოებში მოგროვებულ სულ სხვადასხვა ნივთე-
ბისაგან მიღებულ სუნებს შეურია და ფრანცისკანული მონასტრის უკან მდე-
ბარე ზეთისხილის პლანტაციის სუნთაგან მისი მინიატურული ასლი შექმნა;
პაწია ფლაკონში გამოძვყვეული, ის ახლა შეეძლო თან ეტარებინა და საჭი-
როების შემთხვევაში, მეყვსეულად აღედგინა. რა თქმა უნდა, მთელი ეს
ჯადოქრობები თუ შესანიშნავი ოინები, რომლებსაც ის სუნებს უწყობდა,

მხოლოდ მას, პირადად გრენუის ანიჭებდა სიამოვნებას და მხოლოდ მისთვის იყო ცნობილი, მაგრამ ეს უაზრო ვირტუოზობაც დიდ სიამეს ანიჭებდა და არასოდეს, არც მანამ და არც შემდგომში არ უგრძენია თავი ისე ბედნიერად, როგორც ამ აზარტული თამაშების დროს – სურნელოვანი ხედების ნატურ-მორტებისა და ცალკეული საგნების პორტრეტების შექმნის დროს რომ განიცდიდა.

შემდგომ უკვე ცოცხალ ობიექტებზეც გადავიდა: ჯერ ზამთრის ბუხების, მატლების, ვირთხების, კნუტების დაჭერა და მათი ცხელ ქონში ჩაფლვა იწყო. ღამდამობით ბოსლებსა და ფარდულეებში შეიპარებოდა ძროხებთან, თხებთან და გოჭებთან, რათა რამდენიმე საათით დაეფარა ისინი ქონიანი ტილოებით, ან ზეთით გაჟღენთილი დოლბანდები დაეხვია მათზე. ფარეხებში მიძვრებოდა, რომ ბატკნები გაეკრიჭა და მათი სურნელოვანი მატყლი ღვინის სპირტში გამოერეცხა. დასაწყისისათვის შედეგები არც ისე საიმედო იყო: ისეთი ღამთმენი ნივთებისაგან განსხვავებით, როგორიც თითბერის საკეტი ანთუ ქვაა, ცხოველებს სულაც არ ეპიტნავებოდათ საკუთარი სუნის გაცემა; ღორები ბაგას ეხახუნებოდნენ, რათა დოლბანდები მოეცილებინათ როგორმე, ცხვრები ბლაოდნენ, როდესაც დანით ხელში უახლოვდებოდა მათ; ძროხები ჯიუტად იბერტყავდნენ ჯიქნებიდან ქონიან ნაჭრებს. ზოგიერთი ხოჭო, როდესაც მათ გადამუშავებას ცდილობდა, ყოვლად სეკრეციებს გამოყოფდნენ, ხოლო ვირთხები, ეტყობა შიშისაგან, პირდაპირ საპომადე სითხეში იცლიდნენ კუჭს. ცხოველები, ყვავილებისაგან განსხვავებით, რომლებიც უჩუმალი ამოსუნთქვით ნებდებოდნენ, მაცერაციის დროს თავიანთ სუნებს ასე უდრტვიანველად ვერ ელეოდნენ, არ იძლეოდნენ მოშთობის უფლებას, წიხლებს ისროდნენ, იბრძოდნენ და შიშით გამოწვეული ოფლის შეუდარებლად დიდ რაოდენობას გამოყოფდნენ; ასე რომ, მჭავეებით გადატვირთული ცხელი ქონი სრულიად უვარგისი ხდებოდა დასამუშავებლად. ეს, რა თქმა უნდა, ხელს უშლიდა დაფიქრებით და აწონდაწონვით ეკეთებინა საქმე. ახლა ობიექტები უნდა დაემშვიდებინა და თან ისე მოულოდნელად, ვერც შეშინება და ვერც წინააღმდეგობის გაწევა ვერ უნდა მოესწროთ... მოკლედ, მათი წინასწარ დახოცვა მოუხდა.

დასაწყისისათვის ეს რომელიღაც ლეკვზე სცადა. სასაკლავო წინ, ხუხულადან ხორცის ნაჭრით გამოიტყუა და სახელოსნოში მიიყვანა. როდესაც ცხოველი მხიარული და აღზნებული წკმუტუნით მის გარშემო მოჰყვა ხტუნვას და მარცხენა ხელის თითებიდან ხორცის წაგლეჯას ღამობდა, გრენუიმ მარჯვენაში მომარჯვებული შეშის ნაპობი ჩასცხო კეფაში. ლეკვი ისე სწრაფად მოკვდა, თვალეებში კიდევ შერჩა ბედნიერი გამომეტყველება — ვიდრე გრენუი ცხაურზე აწვენდა ქონიან ფილებს შორის, სადაც ლეკვი თავის სუფთა, სიკვდილით შეურყენელ არომას გაუშვებდა. მაგრამ მაინც, თქმა არ უნდა, მუდამ ფხიზლად უნდა ყოფილიყო გრენუი! გვამები, ისევე როგორც ველზე დაკრეფილი ყვავილები, სწრაფად ფუჭდებიან. სწორედ ამიტომ დარაჯობდა თავის მსხვერპლს დაახლოებით თორმეტი საათი, ვიდრე არ მოყნოსა, რომ ძაღლის სხეულიდან, მართალია არცთუ უსიამო, მაგრამ აქ სრულიად უადგილო კვდომის სუნის ნაკადებმა გამოაღწია. მაშინვე შეწყვიტა ანფლერაჟი, ლეში იქაურობას მოაშორა, არომატიზირებული ქონის ნაჭერი

ქვაბში ჩაუშვა და საფუძვლიანად გამორეცხა. შემდეგ გამოხდა სპირტი, ერთ ციღამდე დაიყვანა და სინჯარაში ჩაასხა. სუნამოს აშკარად ასდიოდა ძაღლის ნეღლი, ცინცხალი მბზინვარე ტყავის სუნი; როდესაც გრენუიმ იგი სასაკლავოს ბებერ ძუკნას აყნოსვინა, ძაღლმა ერთი ყეფა-ყმუილი მორთო და დრუნჩს სინჯარას არ აცილებდა, მაგრამ გრენუიმ მჭიდროდ დაახურა საცობი, ჯიბეში ჩაიდო და კიდევ დიდხანს დაატარებდა თან, როგორც მოგონებას მისთვის იმ ტრიუმფალურ დღეზე, როდესაც პირველად შესძლო ცოცხალი არსებისათვის მისი სურნელოვანი სული წაერთმია.

შემდეგ, ფრიადი თანდათანობითა და უდიდესი სიფრთხილით, გრენუი ადამიანებს მისდგა. საღამოობით, შეუმჩნევლობის საკუთარი მსუბუქი სუნის საფარქვეშ, „ოთხი უფლისწულის“ ხმირ სტუმრებს შორის ტრიალებდა და მაგიდების, და სკამების ქვეშ, და მყუდრო კუნჭულებში ქონით ან ზეთით გაჟღენთილ ნაკუწებს კიდებდა. რამდენიმე დღის შემდეგ აგროვებდა მათ და ჭეშმარიტად, სამზარეულოს გამონაბოლქვის, თამბაქოს კვამლისა და ღვინის ყველა შესაძლებელ სუნთან ერთად, ქონს ადამიანის ოდნავი სუნიც დაჰკრავდა! მაგრამ მეტისმეტად არამკაფიო და ბუნდოვანი იყო – უფრო მეტად საერთო წარმოდგენა სიმყრალეზე, ვიდრე თავად პიროვნული სუნი. ზუსტად ასეთივე აურა – აუარება ხალხისა, ოღონდ უფრო სუფთა, ამაღლებულ-დაოფლილ ხარისხში, ეკლესიაშიც შექმნილი მიელო, სადაც გრენუიმ 24 დეკემბერს გამოვიდა მერხების ქვეშ თავისი საცდელი ბაირალები და მხოლოდ 26 დეკემბერს წამოიღო იქიდან – მხოლოდ მას შემდეგ, რაც მათ თავზე სულ ცოტა შვიდჯერ იჯდა წირვაზე ხალხი. ტაძრის ატმოსფეროს შემსრუტავ ნაჭრის ამ ნაკუწებზე მომწარო ოფლის, მენსტრუალური სისხლის, მუხლებს ქვემოთა ნოტიო ღრმულების, კრუნჩხვით მოგრეხილი ხელების სუნთა შემზარავი ნარევი ახლა ათასობით მომღერალი და ლოცვით მოჩურჩულე ადამიანის ნასუთქ, გადამუშავებულ ჰაერთან და საკმევლის მიძიმე, წებოვან ანაორთქლს იყო შეზავებული – უფრომო, გულიწამრეკვად შედედებული, მაგრამ მაინც – უკვე საცნაურად ადამიანური. პირველი კუთრი სუნი კი გრენუიმ დავრდომილთა თავშესაფარში მოიძია: ერთი ვინმე მეტყავის დასაწვავად გადაღებული თეთრეული მოიპარა – ახალი მკვდარი იყო ჭლექისაგან და მანამდე ამ ზეწრებში ორი თვე გახვეული. ტილო ის, გაჟღენთილიყო მეტყავის სუნით, ანფლერაჟის პასტასავით შეიწოვა მისი ანაორთქლი. შედეგი შემადრწუნებელი გახლდათ: გრენუის ცხვირწინ, ღვინის სპირტის ხსნარიდან, მეტყავე მკვდრეთით აღსდგა და მისი ყნოსვითი პორტრეტი, თუნდაც სქემატური, რეპროდუქციის სპეციფიური მეთოდითა და ავადობის მრავალრიცხოვანი მიაზმებით დამახინჯებული და მაინც სრულიად საცნობი, შიგ სახელოსნოს ჰაერში აღმოცენდა: ტანმორჩილი, ოცდაათიოდე წლის ქერა კაცი, ბუშტა ცხვირით, მოკლე ხელ-ფეხით, დანესტილი ბრტყელი ტერფებით, გასიებული ფალოსითა და საძაგელი სუნით ყრონტიდან; მოკლედ, ვერაფერი ხიბლი ჰქონდა, არც მისი შენახვა ღირდა იმ პატარა ლეკვის სუნით და მაინც, გრენუიმ ნება მისცა ამ მოჩვენებას მთელი ღამე **ფფრიალა** მის ქონში; დროდადრო ყნოსვით იჭერდა მას, ბედნიერი და ღრმად კმაყოფილი იმ ძალაუფლების გრძნობით, სხვა ადამიანის არომაზე რომ მოიპოვა. მეორე დღეს კი მაინც გაატანა ქარს.

იანვრის თვეში, არნულფის ქვრივი კანონიერი ქორწინებით შეუუღლდა თავის უფროს შვირს — დომინიკ დრუიოს, რომელიც ამა იურიდიული აქტის შედეგად თათმანისა და პარფიუმერიის ოსტატ მეტრ დრუიოდ იქცა. გილდიის ოსტატებისთვის დიდი სადილი გამართეს, შეგირდებისათვის — უფრო მოკრძალებული. ქალბატონმა ახალი ლეიბი შეიძინა საწოლისათვის, რომელსაც დრუიოსთან ახლა უკვე ოფიციალურად იყოფდა და კარადიდან თავისი ჭრელი კაბები გამოალაგა. ყველაფერი დანარჩენი ძველებურად დარჩა: შეინარჩუნა თავისი ძველი, შეუბღალავი სახელი — მაღამ არნულფი, გაუყოფავი ქონება, საქმის ფინანსური ბერკეტები და სარდაფის გასაღები; დრუიო ყოველდღიურად ასრულებდა მამრის მოვალეობებს და მერე ღვინით გრილდებოდა, ხოლო გრენუი — იმის მიუხედავად, რომ პირველი და ერთადერთი შეგირდი გახდა — იგივე საზღაურის, მწირი კვებისა და უბადრუკი ღამისსათვის ფასად ასრულებდა მოზღვავებული სამუშაოს მეტ წილს.

წელიწადი ყვითელი კასიების წარღვრით დაიწყო, გიაცინტებით, იებითა და ნარგიზებით. ერთხელ კი, მარტის კვირა დილით — გრასში მისი ჩამოსვლიდან დაახლოებით ერთი წელი იქნებოდა გასული — გრენუი ქალაქის მეორე ბოლოში გაემართა იმის შესატყობად, როგორ მიდიოდა საქმეები ბაღში, კედლის მიღმა. ამჯერად მზად იყო იმ სურნელისათვის და ცხადად ჰქონდა წარმოდგენილი, რაც ელოდა... და მაინც, როდესაც სუნი შეიფნო — ეს კი ახალ ხიფზე მოხდა, ნახევარ გზობაზე იმ ბაღამდე — იგრძნო როგორ აუბაგუნდა გული, სისხლი როგორ აუღუღდა სიხარულისაგან! ის ჯერ კიდევ იქ იყო, მშვენიერი ყვავილი, რომელმაც უვნებლად გამოიზამთრა, წვენი აივსო, მოიზარდა, წელში გასწორდა და დიდებული ყლორტები მოიყარა. სურნელი, როგორც მოელოდა კიდევ, სინატიფის დაუკარგავად გასძლიერებოდა; ის სურნელება, რომელიც სულ რაღაც ერთი წლის წინ წვეთებდა, მხეფებდა მოდიოდა, ახლა ნარნარი, მდორე ნაკადივით მოედინებოდა და ათასობით ფერით ლივლივებდა; და ეს ნაკადი — ნეტარებით აღნიშნა თავისთვის გრენუიმ — სულ უფრო ძლიერი წყაროდან იკვებებოდა... კიდევ ერთი წელი, მხოლოდ ერთი, სულ რაღაც თორმეტი თვე, მერე წყარო ამოხეთქავს და მას შეეძლება მოვიდეს, მიითვისოს და მოათვინიეროს კიდევ სურნელების ეს ველური ამოფრქვევა!.

ნაცნობ კედელთან მიიბრინა, რომლის იქითაც მდებარეობდა ბაღი. გოგონა სახლში იყო — ოთანში, დახურულ დარაბებს იქით, მაგრამ მისი სურნელი თანაბარ, რბილ ტალღებდად გამოდიოდა. გრენუი უჩუმრად იდგა, არც გაბრუებულა და არც დამთვრალა, როგორც მაშინ; იმ მიჯნურის ბედნიერი შეგრძნებით აღივსო, შორიდან რომ უთვალთვალებს ღვთაებრივ სატროფოს და იცის, ერთი წლის შემდეგ უკვე თავისთან ნახავს... და მართლაც, გრენუი — ეს მარტოხელა ტკიპა, ეს ურჩხული, ეს ბაიყუში გრენუი, რომელსაც არც ჰყვრებია ვინმე და არც ის შეეძლო, ვინმეში სიყვარულის გრძნობა გაედვივებინა, იდგა მარტის იმ დღეს ქალაქ გრასის კედელთან და უყვარდა, და უძიროდ ბედნიერი იყო ამ სიყვარულით!.

მართალია, მას ადამიანი კი არ უყვარდა, არა ის გოგონა სახლში, კედელს იქით, არამედ მხოლოდ მისი სურნელი, მხოლოდ სურნელი და არაფერი სხვა, და უყვარდა, როგორც სამომავლო საკუთრება. მოვა ერთი წლის შემდეგ და დაისაკუთრებს. საკუთარი სიცოცხლე დაიფიცა. და რაკი დალო ეს თავისებური აღთქმა — ან, გნებავთ, დანიშნის ხელშეკრულება, რაკილა თავს ფიცი მისცა რომ უერთგულებდა ამ თავის მომავალ საკუთრებას, მხიარული განწყობით დატოვა იქაურობა და დიუკურის კარიბჭის გავლით, ქალაქში დაბრუნდა.

დამით, თავის ქოხში მწოლიარემ, გოგონას სუნი კიდევ ერთხელ მოატივტივა მოგონებიდან — თავადაც ეფერებოდა და მასაც აძლევდა ალერსის ნებას, იმდენად ახლო შეიგრძნობდა, როგორც ეს სიზმარშია ხოლმე, თითქოსდა უკვე დაეუფლა მას, თავის საკუთრებად ქცეულ სურნელს, და ვიდრე ეს დამთრობლად საოცარი წამი გრძელდებოდა, საკუთარი თავიც მხოლოდ ამავე სურნელების წყალობით უყვარდა. და ის-ის იყო, სიყვარულით გათანგულს უნდა დაეძინა, ზუსტად იმ დროს, როდესაც თვალები მიეპლიტა და ერთი ღრმა ჩასუნთქვადა აკლდა სიზმარულ ზმანებებში გადასასვლელად, სურნელმა მიატოვა იგი, მოულოდნელად გაქრა და მისი ადგილი ახლა თხების ბაგის ცივმა სუნმა დაიჭირა.

შეძრწუნდა გრენუი: “და თუკი, — გაიფიქრა, — და თუკი მისი ეს სურნელიც ამოიწურა? ეს ხომ ისე არაა, როგორაც მოგონებებში, სადაც ყველა სურნელი მუდმივია! ცხადში იგი აქროლებადია, გარე სამყაროსთან შეხებისას ნავლდება, და თუკი საბოლოოდ დაშრება ანუ — დაშრა წყარო, საიდანაც ნელსურნელებათა გამოსახდელ ნექტარს ვღებულობ, ისეთივე შიშველი ვრჩები და მომიწევს ისევე ჩემივე სუროგატებით ვუშველო თავს... არა, ადრინდელზე უარესად იქნება ყველაფერი, რადგან ვეღარც შევძლებ მის დავიწყებას, ვინაიდან არანაირი სუნი არ მავიწყდება... ასე გამოდის, მთელი ცხოვრება უნდა ვიტანჯო ამ მოგონებით, როგორც უკვე ახლავე ვიტანჯები მის მოლოდინში! მაშ, რა ჯანდაბად მინდა? რად ვიმწარებ თავს?!”

ამის გაფიქრებაც კი დამზაფრავი იყო. მაინც, რამდენ ხანს შესძლებს მის დანარჩუნებას? რამდენიმე დღე? რამდენიმე კვირა? იქნებ მთელი თვეც, თუ მომჭირნედ იხმარს? კი მაგრამ, მერე? უკვე ხედავდა, როგორ ბერტყავს ფლაკონიდან უკანასკნელ წვეთს, როგორ ავლებს შიგ ღვინის სპირტს, რათა მისხალიც არ დაიკარგოს, და ხედავს — არა, ყნოსავს — სამუდამოდ და დაუბრუნებლად როგორ ორთქლდება მისი სურნელი... ნელი-ნელ კვდომა იქნება ეს, თითქოსდა საკუთარ თავს ამოაორთქლებს გარეთ — ამ საზიზღარ, შემზარავ სამყაროში.

აჟრჟოლებდა. საკუთარ გეგმებზე ხელის აღების სურვილმა შეიპყრო, სურვილმა — გასულიყო დამეში და გაეწია, საითაც გული გაუწევდა; თოვლიანი მთების გადალახვა, ოვერნამდე ასი მილის მუხლჩაუხრელად გავლა, თავის ძველ ქვაბულში შეძრომა, მიძინება და ძილში სიკვდილი მოუნდა. და მაინც არ გააკეთა ეს — ადგილზე დარჩა, არ აპყვა ცდუნებას; არ აპყვა, ვინაიდან ყველაფერი ეს უკვე გამოცდილი ჰქონდა, ხოლო რაც არ გამოე-

ცადა — ადამიანის სუნის ფლობა იყო, ოღონდ ისეთივე მწველი სურნელის, კედლის იქით მყოფ გოგონას რომ გააჩნდა; და იმ წინათგრძნობის მიუხედავად, რა საზარელი ფასიც უნდა გაეღო, მაინც ეს თუნდაც მეყვსეული ფლობა და დაკარგვა უფრო სასურველად მიაჩნდა, ვიდრე იმთავივე ყველაფერზე უარის თქმა, ვინაიდან მთელი თავისი ცხოვრების მანძილზე ყველაფერზე უარს ამბობდა, არც ჰქონია არასოდეს რაიმე, და არც არაფერი დაუკარგავს...

იჭვინულობამ უკან დაიხია და მასთან ერთად ჟრჟოლაც შეუწყდა. იგრძნო, როგორ გამოაცოცხლა ცხელმა სისხლმა და ისევ დაეუფლა ჩაფიქრებულის აღსრულების ჟინი: არჩევანის წინაშე მდგარმა — ჩამხმარიყო საკუთარ თავში, თუ ჩამოვარდნის ნება მიეცა თავისთვის, ტკიპა გრენუიმ მერვე ირჩია, იმ სრული შეგნებით, რომ ეს მისი ბოლო ვარდნა იქნებოდა. ისევ გაწვა ტახტზე, ჩაეფლო თივაში, საბანი გადაიფარა და უმაღ გმირად იგრძნო თავი. ოღონდაც, საქმე ისაა რომ ზოგი სურნელება ათწლეულობით სძლებს — ვთქვათ, მუშკით გაჯერებული ტყავის ნაჭერი, ამბრის გორგალი, კედარის ხის ზარდახშა — ყველაფერი ეს, ყნოსვითი თვალსაზრისით, ლამის უკვდავია; სხვები კიდეც — ლიმეტინის ზეთი, ბერგამოთი, ნარგიზისა და ტუბეროზის ექსტრაქტები — ჰაერზე სუფთა სახით გამოტანის შემთხვევაში, მაღევე კარგავენ სურნელს. პარფიუმერიის ხელოვნებაც სწორედ ამ საბედისწერო ვითარებას ებრძვის, იოლაქროლად არომებს სიმტკიცეს მატებს — თითქოსდა ხუნდებს ადებსო, თავისუფლებისაკენ სწრაფვას უთრგუნავს — და მთელი ხელოვნებაც იმაშია, ეს ხუნდები მეტისმეტად მჭიდრო არ იყოს, რათა მოჩვენებითი თავისუფლებაც მიანიჭოს მათ და სიახლოვეშიც იყოლიოს, რომ სურნელს გაქცევის საშუალება აღარ მიეცეს. გრენუის ეს ორჯერ ზედიზედ გამოუვიდა ტუბეროზის ზეთთან მუშაობის დროს, რომლის ეფემერული არომაც მცირეოდენი ციბეტინის, ვანილისა და ლანდანუმის მეშვეობით შებოჭა და სწორედ ამით გამოავლინა სრულად მისი მომხიბლაობა. განა არ შეიძლება იმ გოგონას სურნელსაც რაიმე მსგავსი უქნას? განა რა აუცილებელია სუფთა სახით გამოიყენო უძვირფასესი სურნელება და ასე უყაირათოდ ხარჯო? რა უაზრობაა, რა უნიათობა! განა აღმასებს დაუწახნაგებლად ტოვებენ? განა ოქროს თვითნაბადებს იკიდებენ ყელზე? განა გრენუი სურნელთა უბრალო ქურდია, დრუიოსა და სხვა მაცერატორების, დისტილატორებისა თუ ყვავილთა გამომწურავების მსგავსად? ნურას უკაცრავად — ის ქვეყნად უდიდესი პარფიუმერია — დიახაც!.

შუბლზე იტკიცა ხელი, ადრევე რომ ვერ იაზრა ეს მეთოდი. რა თქმა უნდა, ყოვლად დაუშვებელია ამ თავისებურად ერთადერთი არომის სუფთა სახით გამოყენება — ძვირფასი ქვისა არ იყოს, მას ჩარჩო სჭირდება, ის კი ნელსურნელებათა მთელ დიადემას გამოსჭვდავს და ხელოვნების ყველა წესის დაცვით დამზადებულ ამ სუნამოს გულისგული სწორედ იმ კედლისმიდმელი გოგონას სურნელი იქნება! ოღონდაც გასაწყობად — ასე ვთქვათ, არანჟირებისათვის — საყრდენ და გადამწყვეტ ნოტად, ხმოვანების გამახვილებისა და განმტკიცებისათვის, ახლა არც მუშკი გამოდგებოდა, არც ციბეტინი, არც ვარდის ზეთი — ეს იმთავითვე ცხადი იყო. ამნაირი სუნამოს, ადამიანის

ასეთი ხელოვნური კეთილსურნელების შესაქმნელად მას სულ სხვაგვარი შემადგენლები სჭირდებოდა...

40.

იმავე წლის მაისში, ვარდების მინდორზე, სადღაც შუა გზაზე გრასსა და მის აღმოსავლეთით მდებარე დაბა ოპიოს შორის, თხუთმეტი წლის გოგონას გაშიშვლებულ გვამს წააწყდნენ. გოგონა კეფაში კეტის ჩარტყვით მოეკლათ. გლეხი, რომელმაც გვამი აღმოაჩინა, ისე იყო შეძრწუნებული, კინაღამ ეჭვი დაიტეხა თავზე, როცა ათრთოლებული ხმით მოახსენა ბოქაულს არასოდეს მსგავსი მშვენიერება არ მინახავსო – თუმცა, არსებითად, იმის თქმა სურდა, რომ მსგავსი საშინელება არასოდეს ენახა.

გოგონა მართლაც რომ დახვეწილი სილამაზით გამოირჩეოდა და ალბათ, იმ ქალების რიგს განეკუთვნებოდა, ტკბილ, განსაკუთრებით მწებარე თაფლს რომ მოგვაგონებენ; ერთი ნაწილი მოძრაობით, თავის ერთი შემობრუნებით, ერთადერთი, შოლტის რკალივით უწყინარი გამოხედვით რომ იპყრობენ გარემოს, თვითონ კი მშვიდად დგანან ვნებათა მორევის შუაგულში, თითქოს და ვერც შეიგრძნობენო მიზიდულობის იმ ძალას, რომლითაც თავისკენ ეწევიან გარემომყოფთა ვნებებსა თუ სულებს; და ჯერ სრულიად ნორჩი იყო, მომწიფების ხანაში, ამნაირი ქალებისათვის დამახასიათებელ მომხიბვლელობას სრულყოფისათვის ჯერ არც მიეღწია. აღნაგობა ჯერ კიდევ მყიფე ჰქონდა, მკერდი მკერივი, ხოლო სახე – სქელი, ყორნისფერი თმით შემოფარგლული – ჯერ კიდევ ბავშვურ კონტურებსა და ნაკვთების იდუმალ დაუმთავრებლობას ინარჩუნებდა. თუმცა თავად თმების სიგრძე გაურკვეველი იყო, რაკიდა მკვლელს შეეკრიჭა და თან გაეყოლა, ისევე როგორც მთელი სამოსი.

თავდაპირველად ბოშებზე მიიტანეს ეჭვი. ბოშებისაგან ხომ ყველაფერია მოსალოდნელი – ეგენი, მოგეხსენებათ, ძველი კაბებისაგან ხალიჩებს ქსოვენ, და ბალიშებს ადამიანის თმით ტენიან, და ჩამოზრჩობილთა კბილებისა და კანისაგან პატარა თოჯინებს აკეთებენ... ასეთი დანაშაული სწორედ ბოშებისათვის შეიძლებოდა მიგეწერა კაცს, მაგრამ ბოშები არსად ჩანდნენ, არ ჩანდნენ არსად მთელს ოლქში – უკანასკნელად მათ დეკემბერში ჩამოველოთ ამ მხარეს.

ბოშების არყოფნის გამო, ეჭვი ახლა იტალიელ მედროვე მუშებზე მიიტანეს. თუმცა, ჯერ არც იტალიელები ჩანდნენ – ასე ადრე არც არასოდეს ჩამოსულან, ისინი მხოლოდ იენისში გამოჩნდებოდნენ ხოლმე ჟანსინის მოსავლის ასაღებად. ასე რომ, იტალიელების დადანაშაულებაც შეუძლებელი გახდა. შემდეგ დალაქების რიგი დადგა, რომლებიც გაჩხრიკეს კიდევ, რათა მოკლული გოგონას თმისთვის მიეკვლიათ. უშედეგოდ. შემდეგ ებრაელებზე მიიტანეს ეჭვი, შემდეგ ბენედიქტელთა მონასტრის ვითომდა ავხორც ბერებზე – თუმცა, თითოეული მათგანი სამოცდაათ წელს კარგა ხნის გადაცილებული

იყო, შემდეგ ცისტერციანელებზე, შემდეგ ფრანკმასონებზე, შემდეგ შემლი-
ლებზე დაერდომილთა თავშესაფრიდან, შემდეგ მენახშირეებზე, შემდეგ
ბოგანოებზე და უზნეო არისტოკრატებზეც კი, განსაკუთრებით მარკიზ დე
კაბრზე, ვინაიდან მას უკვე მესამეჯერ მოეყვანა ცოლი და, როგორც ამ-
ბობდნენ, ორგასტულ მესებს აწყობდა თავისი სასახლის სარდაფებში,
ხოლო მამაკაცური პოტენციის ასამაღლებლად ქალწულების სისხლს
სვამდა... მაინც ვერ შესძლეს ვერაფრის დამტკიცება. მოწმეები არ ჰყავდათ,
ვერც მიცვალებულის ნივთმტკიცებანი – სამოსელი და თმა ვერავის უპოვეს.
ორი კვირის შემდეგ პოლიციის კომისარმა ძიება შეწყვიტა.

იტალიელი მოჯამაგირეები, ბევრ ოჯახთან ერთად, შუა ივნისში
ჩამოვიდნენ ჟასმინის საკრეფად. გლეხები კი ქირაობდნენ მათ, მაგრამ თავი-
ანთ ცოლებსა და ქალიშვილებს მათთან ურთიერთობა მაინც აუკრძალეს:
ვინც ფრთხილობს, იმას ღმერთიც უფრთხილდებაო. მართალია, ეს მუშები
სულაც არ იყვნენ პასუხისმგებელნი მომხდარ დანაშაულზე, მაგრამ ხომ
შეიძლებოდა ყოფილიყვნენ?! ამიტომაც, უმჯობესია, ნავსს მოერიდო...

და მაინც, ძალიან ძალე, ორი სხვა მკვლელობა მოხდა. მსხვერპლნი ისევ
გოგონები იყვნენ – შავდალალა, კალმით ნახატი ლამაზმანების იმავე ტიპისა,
გამიშვლებულ-გაკრეჭილები რომ იპოვეს ასევე ყვავილების მინდორზე, კე-
ფაზე ბლაგვი ჭრილობით. და ისევ – არავითარი კვალი! ახალი ამბავი ელვის
სისწრაფით გავრცელდა და ის-ის იყო ჩაქოლვის საფრთხის ღრუბელი
ჩამოწვა გადამთიელთა თავზე, რომ ცნობილი გახდა – ორივენი
იტალიელები ყოფილან, ვინმე გენუელი მოჯამაგირის ქალიშვილები.

ამან თავზარი დასცა ყველას: უკვე აღარ იცოდნენ, ვისკენ მიემართათ თა-
ვიანთი ყოვლად უძლური მრისხანება. მართალია, ზოგზოგები ჯერ კიდევ ეჭ-
ვობდნენ გიჟებსა თუ ეშმაკულ მარკიზზე, მაგრამ ეს ეჭვი არც ისე დასა-
ჯერებელი ჩანდა, რადგან გიჟებს დღისითა და ღამით მეთვალყურეები
ჰყავდათ მიჩენილი, ბატონი მარკიზი კი, კარგა ხანია, პარიზს გამგზავრებუ-
ლიყო. და ადამიანებმა ახლა მხარი მისცეს ერთმანეთს: გლეხებმა თავიანთი
ფარდულების კარები გაუღეს მოჯამაგირებს, რომლებიც მანამდე ღია მინ-
დორში ათევდნენ ღამეს; მოქალაქეებმა ყოველ უბანში შექმნეს მოდარაჯე
ჯგუფები და ბოქაულმაც საგუშაგო რაზმები გააძლიერა ქალაქის ჭიშკრებ-
თან. და მაინც, ყოველნაირი სიფრთხილე ფუჭი აღმოჩნდა. ორმაგი
მკვლელობიდან რამდენიმე დღის შემდეგ, კიდევ აღმოაჩინეს გამიშვლებული
და გაკრეჭილი გოგონას გვამი. ამჯერად საქმე ეხებოდა სარდინიელს –
ეპისკოპოსის სასახლის მრეცხავს, რომელიც ფონტენ-დე-ლა-ტუს შორი-
ახლო, ესე იგი, ლამის ზედ ქალაქის ჭიშკართან მოეკლათ. და თუმცა
აღზგნებული მოქალაქეების ზეწოლით ქალაქის საკრებულომ შემდგომი
მკაცრი ზომები მიიღო – საფუძვლიანი შემოწმება ჭიშკრებთან, დარაჯთა
რაოდენობის გაზრდა, სიბნელის დადგომის შემდეგ ქუჩაში გამოსვლის
აკრძალვა მდებრობითი სქესის ყველა ადამიანისათვის – იმ ზაფხულს კვირა
არ გასულა, სადმე ნორჩი ქალიშვილის გვამი არ აღმოეჩინათ. და ყველანი იმ
ასაკისანი იყვნენ, როცა გოგონას მხოლოდ დაწყებული აქვს ქალად გარ-
დაქცევა, და ყველანი შავგვრემანებს, ულამაზეს – ასე ვთქვათ, თვალ-

შისაცემ ქალების ამქარს განეკუთვნებოდნენ. თუმცა, მკვლელმა ადგილობრივ მაცხოვრებლებში ფართოდ გავრცელებული – ქერა, ოდნავ ჩასუქებული გოგონების ტიპაჟიც მალე გახადა თავისი ყურადღების ღირსად. იგი მათ ყველგან სწვდებოდა, არა მარტო გრასის მიდამოებში, არამედ შიგ ქალაქში და სახლებშიაც კი. ერთ-ერთი ღურგლის ქალიშვილი მთლად მესხეთე სართულზე, საკუთარ ოთახში აღმოაჩინეს მოკლული, და არავის მთელს სახლში არავითარი ხმაური არ გაუგონია, არც ერთს ძაღლთაგან, რომლებიც ჩვეულებრივ შორიდან ამჩნევდნენ და მთელი ხმით უყეფდნენ უცხოს, არც კი დაუწკმეტუნებია. მოუხელთებელ, უხორცო ავსულს წააგავდა მკვლელი...

აღმფთობებული ადამიანები ხელისუფლებას ლანძღავდნენ. უმცირესი ჭორიც კი მთელ შეხლამემოხლას იწვევდა. ერთი მოხეტიალე ვაჭარი, სიყვარულის სასმელითა და სხვა თაღლითური წამლებით რომ ვაჭრობდა, ბრბომ კინაღამ ჩაქოლა იმის გამო, მის ფხვნილებში ვითომდა ქალიშვილის დანაყული თმა იყო გარეული. ვიღაცა დავრდომილთა თავშესაფრისა და მარკიზ დე კაბრის სასახლის გადაწვას შეეცადა. მემაუღე მინარმა საკუთარ შეგირდს დანა ჩასცა ზურგში, რადგან ის საცოდავი ღამით ბრუნდებოდა შინ და პატრონმა გოგონების სახელგანთქმულ მკვლელად მიიჩნია. ყველა, ვისაც ამის საშუალება ჰქონდა, თავის ქალიშვილებს ნათესავებთან, ან პანსიონებში აგზავნიდა ნიცაში, ექსსა თუ მარსელში. პოლიციის თავი, ქალაქის საბჭოს მოთხოვნით, თანამდებობიდან გაათავისუფლეს. მისმა შემცვლელმა ექიმების კოლეგია მოიწვია, რათა გაკრეჭილი ლამაზმანების გვაშები გამოეკვლიათ მათი ვირგინალური მდგომარეობის დასადგენად. აღმოჩნდა, რომ ამ მხრივ ისინი სრულიად შეუბღალავნი იყვნენ!..

საოცარია, მაგრამ ამ ცნობამ კი არ მიანავლა, პირიქით, ცეცხლი შეუნთო მოსახლეობის ზაფრას, ვინაიდან გულის სიღრმეში თითოეული თვლიდა, რომ გოგონები გააუპატიურეს; ყოველ შემთხვევაში, დანაშაულის მოტივი მაინც იჩნებოდა ცხადი, ახლა კი არავის აღარაფერი ესმოდა, ახლა ყველანი სრულიად გაოგნებულნი იყვნენ. ის, ვისაც ღმერთი სწამდა, ლოცვაში პოულობდა შევას — იმ იმედით, ეშმაკეული ცღუნება მის სახლეულს მაინც ასცდებოდა. ქალაქის საბჭომ, გრასის ოცდაათმა უმდიდრესმა და უპატივცემულესმა ბურჟუამ და აზნაურმა, რომელთა უმეტესობა განათლებული, ე. ი. ანტიკლერიკალურად განწყობილი ბატონები გახლდნენ, მანამდე არავითარ ანგარიშს რომ არ უწევდნენ ეპისკოფოსს და სიამოვნებით გადააქცევდნენ მონასტრებსა თუ სააბატოებს ფაბრიკებად და საწყობებად — ეს ამაყი და გავლენიანი ბატონები იმდენად იყვნენ დათრგუნულნი, მონსენიორს თავმდაბლად არზა აახლეს — ეაჯებოდნენ, გოგონების მკვლელი ეკლესიიდან მოეკვითა და ანათემას გადაეცა, ისევე როგორც ეს მისმა უნეტარესმა წინამორბედმა მოიმოქმედა 1708 წელს, როდესაც ქალაქს საშინელი უბედურება — კალიების შემოსევა დაატყდა თავს. თხოვნა შეწყნარებულ იქნა და გრასელი გოგონების მკვლელი, რომელმაც ოცდაოთხი ულამაზესი ასული შეიწირა, მათი სოციალური ფენისადმი მიკუთვნებულობის განურჩევლად, საჯაროდ გადაეცა ანათემას და მოიკვითა დედა-ეკლესიისაგან. განჩინების ტექსტი ყველა დიდ-პატარა ეკლესიისა თუ სალოცავის კარს მიაკრეს და

ყოველი ამბიონიდან გამოაცხადეს, მათ შორის ნორტ-დამ-დიუ-პიუს ამბიონიდანაც კი, საიდანაც იგი თავად ეპისკოფოსმა წარსთქვა საზეიმოდ.

შედგე პირდაპირ განსაცვიფრებელი აღმოჩნდა: მკვლევლები იმავე კვირიდან შეწყდა. ოქტომბერმა და ნოემბერმა ისე ჩაიარა, უბედურება არაფერი მომხდარა. დეკემბრის დასაწყისში კი გრენობლიდან ამბავმა ჩამოაღწია, რომ იქ ბოლო ხანებში გოგნების მკვლელი გამოჩნდა, რომელიც გუდავს მსხვერპლს, ტანზე კაბებს ახევს და თმას დაღალ-დაღალ აგლეჯს თავიდანო; და თუმც კი ეს უღაზათო დანაშაულობები არაფრით ჰგავდა გრასში ჩადენილ, ფაქიზად შესრულებულ მკვლევლებს, ყველამ მაშინვე ირწმუნა — ერთსა და იმავე ბოროტმოქმედზე იყო ლაპარაკი. გრასის მაცხოვრებლებმა სამგზის შევებით გადაიწერეს პირჯვარი: ახლა ხომ ეს გადაგვარებული გრენობლის სანახებში მხეცობდა და არა მათთან, იქამდე კი მთელი შვიდი დღის სავალია! ეპისკოფოსის პატივსაცემად ჩირადდნებიანი მსვლელობა მოაწყვეს, ხოლო 24 დეკემბერს დიდი სამადლობელო წირვაც გადაიხადეს. 1766 წლის 1 იანვრიდან თოფოსანთა გაძლიერებული საპატრულო რაზმები საერთოდ მოიხსნა და ქალებსაც სადამობით შინიდან გასვლის ნება დაერთო. საზოგადოებრივი თუ კერძო ურთიერთობები სასწაული სისწრაფით დაუბრუნდა ჩვეულ კალაპოტს. შიში თითქოსდა ქარმა წაიღო, სიტყვას აღარავინ ძრავდა იმ თავზარზე, სულ რამდენიმე თვის წინ რომ მეფობდა ქალაქსა და მის შემოგარენში. დაღუპულთა ოჯახებშიც ამაზე ტაბუ ჰქონდათ დადებული. ეპისკოფოსის გამოცხადებულმა ანათემამ არა მარტო მკვლელი, მასზე ყოველგვარი მოგონებაც კი გააზევა თითქოს. ხალხსაც სწორედ ეს სჭირდებოდა.

და მხოლოდ ის, ვისაც მომხიბლავი სიყმაწვილის ასაკში შემავალი ქალიშვილი ჰყავდა, ცდილობდა უყურადღებოდ არ დაეტოვებინა გოგონა, შიში იპყრობდა ბინდის დადგომისას, და ბედნიერი იყო დილაობით, როდესაც მას ცოცხალსა და ჯანმრთელს ხედავდა — ოღონდაც, რა თქმა უნდა, საკუთარ თავსაც კი არ უტყდებოდა, თუ რის გამო.

41

თუმცა ერთი კაცი მაინც იყო გრასში, ვინაც ამგვარად დამყარებულ მშვიდობას არ ენდობოდა. ანტუან რიში ერქვა, მეორე კონსულის თანამდებობა ეკავა და ქალაქში საკუთარი სახლკარი ჰქონდა, დრუატის ქუჩის ზედ თავში.

რიში ორმოცს მიტანებული ქვრივი გახლდათ, და თუმც შესაშური ჯანმრთელობით ვერ დაიკვეხნიდა, ხელახლა დაქორწინებას მაინც არ ჩქარობდა. ჯერ ქალიშვილის — ლაურას გათხოვება სურდა; და არა პირველ შემხვედრზე, რაღა თქმა უნდა, არამედ მარტოოდენ ღირსეული წარმოშობის პირზე. ჰყავდა კიდევაც დაგულებული ვინმე ბარონი დე ბოიონი, რომელიც, ვაჟიშვილთან ერთად, ადგილ-მამულს ფლობდა ვანსის შორიახლო; თავად ბარონი, მართალია, მშვენიერი რეპუტაციით სარგებლობდა, მაგრამ ქონე-

ბრივი მდგომარეობა შერყეული ჰქონდა და რიშის უკვე დასტურიც მიეღო მათი შვილების შეუღლების თაობაზე. აი, როდესაც ლაურა საიმედოდ იქნება მოწყობილი, მაშინ ანტუან რიშიც გაშლის თავის სასასიძოვო საცეცებს რომელიმე ღირსეულ ოჯახში – დ'ორეს საგვარეულო იქნება ეს, მობერთა თუ ფონმიშელთა ჩამომავლების – არა იმიტომ, თითქოსდა მეტიხმეტად პატივმოყვარე იყოს და მაინცა და მაინც არისტოკრატი მეუღლე სურს საწოლში, არამედ იმისა გამო, დინასტია დაამკვიდროს და თავისი შთამომავლობა იმ გზით წარმართოს, მაღალი საზოგადოებრივი მდგომარეობისა და პოლიტიკური გავლენის ბჭესთან რომ მიიყვანს მათ. ამისათვის კი სულ ცოტა, ორი ვაჟიშვილი მაინც სჭირდებოდა, რომელთაგან ერთი საკუთრივ მას ჩაუდგებოდა კვალში, მეორე – იურიდიულ სარბიელზე მოიპოვებდა წარმატებას, ექსის პარლამენტში დაიმკვიდრებდა სკამს და ამ გზით გააღწევდა მაღალ თავადაზნაურულ წოდებაში. ოღონდაც მსგავს ამბიციებს მხოლოდ იმ პირობით ექნებოდა გასავალი, თუ თავის პიროვნებასა და თავის გვარს ახლავე მჭიდროდ გადააწნავდა პროვანსელ დიდებულთა წრეს...

ყველა ეს შორს გამიზნული გეგმები იმით იყო გამართლებული, რომ ბ-ნი რიში, შეიძლება ითქვას, ზღაპრულად მდიდარი გახლდათ, ოლქის ნებისმიერ სხვა ბურჟუაზე გაცილებით მდიდარი: მას არა მარტო გრასის გარშემო ჰქონდა მამულები, სადაც ფორთოხალი, მზესუმზირა, ხორბალი და შვრია მოჰყავდა, არამედ ვანსთანაც და ანტიბოსთან, სადაც იჯარით იღებდა მიწებს; თავისი წილი შემოსავალი შემოსდიოდა გემებიდან, ინდოეთს რომ დაცურავდნენ, ფლობდა სახლებს ექსში, მუდმივი კანტორას გენუაში და რომატიული ნივთიერებების, სანელებლების, ზეთებისა და ტყავეულის ყველაზე მსხვილ საწყობს მთელს საფრანგეთში.

და მაინც, ბ-ნი რიშის ჭეშმარიტ ფასეულობას მისი ერთადერთი ქალიშვილი წარმოადგენდა, მისი ერთადერთი შვილი, ზუსტად თექვსმეტი წლისა, ჟღალთმიანი, მწვანეთვალეა... სახე იმდენად წარმტაცი ჰქონდა, ნებისმიერი სქესისა და ასაკის მნახველი ადგილზე შეშდებოდა და თვალს ვედარ წყვეტდა ხოლმე. ხალხი ისე ელამუნებოდნენ მზერით, როგორც ბავშვები ლოკავენ ნაყინს, და სახეზე შესაბამისი ქმედებისათვის სანიშნო, ბრიყვეულყურადღებანი გამომეტყველება უჩნდებოდათ. თავად რიშიც კი, საკუთარი გოგონას შემყურე, რამოდენიმე ხნით – მეოთხედი საათით, შესაძლოა ნახევარი საათითაც კი – ივიწყებდა ყველა საქვეყნო საქმეს, რაც მას ისე აროდეს, ძილშიაც კი არ მოსდიოდა; სრულად ეფლობოდა ღვთაებრივი ქალიშვილის თვალთვრებაში და გამოფხიზლებული, ვერც კი გეტყობდათ, თუ რითი იყო, კაცმა რომ თქვას, ასე დაკავებული. ეს ერთი ხანია – რიში სინანულით უტყდებოდა თავს – როდესაც დასაძინებლად აწვენდა, ან დილაობით, მის გასადვილებლად რომ შედიოდა, ხოლო გოგონა მძინარე იწვა, თითქოს უფალმა ნანინა უმღერაო, და დამის სამოსის ნაკეცებში მისი თეძოებისა და მკერდის ხაზები ილანდებოდა, და დამის პერანგის ამონაჭრებიდან – კისერთან, იღლიის რკალიდან, იდაყვების ღრმულებიდან, გლუვი ხელის მტევინიდან, რომელზეც მისი სახე ესვენა, მისი წყნარი და თბილი სუნთქვა მოედინებოდა – რაღაც საბრალოდ ეკუთმებოდა მკერდში, ყელში უჭერდა და ნერწყვის გადაყლაპვას აიძულებდა, და – ღმერთო სახიერო – თავს იწყევლიდა, რომ ამ ქალს მამად ეკუთვნის,

რომ ის არ არის ვინმე უცხო, გარეშე მამაკაცი, რომლის წინაშეც ქალი ისე იწვებოდა, როგორც ახლა წევს მის წინ, და შეეძლებოდა მასთან დაწოლა, მასზე და მასში, ფლობის წყურვილით... და ცივი ოფლი ასხამდა, და მთელი სხეულით თრთოდა, ახშობდა თავში ამ შემზარავ აზრს და მისკენ იხრებოდა, რათა სათუთი მამობრივი ამბორით გაეღვიძებინა.

ჯერ კიდევ გასულ წელს, მკვლევლობების ხანაში, სრულიადაც არ განიცდიდა მსგავს უკუღმართ დუდილს. ჯადოსნური ძალაუფლება, რომელიც იმ დროს მის ქალიშვილს გააჩნდა მასზე – ყოველ შემთხვევაში, ასე მიაჩნდა – ჯერ კიდევ მის ბავშვურობის ჯადო იყო, და ამიტომაც არასოდეს გასჩენია შიში, რომ ლაურაც შეიძლებოდა მსხვერპლი გამხდარიყო – ის ზომ არც ბავშვებსა და არც ქალებს თავს არ ესხმოდა, მხოლოდღა წამოზრდილ, ოღონდაც ქალწულობადაუკარგავ ქალიშვილებს... და მაინც, ბატონმა რიშიმ გააძლიერა სახლის დაცვა, ბრძანება გასცა, ზედა ფანჯრებზე ახალი გისოსები დაეყენებინათ და მოახლეს დაავალა, ლაურას ოთახში ეთია ღამე. ის აზრი კიდევ, რომ ლაურა ქალაქიდან გაემგზავრებინა, როგორც თავისი ქალიშვილები და მთელი ოჯახებიც კი გახიზნეს მისი წოდების ხალხმა, ყოვლად მიუღებლად ეჩვენებოდა. სამარცხვინოდ მიაჩნდა მსგავსი ქმედება ქალაქის საბჭოს წევრისა და მეორე კონსულისაგან, ვინც, მისი აზრით, ვალდებული იყო თავშეკავების, ვაჟკაცობისა და უდრეკობის მაგალითი მიეცა თანამოქალაქეებისათვის. გარდა ამისა, ვერც ვერავინ გაუბედავს თავისი გადაწყვეტილება მოახვიოს თავს – ვერც დაზაფრული ბრბო და ვერც ვიღაც ნაძირალა მკვლელი! და მთელი ამ დროის განმავლობაში, ერთ-ერთი იყო იმ მცირეთაგან, ვინც არ მიეცა შიშის ციებ-ცხელებას და ნათელი გონებაც შეინარჩუნა. ახლა კი ყველაფერი უცნაურად შემოტრიალდა: იმ დროს, როდესაც ქუჩებში – თითქოს მკვლელი უკვე ჩამოახრჩვესო – ხალხი ზეიმობდა და თითქმის დაივიწყეს კიდევ ის უკეთური დრო – ანტუნ რიშის გულში, როგორც რამ საზიზღარი სამსალა, შიში შეიპარა. დასაწყისისათვის, არაფრით არ უნდოდა დაეშვა აზრი, რომ სწორედ შიშმა აიძულა გადაედო დიდი ხნის წინ განზრახული საქმიანი მივლინებები, იშვიათად გასულიყო ქალაქში, შეემოკლებინა ვიზიტები და თათბირები, რათა სწრაფად დაბრუნებულიყო შინ. დიდი ხნის განმავლობაში იმართლებდა თავს უდროობისა და გადაღლის მომიზეზებით, მაგრამ ბოლოს იძულებული გახდა ეღიარებინა, რომ რამდენადმე შეფიქრიანებულია, როგორც იქნებოდა მის ადგილას ყველა მამა, ვისაც გასათხოვარი ქალიშვილი ჰყავს – ასეთი მზრუნველობა და წუხილი ხომ ცხოვრებისეული ყოველდღიურობაა მათთვის... განა მთელ დუნიას არ მოედო მისი ასულის საარაკო მშვენიერების ამბავი? განა არ იგრძელებენ კისრებს, კვირაობით მასთან ერთად ეკლესიაში რომ შეაბიჯებს ზოლმე? განა რამდენიმე ღირსპატივისცემმა გვამმა ქალაქის საბჭოდან, არ გადაუკრა უკვე სიტყვა თავის, ან თავისი ვაჟიშვილის შესაძლებელი დაწინდვის თაობაზე?..

მაგრამ ერთხელაც რიში სასტუმრო ოთახში იჯდა და შეკყურებდა, როგორ გავიდა ლაურა ბაღში. ლურჯი კაბა ეცვა, და ამ ლურჯ ფონზე ჩამოშლილი ჟღალი თმა უბზინავდა. არასოდეს ენახა ის ამდენად ლამაზი. გოგონა ბუჩქის ცოცხალ თეჯირს მიეფარა და იქიდან ორი გულისცემით უფრო გვიან გამოჩნდა, ვიდრე მოელოდა და ზაფრამ შეიპყრო, რადგან გულის ამ ორი ფეთქვის განმავლობაშიც მოასწრო იმის გაფიქრება, ვაითუ სამუდამოდ დაკარგა შვილი.

იმავე დამით მძიმე სიზმარმა გამოაღვიძა; შინაარსი კი ვერ გაიხსენა, ახსოვდა მხოლოდ, რომ ლაურას თავს რაღაც ხდებოდა და შლეგივით გავარდა მისი ოთახისაკენ, დარწმუნებული, რომ მკვდარს ნახავდა საწოლში, მოკლულს, შეურაცხყოფილსა და გაკრეჭილს, მაგრამ, მადლობა უფალს, უენებელი დახვდა.

ოფლში გაწურული, აღგზნებისაგან კანკალატანილი დაბრუნდა თავის ოთახში. არა, არა აღგზნებისაგან, არამედ შიშისაგან აკანკალებული, მხოლოდ ახლა გამოუტყდა ამაში თავს და ამიტომაც დამშვიდდა და თითქოს გონება გაუნათდა. სიმართლე ითქვას, ეპისკოფოსის ანათემის ზემოქმედებისა მას თავიდანვე არა სჯეროდა; არ სჯეროდა იმისაც, რომ მკვლეელი ახლა გრენობლში მოქმედებდა; და არც იმის, რომ მან საერთოდ დატოვა ქალაქი. არა, ის ჯერ კიდევ აქ იყო, გრასის მაცხოვრებელთა შორის, და როდისმე ისევ გამოიღებდა ხელს... რიშიმ რამდენიმე მოკლული ნახა აგვისტოსა და სექტემბერში. ნანახმა შეაძრწუნა, მაგრამ უნდა ვადიაროთ, რაღაცნაირად აღაფრთოვანა კიდევ, რადგან ყველა მათგანი და თითოეული თავისებურად, უადრესად დახვეწილი სილამაზით გამოირჩეოდა. თავად ვერასოდეს იფიქრებდა, რომ გრასში ამდენი შეუფასებელი სილამაზეა და, სწორედ მკვლელმა აუხილა ამაზე თვალი. საუცხოო გემოვნებით გამოირჩეოდა, ღმერთმანი, და რაღაც სისტემით მოქმედებდა: გარდა იმისა, რომ ყველა მკვლევლობა ერთნაირად უზადოდ იყო შესრულებული, თავად ზვარაკის შერჩევაც ლამის მათემატიკურ გაანგარიშებაზე მეტყველებდა. მართალია, რიშიმ არ უწყოდა, რას ითხოვდა მკვლეელი თავის მსხვერპლთაგან, რადგან მთავარი სიმდიდრე – სილამაზე და სიყმაწვილის მომხიბვლელობა – მათ ხომ ვერ მოსტაცა... თუ მოსტაცა? ყოველ შემთხვევაში, რამდენად უაზროდაც უნდა ჟღერდეს ეს, ამ მკვლევლობების მიზანი ყაირათიანი კოლექციონირებაა და არა განადგურება. “თუ, დაუშვავთ, – მსჯელობდა რიში – წარმოვიდგენთ ყველა მსხვერპლს არა როგორც ცალკეულ ინდივიდს, არამედ როგორც ნაწილს ზოგადი ამაღლებული პრინციპისა, და ერთიან მთლიანობად გავიაზრებთ მათ მკვეთრად განსხვავებულ თვისებებს, მაშინ მსგავსი მოზაიკისაგან შექმნილი სურათი ზოგადად სილამაზის ხატი გახდება და მისგან მომდინარე ჯადოქრობა არა ადამიანური, არამედ ღვთიური ძალაუფლების ნიშნით იქნება დაღდასმული!” (როგორც ხედავთ, ბ-ნი რიში ფრიად განსწავლული და მოაზროვნე ადამიანი გახლდათ, არც მკრეხელურ აზრებს უფრთხოდა და მიუხედავად იმისა, რომ არა ყნოსვითი, არამედ ოპტიკური კატეგორიებით სჯიდა, მაინც ახლოს იყო ჭეშმარიტებასთან).

“დავუშვათ და, – თავისას განაგრძობდა იგი, – მკვლელი სწორედ ასეთი სილამაზის კოლექციონერია და სრულყოფის პორტრეტს ქმნის, თუნდაც ეს მისი ავადმყოფი ტვინის ფანტაზია იყოს; დავუშვათ შემდგომ, რომ ნატიფი გემოვნებისა და წვრილმანებამდე მეთოდური ადამიანია – მაშინ შეუძლებელია ვიფიქროთ, თითქოს ის უარს იტყოდეს უძვირფასეს დეტალზე ამ პორტრეტისათვის, ანუ ლაურას სილამაზეზე... მკვლელობების მთელი ეს პირამიდაც არაფრად ეღირობა მის გარეშე. სწორედ ისაა ის ქვა, შენობა რომ უნდა დააგვირგვინოს!..”

ეს შემაძრწუნებელი დასკვნა რიშიმ, საწოლზე მჯდომარემ, თავზე ჩაჩწამოკოსებულმა გამოიტანა და თავადვე განცვიფრებული დარჩა საკუთარი გონების სიმშვიდითა და აუძღვრეველობით. აღარც შეციებისაგან აკანკალებულა. ის გაურკვეველი შიშში, რამდენიმე კვირა რომ აწვალებდა, გაქრა და კონკრეტული საფრთხის შეგრძნებას დაუთმო ადგილი. მკვლელის ჩანაფიქრი, აშკარა გახდა, თავიდანვე ლაურასაკენ იყო მიმართული, ხოლო ყველა დანარჩენი მკვლელობა მხოლოდღა ფონი იყო ამ ბოლო, დამავირგვინებელი pointe-სათვის. მართალია, გამოცანად რჩებოდა — რა მატერიალური გამორჩენა ახლდა თან ამ მკვლელობებს და, საერთოდ, თუ ჰქონდათ რაიმე მიზანი, მაგრამ მთავარი რომ მკვლელის სისტემური მეთოდი და მისი იდეალისაკენ მისწრაფება იყო, რიშიმ მაინც სწორად ამოიცნო. რაც უფრო დიდხანს ფიქრობდა ამაზე, მით უფრო იხიბლებოდა ერთითაც და მეორეთიც, და მით უფრო მეტ პატივისცემას გრძნობდა მკვლელისადმი — თუმცა, ასეთი პატივისცემა სარკესავით ირეკლავდა მის საკუთარი თავისადმი დამოკიდებულებას: სხვებისაგან განსხვავებით, მან, რიშიმ, თავისი მახვილი გონების საშუალებით მოახერხა მკვლელის ჩანაფიქრში გარკვევა!

თავად რომ ყოფილიყო იმავე პარანოიკული იდეებით შეპყრობილი, ისიც ასევე, ბოლო ბანქოზე დადებდა ყოველივეს, რათა თავისი ეს უგუნური, შემადრწუნებელი წამოწყება სწორედ ასე, ლაურას მკვლელობით დაეგვირგვინებინა...

ეს ბოლო აზრი რიშის განსაკუთრებით მოეწონა. რაკილა მოახერხა, თავისი ქალიშვილის შესაძლო მკვლელის ადგილას დაეყენებინა თავი, ეს უკვე არსებით უპირატესობას ანიჭებდა მასთან შედარებით: მკვლელი ხომ, მთელი თავისი საზრიანობის მიუხედავად, რაღა თქმა უნდა, ვერ შეძლებდა საკუთარი თავის რიშის ადგილზე დაყენებას — თუნდაც იმიტომ, რომ ვერ ივარაუდებდა რიშის მიერ მის ადგილზე — მკვლელის ადგილზე თავის დაყენებას... ფაქტიურად, აქაც ყველაფერი ისევე იყო, როგორც საქმოსნობაში — *mutatis mutandis* . რაკი კონკურენტის ჩანაფიქრი გამოიცანი, უპირატესობა უკვე შენს მხარეზეა; მით უმეტეს, თუ ანტუან რიში გქვია და კონკურენტებთან დათმობას ჩვეული არა ხარ. სწორედ მას, ანტუან რიშის ეკუთვნის ნელსაცხებლებით უმსხვილესი ვაჭრობა საფრანგეთში, და არც სიმდიდრე, არც

* შესაბამისი სახესხვაობით (ლათ.)

მეორე კონსულის თანამდებობა ზეციდან არ დასცემია – ყოველივე თავისი სიბეჯითითა და მოხერხებით მოიპოვა. დროზე გრძნობდა ყოველგვარ ხიფათს, ზუსტად ხვდებოდა კონკურენტების გეგმებს და გზაკვალს უბნედა მოწინააღმდეგეებს... და თავის სამომავლო მიზნებს – ძალაუფლებასა და აზნაურის ტიტულს შთამომავლობისათვის – ზუსტად ასევე მიაღწევს; და ზუსტად ასევე გადახაზავს ამ თავისი ახალი კონკურენტის – მკვლელის გეგმებს ლაურას ფლობისათვის ბრძოლაში, თუნდაც იმიტომ, რომ ლაურა მისი – რიშის გეგმების გვირგვინია. თქმა არ უნდა, მას უყვარს ლაურა, მაგრამ სჭირდება კიდევ... ხოლო იმას, რაც მას სჭირდებოდა საკუთარი პატივმოყვარეობის განსახორციელებლად, რიში არასოდეს არავის უთმობდა, კბილებით ებლაუჭებოდა მუდამ!..

გულზე მოეშვა. ახლა, რაკილა დემონთან ბრძოლის შესახებ თავისი დამეული ზმანებები უბრალო საქმიანი კონფლიქტის დონეზე დაიყვანა, იგრძნო — ნელ-ნელა აზარტმა შეიპყრო. აორთქლდა შიშის უკანასკნელი ნარჩენები, გაქრა შემბოროკავი მზრუნველობისა და უგუნებობის შეგრძნება, გაიფანტა პირქუში წინათგრძნობების ნისლი, რომელშიც რამდენიმე კვირის განმავლობაში ხელის ცეცებით ეძებდა ბილიკს. ახლა რიში ნაცნობ ტერიტორიაზე იყო და მზად გახლდათ ნებისმიერი გამოწვევა მიეღო.

43.

როგორც კი ესეგვარი შვევა იგრძნო, რიში საწოლიდან ჩამოხტა, ზარის ზონარს რამდენჯერმე ჩამოქაჩა და ნამძინარევე მსახურს, ფეხზე რომ ძლივს იდგა, სამოსელისა და საგზლის ჩალაგება უბრძანა — ვინაიდან, თავისი ქალი-იშვილის თანხლებით, გრენობოლს გამგზავრება გადაეწყვიტა. თავადაც ჩაიცვა და შინამოსამსახურეებიც საწოლებიდან წამოყარა.

მალე სამზარეულოში კერიები აბრიალდა, აღვზნებული მოახლეები გასასვლელებში მიმორბოდნენ, ზემოთ-ქვემოთ დაქროდა ბატონის პირისფარეში, სარდაფებში მეკუჭნავის გასაღებები ჩხარუნობდა, ეზოში ჩირადღნები დაინთო, მეჯინიბეებს ცხენები გამოჰყავდათ თავლებიდან, სხვები ჯორებს ექაჩებოდნენ საჯინიბოებიდან, ლაგამს არგებდნენ, კაზმავენდენ, ტვირთავდნენ, — ისეთი შთაბეჭდილება იქმნებოდა, თითქოს ქალაქს — როგორც 1746 წელს — ავსტრო-სარდინიელთა გაერთიანებული ურდო უტევეს და სახლის პატრონი გასაქცევად ემზადებო. თუმცა, თავად პატრონი, საფრანგეთის მარშალივით — მშვიდად და ამაყად — საწერ მაგიდას მისჯდომოდა თავის კანტორაში, რძიან ყავას მიირთმევდა და ბრძანებებს ურიგებდა თავის ქანცგაწყვეტილ მსახურთ. იმავდროულად, წერილებს სწერდა მერსა და პირველ კონსულს, თავის ნოტარიუსს, თავის ადვოკატს, თავის ბანკირს მარსელში, ბარონ დე ბოიონსა და თავის ათას სხვა საქმიან პარტნიორს.

დილის ექვსი საათისათვის კორესპონდენცია დააგზავნა, მისი გეგმებისათვის აუცილებელი ყველა განკარგულებაც გასცა, წელში გაირჭო ორი დამბაჩა, ფულთი გაძეძგილ ქამარზე ბალთა შემოიჭირა და საწერი მაგიდის საიდუმლო უჯრა ორგზის გადარაზა... მერეღა გაემართა ქალიშვილის გასალვიმებლად.

დილის რვა საათზე პატარა ქარავანი უკვე გზას ადგა. წინ ამხედრებული რიში მიუძღოდათ, ოქროს სირმებით გაწყობილ, ღვინომუქ კამზოლში გამოკვართული, ინგლისური ყაიდის შავ ლაბადა და ბუმბულით კაღნიერად შემკული, ასევე შავი, ფართოფარფლიან ქუდი მხარიღლივ მოეგდო დარდიმანდულად. მას ქალიშვილი მოჰყვებოდა, შედარებით მოკრძალებულად ჩაცმულ-დახურული, მაგრამ ისეთი დამაბრძავებლად ლამაზი, რომ ხალხი, ქუჩაში მდგომი თუ ფანჯრებს მომდგარი, თვალს ვერ სწყვეტდა; ბრბოში ერთთავად აჰ! და ოჰ! გაისმოდა და მამაკაცები ქუდებს იშვლევდნენ, ვითომდა მეორე კონსულის, სინამდვილეში კი ამ დედოფალივით წარმოსაჩენი გოგონას წინაშე. ლაურას მიჰყვებოდა მოახლე, შემდეგ რიშის მსახური, ორი დატვირთული ცხენით – გრენობლის შარავანის ცუდი მდგომარეობის გამო, ეტლის გამოყენება გამორიცხული იყო, – და ქარავანს აბოლოვებდა ორი მხლებლის მეთვალყურეობით მომავალი, ყოველგვარი საქონელით დატვირთული ათიოდე ჯორი. დიუკურის კარიბჭესთან გუშაგებმა მხოლოდ მაშინ დაუშვეს თოფები და განაგრძეს მეთვალყურეობა, როდესაც უკანასკნელი ჯორი გავიდა ქალაქიდან. ბავშვები კიდევ საკმაო ხანს მისდევდნენ პროცესიას და ხელს უქნევდნენ ქარავანს, ნელ-ნელა რომ მიიკლაკნებოდა ციცაბო, მიხვეულ-მოხვეულ გზაზე.

ანტუან რიშისა და მისი შვილის გამგზავრებამ ხალხზე ფრიად დიდი შთაბეჭდილება მოახდინა. ეჩვენებოდათ, თითქოსდა მსხვერპლშეწირვის რომელიღაც ძირძველ ცერემონიას ესწრებოდნენ. გარშემო მხოლოდ იმაზე იყო ლაპარაკი, რიში გრენობლს მიემგზავრება, სადაც უკანასკნელ ხანს გოგონების მკვლელი მონსტრი საქმიანობსო. არავინ იცოდა, რა ეფიქრათ, რითი აეხსნათ რიშის საქციელი – როგორც საძრახისი ფუქსავატობა, თუ როგორც აღფრთოვანების ღირსი ვაჟკაცობა... ან იქნებ, ღმერთებისათვის გულის მოღობობის მცდელობა? მხოლოდ ეგ იყო, რაღაც ბუნდოვანი წინათგრძნობა კი ჰქონდათ, ამ ჟღალთმიან უმშვენიერეს გოგონას უკანასკნელად ხედავდნენ, თითქოს წინასწარ გრძნობდნენ ლაურა რიშის აღსასრულს...

და ეს წინათგრძნობა ახლა კიდევ, იმის მიუხედავად, რომ სრულიად ყალბ წინამძღვრებს ესაძირკვლებოდა. საქმე ისაა, რიში სულაც არ გამგზავრებულა გრენობლს. მთელი ეს პომპეზური მსვლელობა სხვა არა იყო რა, თუ არა ეშმაკური ფანდი. ერთნახევარ მილზე, გრასიდან ჩრდილო-აღმოსავლეთით, სოფელ სენ-ვალეს შორიახლოს შეჩერება ბრძანა, თავისი მსახური უფლებამოსილებითა და შესაბამისი წერილით აღჭურვა და ჯორების ქარავანი გრენობლს გაუყენა, თანმხლები პირებითურთ.

თავად კონსულმა, ლაურასთან და მის მოახლესთან ერთად, კაბრისკენ გადაუხვია, სადაც სადილისათვის პატარა შესვენება მოაწყო და შემდეგ —

ტანერონის მთიანი უღელტეხილის გავლით — სამხრეთისაკენ გაემართა. ეს გზა მეტიხმეტად მძიმე იყო, მაგრამ საშუალებას იძლეოდა გრასისა და მთელი დაბლობისათვის ფართო ნახევარწრით შემოეცლოთ დასავლეთის მხრით, საღამოს პირზე კი სანაპიროსათვის მიეღწიათ. რიშის დაგეგმილი ჰქონდა, მომდევნო დღესვე გადასულიყო ლერენის კუნძულებზე, სადაც სენ-ონორეს კარგად გამაგრებული მონასტერი ეგულებოდა. მონასტრის მეურნეობას ერთი მუჭა ბერები უძღვებოდნენ, რომლებსაც, ჭარმაგი ასაკის მიუხედავად, ძალიანაც კარგად შეეძლოთ საკუთარი თავისა და მონასტრის დაცვა. რიში იცნობდა მათ, ვინაიდან დიდი ხნის განმავლობაში ყიდულობდა და ასაღებდა მონასტრის მთელ ხელნაწარმსა თუ მოსავალს: ევკალიპტის ლიქიორს, პინიის თესლსა და კვიპაროსის ზეთს. სწორედ იქ, სენ-ონორეს მონასტერში, რომელიც იფის ციხე-სიმაგრესა და სენ-მარგერიტის კუნძულზე მდებარე სახელმწიფო ციხესთან ერთად, პროვანსის ყველაზე საიმედო ადგილად ითვლებოდა, აპირებდა რიში თავისი ქალიშვილის შეფარებას. თავად კი დაუყოვნებლივ დაბრუნდება სანაპიროზე, ამჯერად აღმოსავლეთიდან შემოუვლის გრასს ანტიბისა და კანის გავლით, რათა იქიდან ვანსში გადავიდეს. უკვე დაიბარა კიდევ იქ თავისი ნოტარიუსი, რათა ბარონ დე ბოიონთან მათი შვილების — ლაურასა და ალფონსის ქორწინებაზე შეთანხმებას მოაწერონ ხელი. სურდა ისეთი წინადადება მიეცა ბოიონისათვის, რაზედაც ეს უკანასკნელი უარს ვერ იტყვოდა: ბარონის ვალების გადახდა — 40 000 ლივრი, ამავე თანხის მზითვი, მიწის რამდენიმე ნაკვეთი და კარაქის სადღვეები საწარმო მაგანოსთან, ყოველწლიური რენტა 3.000 ლივრის ოდენობით — ახალგაზრდა წყვილისათვის... რიშის ერთადერთი წინაპირობა ის გახლდათ, რომ კონტრაქტი ათი დღის შემდეგ შესულიყო ძალაში და ახალგაზრდები ქორწინებისთანავე ვანსში გადასახლებულიყვნენ.

რიშის მშვენივრად ესმოდა, რომ ასეთი აჩქარება არათანშეზომილად გაზრდიდა მისი ოჯახის დამოყვრების საფასურს ამ ბოიონებთან. დაყოვნების დრო რომ ჰქონოდა, გაცილებით ნაკლებს გადაიხდიდა — მაშინ თავად ბარონს მოუწევდა გამოეთხოვა თანხმობა მდიდარი ვაჭრისაგან: ლაურას მშვენიერების ქება ისევე სწრაფად ვრცელდებოდა, როგორც იზრდებოდა რიშის სიმიდირე, ხოლო ამასობაში ბოიონები, შესაძლოა, სრულიად გალატაკებულიყვნენ კიდევ... მაგრამ იყოს ასე — მისი მოწინააღმდეგე მაინც ის უცნობი მკვლელია და არა ბარონი! აი, ვისთვის უნდა ჩაეშალა გეგმები. გათხოვილი, ქალწულობადაკარგული და შესაძლოა, ორსული ქალი, უკვე ვერაფრით მოთავსდებოდა მის გალერეაში; შეუვსებელი დარჩება მოზაიკის უკანასკნელი უჯრები, ლაურა ყოველგვარ ფასს დაკარგავს მკვლელის თვალში და მისი წამოწყებაც საპნიც ბუშტივით გასკდება! და მან უცილობლად უნდა იგრძნოს დამარცხების მთელი სიმწარე — რიშის გრასში სურდა ქორწილის გადახდა, სრული ზეიმურობითა და მთელი პატიოსანი საზოგადოების თანდასწრებით. დაე, ნურც იცნობს და ვერც ვერასოდეს გაიცნობს თავის მოწინააღმდეგეს, მაინც მეტად საამო იქნება იმის შეგრძნება, რომ იგი ესწრება ზარ-ზეიმს და საკუთარი თვალთ უმზერს, თუ ცხვირწინ როგორ აცლიან სასურველ ნადავლს!..

გეგმა წვრილად იყო გათვლილი. ჩვენ ისევ და ისევ გაკვირვებას უნდა ვიყოთ ბატონ რიშის ალღოს გამოიხიბებით – ლაურა რიშის ქორწინება ბარონ დე ბოიონის ვაჟიშვილზე, ჭეშმარიტად ნიშნავდა გრასელი გოგონების მკვლელის სრულ მარცხს. ოღონდაც გეგმა ჯერ არ იყო სისრულეში მოყვანილი – რიშის ჯერ არ გადაეძალა ლაურა, ჯერ არ შეეფარებინა სენ-ონორეს მონასტრის საიმედო თავშესაფარში. სამი მხედარი ჯერ კიდევ მიიკვლევს გზას ტენერონის არასტუმართმოყვარე უღელტეხილზე; ხანდახან გზა ისეთი საძნელო ხდება, მხედრები იძულებულნი არიან ჩამოქვეითდნენ. სულ უფრო ნელა მიიწევიან წინ. იმედი კი აქვთ, რომ სადამოსათვის ლა-ნაპულის მიაღწევენ, ერთ პატარა სოფელს კანის შორიახლოს, სანაპიროსთან.

44.

იმ წუთებში, როდესაც ლაურა რიში მამასთან ერთად გრასს ტოვებდა, გრენუი ქალაქის მეორე ბოლოში, არწულფის სახელოსნოსათვის ნარგიზის ყვავილის მაცერაციით გახლდათ დაკავებული. მართო იყო და მშვენიერ ხასიათზე: გრასში ყოფნის მისი ვადა იწურებოდა. წინ ტრიუმფის დღე ელოდა – ყუთებში ჩაწყობილი, ბამბით შეფუთული ოცდაოთხი მინიატურული ფლაკონი იდო მის ქოხში, ოცდაათი უმანკო ქალიშვილის მიერ გადმოდერილი სურნელის იმ წვეთებით, რომლებიც გრენუიმ წინა წელს მიიღო სხეულების ცივი ანფლერაჟის, თმისა და სამოსის დიგერირების, ლაგაჟისა და გამობნის გზით. ხოლო ოცდამეხუთეს – უსაუცხოეს, უმნიშვნელოვანეს ესენციას – დღეს მოიპოვებს. უკვე ქვაბიც მზადა აქვს, მრავალჯერად განწმენდილი ქონით, უთხელესი ტილოს ზეწარიცა და უსუფთავესი სპირტიც ამ, ბოლო კი არა, უკანასკნელი ნადავლისათვის. ადგილიც დაზვერილი ჰქონდა. სახეს მთავრობაც დამდგარიყო...

გრენუიმ იცოდა, რა თქმა უნდა, რომ დიუატის ქუჩაზე მდებარე სახლი კარგად იყო დაცული და უბრალოდ ფანჯრიდან შიგ შეღწევა შეუძლებელი იქნებოდა, ამიტომაც შებინდებისას სურდა შეეღწია შიგ, ჭიმკრის ჩარაზვამდე და საკუთარი სუნის უქონლობის საფარქვეშ, რაც შეუმჩნეველს ხდიდა როგორც ადამიანების, ისე ცხოველებისათვის, სახლის რომელიმე კუთხეში მიმალულიყო. გვიან ღამით, ყველანი რომ დაიძინებენ, ყნოსვა-ყნოსვით ავა მალლა, თავის განძთან, შეახვევს მას ქონით გაჟღენთილ ზეწარში და იქვე, ადგილზევე დაამუშავებს. მხოლოდ თმისა და სამოსელს გამოყოლებს თან, ვინაიდან ეს ნაწილები პირდაპირ ღვინის სპირტში უნდა გაივლოს, ამის გაკეთება კი სახელოსნოში უფრო უპრიანია და მოსახერხებელიც. პომადის საბოლოო დამუშავებისათვის და მის კონცენტრატად გამოსახდელად კიდევ ერთი დამე დასჭირდება. თუ ყველაფერი კარგად იქნა – მას კი ეჭვიც არა აქვს, რომ ყველაფერი წარმატებით გასრულდება – მაშინ ზეგისთვის ის ყველა იმ ესენციის მფლობელი გახდება, რომლებიც აუცილებელია მსოფლიოში უმჯობესი სუნამოს დასამზადებლად და მაშინ ქალაქ გრასს დასტოვებს ადამიანი, ვისაც საუკეთესო სუნი ასდის დედამიწაზე!..

ნარგიზებს სადილობამდე მოუთავა ხელი. ცეცხლი ჩააქრო, ქონიან ქვაბს თავი დაახურა და სახელოსნოდან გარეთ გამოვიდა გასაგრილებლად. დასავლეთიდან უბერავდა ქარი...

პირველივე ჩასუნთქვაზე დაიძაბა გრენუი. ჰაერში რაღაც ისე არ იყო, რაღაც ვერ იყო წესრიგში. ქალაქის სუნს, მის სამოსელს, მრავალი ათასი ძაფისაგან მოქსოვილ უჩინარ სივრცეს – ოქროს ერთი ძაფი აკლდა. ბოლო რამდენიმე კვირის მანძილზე ეს კეთილსურნელოვანი ძაფი იმდენად მტკიცე გახდა, გრენუი მას თავის ქონშიაც მკაფიოდ გრძნობდა. ახლა კი ძაფი გაქრა, დაიკარგა, მის კვალსაც ვერ ამჩნევდა ყნოსვით... ელდანაკრავივით გაშემდა ადგილზე.

„მკვდარია“, – გაიფიქრა ჯერ. შემდეგ უარესი: „სხვამ დამასწრო. სხვამ მოწყვიტა ჩემი ყვავილი და მისი სურნელიც მიითვისა!“ — არ უყვირია, ძალზე ძლიერი იყო ზაფრა, ოღონდ თვალის კიდეებში ცრემლი მოაწვა და წვრილ ნაკადად გადმოეშვა უპეებიდან.

ამ დროს „ოთხ დოფინში“ დრონატარები დრუიო გამოეცხადა და სხვათა შორის ამცნო, სწორედ იმ დილას, მეორე კონსული თავის ქალიშვილთან და თორმეტ ჯორკიდებულთან ერთად გრენობლს გაემგზავრაო. გრენუიმ ცრემლი გადაყლაპა და მთელი ქალაქი დიუკურის კარიბჭემდე სირბილით გადაჭრა. იქ მოედანზე შეჩერდა და ჰაერი შეიყნოსა. სუფთა, ქალაქის სუნ-შეურეველ ჰაერში მართლაც აღმოაჩინა თავის ოქროს ძაფი – მართალია თხელი და სუსტი, მაგრამ ყველა სხვა სურნელთან შეუდარი. ოღონდ ეგაა, ის არა ჩრდილო-დასავლეთით, გრენობლის მხრით, არამედ უფრო სამხრეთ-დასავლეთის, კაბრის მიმართულებით მოიწელებოდა.

გრენუი დარაჯებს დაეკითხა, რომელი გზით წავიდა მეორე კონსული. ერთ-ერთმა ჩრდილოეთისაკენ მიუთითა. “ნამდვილად, არა კაბრის გზით? იქნებ სამხრეთით გაემგზავრა, ორიბოს, ან ლა-ნაპულისკენ?” — არა, რა თქმა უნდა, — უპასუხა დარაჯმა, — *საკუთარი თვალით ვნახე...*

გრენუი მთელი ქალაქის გავლით უკანვე გამოქანდა, თავისი ქოხისაკენ. პატარა ზურგჩანთაში ჩატენა ტილოს ნაჭერი, საპომადე ქოთანის, ფითხის, მაკრატელი, ზეთისხილის ხის მოკლე, თლილი კეტი და დაუყოვნებლივ გაემართა — არა გრენობლის შარავზით, არა — იმ გზით, რომელიც ყნოსვამ უკარნახა: სამხრეთისაკენ. ეს პირდაპირი გზა ლა-ნაპულიზე, ტანერონის გან-შტოებებს მიუყვებოდა და ფრეიერისა და სიანის მდინარეების კალაპოტებს ჭრიდა. სავალადაც ადვილი იყო, გრენუი სწრაფად მიიწევდა წინ, ხოლო როდესაც თითქოსდა მთების კალთებზე მოკიდებული ორიბოს პეინაჟი გამოჩნდა, იყნოსა კიდეც, რომ თითქმის წამოეწია ლტოლვილებს. სულ ცოტა ხანში ის უკვე შეიგრძნობდა თითოეულ მათგანს ცალ-ცალკე, მათ ცხენებსაც კი არჩევდა სუნით. დიდი-დიდი, ერთი მილით თუ იყვნენ მოშორებულნი მისგან, სადღაც ტანერონის ტყეებში. გეზი მასსავით სამხრეთისკენ, ზღვისაკენ ეჭირათ.

ნაშუადღევის დაახლოებით ხუთ საათზე გრენუიმ ლა-ნაპულის ჩააღწია. მოძებნა ფუნდუკი, ისადილა და იაფი ღამის გასათევი გაიკითხა — ვითომდა ერთი ვინმე ბადაღის შეგირდი ნიციდან მარსელს მიემართებოდა. საჯინიბოში შეგოდლია გაათიო ღამეო — უპასუხეს. კუთხეში მოეწყო და წაუძინა. სამი მხედრის მოახლოება მან შორიდანვე იცნოსა და ახლა მხოლოდ მოთმინება იყო საჭირო.

ორი საათის შემდეგ — თითქმის მწუხრისას — ისინიც მოვიდნენ. სამივეს ტანზე გამოეცვალა, რათა თვალში არავის სცემოდა მათი მდიდრული სამოსი. ორივე ქალი შავ კაბებში გამოწყობილიყო, სახეზე პირბადეები ეფარათ. რიშის — შავი ფერისვე კაშხლი ემოსა. კასტელანელ აზნაურად ასაღებდა თავს — ხვალვე ლერინის კუნძულებზე უნდა გადასვლა, დაე, მეფუნდუკემ განთიადისათვის მოუშხადოს საუზმე. სხვა ვინმე მდგმურებიც არიან სახლში? არა, — უპასუხა სახლის პატრონმა, — მხოლოდ ერთი დაბაღის შეგირდი ნიციდან, მაგრამ ის საჯინიბოში ათევს ღამეს...

რიშიმ ქალები თავთავიანთ ოთახებში დააგზავნა, თვითონ კი საჯინიბოში შეიარა: როგორც თავად განაცხადა, ზოგი რამ ნივთის ასაღებად ბარგიდან... თავიდან ვერსად მოიძია ის შეგირდი და იძულებული გახდა ფარანი გამოერთმია მეჯინიბისათვის. მხოლოდ ფარნის შუქზე შეამჩნია, კუთხეში მიყუჩული: „დაბაღის შეგირდი“ თივასა და ძველ ჩულოზე იწვა, თავქვეშ ზურგჩანთა ამოედო და მკვდარივით ეძინა. ისე შეუხედავად და შესაბრაღისად გამოიყურებოდა, რიშის წამით მოეჩვენა კიდევ, თითქოს ის საერთოდ არ მყოფობდა იქ, რომ იგი ქიმერაა, ფარანში გარხეული სანთლის ალისაგან ათამაშებული უცნაური ჩრდილი... ყოველ შემთხვევაში, მისთვის მაშინვე საცნაური გახდა, რომ ამ საცოდავ, უწყინარი არსებისაგან არავითარი საფრთხე არ მოდიოდა, უჩუმრად გაეცალა და სახლში შებრუნდა.

მერე თავის ოთახში ივანშმა ქალიშვილთან ერთად. გამოძგზავრების წინ გოგონასათვის არ აუხსნია მათი მოგზაურობის მიზანი და არც ახლა გააკეთა ეს, ლაურას თხოვნის მიუხედავად. ხვალვე გაარაკვევს ყველაფერში, ოღონდ ლაურას ეჭვიც არ შეეპაროს: ყველაფერი, რასაც მამამისი გეგმავს და აკეთებს, მის საკეთილდღეოდაა მიმართული და სულ ახლო მომავალში ბედნიერს გახდის!.. ვაზშმის შემდეგ ლომბერის რამოდენიმე პარტია ითამაშეს და მან ყველა ხელი წააგო, ვინაიდან საკუთარ ქაღალდში ყურების მაგიერ, ლაურას სახის ცქერით ტკებებოდა. დაახლოებით ცხრა საათისათვის გააცილა გოგონა საწოლ ოთახში, რიშის ოთახის ბირდაბირ რომ მდებარეობდა და კარები გარედან გადაკეტა. მალე თავადაც დაწვა დასაძინებლად.

მეორე კონსულმა უეცრად სრულიად არაქათგამოცლილად იგრძნო თავი — მძიმე დღისა და წარსული ღამის დაძაბულობამ თავისი ქნა, მაგრამ ამავე დროს საკუთარი ქმედებითა და არსებული მდგომარეობით ფრიად კმაყოფილი გახლდათ. ყოველგვარი წუხილის, ყოველგვარი იმ ავი წინათგრძნობის გარეშე, ადრე ყოველდამ რომ უფრთოხობდა ძილს, რიშიმ ახლა უმფოთველად

ჩაიძინა და არც სიზმრებს ხედავდა, არც კენესოდა, არც კრთოდა და არც შამფურივით არ უტრიალია სარეცელზე. ბოლო რამდენიმე თვის განმავლობაში პირველად ამოუშვა მშვიდი, თანაბარი ფშვინვა.

ამ დროისათვის, გრენუიც სრულიად კმაყოფილი გახლდათ საკუთარი თავისა და ასევე, არსებული ვითარებით, თუმცა კი თავად ერთი წამითაც არ მოუტყუებია თვალი — როდესაც რიში გამოეცხადა საჯინბოში, მან უბრალოდ თავი მოიმძინარა, რათა კიდევ უფრო მეტი შთაბეჭდილება მოეხდინა მისი მოთენთილი სხეულის „უსაფრთხო“ სურნელს და არც გამოპპარვია ის შვება, რაც რიშიმ განიცადა მის დანახვაზე.

ასე და ამგვარად, იმ წამიერი თანხვედრის ჟამს, ორივე მათგანი ერთმანეთის უვნებლობის რწმენით აღივსო და გრენუის აზრით, ეს ძალიანაც კარგი ამბავი გახლდათ, ვინაიდან ეს იყო მისი ცრუ და რიშის ჭკმშიატი უვნებლობის დასტური.

45.

გრენუი პროფესიონალური წინდახედულებით შეუდგა საქმიანობას: ჯერ ტომარა გახსნა და იქიდან ტილოს ნაჭერი, პომადა და ფითხი ამოიღო; ტილო იმ ჩულოზე გაშალა, რომელზეც ღამით იწვა და მასზე ქონიანი პასტის წასმა დაიწყო. ამ საქმიანობას გვარიანი დრო სჭირდებოდა, ვინაიდან ქონი სულ სხვადასხვაგვარად უნდა დაედო — სად უფრო თხლად, სად უფრო სქლად — იმის მიხედვით, თუ სხეულის რომელ ნაწილზე მოუწევდა ზეწრის ესა თუ ის ადგილი. პირი, ილღიები, მკერდი, გენიტალიები, ტერფები გაცილებით მეტ სურნელს გამოსცემენ ვიდრე, ვთქვათ, მუხლისთავები, ზურგი ან იდაყვები; წარბები — მეტს ვიდრე წამწამები და ა. შ. ასე რომ, გრენუი დასამუშავებლად გამიზნული სხეულის არომული დიაგრამის მოდელირებას ახდენდა ტილოზე და სამუშაოს ეს ნაწილი უდიდეს სიამოვნებას ჰგვრიდა, ვინაიდან აქ ლაპარაკია ზოგადად არტისტულ ტექნიკაზე, რომელშიც თანაბრად ჩართულია ფანტაზია და ხელის გაწაფულობა და ამას გარდა, შემოქმედს სამუალება ეძლევა წინასწარ დატკბეს სავარაუდო შედეგით...

მთელი ქოთანი პომადა რომ დაცალა, გრენუიმ რამდენიმე საბოლოო შტრიხი გაავლო — სადღაც ქონის შრე გაასქელა, სხვაგან ზემდეტი ააცილა და კიდევ ერთხელ შეამოწმა ქონით მოდელირებული ლანდშაფტი — თუმცა, ამისთვის ცხვირს იყენებდა და არა თვალებს, ვინაიდან ყველაფერი ეს უკუნ სიბნელებში ხდებოდა, რაც, შესაძლოა, მისი გაწონასწორებული და ხალისიანი განწყობის კიდევ ერთი საბაბიც იყო. ახალმთვარობის სამყაროში არაფერი არსებობდა სურნელისა და ტალღების ხმაურის გარდა, ზღვის ნაპირიდან რომ აღწევდა. ახლა ის თავის სტიქიაში იყო... შემდეგ ტილო ისე დაკეცა, რომ ქონწასმული ზედაპირი ერთმანეთს მორგებოდა. ეს უკვე არც მთლად სახალისო საქმიანობა გახლდათ, ვინაიდან მშვენივრად იცოდა,

სიფრთხილის მიუხედავად, მოდელირებული კონტურების ნაწილი ამის გამო მაინც გაიდღაბნებოდა და ადგილსაც შეიცვლიდა; ოღონდ ტილოს გადატანის სხვა საშუალება ახლა არც ჰქონდა, მაინც ილღიაში უნდა ამოედო. მერე მაკრატიელი და ფითხი ჯიბეში ჩაიწყო, ზეთისხილის ხელკეტს წაეტანა და ეზოში გასხლტა.

ცა ღრუბლებს დაეფარა, სახლი ბნელში იყო ჩაფლული. ერთადერთი ნაპერწკალი ამ უკუნ სიბნელეში აღმოსავლეთით ციალებდა: ლა-ნაპულიდან ერთ მილზე, სენ-მარგერიტის კონცხზე განლაგებული ფორტის შუქურა ყვავის ფრთასავით შავ ნოხზე მოციალვე ქინძისთავს მოგაგონებდათ. ყურედან მსუბუქი ნიავი უბერავდა, თან თევზის სუნი მოჰქონდა. ძაღლებს ეძინათ. გრენუი რაღაც ფარდულის კედელზე მიყუდებულ კიბეს მიუახლოვდა, თავისუფალი მარჯვენა ხელით სამ საფეხურს მოებღაუჭა, ასწია, მხარი შეუდგა და ასე შევეულად გადაიტანა ეზოს გადაღმა, ლაურას ფანჯრამდე. ფანჯარა გამოღებული იყო. როდესაც ხარიხებზე აბიჯებდა და მაღლა-მაღლა მიიწევდა, თავს მიულოცა რომ შესაძლებლობა მიეცა აქ, ლა-ნაპულიში შეეგროვებინა გოგონას სურნელის მოსავალი. გრასში, სადაც რა ხანია, უგისოსო ფანჯარას ვედარ ნახავდი, ხოლო სახლს ბეჯითად დარაჯობდნენ, საქმე გაცილებით გართულდებოდა. აქ კი ლაურა მარტო იყო ოთახში და გრენუის მოახლის მოშორებაზეც კი არ დასჭირდებოდა ფიქრი...

საგდული ამოაგდო, რაფაზე გადაძვრა და დაკეცილი ზეწარი ფრთხილად დადო იატაკზე. საწოლისაკენ შეტრიალდა; ოთახში თმის სუნი ბატონობდა, ლაურა პირადმა იწვა და მოხრილი მკლავით შემოსაზღვრული სახე ბალიშში ჩაერგო. კეფა საუკეთესოდ უჩნდა ხელკეტის ჩასარტყმელად.

ღარტყმა ყრუდ გაისმა ოთახის ჩაკეტილ სივრცეში. გრენუის სძულდა ეს ხმა, სძულდა თუნდაც იმიტომ, რომ ეს მაინც ხმაური იყო, ხმაური მის ჩუმ საქმეში. კრიჭა შეიკრა და დაელოდა, სანამ ეს ხმაც მინავლებოდა, მერე კიდევ კარგა ხანს იდგა გაშეშებული, ციებაშეყრილივით უჭერდა ხელს კეტს, თითქოს ელოდა, რომ ეს ხმა ექოსავით დაუბრუნდებოდა საიდანმე. ოთახში კი სიჩუმე იდგა, მანამდღეზე უფრო ღრმა სიჩუმე, რაკიდა იქ გოგონას სუნთქვაც აღარ ისმოდა. მაშინღა იცვალა გრენუიმ დგომი და სხეული მოემჩვარა. მერე თავი მოთოკა, ხელკეტი გვერდზე გადადო და მთელი მონდობით შეუდგა საქმიანობას. ჯერ თან მოტანილი ზეწარი გაშალა, მშრალი მხრიდან გადააფარა მაგიდასა და სკამებს, თან ფრთხილობდა, უნებლიედ გაქონილ პირს არ შეხებოდა. გოგონას ღვთაებრივმა სურნელმა ამჯერად ვედარ აუჩუყა გული – ეს არომა უკვე ნაცნობი იყო მისთვის, ხოლო მისით ტკობა მომავლისათვის გადადო... ახლა საჭირო იყო, რაც შეიძლება ბევრი შეეგროვებინა და რაც შეიძლება ნაკლები დასხტომოდა ხელიდან, ახლა მისგან მხოლოდ გულისყური და მოხერხებულობა იყო საჭირო.

მაკრატილის ერთი მარჯვე მოძრაობით გაჭრა ღამის პერანგი, შემოაცალა, ხელი სტაცა ზეწარს და გაშიშვლებულ სხეულს გადააფინა. მერე აწია სხეული, ტილოს ჩამოშვებული ნაწილი მის ქვეშ შეაცურა და გადაახვია – როგორც მეფუნთუშე ახვევს ნიგეზიან რულეტს – ბოლოები გადმოკეცა და

გოგონა მუშისავით გაახვია თავიდან ფეხებამდე. მხოლოდ თმები დარჩა; ეს თმებიც შეაჭრა, შეძლებისდაგვარად ახლოს კანთან, დამის პერანგში გაახვია და მჭიდროდ შეკვანძა. გაკრეჭილ თავის ქალას ტილოს თავისუფალი ნაწილი გადააფარა და ნაჭერი თითების ფაქიზი შეხებით გაასწორა. ბოლოს მთელი ეს უცნაური ფუთა გულდასმით შეამოწმა – არ დარჩენილიყო არც ერთი ხვრელი, საიდანაც არომატის გაჟონვას შეძლებდა, არც ერთი გაუსწორებელი ნაოჭი, სადაც არომა ვერ შეადწევდა. მართლაც რომ, საუკეთესოდ გახლდათ შეფუთული... ახლა საქმე მეტი აღარაფერი ჰქონდა, მხოლოდ ლოდინი იყო საჭირო, ექვსათიანი ლოდინი – განთიადამდე.

გრენუიმ საწოლთან ახლო მოაჩოჩა სავარძელი, რომელზეც ლაურას კაბა გადაეფინა და ზედ დაეშვა. განიერი შავი სამოსი ჯერ კიდევ ინარჩუნებდა გოგონას სურნელს, რომელიც მის მიერ გამგზავრების წინ ჯიბეში ჩატენილი ანისულის კვერების სუნს უერთდებოდა. დადდილობა მოეძალა, მაგრამ მუშაობის დროს ძილი ეკრძალებოდა, მაშინაც კი, როდესაც სამუშაოს საბოლოო ნაწილი მხოლოდ ლოდინისაგან შედგებოდა. ჯერ ის დამეები გაიხსენა, ბაღდინის სახელოსნოში მაცერაციით რომ იყო დაკავებული; ჭვარტლით დაფარული სახდელი ქვაბი, აალებული ცეცხლი, ნაჟური წვეთების მსუბუქი, გამჭირვალე ხმა, როცა ფლორენციული მათარის ფსკერს ეცემოდა; დრო და დრო ცეცხლს მიხედვა რომ სჭირდებოდა, წყალს დამატება, ახალი მათარის შეშველება, გამოფიტული გამოსახდელი მასის ცვლა... და ყოველთვის, ყოველთვის ეჩვენებოდა, რომ არამც და არამც არ შეიძლებოდა დაძინება – არა იმიტომ, რომ რაიმე მორიგი ოპერაცია იყო შესასრულებელი, არამედ იმიტომ, რომ სიფხიზლეს საკუთარი საზრისი გააჩნია – აქაც კი, ამ ფუნდუკში, სადაც ანფლერაჟის პროცესი თავისთავად მიმდინარეობს, უფრო მეტიც – სადაც უადგილო შემოწმება, სურნელოვანი ფუთის გადაბრუნება ან მის გარშემო ფუსფუსი მხოლოდ ხელის შემშლელი შეიძლება აღმოჩნდეს; აქაც კი, როგორც გრენუის ეჩვენებოდა, მისი სიფხიზლე ფრიად მნიშვნელოვანი რამ გახლდათ – ძილს შეიძლებოდა წარმატების სული დაეფრთხო!.

თუმცა კი, დადდილობის მიუხედავად, ლოდინი ძნელი არ იყო. უყვარდა კიდევ ეს – ყველა იმ ოცდაოთხ შემთხვევაშიც სიამოვნებდა ეს გარინდება – არა დამაჩლუნგებელი სევდა წარსულზე და არც ვნებიანი მოუთმენლობა – არამედ გაახრებელი, მზრუნველი და განსაზღვრულ ხარისხში მოქმედი მოლოდინი. ასეთი ლოდინის დროს ყოველთვის რაღაც ხდებოდა, ხდებოდა უადრესად არსებითი რამ და, თუმცა ამას თავად არ ახდენდა, ეს „რამ“ მაინც მისი წყალობით ხდებოდა. ახლაც ყველაფერი გააკეთა, რაც მასზე იყო დამოკიდებული; მთელი თავისი ხელოვნება ჩააქსოვა, არ დაუშვია არც ერთი შეცდომა, მისი მოქმედება ერთადერთი სწორი ქმედება გახლდათ და ახლა მხოლოდ რამდენიმე საათის მოლოდინი იქნა სჭირო... არასოდეს უგრძვნია თავი ასე კარგად, ასე მშვიდად, ასე გაწონასწორებულად; არასოდეს უგრძვნია ასეთი ერთიანობა საკუთარ თავთან – მაშინაც კი, მთის იმ ახოში – როგორც საკუთარი ხელობის მიერ მოთხოვნილ ამ შესვენების საათებში, როდესაც თავის მსხვერპლს უჯდა და თვალმოუხუჭავად იცდიდა. მის შავბნელ ტვინში მხოლოდ ასეთ წუთებში ჩნდებოდა თითქმის რომ მხიარული აზრები.

საოცარია, მაგრამ ეს აზრები სულაც არ იყო მომავლისაკენ მიმართული. ფიქრობდა არა იმ სურნელზე, რომელსაც რამდენიმე საათის შემდეგ მოიპოვებდა, არა ოცდახუთი ქალწულის არომით შექმნილ სუნამოზე, არა მომავლის გეგმებზე, არა ბედნიერებასა თუ წარმატებაზე – არა, იგი წარსულს იხსენებდა. ხსოვნაში იწვევდა იმ ნიშანსვეტებს, ცხოვრების გზაზე რომ ჰქონია – მაღამ გაიარის სახლისა და სახლთან დაყრილი ნესტიანი, მზით გამთბარი მორებიდან დაწყებული, თავის დღევანდელ მოგზაურობამდე – ამ პატარა, თევზის სუნით გაჟღენთილ დასახლება ლა-ნაპულიში. იხსენებდა დაბად გრიმალს, ჯუზეპე ბალდინის, მარკიზ დე ლა ტაიად-ესპინასს; იხსენებდა ქალაქ პარიზს და მის, ათასი ელფერით მოლივლივე მყარალ ანაორთქლს, მარესქუჩელ ჟღალთმიან გოგონას, მიწის თავისუფალ სივრცეებს, სუსტ ნიავს, ტყეებს... იმ მთასაც იხსენებდა ოვერნიში – თავის გამოქვაბულს, ჰაერს ადამიანის სუნის გარეშე... თავის სიზმრებსაც იხსენებდა, იხსენებდა უდიდესი სიამოვნებით. დიახ, როდესაც წარსულში იმზირებოდა, მიაჩნდა, რომ ბედი განსაკუთრებით მოწყალე იყო მის მიმართ, რომ ბედისწერას, მართალია დახლართული, მაგრამ საბოლოო ჯამში მაინც უტყუარი გზით მიჰყავდა, სხვა შემთხვევაში განა შეძლებდა აქ, ამ ბნელ ოთახში, თავისი ლტოლვის ბოლო მიზანთან აღმოჩენილიყო?! თუ კარგად დაუფიქრდებით, ჭეშმარიტად ღვთის ხელი ერია ამ საქმეში!.

გრენუის გული აუჩუყდა ბედისადმი მაღლიერების შემოტევისაგან. „მაღლობელი ვარ შენი, – ჩემად ჩაილაპარაკა, – მაღლობელი, რომ მე, ჟან-ბატისტ გრენუი, ვარ ისეთი, როგორიც ვარ!“ – დიახაც, ამდენად აღფრთოვანებული გახლდათ საკუთარი თავით.

ერთხანს თვალებიც კი დახუჭა, რათა ბოლომდე მისცემოდა ამ წმინდა ღამის ნეტარებას. მშვიდობა მოეფინა მის სულს და ეჩვენებოდა, გარეშემოც იგივე მშვიდობას დაედო ბინა... შეიყნოსა მოახლის მშვიდობიანი ძილი მეზობელ ოთახში, ანტუან რიშის ღრმა, დამშვიდებული ძილი მოპირდაპირე ოთახში, შეიყნოსა მშვიდი თვლენა მასპინძლისა, მსახურებისა, ძაღლების, ცხოველებისა ბაგაში, დასახლებისა და ზღვისა. ქარი ჩაღვა. მშვიდობა, სიწყნარე სუფევდა ირგვლივ.

მხოლოდ ერთხელ ასწია ხელი და ლაურას ფეხს შეახო რბილად. უფრო სწორად არა ფეხს, არამედ ტილოს, ქონის თხელი ფენა რომ ფარავდა, გოგონას არომატს რომ იწოვდა, ლაურას – არა, უკვე მისი, გრენუის! – მეფურ არომას...

ჩიტები რომ აჭიჭკიჭდნენ – ესე იგი განთიადამდე კარგა ხნით ადრე – გრენუი წამოდგა და სამუშაო მოამთავრა. გარდახსნა ტილო და სალბუნით ააცალა მიცვალებულის სხეულს. ქონი კარგად შორდებოდა კანს, მხოლოდ ჩაღრმავებულ ადგილებში რჩებოდა პატარა შენადელები, რომელთა მოგროვე-ბაც ფითხით მოუხდა. ნარჩენი ლაურას ქვედა საცვლით აამშრალა და იმავე საცვლით მთელი სხეული გაწმინდა თხემით ტერფამდე, ისეთი მონდომებით, რომ ფორებიდანაც კი ამოაშრო სურნელის უკანასკნელი ძაფები... ახლა ლაურა ნამდვილად მკვდარი იყო მისთვის – დამჭკნარი, უფერული და მომ-ჩეარული – გამოხდილი ყვავილების ნარჩენი.

საცვალიც, ღამის პერანგიცა და ლაურას თმებიც პატარა მჭიდრო ფუთად გამოკრა; თავი არ შეუწუხებია გვამისათვის რამე გადაეფარებინა. ღამის სიშავე დილის სილურჯეში გადაიზარდილიყო და ოთახში ნივთების კონ-ტურებიც გამოიხაზა, მაგრამ გრენუის საერთოდ აღარ გაუხედავს საწოლი-საკენ. ლაურას სხეული მას არ აინტერესებდა. იგი აღარც არსებობდა მისთ-ვის როგორც სხეული – ეგ სურნელგამოცლილი მასალა იყო მხოლოდ.

გრენუი უხმაუროდ შეხტა ფანჯრის რაფაზე და კიბით დაეშვა დაბლა. გა-რეთ ისევე ქარი ამოვარდა, ცა გადაიწმინდა და მიწაზე მუქ-ლურჯი, ცივი სი-ნათლე გადმოიღვარა. ნახევარი საათის შემდეგ ფარეშმა უკვე ცეცხლიც გააჩაღა სამზარეულოს კერაზე. მერე ეზოში გამოვიდა შეშისათვის, კი შეაძინა აყუდებული კიბე, მაგრამ არაფერი უეჭვია, ვინაიდან ჯერ კიდევ არ გამოფხიზლებულიყო რიგიანად. მხეც მალე ამოვიდა. უზარმაზარი, ხალასი ოქროსფერი დისკო ამოცურდა ზღვიდან, ლერინის კუნძულებს შორის. ცაზე ღრუბლის ნაგლეჯიც კი არ იყო. გაზაფხულის მშვენიერი დღე დგებოდა. რი-შიმ, ვისი ოთახიც დასავლეთისაკენ გადიოდა, შეიღზე გაიღვიძა. პირველად მრავალი თვის მანძილზე, მშვენივრად გამოეძინა და ჩვეულების საწინააღმდე-გოდ, მეოთხედ საათს კიდევ ნებივრობდა ლოგინში. ბოლოს ნეტარებით გაიზ-მორა და სასიამოვნო ფაციფუცს მიაყურადა, სამზარეულოდან რომ გამოდი-ოდა. წამოდგა, ფართოდ გამოაღო ფანჯარა და დაინახა, რომ ქვეყნად მშვენი-ერი დარია, ქორფა, დილის ჰაერი ჩაისუნთქა, გაიგონა ტალღების ხმაური, ტუჩები მოამრგვალა და რაღაც მხიარული ჰანგის სტვენას მოჰყვა.

მორთვა-მოკაზმვის დროსაც არ შეუწყვეტია და ჯერ კიდევ სტვენდა, როცა ოთახიდან გამოვიდა, როცა სწრაფი ნაბიჯით გადასერა დერეფანი და როდესაც თავისი ქალიშვილის კარებს მიადგა. დააკაკუნა. და კიდევ დააკა-კუნა, ძალიან ჩუმად, რათა გოგონა არ დაეფრთხო. არავითარი პასუხი. რიშიმ გაიღვიძა: ტკბილი ძილი ახალგაზრდობის ხვედრიაო, ფიქრად გაუელვა სადღაც გაგონილმა ფრანამ.

მერე ძალზე ფრთხილად შეყო გასაღების პირი ჭრილში და სახელური გადაატრიალა, ფრთხილად, ძალიან ფრთხილად; იმ სურვილით, რომ მძი-ნარეს შესწრობოდა, კოცნით გაეღვიძებინა, კიდევ ერთხელ, უკანასკნელად, მანამდე, ვიდრე მოუწევს სხვა მამაკაცს გადააბაროს საკუთარი ქალიშვილი...

კარი გაიღო, რიში შევიდა და მზის სხივი სახეში მოხვდა. ოთახი თითქოს გამლღვალი ოქროთი გამოეცხოთ, ყველაფერი ბრწყინავდა და წამიერად თვალი დახუჭა.

ისევ რომ გაახილა თვალი, მაშინდა დაინახა საწოლზე გადასვენებული ლაურა – მიშველი და მკვდარი, თმის ძირებამდე შეკრეჭილი და მარმარილოსავით თეთრი. ყველაფერი ისევე იყო, როგორც იმ კომმარულ სიზმარში, გამომგზავრების წინა ღამეს რომ იხილა – ოღონდაც დავიწყნოდა კი უკვე, და ახლა ის კომმარი კვლავ ამოეფრქვა მახსოვრობაში. ყველაფერი ზუსტად ისევე იყო, როგორც იმ სიზმარში, ოღონდ – გაცილებით უფრო მკაფიო.

47.

ლაურა რიშის მკვლევლობის ამბავი ისე სწრაფად გავრცელდა გრასის შემოგარენში, თითქოს ვიღაცას გამოეცხადებინოს: „მეფე მოკვდა!“ ან „ომი დაიწყო!“ ანდა „ნაპირზე მეკობრეები გადმოსხდნენ!“ – და ისეთივე, შესაძლოა, მეტი ძრწოლაც კი გამოიწვია. თვალის დახამხამებაში დაბრუნდა მთელი მონდომებით დავიწყებული შიში, ისეთივე გადამდები, როგორც გასულ შემოდგომას, ყველა თანამდევი გამოვლინებებით: ზაფრით, აღშფოთებით, მრისხანებით, ისტერიული ეჭვიანობით, უილაჯობით... ღამლამობით ხალხი სახლებში იჯდა, ოთახებში კეტავდნენ ქალიშვილებს, ბარიკადებს აგებდნენ კარებთან, არ ენდობოდნენ ერთმანეთს და უძილობა სტანჯავდათ. თითოეული ფიქრობდა, რომ ამჯერადაც ყველაფერი ისე განმეორდებოდა, როგორც ადრე: ყოველ კვირას თითო მკვლევობა! დრომ თითქოს ნახევარი წლით გადაიწია უკან.

ოღონდ შიში ახლა უფრო მეტად დამბლადამცემი იყო, ვიდრე ნახევარი წლის წინ, ვინაიდან საშიშროების მოულოდნელმა დაბრუნებამ, დიდი ხნის გადალახულად რომ თვლიდნენ, ხალხში უიმედობის გრძნობა დათესა: რაკილა თავად ეპისკოფოსის შერისხვამაც არ უშველა საქმეს, თუკი ანტუან რიში, ყოვლისშემძლე ანტუან რიში – ქალაქის უმდიდრესი მცხოვრები, მეორე კონსული, გავლენიანი, წინდახედული ადამიანი, რომელსაც ხელთ ჰქონდა თავდაცვის ყველა საშუალება და მაინც უძლური აღმოჩნდა, თუკი მკვლელს ხელი არ აუკანკალდა ლაურას ღვთაებრივი სილამაზის წინაშე, – რისი იმედიღა შეიძლება გქონდეს კაცს? ეს მკვლელი უფრო თავდარდამცემი იყო, ვიდრე შავი ჭირი, ვინაიდან შავ ჭირს გაექცევი, ხოლო ამ მკვლელს – ვერა, როგორც ეს რიშის შემთხვევამ დაამტკიცა. ამ მკვლელს, ეტყობა, ზეადამიანური თვისებები გააჩნია!.. სატანასთან თუა წილნაყარი! თუ თავად-ვეა სატანა?! და ბევრს, განსაკუთრებით უბირთ, არც თუ ისე ჭკვიან ხალხს, ერთი გზადა დარჩათ – ეკლესიაში შესვლა და ლოცვა; ყოველი ამქარი თავის ბატონს უყრიდა მუხლს: ხარატები – წმინდა ალოიზიუსს, მქსოველები – წმინდა კრისპინეს, მებაღეები – წმინდა ანტონიოს, მენელსაცხებლები – წმინდა იოსებს... და თან მიჰყავდათ თავიანთი ცოლები და ქალიშვილები, მათთან ერთად ლოცულობდნენ, ჭამდნენ და ეძინათ ეკლესიაში, დღისითაც არ გამოდიოდნენ გარეთ, დარწმუნებულნი, რომ ურჩხულისაგან თავდაცვა

მხოლოდ მოუკლებლად ლოცვის მეშვეობით, ღვთისმშობლის ხატების წინაშე იყო შესაძლებელი...

სხვები, უფრო აზრიანი თავები – ვინაიდან ეკლესია ერთხელ უკვე უძლური აღმოჩნდა – ოკულტურ ჯგუფებში ერთიანდებოდნენ, მნიშვნელოვანი თანხის ფასად ქირაობდნენ უკვე სახელგანთქმულ კუდიანებს გურდონიდან, შეფოფხდებოდნენ გრასის მიწისქვეშეთის მრავალრიცხოვანი მღვიმეებიდან ერთ-ერთში და შავ მესებს ასრულებდნენ, რათა უწმინდურისათვის ეჩვენებინათ, რომ მისადმი თავყვანისცემად არიან მზად. პატივცემული ბურჟუებისა და კეთილშობილი ბატონების მცირე ნაწილი მეცნიერულ მეთოდებზე დებდა თავს – ამაგნიტებდნენ საკუთარ სახლებს, ჰიპნოზს უკეთებდნენ თავიანთ ქალიშვილებს, საიდუმლო ფლუიდურ წრეებს ქმნიდნენ თავიანთ სალონებში და ცდილობდნენ, ტელეპატიურად განედევნათ მკვლელის სული – დირექტივების ერთობლივად გადაცემის მეშვეობით.

ეკლესიის მსახურნი მომხანიებელ პროცესებს აწყობდნენ გრასიდან ლა-ნაპულიმდე და – უკან. ქალაქის ხუთივე მონასტრის ბერებმა ოცდაოთხსაათიანი ღვთისმსახურება მოაწყვეს ფსალმუნების მღერით, ასე რომ, ქალაქის ხან ერთ, ხან მეორე ბოლოში უწყვეტი გალობა გაისმოდა, დღისით თუ ღამით. მუშაობით აღარავინ მუშაობდა.

გრასის მთელი მოსახლეობა ასე და ამგვარად ცხოვრობდა ციებცხელეებიან უსაქმურობაში. ლამის მოუთმენლად მოელოდნენ შემდგომ მკვლელობას. ის რომ მოხდებოდა, არავის ეპარებოდა ეჭვი; გულის-გულში თითოეულ მათგანს სურდა რაც შეიძლება მალე გაეგო საზარელი ახალი ამბავი – იმ იმედით, იგი ვისმე სხვას და არა თავად მის ჯალაბობას შეეხებოდა.

მაგრამ ხელისუფლება – ქალაქისა, ოლქისა თუ პროვინციისა, ამჯერად ხალხის ისტერიული განწყობილებით არ დაავადებულა; პირველად იმ დღიდან, რაც გოგონების მკვლელმა თავისი პირველი განაცხადი გააკეთა, გრასის, დრაგინიანისა და ტულონის გეგმიური და ფართოდ გაშლილი თანამშრომლობა დაიწყო მაგისტრატების, პოლიციის, პარლამენტისა თუ საზღვაო ფლოტის დონეზეც კი.

ამა ქვეყნის ძლიერთა ამგვარი სოლიდარობის მიზეზი, ერთის მხრივ, საერთო სახალხო ჯანყის შიში გახლდათ და მეორეს მხრივ, ის ფაქტი, რომ ლაურა რიშის მკვლელობის შემდგომ გამოჩნდა ის საწყისი წერტილი, რომელიც საშუალებას იძლეოდა მკვლელის სისტემური დევნა დაეწყოთ – უნდა დაეწყოთ დაბადის მეტად საეჭვო შეგირდიდან, რომელსაც იმ საბედისწერო ღამეს ლა-ნაპულში, ფუნდუკის საჯინიბოში ეძინა, ხოლო დილაუთენია უკვალოდ გაქრა. მეფუნდუკე, მეჯინიბე და რიში ერთხმად ადასტურებდნენ, რომ ეს იყო შეუხედავი, ჩია ტანის კაცი, მოყავისფრო ქურთუკი ემოსა და უხეში ტილოს ზურგჩანთას დაატარებდა. თუმცა დანარჩენში ამ სამი მოწმის ჩვენებები უცნაურობამდე მერყევი და არაზუსტი იყო. მაგალითად, მათ არ შეეძლოთ აღეწერათ მისი სახის ნაკვთები, თმის ფერი ანდა მეტყველება; მეფუნდუკემ ის მაინც გაიხსენა, რომ უცნობის მოძრაობასა და სიარულში

ყურადღებას იქცევდა ოდნავი მოულოდნელი მოუქნელობა — თითქოს ოდეს-
ღაც კანჭი ჰქონოდა მოტეხილი, ან ტერფი დამახინჯებული.

იმავე დღეს, როდესაც მკვლევლობა მოხდა, ამ მწირი ამოსაცნობი ნიშნე-
ბით დაიმედებული სანაპირო დაცვის ორი ცხენოსანი რაზმი მარსელის მი-
მართულებით შეუდგა დევნას. ერთი სანაპირო ზოლს გაუყვა, მეორე —
პროვინციის სიღრმეში მიმავალ გზას. ლა-ნაპულის უახლოესი შემოგარენის
გაჩხრეკის ბრძანება მოხალისეებს მიეცათ. გრასის სასამართლოს ორი წარ-
მომადგენელი ნიცას გაემგზავრა, რათა იქ მოეძიათ რაიმე ცნობა დაბადის
შეგირდზე. ფრეჟიუში, კანსა თუ ანტიბში ბეჯითად ამოწმებდნენ ზღვაში გა-
მავალ ყველა ხომალდს; საგოიისკენ მიმავალი ყველა გზა დაკეტილი იყო,
მოგზაურებს პირადობის დამადასტურებელ საბუთებს სთხოვდნენ. ყველას,
ვისაც კითხვა შეეძლო, დამნაშავეს აღწერილობიან ფურცლებს ურიგებდნენ
გრასის, ვანსის, გურდონის ყოველ მისასვლელთან, სოფლების ეკლესიების
ბჭეებთან. დღეში სამჯერ გამყინავი ხმით კითხულობდნენ მოედნებზე მაუწყე-
ბლები. თუმცადა კოჭლობის მოხსენიება იმ ეჭვს აღვივებდა, რომ დამნაშავე
თავად ეშმა იყო და სარწმუნო ცნობების მოგროვებაში დახმარების მაგივრად
პანიკას უფრო თესდა. მხოლოდ მაშინ დააპატიმრეს დასმენის კვალად რამ-
დენიმე დაბადის შეგირდი, როცა გრასის სასამართლოს თავმჯდომარემ, რი-
შის სახელით, მკვლელზე ცნობების მომწოდებელს ჯილდო აღუთქვა, არანაკ-
ლებ ორასი ლივრისა. ერთ-ერთი მათგანი, თავისდა საუბედუროდ, კოჭლი
აღმოჩნდა და სწორედ მაშინ, როცა ალიბის მიუხედავად, რომელსაც მრავალი
მოწმე ადასტურებდა, მისი საწამებლად გადაცემა დააპირეს, მკვლელობის
დილიდან მეთუ დღეს მერიაში კაცი გამოცხადდა ქალაქის დაცვიდან და მსა-
ჯულებს შემდეგი განუცხადა: იმ დღის სამხრობისას, როდესაც იგი, დაცვის
კაპიტანი გაბრიელ ტალიასკო, როგორც ყოველთვის სადარაჯოზე იმყოფე-
ბოდა, მას მაკანმა პირმა მიმართა, რომელიც, როგორც მას ახლა მიაჩნია,
სრულად შეესატყვისება სამძებრო ფურცელში აღწერილ პიროვნებას. ეს
სუბიექტი რამდენჯერმე დაჟინებით ჩაეძია, თუ რომელი გზით გაემგზავრა
მეორე კონსული თავის ქარავანთან ერთად. არც მაშინ და არც მოგვიანებით
კაპიტანს ამისათვის განსაკუთრებული ყურადღება არ მიუქცევია და, ალბათ,
ვერაფრით გაიხსენებდა მის გარეგნობას — იმდენად შეუხედავი ვინმე იყო —
შემთხვევით რომ არ შეხვედროდა მას და თანაც აქ, გრასში, დე-ლა-ლუვის
ქუჩაზე, მეტრ დრუიოს და მადამ არნულფის სახელოსნოს წინ; და ამჯერადაც
თვალში ეცა, რომ ეს ადამიანი, შესამჩნევად კოჭლობდა...

გრენუი დააპატიმრეს. ლა-ნაპულის ფუნდუკის პატრონმა და მისმა
მეჯინებემ, რომლებიც ადრევე იყვნენ გამოძახებულნი გრასში სხვა ეჭვი-
ტანილობიანი მკვლელის ამოსაცნობად, წამსვე შეიცნეს მათთან ღამის გამ-
თევი დაბადის შეგირდი: დიახ, შეცდომა გამორიცხულია, ის არის, განაცხა-
დეს მათ — ძებნილი მკვლელი!

გაჩხრეკეს სახელოსნო, გაჩხრეკეს ფრანცისკანელთა მონასტრის უკან,
ზეთისხილის კორომში ჩადგმული ქოხი. კუთხეში, თითქმის თვალმისაწვდე-
ნად, ლაურა რაშის ღამის პერანგი, ქვედა საცვალი და თმა იდო. ზოლო
როდესაც მიწის იატაკი ათხარეს, ერთიმეორის მიყოლებით აღმოაჩინეს დან-

არჩენი ოცდაოთხი მსხვერპლის თმა და სამოსი. იპოვეს ხელკეტი – მკვლელობის იარაღი და უხეში ტილოს ზურგჩანთა. ნივთმტკიცებებმა შემპირწუნებელი შთაბეჭდილება მოახდინა. გაიცა ზარების ჩამორეკვის ბრძანება. სასამართლოს თავმჯდომარემ განკარგულება გასცა განცხადებები გამოეკრათ და მაუწყებლობის ყველა საშუალებით ეცნობებინათ ხალხისათვის, რომ გოგონების სახელგანთქმული მკვლელი, რომელსაც თითქმის, მთელი წელია დასდევენ, ბოლოს და ბოლოს დაპატიმრებულია და ციხეშია გამომწყვდეული, ზემკაცრი მეთვალყურეობის ქვეშ.

48.

თავიდან ამ განცხადებისა არავის სჯეროდა – ეს რაღაც ფანდია, რითაც ხელისუფლებას თავისი უსუსურობის დაფარვა სურს, რათა აღელვებული ხალხი დააყნაროსო: ყველას ჯერ კიდევ კარგად ახსოვდა ის დრო, როდესაც ამბობდნენ, მკვლელი გრენობლში გადაიხვეწაო. ამჯერად შიში მეტისმეტად ჩაბუღებულიყო ადამიანების სულებში.

მხოლოდ მეორე დღეს, როდესაც ტაძრის მოედანზე, სასამართლოს შენობის წინ გამოფინეს ყველაფერი – შემზარავი საყურებელი იყო ეს ოცდახუთი სამოსი და ოცდახუთი თმის ბულული, საფრთხობელებივით შუბებზე გამოკიდებული ერთ რიგში – მხოლოდ მაშინ გამოცოცხლდა ე.წ. საზოგადოებრივი აზრი.

მრავალმა ასეულმა ადამიანმა ნელ-ნელა ჩაიარა ამ საზარელი გამოფინის წინაშე. მსხვერპლთა ახლობლები, როდესაც სამოსს ამოიცნობდნენ, წივილ-კივილით მიწაზე ეცემოდნენ გულწასულები. ბრბოს დანარჩენი ნაწილი, სენსაციების სიყვარულის გამოისობით თუ ბოლო ეჭვის გასადევნად, მკვლელის ჩვენებას მოითხოვდა. ეს წამოძახილები მალე ისეთი ხმამაღალი გახდა, ხოლო მდელვარება ამ პატარა, ხალხით გადაჭედილ მოედანზე – ისეთი სახიფათო, რომ სასამართლოს თავმჯდომარემ გადაწყვეტილება მიიღო: განკარგულება გასცა, საკნიდან გამოეყვანათ გრენუი და მეორე სართულის ფანჯრიდან ეჩვენებინათ ხალხისათვის.

გრენუი რომ ფანჯარასთან მივიდა, უეცრად ისეთი სიჩუმე ჩამოვარდა, როგორი სიჩუმეც შუადღის ხვატში დგება ხოლმე. როდესაც ყველა ან სამუშაოდაა მინდორში გასული, ან სახლების ჩრდილებსაა შეფარებული. არც ფეხების ფრატუნი ისმოდა, არც ტანსაცმლის შრიალი, არც სუნთქვა. ბრბო მთელი წუთი თვალდაჭყეტილი და პირდაღებული იდგა. ვერავინ იაზრებდა, რომ ამ ჩია, წელში მოხრილ ადამიანს, ამ ჭიაყელას, ამ ფუნის ხოჭოს, ამ არარაობას ამდენი მკვლელობა ჩაედინა. სრულიადაც არ ჰგავდა მკვლელს. მართალია, ვერც ერთი მათგანი ვერ გეტყვოდათ, თუ როგორ ჰყავდა წარმოდგენილი მკვლელი – ეს დემონიური არსება – მაგრამ ერთსულოვანნი კი იყვნენ: არა ასეთად! და მაინც, იმის მიუხედავად, რომ მკვლელი

სრულიად არ შეეფარებოდა ხალხის წარმოდგენას მასზე დაშესაბამისად, მისი საჯაროდ ჩვენებაც, თითქოსდა არც თუ ისე დამარწმუნებელი უნდა ყოფილიყო – უკვე ამ ადამიანის ფანჯარაში გამოჩენამ და იმ გარემოებამ, რომ სწორედ იგი, და არა ვინმე სხვა აჩვენეს ხალხს როგორც მკვლეელი, სრულიად უცნაური შედეგი გამოიღო – ერთი პირობა, მის გამოჩენისთანავე ყველამ გაიფიქრა: შეუძლებელია! *შეუძლებელია*, ეს იყოს მკვლეელი! და იმავე წამს მიხვდნენ, რომ ეს სიმართლე იყო...

გასაგებია, როგორც კი დარაჯებმა ოთახის სიბნელეში შეათრიეს დამნაშავე, როგორც კი მან ხილულად ყოფნა შეწყვიტა – თუმცა მცირე ხნით ის მაინც კიდევ აგრძელებდა არსებობას ადამიანთა აღქმაში როგორც მოგონება, თუნდაც როგორც საზიზარო მკვლელის სიმბოლო – ბრბოს განცვიფრება მალევე უკუიქცა და ადგილი დაუთმო შემთხვევის შესაფერის რეაქციას: ხალხი აყბედდა, ათასობით თვალი ისევ გამოცოცხლდა, ყველა ხმა შენივთდა და მრისხანებისა და შურისძიების გრგვინვად გადაიარა: „ჯვარს აცუ ეგე!“ – და ისინი სასამართლოს შენობის იერიშზე გადავიდნენ, რათა საკუთარი ხელებით მოეშოთ, ნაკუნ-ნაკუნ დაეგლიჯათ და დაეფლითათ მსჯავრდებული. ჩაფრებს გვარიანი ჯაფა დაადგათ, რათა კარი გაემაგრებინათ და უკან დაეწიათ გამძვინვარებული ხალხი. გრენუი სასწრაფოდ სარდაფში გადაიყვანეს. თავმჯდომარე ფანჯარასთან მივიდა და სახალხოდ დაიფიცა, რომ პირუთვნელი და უშუკაცრუსი სასამართლო დღე-დღეზე გაიმართებოდა. და მაინც, რამდენიმე საათი დასჭირდა ბრბოს დასაშლელად, და რამდენიმე დღე, რათა ქალაქი ოდნავ მაინც დაწყნარებულიყო.

მართლაც, პროცესი გრენუის წინააღმდეგ საოცრად სწრაფად მიიწვედა წინ, რადგან საქმეში უამრავი სარწმუნო სამხილი იყო და დაკითხვებზეც დამნაშავე ყოველგვარი ყოყმანის გარეშე ადასტურებდა, რომ ყველა მკვლელობა, რომელიც კი ბრალად ედებოდა, სწორედ მისი ჩადენილია.

მან მხოლოდ იმ კითხვაზე ვერ გასცა დამაკმაყოფილებელი პასუხი, თუ რატომ სჩადიოდა ამას. მხოლოდ იმეორებდა, რომ გოგონები მას საქმისათვის სჭირდებოდა და ამიტომაც ხოცავდა. რა საქმე იყო და საერთოდ, რას ნიშნავდა რომ გოგონები „სჭირდებოდა“, ამის თაობაზე ვერაფერი ათქმევინეს.

მაშინ წამება დაუწყეს, რამოდენიმე საათით ჩამოკიდეს ძელზე, შვიდი ლიტრი წყალი ჩაასხეს, ესპანური წაღებიც ჩამოაცვეს – უშედეგოდ. ეს ადამიანი უგრძობელი აღმოჩნდა ფიზიკური ტკივილის მიმართ, არც კი დაუკვნესია და ყოველ განმეორებად კითხვაზე მუდამ ერთნაირად პასუხობდა: „*მჭირდებოდნენ...*“. მსაჯულებმა, ბოლოს და ბოლოს, ჭკუასუსტად ჩათვალიეს, წამება შეწყვიტეს და იმ დასკვნამდე მივიდნენ, რომ რაც შეიძლება სწრაფად, შემდგომი დაკითხვების გარეშე მოემთავრებინათ გამოძიება.

ერთადერთი მცირე გადავადება გამოიწვია იურიდიულმა კამათმა დრაგინიანის მერიასთან, ვის მმართველობაშიც იმყოფებოდა სოფელი ლა-ნაპული და ექსის პარლამენტთან, ვინაიდან დრაგინიანსაც და ექსსაც ამ პროცესის მითვისება სურდათ. მაგრამ გრასის მოსამართლეებმა ამ საქმის წარმოების

უფლება არავის დაუთმეს. აკი სწორედ მათ შეიპყრეს დამნაშავე, მათი იურისდიქციის სფეროში იყო ჩადენილი მკვლელობათა უმეტესი წილი, და ხალხის მრისხანებაც მათ დაატყდებოდათ თავს, თუკი საქმეს სხვა სასამართლოს გადასცემდნენ. გრენუის სისხლი გრასში უნდა დაღვრილიყო...

1766 წლის 15 აპრილს გამოტანილი განაჩენი იმავე საღამოს, მისსავე საკანში წაუკითხეს დამნაშავეს. „მენელსაცხებლის შეგირდი ჟან-ბატისტ გრენუი, – იუწყებოდა განაჩენი, – ორმოცდარვა საათის განმავლობაში უნდა იქნას გაყვანილი დიუკურის საგუშაგოზე, იქ გულადმა იქნას გაკრული ხის ჯვარს, და მას სხეულზე მიეყენოს თორმეტი დარტყმა რკინის კეტით, რომელი დარტყმებიც გადაუმსხვრევენ მას ხელების, ფეხების, თეძოებისა და მხრების სახსრებს, რის შემდეგაც ჯვარზე მიკრული დარჩება სიკვდილამდე“. ამჯერად ჯალათს აკრძალული ჰქონდა დამნაშავისათვის აღმოეჩინა ჩვეული მოწყალება – ბაწრით მოეხრჩო სახსრების დამსხვრევის შემდეგ, მაშინაც კი, თუ მისი სიკვდილისწინა წამება რამდენიმე დღე გასტანდა. საბოლოოდ, გვამი სასაკლაოზე უნდა დაეფლათ ადგილის აღუნიშნავად.

ასე ჩანდა, გრენუიზე განაჩენს არავითარი შთაბეჭდილება არ მოუხდენია. სასამართლოს მოსამსახურე შეეკითხა, ხომ არა ჰქონდა რაიმე უკანასკნელი სურვილი. არა, – უპასუხა გრენუიმ. – *რაც მჭირდება, ყველაფერი მაქვს.*

საკანში მღვდელი შევიდა, რათა გრენუისათვის აღსარება ეთქმევინებინა, მაგრამ მალე თავისი მისიის შეუსრულებლად გამოვიდა უკანვე. მსჯავრდებულმა ღვთის სახელით ხსენებაზე ისეთი განდგომილი მხერით შეხედა, თითქოსდა მხოლოდ ახლა, პირველად გაიგო ეს სიტყვა, მერე კი ტახტზე გაიჭიმა და ძილს მისცა თავი. შეგონებებს აზრი აღარ ჰქონდაო, – თქვა მოძღვარმა.

უამრავი ხალხი მოდიოდა შემდგომი ორი დღის განმავლობაში, სახელგანთქარნილი მკვლელის საკუთარი თვალთ სანახავად. დარაჯები უფლებას იძლეოდნენ სათვალთვალო ჭრილიდან შეეხედათ საკანში და ამისათვის ექვს სოლდოს ართმევდნენ. ერთი ვიღაც სპილენძზე პორტრეტების ამომჭრელი იძულებული გახდა, ექვსი ფრანკი გადაეხადა – პროფილის მონახაზის გასაკეთებლად. შედეგი უვარგისი გამოვიდა: მაჯებსა და კოჭებზე ჯაჭვგამობმულ პატიმარს უმეტესწილად ტახტზე გაწოლილს ეძინა, სახით კედლისაკენ და არც ბრახუნსა და არც ძახილს არავითარ ყურადღებას არ აქცევდა. მომსვლელებს კი საკანში შესვლა სასტიკად ეკრძალებოდათ და დარაჯები, მაცდუნებელი წინადადებების მიუხედავად, ამ აკრძალვის დარღვევას ვერ ბედავდნენ – შიშობდნენ, პატიმარი ნაადრევად არ მოეკლა რომელიმე მსხვერპლის ახლობელს. ამავე მიზეზით არ გადასცემდნენ ხოლმე მნახველების მოტანილ საჭმელს – ვაითუ მოწამლული ყოფილიყო.

გრენუი საპატიმროში ეპისკოფოსის სამზარეულოდან იღებდა საკვებს და მთავარი ზედამხედველი ვალდებული იყო ყოველი კერძი თავად გაესინჯა წინდაწინ. თუმცაღა, ბოლო ორი დღე გრენუი საერთოდ არ გაკარებია საჭმელს. იწვა და ეძინა. დრო და დრო მისი ჯაჭვები აჟღარუნდებოდა და და-

რაჯი, რომელიც მაშინვე კარის საჭვრეტს მივარდებოდა ხოლმე, თვალსდა თუ შეავლებდა, როგორ მოსვამდა გრენუი წყალს მათარიდან, ისევ ტანტზე წამოწვებოდა და კვლავ იძინებდა. იფიქრებდით, ეს ადამიანი იმდენად მოექანცა ცხოვრებას, უკანასკნელი საათებიც კი არ სურს სიფხიზლეში გაატაროსო...

ამასობაში დიუკურის კარიბჭესთან ადგილი მოამზადეს განაჩენის აღსასრულებლად. ხუროებმა ორი მეტრის სიმაღლის ეშაფოტი შეკრეს, მოაჯირებითა და მტკიცე კიბით – ასეთი დიდებული რამ გრასში მანამდე არც ენახათ. ამას გარდა, საპატიო სტუმრებისათვის ხის ტრიბუნა წამოჭიმეს და ღობე, უბირი ხალხის შესაკავებლად. იმ სახლების ფანჯრები მარჯვნივ და მარცხნივ, რომლებიც დიუკურის ჭიშკარსა და ქალაქის დაცვის შენობას შორის იყო განლაგებული, კარგა ხნის გაქირავებული გახლდათ ზღაპრულ ფასებში. თავშესაფარშიც, რომელიც ოდნავ გვერდულად იდგა, ჯალათის თანამემწე ოთახებიდან გამოიყვანა ავადმყოფები და ეს ფანჯრებიც დიდი მოგებით მიაქირავა ცნობისმოყვარეებს. ლიმონათის დამტარებლები ძირტკბილას იმარაგებდნენ, ტვიფრების მჭრელს მკვლელის ციხეში ჩახატული და თავისი ფანტაზიით შელამაზებული პორტრეტის რამდენიმე ასეული ეგზემპლარი ამოტვიფრა, ათეულობით მოხეტიალე ვაჭარი შემოეხეტა ქალაქში, მეფურნეები სამახსოვრო კვერებს აცნობდნენ...

ჯალათმა, მუსიე პაპენმა, რომელსაც მრავალი წლის მანძილზე არა ჰყოლია ისეთი მსჯავრდებული, ვისთვისაც სახსრები უნდა გადაემსხვრია, მჭედელს ოთხუთხა, რკინის კეტი შეუკვეთა და იმ კეტით სასაკლოაზე დადიოდა, რათა ცხოველების ლეშზე ევარჯიშა. წესად ჰქონდა, მხოლოდ თორმეტი დარტყმით უეჭველად გადაემსხვრია თორმეტივე სახსარი და, ამავე დროს, სხეულის სხვა მნიშვნელოვანი ნაწილები არ დაეზიანებინა – ვთქვათ, მკერდი ან თავი – მეტად მძიმე ამოცანაა, რაიც თითების უაღრეს მგრძობიარობას საჭიროებს.

ქალაქის მაცხოვრებლები, როგორც დიდის რამ დღესასწაულის მოლოდინში, ისე ემზადებოდნენ ამ მოვლენისათვის. რა გასაკვირია, ეს დღე რომ უქმედ გამოცხადდა – ქალები საკვირაო მორთულობას დასტრიალებდნენ, კაცები მტვერს აცლიდნენ ქურთუკებს, სერთუკებს და წადებს იპრიალებდნენ; ვისაც სამხედრო წოდება ჰქონდა, ანდა რაიმე თანამდებობა – საამქროების ოსტატი იყო, ვექილი, ნოტარიუსი, სამძოს თავი ანდა რაიმე მნიშვნელოვანი პოსტი ეკავა მუნიციპალიტეტში – მუნდირს ან მოსახამს ან თოვლივით თეთრ, დაპუდრულ პარიკს ისწორებდა მხრებსა თუ თავზე. მორწმუნეები post factum* ეკლესიაში შეკრებას ვარაუდობდნენ წირვალოცვისათვის. სატანის თავყანისმცემლები – მდიდრული სამადლობელი მესის მოწყობას ლუციფერისათვის, განათლებული მაღალი საზოგადოება – მაგნიტურ სეანსებზე გამგზავრებას კაბრის, ვილნევის და ფონ-მიშელის სას-

* მომხდარის მერე (ლათ.)

ტუმროებში. სამზარეულოებში მთელი გაქანებით აცხობდნენ და წვაკდნენ, სარდაფებიდან ღვინოები მოჰქონდათ, ბაზრებიდან – ყვავილები მაგიდების მოსართავად, ტაძარში ორღანისტი და მოძღვრალთა გუნდი რეპეტიციებს ვერ აუდიოდნენ...

მხოლოდ დრუატის ქუჩაზე, რიშის სახლში სუფევდა სიწყნარე. სახლის პატრონმა საკუთარ თავს ამ, როგორც ხალხში ეძახდნენ, *განთავისუფლების დღისადმი* ყოველგვარი სამზადისი აუკრძალა. ყველაფერი ეზიზღებოდა – ეზიზღებოდა ხალხში მოულოდნელად აღმდგარი თავზარი, ეზიზღებოდა დასჯის ეს ცხროიანი წინასწარტეობაც და თავად ისინი, თანამოქალაქეები, ყველა ერთად ეზიზღებოდა. რიში არც დამნაშავესა და მის მსხვერპლთა წარდგენაში მონაწილეობდა ტაძრის მოედანზე, არც კვლევა-ძიების მსვლელობაში, და არც უსაქმურთა თავყრილობებში მკვლელის საკნის კართან. თავისი ქალიშვილის თმებისა და სამოსის ამოსაცნობად სახლში მოიწვია სასამართლოს ბოქაულები, მოკლედ და თავშეკავებულად მისცა ჩვენება და ითხოვა, რომ ეს ნივთები, როგორც სამახსოვრო, მისთვის დაეტოვებინათ, რაც შეუსრულეს კიდევც. რიშიმ ლაურას ოთახში წაიღო ისინი, ღამის პერანგი და საცვალი საწოლზე გადააფინა, ბალიშზე გაშალა ლაურას ჟღალი თმები, საწოლის წინ დაჯდა და მეტად აღარც მოსცილებია იქაურობას, თითქოსდა ამ მუდმივ გუშაგობას შეეძლო შეევესო ის, რაც მან იმ ღამეს არ გააკეთა ლა-ნაპულიში. იმდენად იყო სავსე ზიზღით, ზიზღით მთელი ქვეყნისა და საკუთარი თავის მიმართ, ეული ცრემლიც ვეღარ გადმოიღინა თვალიდან.

რიშის მკვლელიც ეზიზღებოდა. არ სურდა, მასში ადამიანი დაენახა – მხოლოდ შესაწირავი, ზვარაკი, სამსხვერპლო ხორცი. მას მხოლოდ დასჯის წუთებში იხილავს, როდესაც გრენუი ჯვარს იქნება გაკრული და თორმეტი დარტყმა დაატყდება სხეულზე. აი, როდის დაინახავს მას, დაინახავს სრულიად ახლოს, მან ხომ წინა რიგში შეუკვეთა თავისთვის ადგილი. და როდესაც ხალხი დაიშლება, რამდენიმე საათის შემდეგ, ავა მასთან სისხლიან ეშაფოტზე, გვერდით დაუჯდება, უდარაჯებს დღისით თუ ღამით, როგორც გამოვა, თვალბში ჩააჩერდება მას – მისი ქალიშვილის მკვლელს და მანამ, წვეთწვეთობით ჩაუღვრის თვალბში მთელ თავის ზიზღს, თავის სამსალას, ვიდრე ის საზიზღარი არ ჩაძაღღდება!.

და მერე? მერე რას იზამს? ეს კი აღარ იცოდა რიშიმ. შესაძლოა, თავის ჩვეულ ცხოვრებას დაუბრუნდეს, შესაძლოა, ცოლი მოიყვანოს, შესაძლოა, ბიჭიც გაუჩნდეს, შესაძლოა არც არაფერი გააკეთოს, იქნებ მოკვდეს კიდევც. ყოველივე ეს უკვე სულერთი იყო მისთვის. ამაზე ფიქრი ისეთივე უაზრობად მიაჩნდა, როგორც იმაზე, თუ რა უნდა აკეთო სიკვდილის შემდეგ: რა თქმა უნდა, აღარაფერი – ეს უკვე ახლავე იცოდა...

სიკვდილით დასჯა ნაშუადღევის ხუთ საათზე იყო დანიშნული. სანახაობების მოყვარულნი უკვე დილიდანვე შეგროვდნენ და ადგილები დაიკავეს. თან მოიტანეს სკამები, ფეხმოსართხმელი ბალიშები, სურსათი, ღვინო და ბავშვებიც მოიყოლეს. შუადღისათვის, როდესაც ქალაქში ყოველი მხრიდან სოფლის მაცხოვრებლებმა იწყეს დენა, დიუკურის კარიბჭესთან უკვე ისეთი სიმჭიდროვე იყო, ახალმოსულებს გრენბოლისკენ მიმავალი გზის გაყოლებას და გარშემო პლატოზე ტერასებად განლაგებულ ბაღებში მოუხდათ ადგილის ძებნა. მოხეტიალე ვაჭრებმა ხელი დაიცალეს, ხალხი ჭამდა და სვამდა, გარშემო ისეთი ყაყანი და სიმყარაღე იდგა, ბაზრობაზე რომ იცის ხოლმე. მალე ათიათას კაცამდე შეიკრიბა, გაცილებით მეტი, ვიდრე „დედოფალ ჟანდინის“ დღესასწაულზე, მეტი, ვიდრე ყველაზე დიდი ჯვრით სვლაზე, მეტი, ვიდრე ოდესმე შეკრებილან გრასში. ფერდობები ხალხით იყო მოფენილი, ხეებზე მიძვრებოდნენ, სახლების კედლებზე და სახურავებზე მიფოფხავდნენ, თავისუფალი ადგილი მხოლოდ მოედნის შუაგულში, მოაჯირებით გამოყოფილ მონაკვეთზე რჩებოდა – თითქოსდა ხალხით მოხელილი ცომიდან დანით ამოჭრილი ეს ადგილი ტრიბუნასა და ემაფოტისათვის, უეცრად თოჯინების თეატრის სცენასავით დაპატარავდა. და კიდევ ერთი, ვიწრო გასასვლელი დარჩა დიუკურის საგუმბაგოსა და დრუატის ქუჩამდე.

დაახლოებით სამი საათისთვის მუსიე პაპენი და მისი თანაშემწეებიც გამოჩნდნენ. ხალხი მათ კმაცოფილების გუგუნით შეეგება. ემაფოტთან ხის ძელებისაგან შეკრული ჯვარი მიიტანეს და ოთხ ხარიხაზე დაამაგრეს. ჯალათისა და დურგლის თანაშემწეების ყოველ მოქმედებას ბრბო ხმამაღალი შეძახილებით მიესალმებოდა; ხოლო ამის შემდეგ, როდესაც ემაფოტს პაპენი მიუახლოვდა თავისი კეტი, ჯვარს ყოველი მხრიდან შემოუარა, გადათვალა გასაკეთებელი ნაბიჯები და ხან ერთი, ხან მეორე მხრიდან, სავარჯიშოდ, ჰაერში კეტის ქნევას მოჰყვა, ხალხმა ტაში დასცხო.

ოთხი საათისთვის ტრიბუნამ შეესება დაიწყო. ბევრი კეთილშობილი გვამი გამოცხადდა — ასე რომ, დახვეწილი მანერები, ლამაზი ქალები, ათასნაირი ქუდები, ბრწყინვალე ტუალეტები – მოკლედ, ბევრი რამ იყო მხერის დასატკბობი. ქალაქისა და პროვინციის მთელი დიდკაცობა შეიკრიბა: მჭიდრო რიგად შეკრული ქალაქის საბჭოს წევრები, ორივე კონსულის წინამძღოლობით, თავიანთ ადგილებს იკავებდნენ. რიში ერთთავად შავებში იყო ჩაცმული — შავი წინდები, შავი ქუდი... საბჭოს შემდგომ მაგისტრატი განლაგდა სასამართლოს თავმჯდომარის ხელმძღვანელობით. სულ ბოლოს ეპისკოფოსი გამოჩნდა, ღია ჯალამბარში მჯდომი, იისფერი სამოსის ბრწყინვითა და ხასხასა მწვანე ხავრდის კუნკულით. მათ, ვისაც ქუდი ჯერ არ მოეხადა, იჩქარეს ახლა მაინც მოეშვლიათ. სადღესასწაულო წუთები ახლოვდებოდა.

ბატონებმა თავისი ადგილები დაიკავეს, ხალხი გაირინდა, ყველანი ელოდნენ. პაპენი და მისი თანაშემწეები ჩარჭობილებით იდგნენ ემაფოტის ფიცარნაგზე. თბილი ქარი უბერავდა გრასის დაბლობიდან და აყვავებული ფორ-

თოხლის ხეების სურნელი მოჰქონდა. ბოლოს, როდესაც უკვე ისეთი შთაბეჭდილება შეიქმნა, დაძაბულობამ ზღვარს მიაღწია და ათასხმოვანი კივილი საცაა სიჩუმეს გაფლითავს, ბრბოში კიდე ჩხუბი, ჯგლეთა, ზედახორა და ერთი ყალილა ატყვებო, ფლოქვების თქარუნი და ბორბლების ჭრიალი გაისმა.

დრუატის ქუჩაზე ორცხენშებმული ეტლი გამოჩნდა, ქალაქის ჭიშკარი გამოიარა და უკვე ყველას დასანახად შემოუხვია იმ ვიწრობში, ეშაფოტისკენ რომ მიდიოდა. განსასჯელის ადგილზე მიყვანის ეს ხერხი პოლიციის ლიეტენანტმა დაიჟინა, ვინაიდან ეჭვობდა, სხვანაირად თუ შეძლებდა დამნაშავეის უსაფრთხოების უზრუნველყოფას. საერთოდ კი, ციხე სულ ხუთი წუთის სავალზე იყო დასჯის ადგილიდან და თუ სიკვდილმისჯილს რაიმე მიზეზის გამო არ შეეძლო ამ მანძილის ფეხით გავლა, იგი ვირშებმული ღია საზიდარით გადმოჰყავდათ ხოლმე; მაგრამ ვინმე რომ თავის საკუთარ სამსჯავროზე მდიდრული ეკიპაჟით, მეეტლითა და ცხენოსანი ესკორტით მოეყვანათ – ასეთი რამ ჯერ არასოდეს მომხდარა გრასში!

მაგრამ ბრბოში არც შემოფოთება და არც რაიმე უკმაყოფილება არ იგრძნობოდა: პირიქით, ეკიპაჟი ისე აღიქვეს, როგორც წარმატებული რამ იდეა, დაახლოებით ისე, როგორც თეატრში ხედებიან კეთილგანწყობით რომელიმე ცნობილი პიესის მოულოდნელ, ახალ გადაწყვეტას. ბევრმა მართებულად კი მიიჩნია მთავარი გმირის ამგვარი გამოსვლა – ამგვარ განსაკუთრებულ დამნაშავეს, მოპყრობაც განსაკუთრებული შეეფერებაო; ხომ არ შეიძლება, ისიც ჩვეულებრივი ყაჩაღივით გაბაწრული გადაადლოლო მოედანზე და კეტები ურტყა... სულ სხვა საქმეა მდიდრული კარეტის სავარძლიდან რომ წამოაყენებ და ჯვართან მიიყვან – ამაში გაცილებით მეტი, გააზრებულ სისასტიკეა!

ეტლი ეშაფოტსა და ტრიბუნას შორის გაჩერდა. ბოქაულები ეცნენ, კარი გამოადეს და პატარა, გასაშლელი კიბე ჩამოუშვეს. ჯერ პოლიციის ლიეტენანტი გადმოვიდა, შემდეგ დაცვის ოფიცერი და ბოლოს გრენუი – ცისფერ ქურთუკში, თეთრ ხალათში, თეთრ აბრეშუმის წინდებსა და ბალთებიან შავ ფეხსაცმელში გახლდათ გამოწყობილი. არც ხუნდები ელო, არც ხელით იჭერდა ვინმე. ისე გადმოვიდა, როგორც თავისუფალი ადამიანი.

და სწორედ მაშინ მოხდა სასწაული. ყოველ შემთხვევაში, სასწაულის მსგავსი რამ – ისეთი შეუცნობელი, გაუგონარი და დაუჯერებელი, რომ მისი ყველა მოწმე სასწაულს დაუძახებდა, თუკი ოდესმე გაბედავდა ამ თემაზე ლაპარაკს! მათ კი ამაზე სიტყვაც არასოდეს დაუძრავთ ოდესმე, ვინაიდან თითოეულ მათგანს რცხვენოდა იმის აღიარება, რომ საერთოდ მონაწილეობდა ამ ამბავში...

საქმე ის იყო, რომ ათი ათასი ადამიანი – მოედანზე, ჭიშკართან თუ გარშემორტყმულ ფერდობებზე – მოულოდნელად, წამიერად გაიჟინათა ურყევი რწმენით, რომ ცისფერ ქურთუკში გამოწყობილი ეს პატარა ადამიანი, ახლახანს რომ გადმოვიდა ეტლიდან, არანაირად არ შეიძლებოდა,

მკვლელი ყოფილიყო! არა იმიტომ, თითქოს მის ერთპიროვნულობაში შეეპარათ ეჭვი – მათ წინ სწორედ ის ადამიანი იდგა, რომელიც რამოდენიმე დღის წინ ენახათ სასამართლოს შენობის ფანჯარაში და რომელსაც ისინი შემოწმებული სიძულვილით იქვე ჩაქოლავდნენ, ხელში რომ ჩავარდნოდან — რომელსაც ორი დღის წინ, სრულიად კანონიერად, უცილო სამხილებისა და საკუთარი აღიარების საფუძველზე მიესაჯა სიკვდილი, სწორედ ის, ვის მოკვდინებასაც მთელი ჟინით ელოდნენ სულ ამ ერთი წუთის წინ... ის იყო, უეჭველად!

და მაინც არა, არ შეიძლებოდა, არ შეიძლებოდა მკვლელი ყოფილიყო — ეს ადამიანი, რომელიც ახლა დასჯის ადგილას იდგა, უბიწოების განსახიერება გახლდათ. იმ წამებში ეს ყველამ გაიაზრა — ეპისკოპოსიდან მეთულუხემდე, მარკიზიდან მრეცხავამდე, სასამართლოს თავმჯდომარიდან — ქუჩის ბიჭამდე...

და პაპენმაც იცოდა ეს: ფუთიანი მუშტები აუკანკალდა, დაკუნთული მკლავები მოემჩვარა, მუხლები ლამის მოეკვეთა და გულიც ისე შეუფრთხილდა, უმწეო ბავშვს რომ შეეფერება; ვერ შეძლებდა პაპენი ამ რკინის კეტის აწევას, სიცოცხლეში არ ეყოფოდა ძალა, ხელი აღემართა ამ პატარა, უდანაშაულო ადამიანზე! პაპენი აქვითინდა და თავის მომაკვდინებელ იარაღს დაეყრდნო, რათა მუხლებზე არ დაცემულიყო — ეს კლდეკაცი პაპენი!

და გარშემო მყოფი ათასობით სხვაც იმავეს განიცდიდა: ტალღასავით დაატყდათ სინახის, უაზრო ბავშვური სიყვარულის უსაზღვრო გრძნობა — დიახ, ხედავს ღმერთი — სიყვარულის გრძნობა ავაზაკის მიმართ და არ შეეძლოთ, არც სურდათ, ამ გრძნობას აღდგომოდნენ წინ! ეს გოდებასავით იყო, რომლისგანაც საშველი არ არის, რომელიც სიღრმიდან, გულ-ჯივრიდან ამოდის და გთენთავს და გაბრუებს, შემოგაცლის ყველაფერს, რაც კი მას ეწინააღმდეგება. ხალხი თითქოსდა დადნა, გაიხსნა, ამორფულ, თხევად სტიქიად იქცა და მხოლოდ გულის პატარა გუნდასდა გრძნობდნენ, სადღაც სიღრმეში გააფრთხილებით რომ ფეთქავდა და მათ, თითოეულმა მათგანმა სამარადჟამოდ ჩაუდო ეს გული ცისფერქურთუკიან პატარა კაცუნას ხელის-გულში: მათ იგი *უყვარდათ!*

გრენუი უკვე რამდენიმე წუთის განმავლობაში გაუნძრევლად იდგა ეტლის გამოღებულ კართან. მის გვერდზე ვიდაც ლაქია ჯერ მუხლებზე დაემუკა და ბოლოს კი ის განრთხმული პოზა მიიღო, რომელსაც აღმოსავლეთში სულთანის ან ფადიშაჰის წინაშე იღებენ; და ამ მდგომარეობაშიც კიდევ კანკალებდა და ცდილობდა, უფრო დაბლა წასულიყო, მთლად მიწის ქვეშ განრთხმულიყო, მიწის მეორე კიდემდე განწვალულიყო — წმინდა ერთგულებისა გამო... დაცვის ოფიცერმა და პოლიციის ლეიტენანტმა, ორმა ჯანიანმა მამაკაცმა, ვის მოვალეობაშიც მსჯავრდებულის ეშაფოტამდე მიყვანა და ჯალათისათვის მისი გადაბარება შედიოდა, ატირდნენ და ქულები მოიხადეს, შემდეგ ისევ დაიხურეს, მოიხადეს და მიწაზე დაყარეს, ერთმანეთს გადაეხვივნენ, დაშორდნენ, ხელების უაზროდ ქნევა იწყეს ჰაერში, გულამომ-

ჯდარნი იცრემლებოდნენ, იკრუნჩხებოდნენ და იმანჭებოდნენ, როგორც რომ წმინდა ვიტის როკით შეპყრობილნი.

მომორებით მყოფი პატივცემული მოქალაქეებიც სრულად მიენდვნენ ამ ყოვლისმომცველ გრძნობას – იყვნენ ქალბატონები, რომლებმაც გრენუის დანახვაზე მომუჭული მუშტები მუხლებს შორის ჩაიტენეს და ნეტარებისაგან კენესოდნენ; სხვები კიდეც, ამ ღვთაებრივი ყმაწვილისადმი – ვინაიდან, სწორედ ასეთად ეჩვენებოდათ – ვნებიანი ჟინით გატაცებულნი, ხმის ამოუღებლად ძირს ეცემოდნენ გულწასულები. სხვანი, კეთილშობილი ბატონები, უეცრად წამოიჭრნენ თავიანთი სკამებიდან და ისევ დაეხეთქნენ და ისევ წამოხტნენ, საყელოები შემოიგლიჯეს, ქმინავდნენ და დაშნების სახელურებს უჭერდნენ ხელს, ამოსწევდნენ მათ ქარქაშიდან და უკანვე ტენიდნენ ქარქაშში; სხვებიც იყვნენ, უჩუმრად რომ ააპყრეს თვალები ზეცას, დაკრუნჩხული თითები ერთუროს გადააწნეს და სალოცავად მიიკრეს გულზე; და მონსინიორ ეპისკოფოსი, თითქოს უეცრად შეუძლოდ გახდაო, მთელი ტანით გადაიხარა წინ, სახე მუხლებში ჩარგო და მწვანე კუნკული უკულმა გადმოეფარა თავზე; ამ დროს შეუძლოდ სულაც არ იყო – პირიქით, პირველად თავის სიცოცხლეში, სარწმუნოებრივმა აღტკინებამ წამოუარა, ვინაიდან ყველას თვალწინ სასწაული მოხდა: უფალმა ღმერთმა პირადადა შეაკავა ჯალათის ხელი, გამოამჟღავნა ანგელოზური არსი ადამიანისა, ვისაც ქვეყანა მკვლელად მიიჩნევდა – ჭეშმარიტად, ღიდ არს უფალი! ხოლო შენ მუძლი ხარ და არარაობა, ვინაიდან ანგელოზი გადაეცი ანათემას, თავადაც ურწმუნომ, მხოლოდ ხალხის დასამშვიდებლად! ჰოი, რაგვარი კადნიერებაა, რაოდენი მცირედმორწმუნეობა! და აი, სასწაული მოაველინა უფალმა! ბრწყინვალე დამცირებაა, რაოდენ ტკბილი დამცრობა – წყალობა ღვთისაგან ბოძებული – ცუდმედილობის დასათრგუნავად!

ამ დროს ხალხი, თეჯირების გარშემო რომ იდგა, იმ გრძნობათა სიმთვრალეს მიეცა, რომელმაც გრენუის გამოჩენისთანავე მოიცვა ყველა: ის, ვინაც პირველი დანახვისას მხოლოდ თანალმობა და გულის აჩუყება შეიგრძნო, ამჯერად გულისთქმით აღივსო; ის, ვინც სასოება განიცადა, თავდავიწყებას მიეცა. ცისფექურთუკიანი კაცუნა ისე წარდგა ყველას წინაშე, როგორც ულამაზესი, უმშვენიერესი, ყოვლად სრულქმნილი არსება, ვისი წარმოდგენაც კი მათ შეეძლოთ: მონაზვნებს ზორცმესხმულ მაცხოვრად ესახებოდათ, სატანის თავყვანისმცემლებს – ქვესკნელის პირქუშ რაინდად, უგზოუკვლოდ ნაკითხ მწიგნობართ – მავან ზეკაცად, ქალიშვილებს – ზღაპრულ მეფისწულად, მამაკაცებს – საკუთარ შორეულ სახებად... ისეთი შეგრძნება ჰქონდათ, თითქოს მათი ყველაზე მგრძნობიარე ადგილისათვის მიეგნო სხეულში, და თითებით მოესინჯა იგი, ეროგენულ ცენტრში დაეკოდა ყოველი მათგანი; ამ ადამიანს ათასობით უხილავი ხელი ჰქონდა თითქოს, და თითოეულ მათგანისათვის დაედო ხელი ესე მათსა სარცხვინელსა ზედა – ეფერებოდა, ეალერსებოდა ისე, როგორც მხოლოდ უიდუმალეს ზმანებებში თუ მოლანდებიათ...

ასე და ამგვარად, თავისი დროის უსაზიზღრესი დამნაშავეის დასჯა ისეთ ბაქხანალიად იქცა, როგორსაც ქრისტეშობიდან მეორე საუკუნის შემდგომ

კაცობრიობა აღარ შესწრება: ზნეკეთილი ქალები ხალათებს იგლეჯდნენ ტანზე, ისტერიული კივილით იშიშვლებდნენ მკერდს, წამოხდილი ქვედაკაბებით ებერტყებოდნენ მიწას... შეშლილთვალეებიანი მამაკაცები გადაშლართული სხეულებით მოფენილ მინდორზე დაბორილობდნენ, აკანკალებული თითებით იღებდნენ შარვლებიდან თითქოსდა გაქვავებულ ადრეკილებს და სადაც მოუხდებოდათ, იქ ეცემოდნენ ხრიალით, წყვილდებოდნენ წარმოუდგენელ მდგომარეობებსა და შეთავსებებში: ბერიკაცი – უმანკო ასულთან, დღიური მუშა – წარმატებული ვექილის ცოლთან, შეგირდი ბიჭი – მონაზონთან, იეზუიტი – ვინმე ფრანკმასონ ბანოვანთან, არეულ-დარეულად, ვისაც ვისთან მოუწევდა. ჰაერი დამძიმდა ავხორცული ოფლის მძიმე, მოტკბო-მომწარო სუნით და აივსო კივილით, ღრუტუნითა და კენესით. ნამდვილი ჯოჯოხეთი იდგა.

გრენუი კი იღიმებოდა. მეტიც, ყველას, ვინც კი შეხედავდა, ეჩვენებოდა რომ იგი უუმანკოესი, უალერსიანესი, უმოძიბლავესი და, საერთოდ, ამქვეყნად უთვალისმომჭრელესი ღიმილით იღიმებოდა. ოღონდაც, სინამდვილეში გესლიანი ღიმილი ეკლანებოდა ტუჩებზე გველევიით და მთელ მის ზიზღსა და სიძულვილს ირეკლავდა. იგი, ჟან-ბატისტ გრენუი, ქვეყნად უმყრალეს ალაგას ნაშობი, ნარჩენებიდან, ჭუჭყიდან და სიღამპლიდან გამოსული, უსიყვარულოდ გაზრდილი, ადამიანურ სითბოს მოკლებულმა რომ გამოათრია წუთისოფელი თავისი სიჯიუტისა და სიძულვილის წყალობით, პატარა, კუზიანი, კოჭლი, მახინჯი, უკუგდებული, ხორციელად და სულიერად ხეიბარი – იმას ეწია, რომ ქვეყანას მოსწონდა! ესეც ცოტაა – იგი უყვართ! ეთაყვანებიან! აღმერთებენ! პრომეთეს მსგავსია მისი გმირობა: ის, რაც აკვნიდანვე დაჰყვება ადამიანს არც არაფრის გამო, და რასაც იგი, ერთადერთი მსოფლიოში, არა ფლობდა, დაუსრულებელი, გაწაფული შეუპოვრობით მოაპოვა – მეტიც, თავადვე ამოკვეთა საკუთარ თავში!. პრომეთეზე დიადია, უეჭველად. იმგვარი აურა შექმნა საკუთარი თავისთვის, როგორც მანამდე არც არავის ჰქონია! და არც არავის უნდა უმაღლოდეს ამას – არავითარ მამას, დედასა თუ, მით უმეტეს, ვიღაც გულმონწყალე ღმერთს – იგი თავადაა საკუთარი თავის ღმერთი და გაცილებით დიდებული, ვიდრე ის, საკმევლის სუნით ამყრალებული უფალი, ეკლესიებს რომ აფარებს თავს... ცოცხალი ეპისკოფოსი ეგდო მის წინ მუხლებზე და სიამოვნებისაგან წკმუტუნებდა. მდიდარ, ძალაუფლების მქონე, ამაყ ბატონებსა და ქალბატონებს აღტაცებისაგან გული მისდიოდათ, ხოლო ფართო წრედ გარშემორტყმული ხალხი, მათ შორის მის მიერ მოკვდინებული გოგონების დედები, მამები, დები და ძმები მის საპატივცემულოდ ორგიას მართავდნენ! საკმარისია თითი დაუქნიოს, ზურგს შეაქცევინ ღმერთს და მის სახელზე, დიდებული გრენუის სახელზე ილოცებენ...

დიახ, დიდ არს გრენუი! სწორედ ახლა გაცხადდა ეს – ისეთივე დიადი, როგორც თავის ფანტაზიებში იყო, ოღონდაც ახლა ყველაფერი ეს სინამდვილეში ხდება! იმ წამს იგი თავისი სიცოცხლის უდიდეს ტრიუმფს ეწია.

და შეძრწუნდა გრენუი.

შემრწუნდა, რაკი ვერანაირი სიტკბო ვერ შეიგრძნო. იმ წუთებში, როდესაც თავისი საკნიდან მზით გაჩახჩახებულ მოედანზე გამოვიდა, როდესაც ნაპკურები ჰქონდა ის სუნამო, ადამიანებს რომ სიყვარულს უნერგავს, სუნამო, რომლის შექმნაზეც ორი წელი იმუშავა, სუნამო – მთელი ცხოვრება რომ სურდა და სწყუროდა... ამ წუთებში, როდესაც ხედავდა და იყნოსავდა რომ არა კაცს არ ძალედვა წინააღმდეგობა გაეწია და რომ სურნელი ქამანდის ყულფივით ექაჩებოდა მისკენ ყველას განურჩევლად – ამ წუთებში ისევე გაუღვივდა მთელი მისი სიძულვილი ადამიანების მიმართ და ისე მოუწამლა ეს ზეიმი, არა თუ სიხარული, ერთი ბეწო კმაყოფილებაც კი არ უგრძობია. ის, რაც მუდამ ასე ჟინიანად სწყუროდა – სხვა ადამიანებსაც ჰყვარებოდათ – ამ წარმატების წუთებში აუტანელი გაუხდა, ვინაიდან თავად კი არ უყვარდა, სძულდა!.. მოულოდნელად მიხვდა, რომ ვერასოდეს ჰპოვებს სიყვარულისაგან მოწვევად კმაყოფილებას, არამედ მხოლოდ სიძულვილს ადამიანები მიმართ, და ადამიანების სიძულვილს – მისადმი.

მაგრამ სიძულვილი მისი უპასუხოდ რჩებოდა: რაც უფრო მეტად სძულდა ისინი, მით მეტად აღმერთებდა ბრბო, ვინაიდან ვერაფერს აღიქვამდა მასში – მითვისებული აურის, არომის ნიღბის, მოპარული კეთილსურნელოვნების გარდა – ეს კი მართლაც რომ თავყვანისცემას ითხოვდა მხოლოდ...

ახლა მზად იყო პირისაგან მიწისა მოესრა ყველა ეს ჩლუნგი, ამყრალებული, აღტყინებული კაცუნა ისევე, როგორც ადრე თავის ყორნისფრთასავით შავი სულის ქვეყანაში უნდოდა ყოველი უცხო სურნელის წაშლა. და გულით სურდა შეემჩნიათ, როგორ სძულს ისინი და საპასუხო სიძულვილით ეპასუხათ ამ ერთადერთ ნაღდ გრძნობაზე, რომელიც კი ცხოვრებაში განუცდია, და თავის მხრიდანაც მოხარულნი ყოფილიყვნენ მისი მოშობისა, რასაც თავდაპირველად უპირებდნენ. ცხოვრებაში ერთადერთხელ მოუნდა ყოფილიყო ისეთი, როგორიც სხვა ადამიანები არიან და გარეთ გადმონთხია საკუთარი შინაგანი სამყარო: როგორც ისინი ამჟღავნებდნენ თავის სიყვარულსა და თავის ბრიყვეულ თავყვანისცემას, ისევე გამოემჟღავნებინა თავისი სიძულვილი; სურდა ერთხელ, ერთადერთხელ მაინც აღექვათ მისი ჭკუშმარიტი არსი და ადამიანებისაგან თავის ამ ერთადერთ ჭკუშმარიტ გრძნობაზე მაინც მიეღო გამოძახილი!.

ოღონდ არაფერი მსგავსი არ მომხდარა. და არც შეიძლებოდა რაიმე ასეთი მომხდარიყო, რადგან ამქვეყნად საუკეთესო სურნელით იყო შენიღბული, ხოლო ამ ნიღბის ქვეშ სახე არ ჰქონდა, არ ჰქონდა არაფერი, სუნის სრული უქონლობის გარდა. და უეცრად შეუძლოდ გახდა – როგორც მაშინ, გამოქვაბულში, ახლაც მასში რაღაც ნისლი წამოიგრაგნა, მისი საკუთარი სუნის შემზარავი არილი, რომლის ყნოსვით აღქმა შეუძლებელი გახლდათ, ვინაიდან ის სულ სხვა ბუნებისა იყო. და როგორც მაშინ, დაუსაბამო, შემზარავი ძრწოლა და ზაფრა იგრძნო და გაიფიქრა, სადაცაა გავიგუდებო...

ოღონდ ამჯერად ეს არც ზმანება იყო და არც სიზმარი, არამედ შიშველი სინამდვილე – მარტო კი არ იწვა გამოქვაბულში, არამედ მოედანზე იდგა ათი ათასი ადამიანის თვალწინ და ახლა ვერა კივილი ვერ უშველიდა, რომ

გაელვიძებინა და გაენთავისულებინა ამ კომმარისაგან, და არც გზა ჩანდა კეთილ, თბილ, გადამრჩენელ სამყაროში დასაბრუნებლად, ვინაიდან ეს უკვე აქ და ახლა სამყაროში იყო, და ეს აქ და ახლა იყო მისი ხორცშესხმული ზმანება.

და აკი თავად ისურვა ასე.

საზარელი, ყროლიანი ნისლი მოიწევდა მისი სულის უძირო საუფლოდან, ვიდრე მის გარშემო თავაშვებული, ავხორცული ჟრუანტელით ქანცგაწყვეტილი ხალხი კვნესოდა. უცებ მისკენ ვიღაც კაცი გამოქანდა, ისე სწრაფად გადმოიჭრა საპატიო სტუმრებისათვის განკუთვნილი ტრიბუნის წინა რიგებიდან, რომ შავი ქუდი ჩამოუვარდა და კალთებმოფრიალე შავი სერთუკით, როგორც ყორანმა, თუ როგორც შურისძიების ანგელოზმა გადმოიარა ეშაფოტზე. ეს რიში იყო.

“მომკლავს, – გაუელვა გრენუის. — ისაა ალბათ ერთადერთი, ვიზეც ჩემი ჯადო არ გაჭრის – მისი ქალიშვილის არომაა ახლა ჩემზე და ეს ისეთივე უცილო სამხილია, როგორც სისხლი. რიშიმ უნდა მიცნოს და მომკლას. ესაა იქნება ჩემი ბოლო...”

გრენუიმ ხელები გაიშვირა წინ, რათა მისკენ მომავალ შავ ანგელოზს გადახვეოდა. აი, თითქოს, გრძნობს კიდევ ტანზე ხანჯლის დარტყმას, იმ სა-ნუკვარ დარტყმას მკერდში, გრძნობს როგორ კვეთს მახვილი სურნელის ჯავშანსა და აყროლებულ ნისლებს და მის ცივ შიგანს აღწევს – როგორც იქნა, როგორც იქნა მასში არის რაღაც, რაღაც სხვა და არა მხოლოდ თვითონ. და, თითქოს უკვე იგრძნო კიდევ ხსნა!..

გაგიგონიათ?! რიში მის მკერდს ეკვროდა – არა შურისძიების ანგელოზი, არამედ აღელვებული, საწყალობლად ასლუკუნებული ბერიკაცი და ხელებით ებლაუჭებოდა – თითქოსდა, სიყვარულის ამ ზღვაში სხვა ნავსაყუდარი ვერ უპოვიაო. არავითარი შურისმგებელი დახანჯვლა, არავითარი ჩხვლეტა გულში, არც არავითარი წყევლა, ან თუნდაც სიძულვილის ამონაკივლი – ცრემლნასველები ლოყით გრენუის ლოყას მიეკრა, აკანკალებული ტუჩებით წკმუტუნებდა: „მაპატიე, შვილო ჩემო... მე მაპატიე!“

და აქ ყველაფერი ერთიანად გადაუთეთრდა თვალში, და ნისლი, რომელმაც გამოსავალი ვედარ იპოვა, აჩუხჩუხებულ სითხედ იქცა, ქაფის ქვემოდან ამომავალ ადუღებულ რძესავით; მერე ტალღასავით გადაუარა, აუტანელი ძალით დააწვა მისი სხეულის შიდა გარსს, მაგრამ მაინც ვერსაით გაჟონა. გრენუის გაქცევა სურდა, ღვთის გულისათვის – გაქცევა, მაგრამ საით... მაშინ განსკდომა მოუნდა, აფეთქება, რათა საკუთარ თავში არ ჩახრჩობილიყო. მერე დაეცა და ცნობა დაკარგა.

გონს რომ მოეგო, აღმოაჩინა — ლაურა რიშის საწოლზე წევს. ის რელიქვიები — ტანსაცმელი და თმები — აელაგებიანათ. ოღონდაც სასთუმალთან სანთელი ისევ ისე ენთო. მოზეიმე ხალხის შორეული ხმაური ისმოდა შედებულ ფანჯრიდან. ანტუან რიში პატარა, დაბალ სამფეხა სკამზე იჯდა, ხელში გრენუის ხელი ეჭირა და ფხიზლობდა.

ვიდრე თვალებს გაახელდა, გრენუიმ ჯერ გარშემო მოყნოსა. მის შინაგან არეში სიწყნარე სუფევდა — აღარაფერი ჩუხჩუხებდა და არ ითხოვდა გადმონთხევას. მის სულში ისევ ის ღამე გამეფებულიყო, რომელიც ასე სჭირდებოდა რათა ცნობიერება ყინულივით ცივი და ნათელი გაეხადა და ახლა გარე სამყაროსაკენ მიემართა იგი: იქ მან თავისი სუნამოს სუნი შეიყნოსა. სურნელი ოდნავ შეცვლილიყო: აქცენტები ოდნავ მოგლუვდნენ, ხოლო არომის გულისგული — ლაურა რიშის სურნელი — უფრო მეტად გამოიკვეთა, ეული სანთელივით ციალებდა სევდიანი, მოციმციმე ალით. და გრენუიმ თვალი გაახილა.

რიშის მხერაში უსახლვრო სიკეთე, სინაზე, თანაგრძნობა და შეყვარებულის უგუნური, ფუტურო სიღრმე იგრძნობოდა. გაიღიმა, თითები მოუჭირა გრენუის ხელს და წაიდუღუნა: „ახლა ყველაფერი კარგად იქნება. მაგისტრატმა გააუქმა თავისი განაჩენი. ყველა მოწმემ უარი თქვა საკუთარ ჩვენებაზე. თავისუფალი ხარ — რაც გინდა, ის შეგიძლია აკეთო. ოღონდ იქნებ ჩემთან დარჩენილიყავი... ქალიშვილი დაკარგე, ახლა შენ გიშვილებ. საოცრად გავხარ... ისეთივე მშვენიერი თმები, ტუჩები, ხელი... ზუსტად ისეთივე თლილი თითები. შენს მხერას რომ ვაწყდები, სულ მეჩვენება, ის შემომყურებს თითქოს... მინდა ჩემი შვილი გახდე, ჩემი სიხარული, ჩემი სიამაყე, ჩემი მემკვიდრე. მშობლები გყავს?“

გრენუიმ თავი გააქნია და რიშის სახე წამოუჭარხლდა მოძალებული გრძნობებისაგან. „მაშ, თანახმა ხარ, ჩემი შვილი გახდე?“ — და წამოხტა თავისი პატარა სკამიდან, საწოლის კიდეზე გადმოუჯდა, — „თანახმა ხარ? მართლა თანახმა ხარ? არაფერი თქვა, მხოლოდ თავი დამიქნე!“

გრენუიმ ოდნავ დაუქნია თავი და რიშის კანის ფორებიდან მაშინვე წითელი ოფლივით გამოჟონა ბედნიერებამ, გრენუისაკენ გადაიხარა და შუბლზე ეამბორა.

„ახლა კი მოისვენე, ჩემო, — და წელში გასწორდა. — მე გიდარაჯებ, ვიდრე დაიძინებდე...“ — და კიდევ დიდხანს დაჰყურებდა ჩუმი თავყვანისცემით. გრენუიმ ოდნავ გაჭიმა ტუჩები, თითქოს გაღიმებას ცდილობსო. მერე ისევ დახუჭა თვალი. ერთხანს იცდიდა, იწყნარებდა და იღრმავებდა სუნთქვას, ძილით თავწართმეულის მიბაძვით. სახეზე რიშის სიყვარულით აღსავსე მხერას გრძნობდა. ისიც იგრძნო, როდის დაიხარა მისკენ, თითქოს კიდევ ერთხელ უპირებდა კოცნას, მაგრამ გაღვიძების შიშით ვეღარ გაბედა. ბოლოს სანთელი ჩააქრო და თითის წვერებზე გასხლტა ოთახიდან.

გრენუი იწვა, ვიდრე სახლში და ქალაქში ხმაური არ მიწყნარდა. როდესაც წამოდგა, უკვე თენდებოდა. ჩაიცვა, ფრთხილად გაიარა დერეფანი, ფრთხილად ჩაიარა კიბეებზე და სასტუმრო ოთახით ტერასაზე გავიდა.

აქედან შეიძლებოდა ქალაქის კედლის მიღმა გადახედვა და გრასის დაბლობის მოხილვა, მოწმენდილ ამინდში კი ზღვაც მოჩანდა. ახლა მინდვრებზე მსუბუქი ნისლი თუ ბურუსი იდგა და ქვემოდან ბალახის, კურდღლისცოცხასა და ვარდების სურნელი აღწევდა. გრენუიმ ბალი გადაიარა და გალაგანზე გადაძვრა.

დიუკურის საგუშაგოსთან არაერთხელ მოუწია ადამიანების ანაორთქლებში გაღწევა, ვიდრე სამშვიდობოს გავიდოდა. მთელი მოედანი და ბორცვების ფერდობები გახრწნილ-გასავათებული ჯარის ერთ დიდ ბანაკს მოგაკონებდათ. ათასობით ეყარნენ გამომთვრალი, ღამის ორგის ზედმეტობისაგან ქანცგაწყვეტილი სხეულები. ზოგიერთი შიშველი იყო, ზოგი — ნახევრად შიშველი ან სანახევროდ დაფარული თავისივე ტანსაცმლით, რომლის ქვეშაც ისე შემძვრალიყვნენ, საბნის ქვეშ რომ ძვრებიან ზოლმე. გარშემო მჭავე ღვინის, არყის, ოფლისა და შარდის, ფაღარათატეხილი ბავშვისა და მიძწვარი ხორცის სიმყრალე იდგა. აქა-იქ ჯერ კიდევ ბოლავდა მიწაზე ნაგლეხი კოცონები. ალაგ-ალაგ, სმენაწამლებ ზვრინვაში, მოულოდნელად გამოაღწევდა ზოლმე ვისიმე ბუტბუტი ან ხარხარი. ეტყობოდა, ზოგიერთი ჯერ კიდევ ძილ-ღვიძილში იყო და ცნობიერების ბოლო გაელვებას იხშობდა. გრენუი ამ გაშხლართულ სხეულებზე გადადიოდა ფრთხილად და სწრაფად, თითქოს ჭაობზე გადადისო, და ვერც ვერავინ შეამჩნია, და რომც შეემჩნიათ, მაინც ვერავინ იცნობდა: სუნი მას აღარ ასდიოდა. სასწაულმა უკვე ჩაიარა.

როდესაც მოედნის ბოლომდე მივიდა, არც გრენობლის, არც კაბრის მხარეს არ გადაუხვევია, არამედ პირდაპირ დაადგა გზას დასავლეთის მიმართულებით, ისე რომ ერთხელ არ მოუხედავს უკან. მზე რომ ამოიწვერა — სქელი და ყვითელი და ცხელზე ცხელი, მისი კვალიც კი გამქრალიყო.

გრასის მცხოვრებლებმა საზიზღარი შეგრძნებით გაიღვიძეს ნაბახუსევზე. ისიც კი, ვისაც წვეთი არ დაეღია, თავში ტყვიის სიმძიმეს, მუცლის ჭრას, გულისრევასა და სისუსტეს გრძნობდა. მოედანზე, მთელი პატიოსანი თავყრილობს თანდასწრებით, გლეხები ორგის დროს შემოდარცულ ტანსაცმელს ეძებდნენ, ზნეკეთილი ქალბატონები — თავიანთ ქმრებსა და შვილებს. თავზარდაცემულნი ცალკევედობდნენ ერთმანეთს ჩახვეულნი, ერთმანეთისათვის სრულიად უცხო ადამიანები; ნაცნობები, მეზობლები, მეუღლეები მოულოდნელად და სახალხოდ, ყოვლად აუტანელი სიშიშვლით წარდგნენ ერთმანეთის წინაშე...

ბევრს ეს შემთხვევა იმდენად საზარელი, იმდენად აუხსნელი და საკუთარ ზნეობრივ წარმოდგენებთან იმდენად შეუთავსებელი ეჩვენა, რომ იმავე წამს სამუდამოდ ამოიშალა მეხსიერებიდან და მოგვიანებით ალაღად უჭირდა ამ ამბის დაჯერება; სხვები, რომლებიც ამდენად დამოუკიდებელ აღქმის უნარს მოკლებულნი იყვნენ, ცდილობდნენ არ დაენახათ, არ გაეგონათ, მეხსიერე-

ბაში არ აერეკლათ არაფერი. მათ, ვინც თავისი საკუთრება და ახლობლები მოძებნეს, სასწრაფოდ დატოვეს შემთხვევის ადგილი. ნაშუადღევისთვის მოედანი ისე დაცარიელდა, თითქოს ვიღაცამ ცოცხით მოგავაო.

ქალაქელები მხოლოდ საღამოს — და ისიც არა ყველა — გამოვიდნენ სახლებიდან გადაუდებელი საქმეებისათვის. შეხვედრისას, საღამს მოგუდულად ეუბნებოდნენ ერთმანეთს და ლაპარაკითაც მხოლოდ ორიოდ სიტყვას თუ დააგდებდნენ. გადაკვრითაც კი არ იხსენიებდნენ წუხანდელ ამბებს. თუ წინა დღით უშუალო და საღად მოაზროვნე ადამიანებად მიაჩნდათ თავი, ახლა სირცხვილის გრძნობას გაეთანგა ყველა, ოღონდ ისე ჩანდა, გრასის მაცხოვრებელთა შორის არასოდეს ყოფილა უკეთესი ურთიერთგაგება. ქალაქში უჩვეულო სიჩუმემ დაისადგურა.

თუმცა, მკვანნი მაინც იძულებულნი გახდნენ სამსახურებრივი მოვალეობის გამო უფრო უშუალოდ დაინტერესებულები იყვნენ იმით, რაც მოხდა. საზოგადო ცხოვრების ტრადიცია თუ მართლწესრიგის შეურყევლობა მათგან ენერგიული და ქმედითი ნაბიჯების გადადგმას ითხოვდა. ქალაქის საბჭო საღამომდე შეიკრიბა. ბატონები, მათ შორის მეორე კონსულიც, ჩუმად გადაეხვივნენ ერთმანეთს, თითქოს ეს ჟესტი საპატიო საკრებულოს ხელახლად დასაფუძნებლად ყოფილიყო გამიზნული. შემდეგ იმ ავბედითი მოვლენებისა და საერთოდ, გრენუის სახელის ხსენების გარეშე ერთხმად დაადგინეს: “დაუყოვნებლივ აიღონ დიუკურის მოედანზე მდებარე ტრიბუნა და ემაფოტი და თავდაპირველი, საყოველთაოდ მისაღები იერი დაუბრუნონ როგორც მოედანს, ისე მის გარეშემო მიმდებარე მინდორ-ველს. ზემოხსენებულ ღონისძიებაზე დამატებით ასსამოცი ლივრი გამოიყოს ქალაქის ხაზინიდან”.

ამავე დროს გაიმართა სასამართლოს სხდომაც. მაგისტრატი ყოველგვარი განხილვის გარეშე დათანხმდა, ამოწურულად ჩაეთვალა ე.წ. “ინციდენტი **ბ.**” — საქმე დაეხურათ, რეგისტრირების გარეშე მიებარებინათ არქივს და ახლა ახალი გამოძიება წამოეწყოთ გრასის ოლქში ოცდახუთი გოგონას უცნობი მკვლელის წინააღმდეგ. პოლიციის შეფს ებრძანა, დაუყოვნებლივ მიეყო ხელი ძიებისთვის.

თავის მხრივ, პოლიციამაც თავი გამოიღო და მეტად საეჭვო სამხილების საფუძველზე დააპატიმრა დომინიკ დრუიო — მენელსაცხებლე დე-ლა-ლუვის ქუჩიდან — ბოლოს და ბოლოს, ქონი, რომელშიც თმები და ტანსაცმელი იქნა ნაპოვნი, ხომ მისი საკუთრება იყო! ეჭვმიტანილი იმთავითვე უარყოფდა დანაშაულს, მაგრამ მოსამართლეებიც მაგრად დაუდგნენ და მათი შეცდომამში შეყვანის საშუალება არ მისცეს: თოთხმეტსაათიანი წამების შემდეგ დრუიო ყველაფერში გამოტყდა და ისიც კი ითხოვა, სასჯელის აღსრულება დაეჩქარებინათ, რაც იქვე დანიშნეს კიდევ მეორე დღისათვის. დრუიო განთიადისას ჩამოაზრჩვეს — ყოველგვარი ზარ-ზეიმის, ემაფოტისა და ტრიბუნების აღმართვის გარეშე; ესწრებოდნენ მხოლოდ ჯალათი, მაგისტრატის რამდენიმე წევრი, ექიმი და მღვდელი. როგორც კი სიკვდილის ფაქტი დაფიქსირდა, დამტკიცდა და ოქმში იქნა შეტანილი, ბრძანება გაიცა — გვამი სასწრაფოდ დაეფლათ. ასე და ამგვარად მოთავდა ეს საქმე.

ქალაქმა ისედაც უკვე დაივიწყა ყველაფერი — იმდენად, რომ შემდგომ დღეებში აქ მოხვედრილი ადამიანები, შემთხვევით რომ გაიკითხავდნენ რაიმეს სახელგანთქმული მკვლელის შესახებ, ერთ ჭკუადაძვდარ კაცსაც ვერ პოულობდნენ, ვინც რაიმე აზრიანი პასუხის გაცემას შეძლებდა. მხოლოდ უპოვართა თავშესაფრიდან ქალაქს მოწყალეების სათხოვნელად საღამომდე გამოშვებული რამდენიმე სალოსი ბოდავდა რაღაც სისულელეს რომელიღაც დიდი დღესასწაულის თაობაზე, რომლის გამოც მათ თავიანთი ოთახების დაცლაც კი მოუხდათ...

მოკლედ, ცხოვრება ძველ კალაპოტში ჩადგა. გრასის მოსახლეობა ბეჯითად შრომობდა, შშვიდად ეძინა, საქმიანობდა და ზნეკეთილად იქცეოდა. წყალი ძველებურად მოჩხრიალებდა მრავალი წყაროდან თუ ფშანიდან და ქუჩა-შუკებიდან ლამი და ნაგავი გაჰქონდა. ქალაქი ისევ ისე ამაყად აზიდულიყო ნაყოფიერი დაბლობის თავზე. მზე ჩახჩახებდა, მაისიც დადგა და ვარდის მოსავლის აღების დრომაც მოაწია.

პილოზი

51.

ქვეითად ვიდოდა გრენუი. ისევე, როგორც მოგზაურობის დასაბამიდან, გვერდს უვლიდა ქალაქებს, შარაგზებს გაურბოდა, განთიადისას დასაძინებლად ეწყობოდა, საღამოობით დგებოდა და გზას აგრძელებდა. ჭამდა იმას, რასაც გზაში იპოვიდა: ბალახებს, სოკოებს, ყვავილებს, მკვდარ ჩიტებს, მატლებს... გადასურა პროვანსი, მოპარული ნავით გადაცურა რონა — ორანჟის სამხრეთით, არდემის დინების გაყოლებაზე სევენის სიღრმეში შეაღწია და შემდეგ ჩრდილოეთით, ალექსკენ გაემართა.

ოვერნიში უკვე პლონ-დიუ-კანტალს მიუახლოვდა. მწვერვალი მისგან დასავლეთით წამომართულიყო, მთვრის სინათლეზე მოვერცხლისფრონაცრისფერი ელო და გრენუი მისგან მონაბერი ცივი ქარის სუნსაც შეიგრძნობდა; ოღონდ მთა ახლა აღარ იზიდავდა თავისკენ: ქვაბულში მარტობის მისეული ჟინიანი კაემანი გამქრალიყო — ეს ცდა სიცოცხლისათვის გამოუსადეგარი აღმოჩნდა; ზუსტად ისევე, როგორც ის მეორე მცდელობა — ადამიანთა შორის ცხოვრება რომ მოისურვა. ერთნაირად იგულები — როგორც აქ, ისე იქ. საერთოდ აღარ სურდა ცხოვრება. ახლა გრენუის პარიზში დაბრუნება და იქ სიკვდილი ერჩია.

დროდადრო ჯიბეში იყოფდა ხელს — მინის პაწია ფლაკონს ეთამაშებოდა, რომელშიც მისი სუნამო ესხა. ის ჯერ თითქმის საესე იყო, გრასში იმ მაქციაობის დროს სულ ერთ წვეთი დაეხარჯა. დანარჩენი საესეებით ეყოფოდა თუნდაც მთელი მსოფლიოს მოსაჯადოებლად. თუ მოესურვებოდა, შეეძლო პარიზში ასეულობით კი არა, ასეულობით ათასი ადამიანი გაეხადა იძულებული მისთვის თაყვანი ეცათ; ანდა ვერსალისაკენ გაესეირნა, რათა თვით მეფეს დაეკოცნა მუხლები მისთვის; ნოტრ-დამში იმპერატორთა-იმპერატორად ეკურთხებინა თავი; პაპისათვის გაეგზავნა ამ სუნამოთი ნაპკურები უსტარი და კაცობრიობას ახალ მაცხოვრად მოვლინებოდა...

ყველაფერ ამის აღსრულება შეეძლო, თუკი მოისურვილებდა. საამისო ძალაუფლება ხელში ეჭირა — ეს ფულის ძალაუფლებაზე მეტი იყო, ან თუნდაც ტერორის ძალაუფლებაზე, გინდა სიკვდილის ძალაუფლებაზეც ძლიერი: იმის უკიდევანო ძალმოსილება, სიყვარული ჩაუნერგო ხალხს... და მხოლოდ ერთი რამის მოცემა არ შეეძლო ამ ძალას: არ შეეძლო მისთვის მისი საკუთარი სუნი მიეცა. დაე, მთელი მსოფლიოს წინაშე თუნდაც ღმერთად გარდამოვიდეს ამ სუნამოს წყალობით — რაკილა თავად არ შეუძლია საკუთარი სუნი იკრას და ამიტომაც ვერც ვერასოდეს გაიგებს თუ რას წარმოადგენს თავად, ჯანდაბამდეც გზა ჰქონია ყველაფერს — ამ თავის სუნამოს, საკუთარ თავსა და მთელ სამყაროს!.

თითებს, რომელთაც ახლახანს ფლაკონი ეჭირათ, ძლივს შესამჩნევი სურნელი აპყოლოდათ და როდესაც ცხვირთან მიჰქონდა და ყნოსავდა, სევდა იპყრობდა ხოლმე; რამდენიმე წამით ჩერდებოდა, და იღვა, და ყნოსავდა... “არავინ უწყის, სინამდვილეში მართლა რამდენად კარგია ეს სუნამო, — ფიქრობდა გრენუი, — ყველანი მხოლოდ ემონებიან მის ზემოქმედებას და არც იციან, რომ ეს სუნამოს გამოა ყველაფერი, მისი ჯადოქრული ხიბლის ბრალი... მე ვარ ერთადერთი, რადგან თავად შევქმენი და ამავე დროს — ერთადერთი, ვისზეც მისი ჯადო არ მოქმედებს, ვის წინაშეც მისი ხიბლიც კი უძლურია!”

და კიდევ ერთხელ (უკვე ბურგუნდიის სანახებში) გრენუიმ გაიფიქრა: იქნებ როდესაც ქვის კედლის წინ ვიდექი ბაღთან, სადაც ის ჟღალთმიანი გოგონა თამაშობდა და ჩემამდე აღწევდა მისი სურნელი... უფრო სწორად, ჯერ არარსებული არომის იმედი — შესაძლოა, რაც მე ვიგრძენი მაშინ, სწორედ ისაა, რასაც ხალხი გრძნობდა გრასის მოედანზე? არა, აქ რაღაც სხვაა — მე იმთავითვე ვიცოდი, რომ სურნელი მსურდა მიმეთვისებინა და არა გოგონა, ის ხალხი კიდევ ფიქრობდა, რომ ჩემკენ მოილტვოდნენ, ხოლო რაც სინამდვილეში იზიდავდა მათ, მაინც გამოცანად დაურჩათ...

ამ დასკვნის გამოტანის მერე აღარაფერზე უფიქრია, რადგან მაინცა და მაინც არც უყვარდა ფიქრისათვის თავის მიცემა. მალე კი ორლენს მიაღდა.

ლუარა სიულისთან გადალახა გრენუიმ. ერთი დღის შემდეგ მისმა ცხვირმა უკვე პარიზის სუნი იყნოსა. 1767 წლის 25 ივნისს, დილის ექვს საათზე, გრენუიმ სენ-ჟაკის ქუჩით ქალაქში შეაბიჯა.

საოცრად ცხელი დღე დგებოდა, ასეთი ხვატი საერთოდ არ ყოფილა იმ წელს. ათასობით სუნი და ანაორთქლი ისე მოედინებოდა ქუჩებში, როგორც ჩირქი გამსკლარი მუწუკიდან. ნიავის ძვრა არ იყო; ბაზრების დახლებზე მწვანელი ჯერ კიდევ შუადღემდე დაჰკნა, აყროლდა ხორცი და თევზი. ჩისებშიც საზიზღარი ოხშივარი ლივლივებდა. თითქოს მდინარეც კი აღარ მიედინებოდა, გუბდებოდა თითქოს და ისიც ჭაობის ყროლს გამოსცემდა.

და ეს ზუსტად ჟან-ბატისტ გრენუის დაბადების დღეს დაემთხვა.

გრენუი ახალი ხდით გადავიდა მარჯვენა ნაპირზე და ბაზრისა და უმანკოდ გვემდითა სასაფლავოს მხარეს გააგრძელა გზა. ო'ფერის ქუჩის გაყოლებასზე, ღვთისმორწყალების სახლების თაღებქვეშ, ქვაზე ჩამოჯდა. მის წინ ახლა სასაფლაო გადაშლილიყო გადათხრილი ბრძოლის ველივით — დაღარული, საფლავებით დასერილი, თავის ქალებითა და ჩონჩხებით მოფენილი; უხეებოდ, უბუჩქებოდ, უბალახოდ — სიკვდილის სანაგვე.

გარეშემო სულიერი არ ჭაჭანებდა: გვამების სიმყრალე იმდენად მძიმე იყო, მესაფლავეებმაც კი დაყარეს ფარ-ხმალი. ისინი მხოლოდ მზის ჩასვლის მერე მოდიოდნენ, რათა შუადამემდე, ჩირაღდნების შუქზე ეთხარათ საფლავეები. მხოლოდ შუადამის შემდეგ — მესაფლავეები უკვე წასული-ყვნენ — იწყო შეკრება ყოველნაირმა ნაყარ-ნუყარმა: ქურდებმა, მკვლელებმა, შარაგზის ყაჩაღებმა, კახპებმა, მამათმავლებმა, დეზერტირებმა, მცირეწლოვანმა დამნაშავეებმა... პატარა კოცონი დაანთეს, რომ სალაფავი მოეხარშათ და სიმყრალეც იქნებ ოდნავ გაექარვებინათ.

თავიდან ყურადღება არავის მიუქცევია გრენუისთვის, რომელიც თაღებქვეშიდან გამოვიდა და ამ ჯგროს შეუერთდა. ისე დაუბრკოლებლად შეძლო კოცონთან მისვლა, თითქოს ერთ-ერთი მათგანიყო. მოგვიანებით ამან განამტკიცა კიდევ მოსაზრება, რომ საქმე ავსულთან, ან ანგელოზთან ჰქონდათ. ყოველ შემთხვევაში, სხვა დროს ისინი მუდამ მტრულად ხვდებოდნენ ხოლმე უცხოს.

ახლა კი ეს ცისფერქურთუკიანი ქონდრისკაცი ისე მოულოდნელად აღმოჩნდა მათ შორის, თითქოს მიწიდან ამოიზარდაო პაწია ფლაკონით ხელში; მერე საცობი ამოაძრო, მთელი შიგთავსი ზედ გადაისხა და ვითარცა სხივმფინარი ალისაგან, ისე გაბრწყინდა არაამქვეყნიური მშვენიერებით!.

ამ წამებში ყველამ უკან დაიწია — მოწიწებისა და უკიდვანო გაოცებისაგან; თუმც კი იმგვარი შეგრძნება ჰქონდათ, რომ პირიქით — თითქოსდა ზროვად ეცნენ, მოწიწება მითვისების სურვილად ექცათ, გაოცება — აღტ-

კინებად. ეს ადამიანი-ანგელოზი ბასილისკოს თვალივით აქვაკვებდა მათ, მისგან იმგვარი მომწუსხავი ნელსურნელება მოედინებოდა, რომელსაც ვერა ადამიანიშვილი ვერ გაუწევდა წინააღმდეგობას, მით უმეტეს, რომ წინააღმდეგობა არც არავის მოსურვებია...

მერე ალყაში მოაქციეს გრენუი — ოცნი, ოცდაათნი მაინც იქნებოდნენ და სულ უფრო ამჭიდროვებდნენ წრეს, სულ უფრო მჭიდროდ და მჭიდროდ ეკვროდნენ; მალე წრე უკვე ვეღარ იტევდა ყველას და მათაც ერთმანეთის გამოსწორება იწყეს, ერთურთის გამოგდება, თითოეულს სურდა, რაც შეიძლება ახლოს ყოფილიყო შუაგულთან.

და ბოლოს, ყველა შემაკავებელი რეფლექსი გაეთიშათ თითქოს და წრეც დაიშალა: ყველანი ერთად მიესივნენ ანგელოზს, დაეხვივნენ და წამოაქციეს — ყველას სურდა შეხებოდა მას, მისგან რაიმე მოეგლიჯა, ფრთის ბუმბული მოეფლითა ან ჯადოსნური ალის ნაპერწკალი მაინც რგებოდა მისგან. ჯერ ტანსაცმელი შემოახიეს, მერე თმები და კანი ააძვრეს, დაბღვინეს და დაგლიჯეს, აფთრებივით დასეულებმა, ბრჭყალები და ღოჯები ჩაასვეს მის ხორცს...

ოღონდ ღვთისშვილის სხეული სიცოცხლეში მაინც მტკიცეა და, როდესაც სიკვდილმისჯულს ოთხად გლეჯენ, ცხენებსაც კი მთელი ძალ-ღონით სჭირდებათ თოკების ქაჩვა; და აპრილდნენ დანები — კუნთების დასასერად; და ნაჯახები ეშვებოდნენ სახსრებზე და ხრაშუნით ამსხვრევდნენ ძვლებს... სულ მცირე დროში ანგელოზი ოცდაათ წილად განყვეს და ამ ველური ჯოგის თითოეულმა წევრმა დაითრია თავისი, ავხორცული სიხარბით შეპყრობილი გვერდზე მიდგა და უმაღლ შეთქვლიფა. ნახევარი საათის შემდეგ, ჟან-ბატისტ გრენუი უკანასკნელ ფხამდე მოისრა პირისაგან მიწისა.

ტრაპეზს რომ მორჩნენ, ეს კანიბალებად ქცეულები ისევ თავიანთ კოცონს მიუცუცქდნენ, არც ერთ მათგანს სიტყვაც არ დაუძრავს. რომელიდაცამ მაღიანად ამოაბოცინა მხოლოდ, ვიდაცამ ძვლის ნატეხი გადმოაფურთხა, ენა გააწკლაპუნა და ფეხით ცისფერი ქურთუკის მონახვეი შუაგლო ცეცხლში. ერთი ეგ იყო, ყველა მათგანი რაღაცნაირ უხერხულობას გრძნობდა და თვალს ვერ უსწორებდა გვერდით მჯდომს. მკვლელობა, ან რაიმე სხვა სულმდაბალი დანაშაული თითოეულ მათგანს ჰქონდა ჩადენილი, კაცსა თუ ქალს, მაგრამ ადამიანის შეჭმა — ასეთ საზარელს საქმეზე არასოდეს წავიდოდნენ, ასე ეგონათ, და ახლა თავადაც უკვირდათ, რა ადვილად მოახერხეს ეს და იმასაც კვირობდნენ, ამ უხერხულობის მიუხედავად, სინდისის არავითარი ქენჯნა რომ არ უგრძენიათ — პირიქით! არა, რაღაც სიმძიმისდაგვარი კი აწუხებდათ სტომაქში, მაგრამ გულზე მაინც შვება ეფინათ; მათ შავბნელ სულებში რაღაც იძრა, მათ სახეებსაც გულუბრყვილო ბედნიერების ათინათი დათამაშებდა... იქნებ, თავის წამოწევა და ერთურთისათვის თვალის გასწორებაც სწორედ ამიტომ ერიდებოდათ.

ხოლო როდესაც მონახერხეს ეს — ჯერ შეფარვით, შემდეგ კი ღიად, დაუფარავად — ჩაეცინათ კიდევ: ცხოვრებაში პირველად, რაღაც მაინც ხომ მოიმოქმედეს მოყვასის სიყვარულით...

დასასრული

თარგმანი: ბესიკ კალანდაძე/გია ჭუმბურიძე



ს ა მ ბ ს ნ ო უ ჯ ძ ო



"შერეკილი, მაგრამ — საინტერესოდ..."

ბოლო ორასი წლის განმავლობაში, ინტელექტუალების გავლენა საზოგადოებაზე შეუვალი თანამიმდევრობით იზრდებოდა და სიმართლე ითქვას, არაეკლესიურ მოაზროვნეთა ფაქტორი ჩვენი დღევანდელი მსოფლიოს გარკვეულ ყალიბადაც კი იქცა. ისტორიის გადასახედიდან, ეს სრულიად ახალი ფენომენია: მართალია მღვდელნი, მოგვნი თუ შემლოცავნი — თანამედროვე ინტელექტუალების ეს წინამორბედნი — იმთავითვე საზოგადოების სულიერი წინამძღვრობის უნარს ჩემულობდნენ, მაგრამ გინდაც რთული, გინდაც პრიმიტიული *პიერატიული* კულტურისადმი მიკუთვნებულობა მათ ზნეობრივ და იდეოლოგიურ ინოვაციებს მაინც ტრადიციული მემკვიდრეობის ჩარჩოში აქცევდა: სრულად თავისუფალი აზროვნება — ასე ვთქვათ, გონებრივი თავგადასავლების მაძიებლობა — მათთვისაც უცხო იყო.

XIX საუკუნეში, ეკლესიის გავლენის შემცირებასთან ერთად, სცენაზე უკვე ახალი ტიპის ქადაგი ჩნდება — ეს საერო მოძღვარი შესაძლოა მორწმუნეც იყოს, სეკუტიკოსი ან თუნდაც ათეისტი, მაგრამ არანაკლები სურვილი აქვს მთელს კაცობრიობას დაარეგოს ჭკუა, ვიდრე ნებისმიერ ეკლესიის თავს — თუნდაც საკუთარ სამწყსოს. დასაბამიდან, იგი ადამიანთა მოდგმის ინტერესების დამცველად გვეცხადებოდა და აღთქმისეულ მოვალეობად მიიჩნევდა ღვთისშვილთა სრულყოფას სწავლების მეშვეობით; ამ თვითმიზანს იქნებ მეტად რადიკალურადაც კი უდგებოდა, ვიდრე მისი საეკლესიო წინამორბედნი. რაკი თავად არც ერთი საეკლესიო ინსტიტუტის წინაშე არ მოიაზრებდა რაიმე ვალდებულებას, საკუთარი შეხედულებებისა და საღი აზრის თანახმადღა თუ ირჩევდა ან სრულიად უარყოფდა წარსულის კოლექტიურ გამოცდილებას, წინაპრების დანატოვარ ტრადიციებსა თუ ქცევის საყოველთაოდ მიღებულ ნორმებს. პირველად კაცობრიობის ისტორიაში, ადამიანმა უფლება მიიღოვალა დამოუკიდებლად განესაჯა საზოგადოების დაავადებანი, საკუთარი განსჯის მიხედვით დაესვა დიაგნოზი და ეწამლა კიდეც. მეტიც, სრულად ირწმუნა, თითქოს იმგვარი ფორმულის ჩამოყალიბება ძალუძდა, რომ არათუ საზოგადოებრივ წყობას, ადამის ჩამომავალთა ძირეულ მისწრაფებებსაც უკეთესობისაკენ უზამდა პირს. თავის ეკლესიურ წინამორბედთაგან განსხვავებით, იგი ღვთაებათა მსახური და განმსიტყველებელი კი აღარ იყო, არამედ მათი შემცვლელი; ხოლო მისაბამ გმირად პრომეთე ესახებოდა, ვინაც ღვთაებრივი ცეცხლი მოსტაცა ღმერთებს და ხალხს უსაკუთრა.

ერთი მთავარი, რაც ამ ახალ, ასე ვთქვათ, საერო ტიპის ინტელექტუალებს ახასიათებდათ, მათ მიერ რელიგიისა და ეკლესიის მსახურთა მიმართ კრიტიკული განსჯით მიდგომა იყო: ანუ, რამდენად სასარგებლო თუ პირიქით —

მავნებელი აღმოჩნდა ბრმა რწმენა კაცობრიობისათვის? რამდენად იცავდნენ იგივე ღვთისმსახურნი დადგენილ საეკლესიო წეს-რიგს, მისდევდნენ მცნებებს და ინახავდნენ აღთქმას? დასკვნა მათი, როგორც მთლიანად ეკლესიის, ასევე ზოგადად სასულიერო პირთა მიმართ მეტად სავალალო გახლდათ; ახლა, ეკლესიურობის ორსაუკუნოვანი დაკნინების შემდგომ, როცა საერო ინტელექტუალების გავლენა ჩვენი საკუთარი შეხედულებებისა და საზოგადოებრივი ინსტიტუტების ჩამოყალიბების მხრივ განუზომელია, ხომ არ დადგა დრო, შესაბამისად, ახლა მათი ნააზრევი და ქმნილებანი განისაჯოს?

განსაკუთრებით, მე სწორედ ის მაინტერესებს, რამდენად შეესაბამებოდა მათი მორალური და ლოგიკური კრიტიერიუმები კაცობრიობის განვითარებისათვის ახალი გზების მითითების სურვილს: რამდენად მართლზომიერად წარმართავდნენ ისინი საკუთარ ცხოვრებას, რაგვარი ურთიერთობა ჰქონდათ ოჯახთან, მეგობრებთან, თანამოაზრეებთან, რა პრობლემები უჩნდებოდათ ქალებთან თუ ფულთან მიმართებით? და საერთოდ, რამდენად გაუძლო მათმა ცხოვრებისეულმა თვალთახედვამ დროისა და ცხოვრების გამოცდას...

მოდით, ჟან-ჟაკ რუსოთი დავიწყოთ (1712-78), ვინც პირველი იყო ამ ახალ ინტელექტუალთაგან, მათი არქეტები და ბევრის მხრივ, ყველაზე გავლენიანიც მათ შორის. წინა თაობის მოხუცებმა — ვოლტერის მსგავსად — საკუთხეველების ნგრევა და გონების ფარზე ატანა იწყეს, ოღონდ სწორედ რუსო იყო, ვინაც თანამედროვე პრომეთეს ყველა მახსიათებელს ერთად მოუყარა თავი: არსებული წყობის უარყოფა; სრული თვითდაჯერება — ძირეულად გარდაექმნა იგი საკუთარი შეხედულებებისდა მიხედვით; რწმენა იმისა, რომ ყველაფერი ეს პოლიტიკური პროცესით იყო შესაძლებელი და ბოლო, მაგრამ არა უკანასკნელი — ინსტინქტის, ინტუიციისა და იმპულსურობის განსაკუთრებული როლის აღიარება ადამიანის ქცევის განსაზღვრისათვის. იგი დარწმუნებული გახლდათ, რომ გამორჩეული სიყვარული ამოძრავებდა კაცობრიობის მიმართ და აქამომდე არნახული ნიჭიც ებოძა მისი უკეთესი მერმისისაკენ წარსამართავად... შესაბამისად, როგორც თავის დროს, ასევე შემდგომშიც, ხალხის გამაოგნებელი რაოდენობა სწორედ ამგვარად აღიქვამდა კიდევ მას — ანუ, რუსოს გავლენა მის სიცოცხლეშივე და კარგა ხნის მერეც განუზომელი იყო, უშუალოდ მისი შემდგომი თაობისათვის კი მისი სახელი ლამის მითიური საბურველით შეიმოსა!

რუსო საფრანგეთის 1789 წლის რევოლუციამდე მთელი ათწლეულით ადრე გარდაიცვალა, მაგრამ ბევრი თანამედროვე სწორედ მას მიიჩნევდა ამ კატაკლიზმის პირველმიზეზად და მასვე მიაწერდა ზოგადად ძველი წყობის დაცემას მთელს ევროპაში. ამგვარ მოსაზრებას იზიარებდნენ როგორც ნაპოლეონი, ასევე ლუი XVI. ედმუნდ ბერკი წერდა: *"დიდი დავა-კამათია რევოლუციონერთა თავკაცობაში, თუ ვინ უფრო იმსახურებს 'მეორე რუსოს' ეპითეტს... მათთვის ის ლამის სრულყოფილების განსახიერებაა"*. თავად რობესპიერს აქვს ნათქვამი: *"რუსოა ის პიროვნება, ვინაც საკუთარი სულიერი სიდიადისა და პიროვნული ღირსებების გამოიხობით, კაცობრიობის მასწავლებლის სახელი დაიმკვიდრა"*. რევოლუციის დღეებში ეროვნულმა კონვენტმა მისი ნეშტის პანთეონში

გადატანას დაუჭირა მხარი და ამ აქციისადმი მიძღვნილ ცერემონიაზე კონვენტის თავმჯდომარემ საჯაროდ განაცხადა: "რუსოს უნდა ვუმადლოდეთ, ჩვენი ზნეობა, კანონები, ჩვევები და მისწრაფებანიც უკეთესობისაკენ რომ შეიცვალა".

უფრო ღრმად თუ ჩაუვკვირდებით და ამ განვლილ ორ საუკუნესაც გადავავლებთ თვალს, აღმოჩნდება რომ სწორედ რუსოს იდეებმა გადაასხვაფერა ცივილიზებულად წოდებული ადამიანის ზოგიერთი ძირეული წარმოდგენა და გონებაც სხვანაირად მოუტრიალა. ზოგადად, მისი გავლენის კვალი ლამის ყველგან და ყველაფერში ჩანს, მაგრამ ძირითადად, მაინც 5 მთავარი სფეროთი შეიძლება შემოიფარგლოს. უპირველესად, განათლების ყველა თანამედროვე იდეა თუ პროექტი, მეტ-ნაკლებად მაინც, რუსოს სწავლებასთანაა წილნაყარი და განსაკუთრებით, მის ვრცელ რომან-ტრაქტატთან *Emile* (1762). მან არა მარტო პოპულარიზაცია გაუწია, გარკვეულწილად თავადვე ჩამოაყალიბა ბუნების კულტი, ბუნების წიაღში გასვლის, სიახლის, სპონტანურობის, გამომაცოცხლებელი ბუნებრიობისაკენ სწრაფვის იდეა. პირველად სწორედ მან განასიტყვა გართულებული ურბანისტული ყოფის კრიტიკა და საერთოდ, ცივილიზაციის განვითარების ხელოვნურობაზეც მიათითა. მანვე შემოიტანა აღზრდის სისტემაში ცივი წყლით განბანვის, ყოველდღიური გონებრივი წვრთნის აუცილებლობა, სპორტის როგორც ხასიათის ჩამომყალიბებლის, კვირადღზე ქალაქგარეთ გასვლის საჭიროების იდეები.

მეორეც, სწორედ რუსომ შეიტანა ეჭვი მატერიალისტური კულტურის ნელი, მაგრამ თანაბარი წარმატების შედეგად მიღწეული განვითარების სიკეთეში; ამ მხრივ იგი განმანათლებლობასაც უპირისპირდებოდა, თუმცა, გარკვეულწილად, თავად ამავე ეპოქას ეკუთვნოდა და ბევრად უფრო რადიკალური გადაწყვეტის გზებსაც ეძიებდა. იმასაც ამტკიცებდა, ჩვენს გონებას მეტისმეტად ბევრი შეზღუდვები აქვს დაწესებული — მისი საზოგადოების გაუმჯობესების იარაღად გამოყენების თვალსაზრისითო. ამით იმის თქმა კი არ სურდა, თითქოს ადამიანის ტვინი უვარგისი ხელსაწყო ყოფილიყოს აუცილებელი გარდაქმნების გასატარებლად — პირიქით, იმას ამტკიცებდა, რომ მისი შინაგანი, ფარული, პოეტური თვალთახედვა და ინტუიცია უნდა ამოქმედდეს ცივი გონების დიქტატის საწინააღმდეგოდო. სწორედ ამ მოსაზრების დასადასტურებლად დაწერა რუსომ თავისი "აღსარება", რომელიც მართალია, 1770 წელს დაამთავრა, მაგრამ მის სიკვდილამდე არ გამოქვეყნებულა. ეს, უკვე მესამე განხრა, ერთდროულად რომანტიზმის საწყისიც იყო და თანამედროვე ინტროსპექტული ლიტერატურისაც, რადგან მასში რუსომ რენესანსის უპირველესი მონაპოვარი — ინდივიდუუმის აღმოჩენა — განუზომლად წამოსწია წინ, პიროვნულის "ახლოით განჩხრეკისა" და ფენომენის საზოგადოების სამსჯავროზე გამოტანის გზით. მკითხველს მოულოდნელად პიროვნების გულისგული გადაუშალეს, თუმცა — და ესეც ნიშანდობლივი იყო თანადროული ლიტერატურული ქმნილებისათვის — ხედვა მაცდური გახლდათ, პერსონაჟის შინაგანი ბუნების სურათი — სახეცვლილი, ერთის შეხედვით ღია და დაუფარავი, მაგრამ სინამდვილეში — მზაკვრობით სავსე...

რუსოს მიერ გაცხადებულმა მეოთხე კონცეფციამ, შეიძლება ითქვას, ყველაზე მეტი გავრცელება ჰპოვა. მისი მტკიცებით, როდესაც საზოგადოება თავისი

საწყისი, ძირძველი მდგომარეობიდან ურბანისტულ ყოფაში გადადის, ადამიანი სულიერად ირყვნება: მისი ბუნებრივი ეგოიზმი, რასაც რუსო *amour de soi-* უწოდებს, ბევრად უარეს, დამლუპველ ინსტინქტად გარდაიქმნება (მისივე ტერმინოლოგიით — *amour-propre*), რაც ამაოებისაკენ სწრაფვისა და თავკერძობის თავისებური ნარევი, როცა კაცი იმით აფასებს საკუთარ თავს, როგორი თვალთ უყურებენ მას სხვები და სულ იმის ცდამია, სიმდიდრით, ძალაუფლებით, გინდაც ჭკუითა თუ ზნეობრივი უპირატესობით შთაბეჭდილება მოახდინოს მათზე. ამგვარ ვითარებაში მისი სრულიად ბუნებრივი, თანდაყოლილი ეგოიზმი ჯიბრში გადადის, პიროვნება უცხოვდება არა მარტო გარშემო მყოფთაგან — ვისაც იგი უკვე მოცილებდა და არა მოკეთებდა აღიქვამს, არამედ თვით საკუთარი თავისაგანაც. ამგვარი გაუცხოება კი ფსიქოლოგიურ თრგუნვას იწვევს, რაც სასურველსა და არსებულს შორის ტრაგიკული შეუსაბამობით ხასიათდება.

კონკურენციის ამგვარად გააზრებულმა ფენომენმა, რომელიც, რუსოს აღქმით, ურთიერთობებისადმი ადამიანის თანდაყოლილ მოთხოვნილებას აკნინებს და მის ყოველგვარ ქვენა სურვილებს, თუნდაც სხვების ექსპლუატირებისაკენ მისწრაფებას ამძაფრებს, იგი კერძო საკუთრების, როგორც ყოველგვარი სოციალური უკუდმართობის პირველწყაროდ მიჩნევამდე მიიყვანა. რუსოს მეხუთე ინოვაცია, ინდუსტრიული რევოლუციის ზედ წინკარზე, კაპიტალიზმის კრიტიკის საფუძვლების შემოტანა იყო — საკუთრებისა და კონკურენციის გაუცხოების მიზეზად შერაცხვა, რაც განასიტყვა კიდევ თავისავე პიესა "ნარცისის" წინათქმასა და ნაშრომში *Discourse sur l'inegalite*. ეს იყო სწორედ ის სამომავლოდ გადმოგდებული დებულება, შემდგომში მარქსმა და მისმა მიმდევრებმა რომ აიტაცეს, ისევე როგორც რუსოსავე მოსაზრება კულტურის ევოლუციის თაობაზე, რომლის მიხედვითაც ცნება "ბუნებრივი" იგივე "პირველადის", ანუ წინარე კულტურულის შესაბამისი გახლდათ; ყველა კულტურა კი საკუთარ პრობლემებს ქმნის, რადგან სწორედ ადამიანთა სხვა ადამიანებთან ურთიერთობა მათში მიძინებულ უკეთურ მიდრეკილებებს აღვიძებს: როგორც ეს თავად უწერია — "ადამიანის სუნთქვაც კი ბოროტების მომტანია მისი მოძმისთვის" ("ემილი"). ამგვარად, ის კულტურა, რომელშიც ადამიანი მყოფობს, და რაც თავისთავად უკვე ხელოვნური წარმონაქმნია, კარნახობს მას ქცევის კანონებს; შესაბამისად, მისი ქცევის არათუ გამოკეთება, სრული გარდაქმნაც სავსებით შესაძლებელია — მოცემული კულტურისა და მისი წარმომქმნელი მოქიშპე ძალების გარდაქმნით, ე.ი. სოციალური ინჟინერიის გზით.

ეს იდეები იმდენად ფართო არეალს ფარავს, ლამის თანამედროვე აზროვნების მთელ ენციკლოპედიას გასწვდეს. მართალია, ყველა უკლებლივ იმთავითვე რუსოსი არაა: მისი მწიგნობრივი თვალსაწიერი მოიცავს დეკარტეს, რაბლეს, პასკალს, ლეიბნიცს, ბეილის, ფონტენელს, კორნელს, პეტრარკას... განსაკუთრებით, ლოკსა და მონტენს უკირკიტებდა. ჟერმენ დე სტალმა, რომლის ღრმა რწმენით, იგი "ზნიჭიერესი იყო კაცთაგან", განაცხადა: "თავად მას არაფერი აღმოუჩენია"; თუმც კი იქვე დაამატა: "ლონდონ გარშემო კი ყველა გზებით აღანთო". რუსო თავისი პირდაპირი, მგრძობიარე წერის მანერით აღწევდა იმას, რომ მისი აზრები ჭეშმარიტების გაცხადების ეფექტს ახდენდა ნებისმიერ მკითხველზე, კაცსა თუ ქალზე.

ბოლოსდაბოლოს, ვინ იყო ამგვარად გამორჩეული ზნეობისა და ინტელექტის მქონე ეს კაცი? ეროვნებით შვეიცარიელი გახლდათ, ჟენევაში დაიბადა და კალვინისტური მრწამსით გაზარდეს. მამამისმა, პროფესიით მესაათემ, სახელი ხელობით კი არა, უფრო ჩხუბისთაობითა და მოჯანყებით დაიგლო. დედამისი, სიუზან ბერნარი, შეძლებული ოჯახისშვილი, სამშობიარო ციებამ შეიწირა. მოკლედ, რუსოს მშობლები არ შედიოდნენ იმ ოჯახების ვიწრო წრეში, რომლებიც ჟენევის ოლიგარქიას წარმოადგენდნენ და ე.წ. "ორასის საბჭოსა" და "ოცდახუთის დარბაზს" ქმნიდნენ; მაგრამ როგორც სრული საარჩევნო, ასევე სხვა სამოქალაქო პრივილეგიებით სარგებლობდნენ და რუსოც მუდამ თავს იწონებდა საკუთარი წარმომავლობითი სტატუსით. მართალია, არა თავისი აზროვნების წესით, მაგრამ აღზრდისა თუ ცხოვრებისეული ინტერესებისდა კვალად, იგი ბუნებრივია, კონსერვატორად იქცა და მუდამ ამრეზით უყურებდა საარჩევნო უფლებებს მოკლებულ ბრბოს. ისიც ითქვას, ყველაფრისდა მიუხედავად, ოჯახს ხელმოკლეობა არასოდეს განუცდია.

მას დები არ ჰყავდა, მხოლოდ 7 წლით უფროსი ძმა, ოლონდ სწორედ რუსო უფრო დაემგვანა დედას, სახითაც და ხასიათითაც, და ამიტომაც დაქვრივებული მამამისი მის მიმართ წრეგადასულ მზრუნველობას იჩენდა. ისააკ რუსოს აღმზრდელობითი მეთოდები ცრემლნარევი მგრძნობიარობასა და დამთრგუნავ ძალმომრეობას შორის მერყეობდა გაუთავებლად; შემდგომში მისი საყვარელი ჟან-ჟაკი დაუფარავი საყვედურით წერდა: *"მამების ამბციები, გაუთავებელი პატივისცემა-ძორჩილების მოთხოვნა, დაუთმენლობა და უხეშობა ასმაკად მეტი ვნების მომტანია მოზარდისათვის, ვინემ დედების დაუსაზღვრავი სინაზე"* ("ემილი"). უცნაურია, მაგრამ მშობლის აულაგმავი სიმკაცრის მსხვერპლი კი სწორედ მისი უფროსი ძმა შეიქნა. 1718 წელს მამამისმა, "გამოუსწორებელი უზნეოს" ბრალდებით, იგი უწლოვანთა გამოსასწორებელ დაწესებულებას გადააბარა; იქიდან კიდევ, 1723 წელს გაქცეული, მერე ის აღარავის უნახავს. ამგვარად რუსო, ფაქტიურად, მამისერთად იყო ოჯახში, რაც იმდროის ინტელექტუალთა ბიოგრაფიების თავისებურ მახასიათებლად იქცა. და მაინც, ყველაფრის მიუხედავად, ბავშვობიდან მას ნაკლებობის ძლიერი შეგრძნება გამოჰყვა — რამაც შემდგომში უკვე მკვეთრად გამოხატული თვითშეცოდების ფორმა მიიღო.

15 წლისაც არ გახლდათ, რუსოს მამაცა და დედინაცვალიც სიკვდილმა რომ მიიბარა. რაკილა მენახჭის ხელობა, რომლისთვისაც მამის დაჟინებული მოთხოვნით წვრთნიდნენ, დიდად არ ეპიტნავებოდა, გულმშვიდად მიატოვა სახლ-კარი და ანესიში მცხოვრებ ვინემ ქალბატონ ფრანსუაზ-ლეიზ დე ვარენსის კალთას შეაფარა თავი. სავარაუდოა ასევე, რომ კათოლიციზმსაც სწორედ ამავე ქალბატონის საამებლად ეზიარა. საზოგადოდ, თავად რუსოს მონათხრობს საკუთარი კარიერის ადრეული ხანის თაობაზე (*'Confessions'*), კაცი ვერ ენდობა; მაგრამ მისი წერილები, ისევე როგორც სხვადასხვა რუსოისტული წყაროები, მრავალ მიჩუმათებულ ამბავს ხდის ფარდას. იგივე ქ-ნი დე ვარენსი სამეფო პენსიაზე ცხოვრობდა და ასე ჩანს, ერთდროულად საფრანგეთის ხელისუფალთა აკენტიც იყო და რომის კათოლიკური ეკლესიისაც...

1728-42 წ.წ. უმეტესი ნაწილი რუსო მასთან და მის ხარჯზე ცხოვრობდა. ერთხანობა მისი საყვარელიც იყო, თუმცა შიგადაშიგ თავის ნებაზეც დაიარებოდა. სანამ მესამე ათეულს არ მიუკაკუნა, რუსო ხელმოცარული და მთლიანად სხვაზე, ძირითადად ქალებზე დამოკიდებული კაცის ცხოვრებას ეწეოდა. ათზე მეტი ხელობის დაუფლება სცადა, მენახჭედაც მუშაობდა, სემინარიაშიც სწავლობდა, მუსიკობდა, სახელმწიფო სამსახურშიც იდგა, ფერმერობდა კიდევ, კერძო მოწაფეებიც აყავდა, ნოტების გადამწერიც ყოფილა და პირადი მდივანიც. 1743წ. გვარიანი თანამდებობა ერგო — საფრანგეთის ელჩის, გრაფ დე მონტეგეიუს მდივნობა ვენეციაში. ეს მხოლოდ 11 თვე გაგრძელდა: მერე მოხსნეს და ვენეციის რესპუბლიკის სენატის განკარგულებით დაპატიმრებასაც ძლივს გადაურჩა. თავად მისმა აღმატებულებამ განაცხადა (რომლის ნათქვამს, ამ შემთხვევაში მაინც, თვით რუსოს მონათხრობზე მეტად დაეჯერება), რომ მისი მდივანი სიდატაკისთვისაა განწირული — საკუთარი უნიათობის, შეუვალი სიჯიუტის, შერეკილობისა და წრეგადასული თვითრწმენის გამოისობით.

გარკვეულ ხანს რუსო მწერლობისთვის მოწოდებულადაც თვლიდა თავს. სიტყვა მართლაც მოსდევდა, იოლად აყალიბებდა სათქმელს, თუმც ფაქტობრივ სიზუსტეს მაინცაღამაინც არ დაგიდევდათ; მისგან, შესაძლოა, მშვენიერი ვექილი გამოსულიყო. იქნებ ესეც იყო ერთი მიზეზთაგანი, ბ-ნმა მონტეგეიუმ, სამხედრო აღზრდამიღებულმა კაცმა, ასე რომ აითვალწუნა საკუთარი მდივანი: ხშირად თურმე, წერილების კარნახისას, რუსო მთქნარებას ვერ იკავებდა, ან ბოლთის ცემას მოჰყვებოდა ხოლმე, როცა მისი შეფი სიმწრის ოფლად იღვრებოდა საკუთარი აზრის წყობისად სათქმელად. 1745წ. რუსომ ვინმე ტერეზა ლევაზიე გაიცნო, მრეცხავი გოგონა, მთელი 10 წლით მასზე უმცროსი, ვინაც სიამოვნებით დათანხმდა უცვლელ საყვარლად დაჯდომოდა მეტად იმედისმომცემ აღაღგაზრდა კაცს. ამან ცოტათი დასაზღვრა რუსოს მოუწესრიგებელი ყოფა. იმავე ხანს იგი დაუახლოვდა დენის დიდროს, განმანათლებლობის ხანის თვალსაჩინო ფიგურას, შემდგომში ფრანგული ენციკლოპედიის მთავარ რედაქტორს. დიდრო ხასიათის სიკეთით გამოირჩეოდა, ხოლო ნიჭიერი ახალგაზრდების მიმართ მუდამ განსაკუთრებულ მზრუნველობას იჩენდა. რუსო მართლაც დავალებული იყო მისგან: სხვათა შორის, სწორედ მან გააცნო რუსო სახელმწიფოებრივ გერმანულ ლიტერატურის კრიტიკოსსა და დიპლომატს, ფრიდრიჰ მელქიორ გრიმს, ვინაც რუსო "ფილოსოფიის სახლის გამგებლად" (*le Maître d'Hotel de la philosophie*) ცნობილ ბარონ ჰოლბახის რადიკალთა სალონს წარუდგინა.

ამ პერიოდში იწყო ფრანგი ინტელექტუალების გავლენამ ზრდა და ეს პროცესი საუკუნის მეორე ნახევარში სულ უფრო თვალსაჩინო ხდებოდა. ოღონდ იმ 1740-50-იან წ.წ. მათი, როგორც საზოგადოების განმსჯელთა პოზიცია ჯერ კიდევ სრულიად არამყარი იყო: სახელმწიფოს, თუკი არსებული რეჟიმის მიმართ რაიმე საფრთხეს იეჭვებდა, სავსებით შეეძლო რეპრესიებისთვის მიემართა. შემდგომში რუსო ხშირად ჩიოდა ხოლმე საკუთრივ მისი პირადი დევნა-შევიწროების წლების თაობაზე, მაგრამ კაცმა რომ თქვას, თანამედროვეთა უმრავლესობისგან მას ყველაზე ნაკლები ჰქონდა საწუწუნო: ვოლტერი მისგან განაწყენებული მაჟანი არისტოკრატის მსახურებმა დაჟვკაეს სახალხოდ და ამას გარდა, თითქმის წელიწადი გაატარა ბასტილიის ციხეში; აკრძალული

წიგნების გამყიდველს 10 წელი გალერებზე ყოფნა ესჯებოდა; 1749 წლის ივლისში დიდროც დააპატიმრეს და 3 თვით ვინსენის ფორტის დილეგში უკრეს თავი — ათეიზმის დამცველი წიგნის დასტამბვისათვის. რუსო მის მოსანახულებლად გაემგზავრა და სწორედ მაშინ მოკრა თვალი გაზეთში დაბეჭდილ განცხადებას, რომელიც იუწყებოდა, რომ დიჟონის კაზმულსიტყვაობის აკადემია კონკურსს აცხადებდა თემაზე: "რამდენად აღაზვევებს მეცნიერებისა და ხელოვნების წინსვლა ზნეობას?"

1750წ. მომხდარმა ამ შემთხვევამ ძირფესვიანად შეცვალა რუსოს ცხოვრება. უეცარი ზემოთაგონებით გაიაზრა, თუ რა უნდა ექნა. ჯილდოს მოსურნენი, ცხადია, მეცნიერებასა და ხელოვნებას განადიდებდნენ, ის კი ბუნების უპირველესობის თეზისს დაიცავდა. მეფესუფლად, როგორც თავად წერს თავის "აღსარებაში", იგი "ჭეშმარიტების, თავისუფლებისა და სათნოებისადმი ღვთაებად" შეიპყრო. "*ჩემს თავს განუუცხადეო, — გვიყვება, — ჭეშმარიტება, სათნოება! მარად და მარად ვიძახებ — სათნოება, ჭეშმარიტება!*" მისივე სიტყვით, პერანგი დაუსველა ცრემლთა ღაპა-ღუპმა, მაგრამ ვერც კი ამჩნევდა ამას... ცრემლების ფრქვევას რაც შეეხება, სავსებით დასაჯერებელია: ეგ საქმე ძალზე ეადვილებოდა. დანამდვილებით კიდევ ის ვიცით, რომ რუსომ იქვე გადაწყვიტა შესაბამისი ესეის შეთხზვა, რომელიც მერე მრწამსის ქვაკუთხედად ექცა, ჯილდოც მოიგო საკითხისადმი უჩვეულო მიდგომის წყალობით და ლამის სულ ორიოდ კვირაში სახელიც გაუვარდა. ეს იყო ცხოვრებაში ხელმოცარული და ცხოვრებაზე გულარძინილი 39 წლის კაცის ამბავი, ვისაც სახელი და დიდება სწყუროდა, და ვინაც ბოლოს შიგ კაკალ გულში გაართყა მიზანს. თავისთავად ნაშრომი სუსტია და დღევანდელი გადასახედიდან — წასაკითხად ყოვლად უსარგებლო: როგორც ეს ხშირად ხდება ხოლმე, როცა ამგვარ ლიტერატურულ მოვლენასთან გვაქვს საქმე, გამოგონებელი გვეჩვენება, რა მანქანებით გამოიწვია რაღაც ნაცოდვილარმა ამგვარი აღტკინება. ცნობილმა კრიტიკოსმა, ჟიულ ლემეტრმა რუსოს ესეგვარი ნაუცბათევი განდიდება *ადამიანური სიბრძევის უთვალსაჩინოეს საბუთადაც* კი მიიჩნია.

მის ამ ესეის — *განსჯა* (Discours) ხელოვნებათა და მეცნიერებათა შესახებ, რუსოს ჯიბე არ გაუსქელებია: თუმც ხელიდან ხელში გადადიოდა, თავად ნაბეჭდ ერთეულთა რიცხვი დიდი არ იყო — სულ რაღაც სამასიოდე ცალი, ასეთი ტირაჟიდან მოგებას კი მხოლოდ გადამყიდველები ნახულობდნენ. მეორეს მხრივ, ამან გზა გაუკვალა მდიდარ არისტოკრატთა კარზე, რომელიც, მოგესხენებათ, მუდამ დიაა მოდაში შემოსულ ინტელექტუალთათვის. რუსოს კვლავაც შეეძლო ნოტების გადაწერით ერჩინა თავი (მშვენიერი ხელწერა ჰქონდა), მაგრამ უკვე 1950 წლიდან ამა თუ იმ დიდებულის სტუმართმოყვარეობის ხარჯზე ცხოვრება არჩია; რა თქმა უნდა, იმ შემთხვევების გარდა, როცა მასპინძელს თავად მოუწყობდა ხოლმე სკანდალურ შეხლა-შემოხლას. ახლა უკვე სერიოზულად მოკიდა ხელი მწერლობას, კალამიც უჭრიდა და არც იდეების ნაკლებობას უჩიოდა. ეგაა, შედეგი ყოველთვის არ იყო ერთნაირი: "საზოგადოებრივი ხელშეკრულება", რომელიც მან 1752წ. წამოიწყო, 10 წლის მერე გამოსცა და რომელშიც, როგორც ითვლება, სრულადაა დაწერილი რუსოს პოლიტიკური

ფილოსოფია, ცოტა ვინმემ თუ წაიკითხა მის სიცოცხლეში, ხელმეორედ კი მხოლოდ 1791წ. დაისტამბა. იმ დროის 500 ბიბლიოთეკიდან, როგორც აღმოჩნდა, მხოლოდ ერთს გააჩნდა იგი საკუთარ საცავში. რუსოს მკვლევარმა, ჯონ მაკდონალდმა, 1789-91 წწ. გამოცემული 1114 ცალი პამფლეტი გადაქექა და მხოლოდ 12 მათგანში მიაკვლია მის ხსენებას. როგორც თავად ამბობს: "მართლაცდა, უნდა განვასხვავოთ საზოგადოდ რუსოს კულტი და კერძოდ — ის კვალი, რაც მისმა პოლიტიკურმა აზროვნებამ დაამჩნია თანადროულობას". პოპულარობა, რომელიც ჯილდოს მოგებით დაიწყო და ზეავივით მატულობდა, ორად-ორ წიგნზე იყო დამყარებული: პირველი — ეს მისი რომანი გახლდათ, "ახალი ელიზა", რიჩარდსონის "კლარისას" თარგზე გამოჭრილი — ახალგაზრდა ქალის ცდუნების, მონანიებისა და სასჯელის ამბავი, ოსტატურად გამიზნული მკითხველთა სწორედ ქალთა წრისათვის — განსაკუთრებით კი საშუალო კლასის, ბურჟუათა ფენის ბანოვანთათვის — მორალიზებისაკენ მათი დაუოკებელი სწრაფვის გათვალისწინებით. ტექსტი იმ დროისათვის საკმარისად თამამი იყო, დედაზრი — ზედმიწევნით შესაფერისი. მართალია, პარიზის არქივებისკოფოსმა ბრალი დასდო ავტორს, თითქოსდა იგი "მაცდურის განგდების საბურველით, გარყვნილების სამსალას აპარებდა მკითხველს", მაგრამ ამან მხოლოდ წიგნის გასაღებას შეუწყო ხელი, ისევე როგორც თავად რუსოს ეშმაკურმა წინათქმამ, სადაც იგი ამტკიცებდა, რომ უმანკოესი გოგონაც კი, ვინაც გინდ ერთ გვერდს წაიკითხავდა, სულის სიწმინდეს უნდა გამოთხოვებოდა. თუმცაო, ამატებდა იქვე — "უმანკო სულელები ხომ სასიყვარულო რომანებს არ ეტანებიან". ბოლო-ბოლო საქმე იმით დამთავრდა, გასათხოვარი გოგონებიცა და მათი ღირსპატივსაცემი მატრონებიც ცრემლმორეულნი ფურცლავდნენ ამ წიგნს და ფინალის მაღალზნობრივი შეგონებებითა იმართლებდნენ თავს. მოკლედ რომ ვთქვათ, ეს იყო ბესტსელერი სწორედაც რომ დღევანდელი გაგებით, ოღონდ პირების უმრავლესობა ანონიმურად ისტამბებოდა და ვრცელდებოდა.

1762 წელს, "ემილის" ქამოქვეყნებისთანავე, რუსოს პოპულარობა ნამდვილთაყვანისცემაში გადაიზარდა. ამ რომანში მან ბუნებასა და მის მიმართ ადამიანის დამოკიდებულებაზე საკუთარი იდეების მთელი წყალვარდნილი დააფრქვია; რომანტიზმის ზეობის ხანაში ეს ყველაფერი ტრივიად იქცა, მაგრამ მაშინ კი სრული სიახლე გახლდათ. ეს წიგნიც იმაზე იყო გათვლილი, რაც შეიძლება მეტი მკითხველი მიეზიდა; ოღონდაც ერთ რამეში რუსოს ცოტა ზედმეტი მოუვიდა: წინასწარმეტყველისა და ახალი მოძღვრის ხატის შესაქმნელად მისთვის, უბრალოდ, უცილობელი გახდა გონების შესაძლებლობების საზღვრულობა მოენიშნა და მკითხველთა გულებში სარწმუნოებისთვისაც მიეჩინა ადგილი. "ემილის" ერთ-ერთი კარი მან ასევე დაასათაურა: "რწმუნის მირქმა", სადაც იგი განმანათლებლობის აპოლოგეტებს, განსაკუთრებით კი ათეისტებს, გადამეტებულ თვითდაჯერებასა და დოგმატურობაში სდებდა ბრალს: "ეგენი ვითომ სკეპტიციზმს ქადაგებენ, ამავე დროს კი ყოვლისმცოდნეებად მოაქვთ თავი, აინუნშიაც არ ავდებენ იმ ზიანს, რაც მათ ზნეკეთილ ხალხისთვის მოაქვთ — ფეხქვეშ თელავენ შეჭირვებულთა ბოლო იმედს, რელიგიური გრძნობის დაკნინებით ბოლო ჯებირს უხსნიან მდიდართა და ძალამოსილთა თავაშეებულობას". თავისთავად, გვარიანი მომგებიანი სვლა იყო, ოღონდ დასაბაღანსე-

ბლად რუსო ახლა ეკლესიასაც გადასწვდა და სასწაულების კულტის მეშვეობით ცრურწმენების გავრცელების ხელშეწყობაში დაადასაშაულა. ეს უკვე თავხედობას უტოლდებოდა — თუ იმასაც გავითვალისწინებთ, რომ ამჯერად, ფარული ტირაჟირების აღსაკვეთად, წიგნს ავტორის ხელრთვაც დაერთო. რუსო საფრანგეთის საეკლესიო წრეებს ხომ ისედაც ათვალწუნებული ჰყავდათ: სხვას თავი დავანებოთ და, კათოლიციზმში გადასული, შემდგომ ჟენევის მოქალაქეობის აღსადგენად კალვინიზმს დაუბრუნდა, ახლა კი პარიზის საკრებულომ, სადაც იანსენისტები უმრავლესობდნენ, "ემილის" ანტი-კათოლიკური გამოხდომები იწყინა — ჯერ სახალხოდ, იუსტიციის სასახლის წინ დაწვეს წიგნი და ცხელ გულზე ზედ მწერლის დაპატიმრების ბრძანებაც გასცეს. მხოლოდ ვიღაც მაღალი თანამდებობის პირისაგან დროულმა შეტყობინებამ იხსნა რუსო. რამდენიმე წელი იმალებოდა — კათოლიკეები კალვინისტებზე არანაკლებ განაწყენებულნი გახლდნენ "ემილის" გამო და რუსოც წამდაუწუმ იცვლიდა ადგილსამყოფელს. თუმცა, მას არც მფარველები კლებია: ინგლისში 15 თვე ცხოვრობდა გულმშვიდად, 1767 წლიდან კი საფრანგეთის ხელისუფლებამაც შეწყვიტა მისი დევნა. უშუალო მოძულეთ რუსოს ახლა მხოლოდ თანამომძე ინტელექტუალები და მიაჩნდა, განსაკუთრებით — ვოლტერი. სწორედ მათ საპასუხოდ დაწერა თავისი "აღსარებანი". დასტამბვანზე თავი არ გამოუდვია, თუმცა სხვადასხვა სალონებში მოწყობილი წაკითხვების შედეგად ნაშრომი ფართოდ იყო ცნობილი. მისი გარდაცვალების წლისათვის (1778), რუსოს სახელი უკვე ყველას პირზე ეკერა — აღარას ვამბობთ რევოლუციის პერიოდზე.

ასე და ამგვარად, სახელის მოხვეჭა რუსოს სიცოცხლეშივე არ გასჭირვებია. ჩვენი გაგებით, საწუწუნოც ბევრი არაფერი ჰქონდა, ოღონდაც კანძულსიტყვაობის ისტორიაში ჩივილისა და მოთქმა-გოდების დიდოსტატის წოდება რუსოს მაინც განაღებულ აქვს: თუ დაუუჯერებთ, ცხოვრებაში წვალებისა და დევნის მეტი არაფერი რგებია. ამას იმგვარად და იმდენჯერ იმეორებს, ეჭვის შეტანა უხერხულიც გეჩვენება — განსაკუთრებით, ჯანმრთელობის განხრით: *"უბედურ დღეზე გაჩენილი, დღეყოველ ვებრძოდი ტკივილს... 30 წელი არ მიძინია ნებისად... ბუნებამ ერთი ნიჭი დამამაღლა მხოლოდ — ტკივილის ატანის უნარი, რათა ძალამოუწურავად შემძლებოდა მისი შეგრძნობა"* ერთი კია — მას მართლა ჰქონდა პრობლემები — საკუთარ პენისთან დაკავშირებით. 1755წ. ექიმ ტრონშენთან მიწერილ წერილში იგი იხსენიებს "იმ ორგანოს ფუნქციურ მოშლას, რომლის მეშვეობითაც თავად ჩავისახე". მისი ბიოგრაფი, ლესტერ კროკერი, ამტკიცებს: "უკვე დანამდვილებით შეიძლება ითქვას, რომ რუსო *ჰიპოსპადიაზით* — პენისის დეფორმაციით იყო დაავადებული, რის შედეგადაც ურეტრა ნორმალურად ვეღარ ფუნქციონირებდა." გასაგებია, რომ ზრდასრულ კაცს ეს დიდ ფსიქოლოგიურ და ფიზიკურ პრობლემებს უქმნიდა საზოგადოებაში: "ახლაც ტანში მაჟრიალებს, როცა ვიხსენებ როგორ ვიდექი მაღალი წრის ბანოვანთა გარემოცვაში, სიმწრის ოფლი მასხავდა და ველოდი, როდის ჩამოვარდებოდა პაუზა რაღაც ყოვლად უმნიშვნელო, გულისგამაწვრილებელი ქალური ტლიკინის დროს... მერე კიბეზე ჩავრბოდი და ჩემს თარს იბღალზე იქაც ვინმე მაღალჩინოსნის მეუღლეს გადავაწყდებოდი ხოლმე, გარეთ ან ლაქიები მასლაათობდნენ ქალებისა და ბატონების გამოსვლის მოლოდინში, ან მეეტლეები აფუილებდნენ ჩიბუხებს... ერთ ბნელ, ცარიელ კუთხეს ვა-

ნაცვალელებდი მთელ ქონებას, მაგრამ რა... ბოლოს, ისევ ვიღაცის გამჭირდავი მზერის ქვეშ, აბრეშუმწინდამოსილი ფეხის თანდასწრებით მიწვედა შარდვა."

მთელი შემდგომი აბზაცი ამგვარივე თავის შეცოდების სურვილითაა გაჯერებული, ოღონდ იმის ეჭვიც ჩნდება, რომ მისი დამწერის ჯანმრთელობა არც მთლად ასეთ სავალალო მდგომარეობაში გახლდათ. როცა აწყობს, იმასაც გაიძახის — ფიზიკურად არა მიჭირდა-რაო. პერმანენტული უძილობის ამბავიც მისივე ფანტაზიის ნაყოფი უნდა იყოს — მრავალი თანამედროვე იხსენებს, გვარიანი ხვრინვა სჩვეოდაო. დღევინდ ჰიუმი, რომელიც მას ინგლისში მოგზაურობისას ახლდა, პირდაპირ წერს: "კაჟივით მაგარი იყო — ერთხელ მთელი ღამე გემბანზე გაატარა, საშინელ ამინდში, მეზღვაურები ლამის სიცვიისაგან დაითოშნენ, ეგ კი ვითომც აქ არაფერიო, სურდოც არ დამართნია". ასეა თუ ისე, საკუთარ თავზე ზრუნვა-წუწუნი ბოლოს ჩვევად ექცა, პირადი ცხოვრების ნებისმიერ ეპიზოდზე მოგონებას გადატანილი ტანჯვის საბურველში ახვევდა — განსაკუთრებით, შეძლებულ და კეთილშობილ ბანოვანთა წინაშე. საკუთარ თავს "მოკვდავთა შორის უბედურესს" უწოდებდა, იხსენიებდა "აჰ ბედისწერას, მშიერ ძაღლივით რომ დამსდევს კვალში", სერიოზულად ამტკიცებდა, რომ "ცოტა ვინმეს თუ უღვრია ჩემსავით ცრემლი" და ბოლოს ისიც განაცხადა, "ჩემი სვე-ბედის აღწერას ვერვინ იკისრებს, და რომც სცადოს კიდევ, კაცს ვერ იპოვის, მონათხრობი რომ დაიჯეროს". სინამდვილეში, თავადაც ბევრი წერა და სხვაც ძალზე ბევრი დააჯერა, სანამ ახლოს გაიცნობდნენ... თუმცა, ზოგჯერ რაღაც სიმპათიები მაინც რჩებოდათ ამ "ბედკრული ჟან-ჟაკის" მიმართ. ქ-ნ დ'ეპინეს, მის მფარველს, ვისაც იგი ყოვლად აუტანლად ექცეოდა, ასეთი რამ წამოსცდა, თუმცა კი კარგა ხნის ახელილი ჰქონდა თვალები საკუთარი პროტექტუს უმსგავსოებებზე: *ჩემთვის ახლაც სევდისმომგვრელია ის მორჩილება და თვინიერება, რითაც იგი მის თავს დატეხილ უბედურებებს ჩამოითვლიდა ხოლმეო*. არცაა გასაკვირი, რადგან ჯერ კიდევ ახალგაზრდამ, თხოვნის ქაღალდების წერაში გაიწაფა ხელი. შემთხვევით, ერთი მათგანი შემოგვრჩა კიდევ: *სავოიის მმართველს წერდა, იქნებადა დღიური საარსებო დამინიშნოთ, უკურნებელი სენით ვარ შეპყრობილი და დიდხანს მაინც ხომ ვერ ვავატანო*.

ამ თავშეცოდების მიღმა უკვე ეგოცენტრიზმი მოჩანს, იმის რწმენა, რომ ის სრულიად განსხვავდება სხვათაგან, მისი გაჭირვებაც განსაკუთრებულია და ღირსებებიც. თავად წერს: "თქვენი და ჩემი სატანჯველი ვით შევადარო? ჩემი მდგომარეობა არნახულია, დასაბამითგან არგავონილი..." ასევე, "ჯერ არ გაჩენილა იგი, ვინც ისევე შემთხვევარება, რავგარი სიყვარულიც თავად ძაღმძის — ჯერ არავის ბოძებია ამგვარი ნიჭი". ან, თუნდაც: "თავს ბედნიერად ჩავთვლიდი, სადმე მაინც გადაყვროდი პიროვნებას ჩემზე ზნეკეთილს... მიჩვენეთ გული, მეტად მოწყალე, მეტად მგრძობიარე, მეტად მიმნდობი... ბოლომდე მხოლოდ შთამომავლობა თუ დამაფასებს... ჩემი ნუგეში დღესდღეობით მხოლოდ ისღაა, თავად როგორ ვაფასებ საკუთარ თავს... განმანათლებლობას ერთი ხელისუფლება მაინც რომ ეშვა, აქამდე ჩემი ბიუსტებით იქნებოდა მოფენილი მთელი ქვეყანა..." რაღა გასაკვირია, ედმუნდ ბერკს რომ ეთქვა: *ამპარტავნობის ხელოვნება ისეთ დონეზე აიყვანა, სიგიჟეს არც აღარაფერი უკლდაო*.

მართლაცდა, იმდენად ამპარტავანი იყო, ადამიანური გრძნობებისათვის შეუვალი ეგონა თავი: "სიძულვილი ჩემთვის უცხოა — იმდენ პატივს ვცემ საკუთარ თავს, სიძულვილისათვის ადგილიც აღარ მრჩება... არც ეჭვიანი ვყოფილვარ ოდესმე, არც შურისძიების სურვილს დაუჭამივარ... ხანდახან სიბრაზე თუ წამოძვილის ზოლმე, ისიც მცირე ხნით..." სინამდვილეში ყველაფერი პირუკუ იყო და ბევრს ეს შეუმჩნეველი არ დარჩენია. რუსომ, პირველმა ახალ ინტელექტუალთა შორის, მთელი კაცობრიობის მეგობრად კი გამოაცხადა თავი, მაგრამ ამას მისთვის ხელი არ შეუშლია, კონკრეტულ ადამიანებს სამკვდროდ გადაკიდებოდა. ერთი მათგანი, მისივე ყოფილი მოკეთე, შენეველი ექიმი ტრონშენი მხოლოდ მხრებს იჩეჩავდა: "რანაირად ხდება, კაცობრიობის მეგობარი პირად მეგობრებს ვედარ ეგუებოდეს?" ამაზე რუსოს თავისი არგუმენტები ჰქონდა: "მე კაცობრიობას ვამბობ, თორემ ადამიანები ყველგან სხვადასხვანაირები არიან. ჩემსავით ჭეშმარიტების მიმდევარი უკეთურ ხალხს ყველგან გადააწყდება — ამისათვის შორს წასვლა არაა საჭირო." სრული ეგოისტი, რუსო მის მიმართ უარყოფით დამოკიდებულებას ჭეშმარიტებისა და სათნოების უარყოფასთან აიგივებდა; ამგვარად, გადაჭარბებულ არაფერი მიაჩნდა საკუთარი მტრებისთვის — მისი აზრით, თავად მათი არსებობაც კი სამარადისო სასჯელის დებულებას განამტკიცებდა: "ბუნებით გულბოროტი არა ვარ, — უთხრა ერთხელ ქალბატონ დ'ეპინეს, — მაგრამ როცა ვხედავ, ამქვეყნიური სამართალი ბრმაა ამ ურჩხულების მიმართ, მათთვის განხვნილ ჯოჯოხეთის კარზე ფიქრიც შევბას მანიჭებს."

მაგრამ თუკი მართალია, რომ რუსო ამპარტავანიც იყო, ეგოისტიც და ჭინჭყლი ხასიათითაც გამოირჩეოდა, რაღა ყველა მის დასახმარებლად იწვდიდა ხელს? ამის პასუხი ისევ მის ხასიათსა და იმდროინდელ ისტორიულ ვითარებაში უნდა ვეძებოთ. შემთხვევით, ქვეცნობიერად თუ გამიზნულად (ან, შესაძლოა, სამივე ერთად) რუსო პირველი აღმოჩნდა, ვინაც მეთოდურად და სისტემატურად ხეირობდა პრივილეგირებულთა ბრალეულობის სინდრომით. მეტიც, იგი ამას სრულიად განსაკუთრებული მიდგომით სჩადიოდა — უხეშობის მეშვეობით. კაცმა რომ თქვას, რუსო თანამედროვეობის *გაბრაზეებული ახალგაზრდა თაობის* ნაღდ პროტოტიპად მოჩანს. ბუნებით ანტი-სოციალური სულაც არ გახლდათ — პირიქით, ყრმობიდანვე საზოგადოებაში თავის გამოჩენისაკენ ისწრაფვოდა, განსაკუთრებით კი სწორედ საზოგადოებაში გამოსულ ქალთა ღიმილი ხიბლავდა. ერთგან წერს კიდევ: "ვიღაც ყვავილების გამყიდველი გოგონები, მრეცხავ-მკერავები, მომვლელ-ძიძები და სხვანი და სხვანი არ მაინტერესებდნენ. უფრო ახალგაზრდა ქალბატონებისაკენ მიმიწევდა გული." ეგაა, პროვინციალს შორიდანვე ცნობდნენ; 1740-იან წლებში მისი მცდელობა, საზოგადოებისათვის კოჭის გაგორებანა გაეთამაშა, სრული მარცხით დამთავრდა და მისმა პირველმა პიესამაც, მაღალი წრის ბანოვანთა გულის მოსაგებად გამიზნულმა, ფიასკო განიცადა.

ოღონდაც, კონკურსზე ჯილდოს მიღებამ კარგი კარტი გაუხსნა ხელში — ბუნებრიობის თეზისი მართლაც ოქროს საბადოდ იქცა მისთვის და რუსომაც ნირო

იცვალა: გაუთლელიობის დამალვას მისი დაუფარავად წარმოჩენა ამჯობინა და მდაბიორობას ახლა უკვე სათნოების წყაროდ ასაღებდა. უცნაურია, მაგრამ სწორედ ამ ტაქტიკამ გაუმართლა: საფრანგეთის არისტოკრატიის შედარებით განათლებულ ახალგაზრდობას მოღად ექცა კლასობრივი პრივილეგიების არსებული სისტემის გამო ჭმუნვა, და მწერლებს განტყევის სიგელ-გუჯარის როლი მიაკუთვნეს. იმდროინდელი მიმოძილველი, ვინმე დუკლო წერდა: "დიდებულთაგან ისინიც კი, ვისაც ინტელექტუალები გულზე სულაც არ ეხატებოდათ, ცდილობენ მათ მიმართ ყურადღება მაინც გამოიჩინონ — ახლა მოდაა ასეთი." ნაფერებ კალმოსანთა უძრავლესობა, რაღა თქმა უნდა, საკმევლს უკმევლა თავის მწყალობლებს, რუსომ კი საწინააღმდეგო მოიმოქმედა და ამით კიდევ უფრო "მოდურ", "საინტერესო", ყველა სალონსა თუ ბუდუარში სასურველ სტუმრად იქცა — გაუთლელ, დაუხვეწავი მანერების მქონე "ბუნების შეილაღ", ანუ "დათვად", როგორც მას სიყვარულით იხსენიებდნენ. საყოველთაოდ დაკანონებულ ქცევის ნორმებს იგი "გრძნობების ფეთქვას" უპირისპირებდა, კეთილგონიერებასა და თავდაჭერას — "გულისთქმისათვის ყურისგდებას": *ჩემი გრძნობები იმგვარია, თქვენებური ზრდილობის წესებს ვერ ურიგდება... ბუნებითა ვარ უხეში, უსიამო, ტეტია — და პრინციპულად ასეთივე ვრჩები... თქვენს გაწვრთნილ ფინიებს ვერასოდეს დავემსგავსები — დაბადებით ბარბაროსი ვარ... ჩემს გულისგულში იმდენი რამ ძევს, მწერლობისათვის კვლარც ვიცლი...*

ამგვარი ქცევა ზედმიწევნით მიესადაგა მის პროზას, რომელიც სტილისტურად ბევრად ჩამოუვარდებოდა თანამედროვეთა დახვეწილ-დაკრიალეზულ პერიოდებს. თანაც, მისი პირდაპირობა სქესის საკითხებში ლამის საარაკოდ იქცა: "ახალ ელოიზაში" მან ქალის ტუალეტის ისეთი დეტალიც კი მოიხსენია, როგორიც იყო *კორსეტი* (!). საზოგადოებაში მიღებული ნორმების უგულვებლყოფას რუსო სამოსის გამორჩეული სისადავითა და თავისუფლებითაც უსვამდა ხაზს, რაც მერე ახალგაზრდა რომანტიკოსთა საყოველთაო მახასიათებლად იქცა. შემდგომში წერდა კიდევ: "გარდაქმნა ტანსაცმლიდან დავიწყე. შევეშვი ოქროს ძეწკვებს, თეთრ წინდებს, წელზე დამნის შემორტყმას... საათიც კი გავყიდე." ამას გრძელი თმები მოჰყვა და საერთოდ, რუსო ერთადერთი თმაცვრემოშვებული ბრძენკაცი იყო იმ ხანებში. თერძის მეშვეობით იგი წლიდან წლამდე ზეწდა და ამრავალფეროვნებდა საზოგადოების ყურადღების მიპყრობის ხერხებს. აღან რემშიმ ნევშატელის ტბის პირას მდგომი რუსო რაღაც გაუგებარი წარმომავლობის აღმოსავლურ ხიფთანში გამოსახა, ოღონდ ეს მხატვრის ფანტაზიის ნაყოფი არ ყოფილა — რუსო ეკლესიაშიც კი ამ სამოსით დაიარებოდა. მრევლი ჯერ აღშფოთებამ მოიცვა, მაგრამ მალევე შეეჩვია ამ ახირებას. ინგლისში რომ მიიწვიეს, დრური ლეინის თეატრშიც ასე გამოწყობილი გამოცხადდა და ბრბოს აღტაცებული შემახილების საპასუხოდ, ლოჟის მოაჯირზე გადაყუდებული, ქ-ნი გარიკის სწორედ ამ ხიფთანის კალთაზე ჩამოკონწიალებამ გადაარჩინა გადმოვარდნას.

გააზრებით აკეთებდა ამას თუ არა, ყოველ შემთხვევაში, რუსო აღმატებული თვით-რეკლამისტი, ან, დღევანდელნი რომ იტყვიან, *პრომოუტერი* გახლდათ:

მისი ექსცენტრომანია, ეპატაჟი, ყოვლად სოფისტური მსჯელობანი განსაკუთრებულ ყურადღებას იპყრობდა და ასე განსაჯეთ, სასურველიც კი იყო ზემდგომ მფარველთა, თაყვანისმცემელთა და უბრალოდ, გარეშე მკითხველთათვის. თუ დავუკვირდებით, პიროვნების ურთიერთობა საზოგადოებასთან, თუნდაც ჩაცმულობისა და იერსახის გათვალისწინებით, იმ დროიდან მრავალი ინტელექტუალისათვის მეტად მნიშვნელოვან ფაქტორად იქცა წარმატების მისაღწევად. ამ მხრივაც რუსო გზის გამკვლევის როლში გვევლინება. ისე, კაცმა რომ თქვას, განა სწორადაც არ იქცეოდა? ხალხის უმრავლესობა ძნელად ეგუება ახალ იდეებს, ოღონდ პიროვნული ქცევით იოლად იხიბლებიან. ექსტრაგაგანტურობა საუკეთესო საშუალებაა მიქსტურის დასატკობად, როცა საქმე უჩვეულო, ერთის შეხედვით, მიუღებელ იდეებს ეხება.

ყურადღების მიპყრობის კიდევ ერთ საშუალებად რუსომ, რომელიც გვარიანი ფსიქოლოგი გამოდგა, ახლა უმაღურობის გამოვლენაც სათნოების ნიშნად გამოაცხადა: რაკი თავად ანგარიშიანი კაცი გახლდათ, ხოლო თავი კი დაირწმუნა — პირდაპირი მნიშვნელობით — ყოველთა შორის გამორჩეულად ზნეობრივი პიროვნება ვარო — ეს უკვე იმას ნიშნავდა, რომ სხვები ბევრად უფრო ანგარიშიანნი უნდა ყოფილიყვნენ, თანაც, მისგან განსხვავებით, მხოლოდ ქვენა მიზნების მისაღწევად შემართულნი. ამგვარი ლოგიკით, ვინც კი მასთან საქმეს დაიჭერდა, ყველა მის გაცურებას ეცდებოდა და იგი, უბრალოდ, ვალდებული ხდებოდა საკუთარი გამჭრიახობითა და შორსმჭვრეტელობით დაეთრგუნა ისინი. ამგვარად, ერთადერთი, რა ნიადაგზეც შეიძლებოდა მისი სხვებთან ურთიერთობა დამყარებულიყო, უმარტივესი პრინციპით გამოიხატებოდა: *ისინი გასცემენ, მე ვიღებ*. ყოველივე ამას რუსო დამატებით გამართლებასაც უძებნიდა: მისივე უნიკალურობის გამოისობით, ვინც კი მის მიმართ სწადიოდა სიკეთეს, ფაქტიურად, საკუთარ თავს სცემდა პატივს. სწორედ ამას უმტკიცებდა დიჟონის აკადემიის კომიტეტის წევრებს მისთვის ჯილდოს მინიჭებასთან დაკავშირებით გაგზავნილ საპასუხო წერილში: *"ჩემი ესეი არცთუ ყველასათვის სასიამო სიმართლეს თესავს და ეს თქვენი გაბედული ნაბიჯიც თქვენვე უფრო გდებთ პატივს... ბატონებო, მარადმწვანე დაფნის გვირგვინი, რითაც შემამკეთ, თქვენზევე დიდბუნებოვნების ნიშნად იქცევა სამარადჟამოდ"*. რუსო იმავე სტილში მოქმედებდა, როცა სახელმა და დიდებამ ბევრს მის მიმართ სტუმართმოყვარეობის ჟინი გაუჩინა: *"საყარად ვიქეც და კაცობრიობაც მოვალეა ჩემნაირ შეჭირვებულთ გაუწოდოს საშეელად ხელი"*... სხვაგან იმასაც ჩივის, რომ *"დამთრგუნველია, ვინდაც საკუთარი ნების საწინააღმდეგოდ, უცნობთაგან წყალობის მიერქმა: როცა ათასგზის განმეორებულ თხოვნას ვთანხმდები, ამას გამორჩენის მიზნით როდი ჩავდივარ — უბრალოდ, მინდა გარეშემო სიმშვიდემ და სიწყნარემ დაისადგუროს... საბოლოოდ, ჩემდამი გამოჩენილი სიკეთე რაც არ უნდა ძვირი ეღიროს, მბოძველი მაინც ვალში მრჩება — მე ხომ ეს უფრო ძვირად მიჯდება"*. თურმე ნუ იტყვით, მას *იძულებულს* ხდიდნენ საკუთარი პირობები დაყენებინა ქალაქგარეთ, აგარაკზე საცხოვრებლად მიწვევის შემთხვევაში: *"ბედნიერებაზე ჩემი წარმოდგენა იმას მოიცავს, აროდეს მოვიმოქმედო ის, რისი მცირედი სურვილიც არ გამაჩნია. ამიტომაც ვითხოვ, სრულად განმიტევოთ ნებისმიერ ვალდებულებათაგან. ოდნავადაც თუ შემაწუხეთ, მეტი ველარასოდეს მიხილავთ თქვენსას"*. სამადლობელო წერილებიც კი (თუკი მათ

საერთოდ შეიძლება ასე ვუწოდოთ) განაწყენებულ-შეურაცხყოფილი კაცის მიერ ბოდიშის მოხდის მოთხოვნას უფრო წააგავს: "დიდად გმადლობთ — წერს იგი მავანს — რომ დამითანხმეთ სტუმრად გწვეოდით. ოღონდაც ჩემი ეს მადლობა ოდნავ უფრო თბილი გრძნობით იქნებოდა ნაკარნახევი, მანდ ყოფნა ასე საძნელო რომ არ გაგებხდათ ჩემთვის."

როგორც ერთი ბიოგრაფთაგანი აღნიშნავს, რუსო ერთთავად რაღაც მახეებს უგებდა ხოლმე ხალხს: ჯერ თავის ხელმოკლეობასა და გაჭირვებაზე მოჰყვებოდა წუწუნს და მერე, თუკი დახმარებას შესთავაზებდნენ, აღშფოთებასა და გულისწყრომას გაითამაშებდა — როგორ არ გესმით, რაოდენ ზიანს აყენებთ საკუთარ თავს, როცა მეგობარი მოვალედ ვინდათ გაიხადოთ... და იქვე დაამატებდა: თუმცა უარზე არა ვარ თქვენი წინადადებაც მოვისმინო, თუკი შევთანხმდით, რომ ფულზე არ ვხურდავდებო. ამგვარად კვანტგამოდებული კეთილმოსურნე, რაიმე გაუგებრობის თავიდან ასაცილებლად, იძულებული ხდებოდა რუსოს მოთხოვნებისათვის აქეთ გაეწია ანგარიში. რუსოს განსაკუთრებით კარგად სოციალურ საფეხურზე მასზე უფრო მაღლა მდგომ ხალხთან ჰქონდა ერთი ფანდი დამუშავებული: სულ იოლად არწმუნებდა ასეთებს, რომ მადლობების ფრქვევა და საერთოდ, ყალბი მადლიერების გამოხატვა მის პიროვნულობასთან შეუთავსებელი იყო; ლუქსემბურგის დუკას, მარშალ დე მონმორანსის ამგვარად შეთხზული ბარათი გაუგზავნა: "არც ხოტბას გასხავთ და ვერც მადლობის სიტყვას გეტყვით, თქვენს სახლში კი ვცხოვრობ. ყველას თავისი ენა აქვს — ჩემსაზე უკვე ყველაფერი გითხარით". ხრიკმა გაჭრა — დუკას მეუღლე პასუხად აქეთ უხდიდა ბოდიშს: "თქვენის მხრივ რაიმე მადლობის გამოხატვა სრულიად ზედმეტია — ეს ჩვენ, მარშალი და მე უნდა ვგრძნობდეთ თავს თქვენგან დავალებულად."

ოღონდაც რუსო სულ არ გახლდათ წყნარი, დალხინებული ყოფის მოსურნე კაცი. მის ანგარიშიან ხასიათს პარანოიკული ბუნებაც გვერდი-გვერდ უთავსდებოდა, და ეს უკანასკნელი არანაირად არ აძლევდა მშვიდი, საკუთარ პიროვნებაზე კონცენტრირებული, პარაზიტული ცხოვრების საშუალებას. გაუთავებელი უთანხმოებანი, დავა და აყალმაყალი ჰქონდა თითქმის ყველასთან თავის გარშემო, მეგობრებთან კი — განსაკუთრებით. ასეთი ქცევა გვაფიქრებინებს, ფსიქიკურადაც ვერ უნდა ყოფილიყო მთლად ჯანმრთელი. თვითმყოფად, ფართო გაქანების გონებაში ეს ავადობა მეტად სახიფათო, ფეთქებად ნიადაგს ქმნიდა როგორც თავად რუსოს, ასევე მის გარეშემო მყოფთათვის. საკუთარი უმცდარობის ამგვარი რწმენა, გარკვეულად, უკვე დაავადების პირველად ნიშნებზე მიუთითებს, და რუსო რომ ერთი უბირი ვინმე ყოფილიყო, ან თავისთავად განიკურნებოდა — გარემოებათა ზეგავლენით — ანდა ეს ავადობა მცირე პიროვნულ ტრაგედიად გარდაისახებოდა; მაგრამ მწერლობის ნიჭმა მას სახელი და დიდება მოუტანა, და სწორედ ეს განუმტკიცებდა რწმენას, რომ საკუთარი თავის მისმიერი შეფასება კერძო აზრი კი არ იყო, არამედ vox populi — ხმა ერისა — მოშურნეთა გამოკლებით, რაღა თქმა უნდა...

ეს მოშურნენი კი ვინღა იქნებოდა, თუ არა მისივე ყოფილი მეგობრები, რომლებიც (ეს მათთან განხეთქილების მერეღა მოსდიოდა თავში), მოკეთეობის ნიღაბს ამოფარებულნი, დასაბამიდან იმის ცდაში იყვნენ, როგორმე საკუთარი ქვენა მიზნებისათვის გამოეყენებინათ იგი. გამორჩენის სურვილის გარეშე მეგობრობა გაუგებარი ცნება იყო მისთვის; და რაკიღა თავად საუკეთესო იყო ადამიანთა შორის, ჟან-ჟაკ რუსოსათვის გაუთავისებელი რამ *a fortiori* ვედარც სხვისთვის უნდა ყოფილიყო შესაძლებელი. ამგვარი ლოგიკიდან გამომდინარე, რუსო ეჭვიანად უთვალყურებდა საკუთარ "მეგობრებს", და პირველსავე საბაბზე ყალილას ტყენდა: დიდროს ეჩხუბა, ვისგანაც ყველაზე მეტად იყო დავალებული; ეჩხუბა გრიმს; მთელი სცენა მოუწყო და მეტად მძიმედ დაცილდა ქალბატონ დ'ეპინეს, მის უგულმხურვალეს თაყვანისმცემელს; ეჩხუბა ვოლტერს — თუმცა ეს არც ისე სამხელო იყო, სიმართლე ითქვას; დევიდ ჰიუმს, ვინც მართლა მოწამედ მიიჩნევდა რუსოს, ვინაც ინგლისში წაიყვანა, გმირად შერაცხა და ყველაფერი იღონა, რათა ვიზიტი წარმატებული ყოფილიყო, თავად რუსო კი — ბედნიერი. სხვა უამრავიც იყო, კარის შედარებით ნაკლებხმაურიანი გაჯახუნებით... მაგალითად — თავის ჟენეველ მეგობარ, ექიმ ტრონშენთან. უმრავლეს შემთხვევაში რუსო მრავალფეროვლიან, საყვედურებითა და ბრალდებებით სავსე წერილებს აცხობდა ხოლმე, დელუქტიური მოკვლევის ნამდვილ შედეგებს, სადაც ყოველი სამხილი ოსტატურად იყალბებოდა, ამბავი გადასხვაფერდებოდა, ინციდენტთა თანამიმდევრობა ირღვეოდა სწორედ იმგვარად, ადრესატი როგორმე "ნამდვილ ურჩხულად" გამოეყვანა. დევიდ ჰიუმს რომ წერილი მისწერა, 1766წ. 10 ივლისით დათარიღებული, დღევანდელ 25 ნაბეჭდ გვერდს მოითვლის. ჰიუმის ბიოგრაფის მოსწრებული დახასიათებით, "ესე უსტარი უბრწყინვალესია სტილით და ყოვლად მომაჯადოებელი თავისი ლოგიკით, რაც კი ოდესმე აღრეული გონების მიერ შექმნილა."

თანდათანობით რუსომ ისიც ირწმუნა, რომ მოკეთეობის ცალკეული შემთხვევები, რითაც მისი მტრები ინიღბებოდნენ, შემთხვევითი კი არ იყო, არამედ შეთქმულების ერთიან ჯაჭვს წარმოადგენდა, ხოლო ეს ყველაფერი პირადად მისი და ზოგადად მისი მოღვაწეობის დასათრგუნად იმიზნებოდა. გამოწვლილვით განსჯის შედეგად იმ დასკვნამდე მივიდა, შეთქმულების საწყისი ვერსელის კომტესას სახლშია საძიებელი (16 წლის რუსო იქ ერთხანობა ლაქიად იღვა): *"ვგრძნობ, სწორედ იმ დროიდან დამიწყეს დევნა-თვალთვალი, საკუთარი ფარული ზრახვების აღსასრულებლად, და რაღა გასაკვირია, თუ მეც იმ სახელმწიფო წყობას ვადანაშაულებ, რომელიც ყოველივე ამ უმსგავსობას ხელს აფარებდა"*. ოღონდაც, საღი თვალთ თუ გადავხედავთ ფაქტებს, სხვა თანამემამულეებთან შედარებით, რუსო ბევრად მეტ პატივში იყო საფრანგეთის ხელისუფალთაგან: სულ ერთადერთხელ დაუპირეს დაპატიმრება, ხოლო მთავარი ცენზორი, ვინმე მალშერბე, ყოველნაირად ხელს უწყობდა მისი ნაწერების გამოქვეყნებას. მაგრამ წლიდან წლამდე რუსო უფრო და უფრო აჯერებდა თავს, რომ საერთაშორისო შეთქმულების მსხვერპლი ხდებოდა — ეს აზრი განსაკუთრებით ინგლისში ყოფნის შემდეგ აეკვიატა. მთავარ კონსპირატორად კი დევიდ ჰიუმს დასახა — რაღა თქმა უნდა, ათეულობით ხელქვეითით გარშემორტყმული. იქამდე მივიდა, უზენაეს სასამართლოს თავკაცსა და ლორდთა პალატის თავმჯდომარეს, ლორდ კემდენს მისწერა, შეიარაღებულ დაცვას მოვითხოვ ქვეყნის ფარგლების დასატოვებლადო. დუერის ნავსადგურში,

გამგზავრების წინ, გემბანზე ავარდა დაფეთებული და კაიუტაში ჩაიკეტა, მერე ანძაზე აძვრა და მოსიერი ბრბოს მიმართა მგზნებარე სიტყვით — ეს თავისუფალი კაცი ძალით სურთ ინგლისში დამაკავონო.

სამშობლოში დაბრუნებისთანავე, სახლის კარზე განცხადებების გამოკვრას მიჰყო ხელი, რომლებშიც წვრილად აღნუსხავდა ყველა იმ წყენა-საჩივარს, საზოგადოების სხვადასხვა წრეების მიმართ რომ დაგროვებოდა; არავინ გამორჩენია, ყველას თავისი მიაგო — მღვდლებს, სწავლულებს, რიგით ნაცნობებს, ქალებს და, ასე განსაჯეთ, შვეიცარიასაც კი გადასწვდა. განსაკუთრებით საფრანგეთის საგარეო საქმეთა მინისტრს ადანაშაულებდა — საერთაშორისო ანტირუსოისტული შეთქმულების მოთავეობის ესტაფეტა ახლა მას გადაულოცა: რუსომ კორსიკისათვის კონსტიტუცია დაწერა და — აჰა შედეგი! საფრანგეთი კორსიკას იერთებს; იმავე საგარეო საქმეთა მინისტრის პირადი თხოვნით მსგავსსავე დოკუმენტს დამოუკიდებელი პოლონეთისათვის ქმნის და — კვლავ ღალატი — მის ჯინაზე, ახლა მინისტრი გადადგა! *"ჭეშმარიტებისა და სამართლის განსახიერების გარდა, ვერა ბრალს ვერ ვდებ თავს ჩემსას, რისთვისაც კი შეიძლება ასე მღევნიდნენ და მაწამებდნენ... მაგათი ნება რომ იყოს, ცოცხლად ჩამასვენებდნენ კუბოში... სადაც არ უნდა მივდიოდე, ყოველ ჩემს შესაძლო სვლას წინასწარ თვლიან და კვალში მღევნენ... ყველა მაგათი მოსყიდულია — შემთხვევითი თანამგზავრები, მეეტლეები, სასტუმროების მეპატრონენი... ვზაზე ისეთ ხმებს მიყრიან, ყოველ ნაბიჯზე გული კბილებით მიჭირავს."* მისი ერთ-ერთი ბოლო ნაშრომი — "დიალოგები საკუთარ თავთან" (წამოიწყო 1772წ.) პირდაპირ ავლენს მის ამ ღვენის მანიას. დამთავრებისთანავე იმ დასკვნამდე მივიდა, "ისინი" ამას ასე არ დატოვებენო და 1776წ. 24 თებერვალს ნოტრ დამის ტაძარს მიადგა — ხელნაწერის საკურთხეველზე დასვენება უნდა ეთხოვა, მხოლოდ ასე თუ გადავარჩინთო. კარიბჭე ჩარახული აღმოჩნდა. აქაც შეთქმულება! მაინც არ ჩაიქნია ხელი, 6 ასლი გადააწერინა და წინდახედულად, სხვადასხვა ხალხს დაურიგა, მათ შორის დრ. ჯონსონის უგანათლებულეს მეგობარ ქალს, ლინჩფილდელ ქ-ნ ბრუკ ბუთბის, რომელმაც გამოაქვეყნა კიდევ ზემოხსენებული ოპუსი 1780წ. ამ დროისათვის რუსო უკვე საფლავს იყო მიბარებული და ალბათ, იმქვეყნადაც ჭმუნავდა ადამიანთა გულარძნილობის გამო...

მანიაკალური სინდრომი სავსებით რეალურ შეგრძნებებს უვლენს შეპყრობილს, და რა გულქვა უნდა იყო კაცი, ხანდახან მართლა არ შეიცოდო ამ ღღეში ჩავარდნილი. მაგრამ ასე იოლად რუსოს ფენომენს გვერდს ვერ აუვლი: ის კაცობრიობის მეგობრად, ჭეშმარიტებისა და სათნოების აპოლოგეტად აცხადებდა თავს, ასეთად სცნობდნენ კიდევ და ასევე იხსენიებენ ხოლმე დღესდღეობით. ამიტომაც უპრიანია, ბოლომდე ჩავეძიოთ, რამდენად ღალადებდა იგი შეუვალ ჭეშმარიტებებს და რამდენად სათნო პიროვნება იყო თავად. აქ სიმართლე-ჭეშმარიტების საკითხი უმთავრესია, რადგან გარდაცვალების შემდგომ, რუსო სწორედ მისი "აღსარებით" იქნა ცნობილი. ეს იყო თვითმცდელობა, სრული შინაგანი სიმართლე ეთქვა ერთი ადამიანის ცხოვრებაზე, რაც მანამდე არავის უცდია. თავისთავად, ეს ერთგვარი ზე-სანდო ავტობიოგრაფიაა, ისევე როგორც

10 წლის მერე (1791) ჯეიმზ ბოზუელის მიერ გამოქვეყნებული დრ. ჯონსონის შრომა მიიჩნევა ზესანდო ბიოგრაფიად.

რუსო სწორედ ამგვარად უდგებოდა თავის ჩანაწერებს. 1770-71 წლების მიჯნაზე, გადაჭედილ სალონებში, 15-17 საათის განმავლობაში კითხულობდა მათ, ხემისათვის პატარ-პატარა შესვენებებით. მისი ბრალდებები ნაცნობ-უცნობთა მიმართ იმდენად დამზაფრავი იყო, ქ-ნმა დ'ეპინემ ხელისუფლების წარმომადგენლებსაც კი მიმართა თხოვნით, აღეკვეთათ ეს უმსგავსობა. რუსო დასთანხმდა, ოღონდ ბოლო ჯერზე ასეთი მიმართვით დაამთავრა საჯარო გამოსვლა: *"მე მხოლოდ სიმართლე ვთქვი. თუ ვინმემ იცის რაიმე ფაქტი, რაიც ჩემს ნათქვამს ეწინააღმდეგება, ათასგვარი მტკიცებაც რომ წარმოადგინოს, მაინც ჩემსაზე ვიდგები. ვინც კი მიცნობს და მაინც უნდობლობას მიცხადებს, გაწკეპვლის ღირსია. ადგეს და მეჩვენოს!"* ამას მეტად შთამბეჭდავი სიჩუმე მოჰყვა.

რუსო თავის სიმართლისმოქმელობის უნარს შესანიშნავი მეხსიერებით ასაბუთებდა; მეტიც, მკითხველს უმტკიცებდა, რომ პირველი იყო, ვინაც არ დაერიდა საკუთარი სექსუალური ცხოვრების წარმოჩენას — ოღონდ არა ტრახანისა და თავმოწონების, არამედ სირცხვილის განცდითა და მონანიების მიზნით: *"ჩემი ამგვარი თავგადასავლების ბნელსა და ბილწ ლაბირინთების მოხილვას ის კი არ მიძნელებს, რაც დანაშაულებრივია, არამედ ის, რაც ახლა მხოლოდ სირცხვილისა და მონანიების გრძობას მიჩენს"*. ოღონდ, რამდენად გულწრფელია რუსო? ტურინში, ჯერ სრულიად ახალგაზრდა, ქალაქის ბნელ შუკებში დაბოდილობდა და ქალს თუ შეეჩხებოდა სადმე, უცილობლად შარვაღჩაზდილი უთმობდა გზას: *"აუწერელია ის სიამოვნება, რასაც ამგვარი გამოხდომები მანიჭებდა!"* უცნაური კომენტარია, ღმერთმანი. რუსო ყველა გაგებით ეგზიბიციონისტი იყო, და ეს მის თხრობასაც აშკარად ეტყობა — ერთგვარი კმაყოფილებითაც კი აღწერს თავის მაზოხისტურ მიდრეკილებებს: ძალად როგორ გამოეყვანა მოთმინებიდან პატერის მკაცრი და — მადემუაზელ ლამბერსიე, რადგან დასჯა შიშველ უკანალზე შიშველივე ხელისგულით გატყეპვაში მდგომარეობდა; იგივეზე უბიძგებდა მეორე ქალბატონს, ვინმე მადემუაზელ გროტონსაც: *"ერთი ნეტარება იყო ეს სასჯელი, მათი ბრძანებების უსიტყვოდ აღსრულება..."* იმასაც ყველა, ბიჭობაში, ხელმრუშობას რომ დაეჩვია, რაც საკვებით ბუნებრივად, საჭიროდ და სასარგებლოდაც კი მიაჩნია: *"ამ ცოდვას, რომლისკენაც სიმორცხვე და გულჩათხრობილობა გვიბიძგებს, ბევრი დადებითიც სდევს თან, წარმოსახვის განსავითარებლად; იგი საშუალებას იძლევა ნებისმიერი ქალი ჩვენს სურვილებს დავუმორჩილოთ და მშვენიერება ვიმსახუროთ — თუმც სინამდვილეში ჩვენ ის არ დავკვებდით... გარდა ამისა, ახალგაზრდებს ზომ ვენერიულ დაავადებებსაგანაც იცავს."* ამასთან, წვრილად მოგვითხრობს, თუ როგორ ცდილობდა ვიღაც მამათმავალი მის ცდუნებას იმავე ტურინის ერთ ქარვასლაში. იმასაც აღიარებს, ქ-ნ დე ვარენსის წყალობას მის მებაღესაც ვუზიარებდით. არც იმის მოხსენება ავიწყდება, მავან ქალწულთან მხოლოდ იმიტომ მომეცარა ხელი, კერტები განუვითარებელი ჰქონდა, იმან კი მირჩია, ქალებს თავი ანებე და ისევ შენს მათემატიკას მიხედო. იქნებ ამი-

ტომაც, მოწიფულობის ხანაში მასტურბაციას მივუბრუნდი, რაც უფრო მოსახერხებელი მგონია, ვიდრე ქარაფშუტა ქალების დევნაო. ისეთი შთაბეჭდილება იქმნება, და იქნებ გამიზნულადაც, რომ ავტორის დამოკიდებულება სექსის მიმართ ბოლომდე რაღაც ინფანტილური დარჩა — აკი ქ-ნ ვარენსაც ის ყველგან მხოლოდ "დედიკოდ" იხსენიებს: "Maman"...

ამგვარი მიდგომა — და ასევე, სხვა ეპიზოდების გახსენება, რაც ქურდობას, ცრუმოწმეობას, სიმხდალესა და სხვათა და სხვათა მრავალთა ცოდვათ მოითვლიდა — თავისებურად განამტკიცებდა კიდევ შეულამაზებელი სიმართლის თქმისადმი რუსოს მიდრეკილების ლეგენდას. მაგრამ სწორედ აქ იყო ძაღლის თავი დამარხული: ამგვარი ბრალდებები საკუთარი თავის მიმართ უკვე სხვების მიმართ რაგინდარა აბსურდულ ბრალდებებსაც დამაჯერებელს ხდიდა. დიდროს თქმით: "თავზე ფერფლს იყრის, რომ სხვების თავზე ლაფის დასხმა გაამართლოს" მეტიც, რუსოს სიმართლე უმეტესად მხოლოდ ნახევარ-სიმართლეა და ეს, ასე ვთქვათ, არჩევითი პატიოსნება სწორედაც რომ უპატიოსნობის დამდად ადევს როგორც მის "აღსარებას", ასევე წერილებს. მის მიერ მოხმობილი "ფაქტები" თანამედროვე მკვლევართა გადასახედოდან ხშირად ზერეულე, დამახინჯებული, ან სულაც არარსებული აღმოჩნდება ხოლმე. ზოგჯერ კი ამას თავად ტექსტში არსებული წინააღმდეგობები ავლენს: ვთქვათ, ჰომოსექსუალიზმზე სულ სხვადასხვას ამბობს *ემილისა* და *აღსარებაში*. მისი უნაკლო მეხსიერებაც, უბრალოდ, მითია: მამამისის გარდაცვალების თარიღიც ეშლება და ასაკსაც არასწორად უთითებს — *სამოციოდე წლისა იყო*; მამინ როდესაც დანამდვილებითაა ცნობილი, 75 წლისა მიიცვალა.

ტურინში საკუთარი თავგადასავლების ლამის ყველა ამბავი ურთიერთწინააღმდეგობრივი დეტალებითაა სავსე. ასე ჩანს, "აღსარების" არც ერთი ეპიზოდი არაა სანდო, თუკი გარეშე მტკიცებებით არაა გამაგრებული. ძნელია არ დაეთანხმო რუსოს ცნობილ თანამედროვე მკვლევარს, იოჰან ჰაიზინგას, რომლის თქმით: "აღსარებაში მრავალგზის განმეორებული განცხადებები ჭეშმარიტებისა და პატიოსნების ზედმიწევნით მიდევნის თაობაზე, მასში გამოვლენილ ტყუილებსა და ნაყალბევს კიდევ უფრო სამარცხვინოს ხდის." ხოლო რაც მის უპატიოსნობას უკვე სწორედაც რომ სახიფათოს ხდიდა, და რასაც ასე უფრთხოდნენ კიდევ მისი ყოფილი მეგობრები — ეს მისი შეითხნილი ბრალდებების უზადო სტილითა და მახვილგონიერებით გადმოცემა იყო. რუსოს ერთი პირუთვნელ ბიოგრაფთაგანი, პროფ. კროკერი აღნიშნავს: "ვენეციაში მომხდარი ეპიზოდის აღწერა (ისევე როგორც ნებისმიერი სხვა მსგავსი შეხლა-შემოხლისა) იმდენად დამაჯერებელია ფსიქოლოგიურად, იმდენად ცოცხლადაა მოთხრობილი, იმგვარი გულწრფელობის აურა ახლავს, შოკისმომგვრელ შთაბეჭდილებას ახდენს მკითხველზე."

მაშ ასე, ესეც რუსოს მართალკაცობის შესახებ; სათნოების თაობაზე რაღა ვთქვათ? ჩვენ თავად, განა ყველა და ყოველთვის მივისწრაფით მისკენ? ერთის შეხედვით, უხერხულიც კია ათასი ჯურის მკვლევარ-კრიტიკოსთა მიერ განჩხრეკილი, შიშველ ფაქტებამდე დაყვანილი თუ გამოწველივით განხ-

ილული რუსოს ცხოვრება თანამედროვეთა რაღაც ზნეობრივ სამსჯავროზე გამოვიტანოთ; მაგრამ აკი თავად მოითხოვდა ამას, და თუ იმ უზარმაზარ გავლენასაც გავითვალისწინებთ, რაც მისმა შეხედულებებმა მოახდინა ეთიკური ნორმებისა თუ ქცევის ნორმების ცვლაზე, სხვა გზა არცა გვაქვს. იგი სიყვარულისთვის გაჩენილად აცხადებდა თავს, და უკვე მცნებად ნაქცევ ამ გრძნობას ლამის მეტი გზებით ქადაგებდა, ვიდრე მახარებელთაგან უმეტესნი. მერედა, რამდენად ავლენდა რუსო სიყვარულს სწორედ მათ მიმართ, ვისაც განგებამ მის გვერდით დააბედა ყოფნა? მართალია, დედის სიკვდილმა ნორმალური ოჯახური გარემო დააკარგვინა, და ვერც რაიმე განსაკუთრებული გრძნობა შერჩებოდა მისდამი, რაკილა არანაირად არ შეიძლება ხსომებოდა; ოღონდაც მას არც სხვა ვინმე ახლობლის მიმართ გამოუჩენია ოდესმე თანაგრძნობა, და საკუთარი მამის სიკვდილიც მისთვის მხოლოდ მემკვიდრეობის მიღების ამბავი იყო. დაკარგული ძმა მაშინდა გაახსენდა, მისი მკვდრად გამოცხადება რომ დასჭირდა, მემკვიდრეობის დარჩენილი ნაწილის დასასაკუთრებლად. საერთოდ, ოჯახთან მისი ურთიერთობა მარტოოდენ ფულით განისაზღვრებოდა. *აღსარებაში* თავად აღნიშნავს: "ჩემში მულამ ორი ურთიერთგამომრიცხავი საწყისი ებრძოდა ერთურთს — ანგარიშიანობა და ზიზღი *ხელის ჭუჭყის* მიმართ." ოღონდაც ამ "ზიზღის" კვალი მისი ცხოვრების გზაზე არსადა ჩანს. საპირისპიროს კი თავად გვიყვება: "*ქონების საკითხი ჩემს სასარგებლოდ რომ გადაწყდა, წერილი საღამოს მივიღე და მეც მეორე დღემდე ვიხანგრძლივებდი სიამოვნებას... მერე თავს ძალას ვატანდი, აუჩქარებლად ამეხსნა ბეჭედი. თამასუქის დანახვაზე ჟრუანტელმა დამიარა, ოღონდ მაინც ვერაფერი შეედრებოდა იმ კმაყოფილებას, საკუთარი თავის მოთოკვა რომ მოვახერხე.*"

თუკი ამგვარ დამოკიდებულებას იჩენდა ოჯახის წევრთა მიმართ, გარეშეს როგორღა მოეპყრობოდა? როგორ და — გოთვერნულად. ქ-ნმა ვარენსიმ ოთხჯერ მაინც იხსნა ქუჩაში ხელგაწვდილი მათხოვრობისაგან, მაგრამ როცა თავად გაზულუქდა, მის კეთილისმყოფელს კი მძიმე დღეები დაუდგა, რუსოს თავი დიდად არ გამოუდვია. ოჯახის ქონება რომ დაისაკუთრა, რაღაც კი "უწყალობა" სამადლოდ, ოღონდ ისიც დაამატა, *მეტი რომ გამოვიგზავნოთ, გარეშემო იმდენი გაიძვერა გახვევიათ, მაინც არაფერს შეგარჩენენო*. ხელების დაბანაც ამას ჰქვია, ნამდვილად. შემდგომში, უკვე თხოვნაზე პასუხის გაცემასაც კი ხედმეტ ტვირთად მიიჩნევდა. სიკვდილამდე დარჩენილი ორი წელი ქ-ნმა ვარენსიმ ლოგინად ჩავარდნილმა გაატარა, და როგორც ამბობენ, მიზეზი, უბრალოდ, საკვების უკმარობა იყო. არადა, *აღსარებაში* რუსომ ქებათა-ქება აღუვლინა, "ქალთა და დედათა შორის უკეთილშობილესად" იხსენიებდა; ისიც არ დაავიწყდა ეთქვა, *მხოლოდ იმიტომ არ ვწერდი წერილს, აღარ მინდოდა მისი შეჭირვება საკუთარ უბედურებათა ჩამონათვალთი გამეძმაფრებინაო*. ბოლოს კი ასე ამთავრებს: "წარვედ, საკუთარ გულმოწყალებათა იგემე ნაყოფი და შენს ბედკრულ მოწაფესაც ჩვეული წინდახედულობით განუშხადე ადგილი მარჯვნივ! განიხარე გადატანილ უბედურებათა გამო, რაკილა ბედმა მათი ჯაჭვი უკვე გაწყვიტა..." სათნოება იქით იყოს და, დააკვირდით, სხვის გარდაცვალებასაც რუსო მხოლოდ საკუთარ ეგოცენტრიკულ კონტექსტში თუ განიხილავს!

საერთოდ, შეეძლო კი მას ქალის სიყვარული რაიმე სხვა, წინასწარგათვლილი სარგებლიანობის გარეშე? მასვე თუ დაუუჯერებთ, ასეთი ვინმე კომტესსა დ'უდეტო გახლდათ, მისი მწყალობელის, ქ-ნ დ'ეპინეს რძალი. იქნება და უყვარდა კიდეც, თავისებურად, მაგრამ საინტერესოა, რომ თავადვე შენიშნავს: *წინასწარ ყველა ღონე ვიხმარე, მისდამი წერილები ისე შექმედებია, მათი გამოქვეყნების შემთხვევაში კარგი დღე არ დასდგომოდაო*. ტერეზა ლევაზიეს რაც შეეხება, სწორედ იმ მრეცხავ ქალიშვილს, 1745წ. რომ გაიხადა საყვარლად და ვინც 33 წელი, რუსოს გარდაცვალებამდე, გვერდიდან არ მოცილებია, ასე და ამგვარად იხსენიებს: *"არასოდეს არავითარი გრძნობა არ გამჩენია მის მიმართ... მხოლოდ ფიზიოლოგიური მოთხოვნილება მაკავშირებდა და არავითარ შემთხვევაში — რაიმე სულიერი. ერთხელ ვუთხარი კიდეც — არც მივატოვებ ოდესმე, და ვერც ცოლად დავისვამ"*. მეოთხედი საუკუნის მერე მაინც გატეხა სიტყვა, რაღაც ჯვრისწერის მსგავსი მოაწყო მეგობრებისათვის თვალის ასახვევად და იქაც არ გაუშვა შემთხვევა, სიტყვით არ გამოსულიყო და განეცხადებინა: *შთამომავლობა ძველს დამიდგამს, და მაშინ ჟან-ჟაკ რუსოს გვერდით დგომა არც ისე უბრალო ამბად გამოჩნდებაო*.

მეორეს მხრივ, თურმე "საკუთარი თავი ეჯავრებოდა" ამ გომბიო, უწიგნურ გოგოსთან თანაცხოვრების გამო; მის ძმას დააბრალა, 42 ცალი ბატისტის პერანგი მომპარაო (ადვილად დასამტკიცებელი და, შესაბამისად, ძნელად დასაჯერებელი ამბავია); სულ იმას გაიძახოდა, ტერეზამ არათუ წერა-კითხვა არ იცის, დროს ვერ გეტყვის და თვის რიცხვს ვერ დაგისახელებსო. არსად გამოჩნდებოდა მასთან ერთად, და თუ სახლში ჰყავდა სტუმრები, ტერეზას ნება არ ჰქონდა, სუფრას მიჯდომოდა. ცხელ კერძს თუ შემოიტანდა ხოლმე და ეგ იყო; *დაცინება-გამახსარავების საბაბს არ მაკლებდაო — წერს რუსო*. მისი უახლოესი წრეც კი ზოგჯერ შეურაცხყოფილად გრძნობდა თავს, იმდენად დამამცირებლად ეპყრობოდნენ გოგოს მათი თანდასწრებით. ისიც ითქვას, ბევრი თანამეინახე ათას რამეს უგონებდა იმ საწყალს, რუსოს საქციელის გასამართლებლად, მაგრამ სწორედ რომ უფრო სანდო ხალხი უდგება დამცველად.

სიმართლე არ უნდა დაუეკარგოთ და შიგადაშიგ რუსო, თავისსავე საწინააღმდეგოდ, აღმატებული გამოთქმებით ამკობს თავის "გულის ვარდს": *მიწაზე ფეხდადგმული ანგელოზი, ნაზი და განმდობი, საუკეთესო მრჩეველი, უბრალო, ტვინაურეველი არსება, დამყოლი ბუნების ადამიანი, ბოჩოლასავით მორჩილი... ვკონებ, რუსო საერთოდ არც იცნობდა მას წესიერად — საკუთარ განცდებში ჩაძირულს, ხელზე მოსამსახურე გოგოს შესასწავლად სად ეცალა. ყველაზე სანდო პორტრეტი, ალბათ, ისევ ჯეიმზ ბოზუელმა დაგვიტოვა, რომელიც 1764წ. ზუთჯერ სტუმრობდა რუსოს და ტერეზასთან ერთად, ინგლისში მოგზაურობის დროსაც თან დაყვებოდა: "ტანმორჩილი, ხალისიანი, კოხტა ფრანგი გოგონა", რომელსაც რუსოს მისდამი მიწერილი 2 სასიყვარულო ბარათი აწაპნა (ჩვენამდე კიდეც ერთია მოღწეული). მათში რუსო თაფლად იღვრება და ადრესატისათვის საალერსო სიტყვებს არ იშურებს. ქალს ბოზუელისათვის უთქვამს: 22 წელი გავატარე ბატონ რუსოსთან ერთად და ჩემს ადგილს საფრანგეთის*

დედოფალსაც არ გაეუცვლიდით. ოღონდ როცა ბოზუელმა შეცდენა დაუპირა, მიზნის მიღწევა გასაკვირად იოლი აღმოჩნდა. მის დღიურებში ვკითხულობთ: "გუშინ დილაუთენია შევადღწიე მის საძინებელში და მხოლოდ ერთხელ მოვასწარი. ჯამში 13 გამოდის". სხვათა შორის, ბოზუელის ჩანაწერებიდან ისეთი შთაბეჭდილება რჩება, ტერეზა არც იმგვარი ბეჩავი ვინმე იყო, როგორც ბევრს ეგონა. ასე ჩანს, მას მართლა უყვარდა რუსო, მრავალმხრივაც პატივს სცემდა, მაგრამ მისივე მაგალითით ჭკუანასწავლი, ისევე იყენებდა, როგორც თავად რუსო სარგებლობდა ამ სიახლოვით. აი, ცხოველები კი რუსოს მართლა უყვარდა. იგივე ბოზუელი წვრილად მოგვითხრობს, თუ საათობით როგორ ერთობოდა თავის კატასთან და ძაღლებთან (ორი ჰყავდა, ჯერ *თურქი*, მერე *სულთანი*). რაც ადამიანებს ვერ დაახარჯა, იმ გრძნობას სულ თავის ცხოველებს უნაწილებდა, ლონდონშიც თან წაიყვანა და სწორედ ძაღლის საეჭვო წკმუტუნმა, ლამის იყო, დრური-ლეინის თეატრში ბ-ნი გარიკის მისდა საბენეფისოდ მოწყობილ წარმოდგენაზე წასვლა რომ გადააფიქრებინა.

რუსოს სხვა რამეებისათვისაც სჭირდებოდა ტერეზა — კათეტერის ჩადგმაში მხმარებოდა, მაგალითად. ოღონდ ვერ იტანდა, თუ ვინმე რაიმე ყურადღებას მაინც გამოიჩენდა მის მიმართ. ერთი ყალილა ატეხა, როცა გამომცემელმა კაბა გამოუგზავნა რუსოს "თანამდგომს", მაღლიერების ნიშნად. მისთვის პენსიის დანიშვნის წინადადებაც ძირშივე უარყო, ვაითუ ჩემგან დამოუკიდებლად იგრძნოს თავიო. მაგრამ რუსოს ნამდვილი დანაშაული დედობის აკრძალვა იყო მისთვის. კაცმა რომ თქვას, სახელი რუსოს უმთავრესად ბავშვთა აღზრდის თეორიებით ჰქონდა გაგებულნი — განათლება, როგორც მთავარი თეზისი — მაგრამ პირად ცხოვრებაში, ნაწერებისაგან განსხვავებით, ბავშვებისაკენ არც იხედებოდა. იმითაც არ დაინტერესებულა, საკუთარი იდეები მაინც შეემოწმებინა პრაქტიკაში. სიტყვით, როგორ არა, იმასაც კი ამბობდა, ბავშვებთან თამაშს არაფერი მიჩვენიაო, მაგრამ ერთი ანეკდოტური ამბავი ამ განცხადებასაც მეტად საეჭვოს ხდის: დელაკრუა, სახელმოხვეჭილი მხატვარი, იხსენებს: *ნაცნობი მეუბნებოდა, გუშინ რუსო დაეინახე ტიუილორის ბაღში, ვიღაც ბავშვს ბურთი აუცდა და დიდ ფილოსოფოსს მოხვდა ფეხზე; იმდენად დაკარგა გონი, საბიჯგელით გამოეწიო საცემრადო. მართლაცდა, რაც ჩვენ ვიცით მისი ხასიათის თაობაზე, ძნელად რომ მისგან კარგი მამა გამოსულიყო; და მაინც, რაც მან თავისი ღვიძლი შვილების მიმართ მოიმოქმედა, პირდაპირ დამზაფრავია:*

პირველი ტერეზასაგან ეყოლა, 1746-47 წწ. ზამთარში. ბიჭი იყო თუ გოგო, ამას ვედარასოდეს გავიგებთ — სახელი არ დაურქმევიათ. რუსოს თუ დაუვჯერებთ, "გული ეწურებოდა", მაგრამ "ტერეზასთვისავე სასიკეთოდ" იძულებული შეიქნა, ბავშვზე უარი ეთქვა. ჩვილს ნომერამოტვიფრული მუყაოს ნაჭერი ჩაუჩურთა ჩვრებში და ახალნაშობიარევი ქალს აიძულა, უპატრონო ბავშვთა თავშესაფრის კართან დაეტოვებინა ფუთა. მის ოთხ მოძღვენო ნაშიერსაც იგივე ბედი ეწიათ, იმ განსხვავებით, რომ მათი დანომვრით აღარ აუტკივებია თავი. სახელიც არც ერთისთვის არ დაუნათლავთ. საეჭვოა, რომელიმე მათგანს დიდხანს ეცოცხლა: ამ დაწესებულების ანგარიში, 1746 წ. რომ გამოქვეყნდა ჟურნალში *Mercure de France*, ცხადყოფს, რა მოვლა-პატრონობაც ექნებო-

დათ... იქ წელიწადში 3,000 ბავშვზე მეტი აღირიცხებოდა და თავად რუსო აღნიშნავდა, წელს 5082 ბავშვი ჩაუბარებიათო. ამთგან 2/3 პირველსავე წელს იღუპებოდა; არსებული მონაცემებით, 100-დან 14 აღწევდა 7 წლის ასაკს, და 5 — ზრდასრულობას; ესენი კიდევ ან მათხოვრობდნენ, ან ქურდობაზე იხდნენ ციხეში. რუსო არც არასოდეს დაინტერესებულა შვილების ბედით; მხოლოდ ერთხელ, 1761 წელს, როცა რაღაც ავადობისაგან ტერეზას თითქოს სააქაო პირი აღარ უჩანდა, სცადა ნომრის მიხედვით ეპოვა თავისი პირმშო, მაგრამ მალევე ჩაიქნია ხელი.

რავა თქმა უნდა, რუსოს ამგვარი ქცევა მთლად შეუმჩნეველი ვერ დარჩებოდა; კერძო წერილებში ორჯერ — 1751 და 1761 წწ. მაინც გახდა იძულებული, თავი ემართლებინა. მერე კიდევ, 1764 წელს, მისი ათეიზმის თაობაზე რუსოს გახშირებული თავდასხმებით გაბეზრებულმა ვოლტერმა ანონიმური პამფლეტი გამოაქვეყნა, სახელწოდებით *Le Sentiment des Citoyens*, სადაც ღიად სდებდა ბრალს ხუთი უმანკო ჩვილის დაღუპვის გამო. ოღონდ ცოტა ზედმეტი კი მოუვიდა — და ათამანგით დაღდასმულ კაციჭამიად მოიხსენია — რითაც რუსოს ყველაფრის უარყოფა გაუადვილა. შემდგომ, 2-ჯერ *აღსარებას* და სხვა ნაწერებშიც იგი კვლავ და კვლავ დაუბრუნდება ამ "ჩვილთა მოსწყვედნის" ბრალდებას, თუმცა ამით მხოლოდ გაიფუჭებს საქმეს — მისი სისასტიკე და ეგოიზმი აქ უკვე შეუნიღბავ თვალთმაქცობასთანაა წილნაყარი. ჯერ იყო და მის გარშემო შემოკრებილ ბიწიერ ინტელექტუალთა წრეს გადააბრალა ყველაფერი — აბა საკუთარ ბავშვთა თავშესაფარში მიგდების იდეა ჩემდათავად საიდან გამიჩნდებოდაო; მერე იმის გაგებინებას შეეცადა, თუ რამდენად "ხელისშემშლელი" იქნებოდა მისთვის ბავშვების ყოლა: "*როგორღა შევინარჩუნებდი აუღმღვრეველ გონებას, განსჯისათვის აუცილებელს, თუკი თავი ოჯახზე ზრუნვითა და სძენა — ბავშვების ჭყიპინით მექნებოდა გამოჭვდილი?.. არადა, იმაზეც ვფიქრობ, ვინ გაზრდიდა? განა შემძლო ტერეზას დედისათვის, ამ ალქაჯისათვის, ან მისი ქურდი ძმისთვის მიმებარებინა?.. ბავშვები რომ მყოლოდა, დედამიწის ზურგზე არ იქნებოდა ჩემისთანა მოსიყვარულე მშობელი... საერთოდ, ნუთუ ჩემი ზნეობის პატრონს, ვინმემ შეიძლება ამისთანა რამ დამაბრალოს?!. შეუძლებელია! არა მჯერა! არა წამს მე, ჟან-ჟაკ რუსო, ამგვარ რამეს ფიქრადაც კი ვერ გავივლებდი..."*

რაკი საკუთარ სათნოებაზე კამათი თავად დაასრულა, რუსომ ახლა ზოგადად თავის იდეების დაცვასაც მოჰყვა; და სწორედ აქ, იქნებ უნებლიედაც კი, იგი საკუთარი პირადი პრობლემებისა და ზოგადად პოლიტიკური ფილოსოფიის ძირისძირ საკითხებს შეეხო. ჩვილების ტრაგიკული ამბავი არა მარტო მისი ხასიათის სიღჯუესა და გულქვაობას ააშკარავებს, არამედ სწორედ იმ საყრდენ წერტილს გვიჩვენებს, საიდანაც აირეკნა რუსოს პოლიტიკის თეორია და, შესაბამისად, სახელმწიფოს როლი მასში. რუსო საკუთარ თავს მიტოვებულ ბავშვად მიიჩნევდა; გარკვეული გაგებით, მთელი ცხოვრება ასეთად დარჩა — ქნვარენის ლამისაა დედის, ხოლო ტერეზას — ძიძის ფუნქციები ჰქონდათ მიკუთვნებული. "აღსარებაში" ამის უამრავ მტკიცებას წააწყდებით და მის გარშემო მყოფთაგან ბევრი სწორედაც რომ დიდი ბავშვივით ეპყრობოდა მას —

იგივე ჰიუმი, მაგალითად; ოღონდ მათ რუსო გულუბრყვილო, უვნებელი არსება ეგონათ, სანამ თავად არ იწვნიეს მისი სიავე. რაკილა საკუთარ თავს მიიჩნევდა ბავშვად, ცხადია, რუსო ვერც ბავშვების აღზრდის უფლებას დაიჩემებდა. ვილაცას უნდა ეკისრა ეს მის მაგივრად, და ეს ვილაც სახელმწიფო იყო.

"თუკი ჩემულ მსჯელობას გამოყვებით, ირწმუნებთ, სავსებით მართებული ხელშეკრულება დამიდვია. განა პლატონიც ამას არ ამტკიცებს? სულაც არ უნდა მოეპყრათ ბავშვებს ნაზად და ფაქიზად — ეს მათ მხოლოდ ვნებთ. დამიჯერეთ, ასე უფრო ბედნიერნი იქნებიან. ნეტავი კი მეც თავშესაფარში მივებარებინეთ — ჩემთვისვე იქნებოდა უკეთესი". ამგვარი მსჯელობითა და საკუთარი პასუხისმგებლობის სახელმწიფოზე გადაბარებით, რუსოს შემდეგ დასკვნამდე მივყავართ: *"ვფიქრობ, ამით მოქალაქეობრივი შეგნება გამოვიჩინე და ახლა პლატონისეული რესპუბლიკის წევრად ვრაცხ საკუთარ თავს".*

როგორც თავად ამტკიცებს, სწორედ ბავშვებზე ფიქრმა და საკუთარი ნამოქმედარის პირუთვნელმა შეფასებამ მიიყვანა იგი სწავლების იმ თეორიამდე, რაც ემილში აქვს ჩამოყალიბებული. ასევე, მის "საზოგადოებრივ ხელშეკრულებასაც" ატყვია იგივე განსჯის კვალი. ის, რაც თავიდან მხოლოდ საკუთარი უგვანი საქციელის გასამართლებლად წამოიწყო, ნელი-ნელ ჭკუაშიც დაუჯდა, მსჯელობის მწყობრ სილოგიზმებში გადაეზარდა და შედეგად, იმ თეზისად ჩამოუყალიბდა, რომ რაკილა სწავლა-განათლებაა საზოგადოების სოციალური და ზნეობრივი მდგომარეობის გაუმჯობესების ძირითადი ბერკეტი, ეს ტვირთი სწორედაც სახელმწიფომ უნდა ზიდოს. სახელმწიფომ უნდა მოახდინოს არა მარტო ბავშვთა გონების ფორმირება (როგორც ეს, სავარაუდოა, რუსოს ბავშვებს უქნა თავშესაფარში), არამედ ყველა ზრდასრული მოქალაქისაც. ასე და ამგვარად, არშემდგარი მამა-აღმზრდელის შერყვნილმა ცნობიერებამ, ლოგიკის უცნაური ჯაჭვის ხლართვით, იგი თავის იდეოლოგიურ პირმშოსთან — მომავალი ტოტალიტარული სახელმწიფოს იდეასთან მიიყვანა.

თეორიული მოსაზრებებიდან მცდარი და ნაჩქარევი დასკვნების გამოტანა რუსოს იმთავითვე ახასიათებდა, რადგან ბევრის მხრივ წინააღმდეგობრივი და არათანმიმდევრული მწერალი გახლდათ. ერთგვარად, სახელის მოსახვეჭელად ამან კარგი სამსახურიც გაუწია — აკადემიურ მოაზროვნეთ აკი მუდამ ზიბლავდათ "პრობლემების" ირგვლივ მსჯელობა... ასე მაგალითად, ზოგან რუსო კონსერვატორის პოზაში დგება, ყოველგვარი რევოლუციის მოწინააღმდეგედ აცხადებს თავს: *"იმის ფიქრიც კი მზარავს, რა იქნება, ხალხის მასები თუ ამოძრავდა; ხალხი რომ ამბოხს აწყობს, მერე იმათ ბარდება, ვინც მათ ორმაგ ბორკილებს ადებს; არავითარი სურვილი არ მაქვს, რაიმე შეთქმულებას შევუერთდე — ამ გზას მხოლოდ არევ-დარევის, ძალმომრეობისა და სისხლისღვრისაკენ მივყავართ; თუნდაც ერთი ადამიანის სიცოცხლის ფასად მიღწეული, მთელი კაცობრიობის თავისუფლებაც არაფრად მიდირს..."* სხვაგან პირწავარდნილი რადიკალია: *"ეს სწორედ თქვენი ფენაა, მდიდართა ფენა, მაღაროებში ლუკმას რომ ჰპარავს ჩვენს ბავშვებს... ისეთი გრძნობა მაქვს, თითქოს ყველა*

მქონებელსა და სვებედნიერს, სწორედ ჩემს ხარჯზე მიეღწიოს სიმდიდრისა და წარმატებისთვის... ეგენი დამშეული მგლებივით არიან — ერთხელ თუ იგემეს ადამიანის ხორცი, სხვა საკვებს პირს აღარც დააკარებენ"... საერთოდ, მისი კვეთილი აფორიზმები, რაც ასე იზიდავდა მკითხველს, განსაკუთრებით ახალგაზრდობას, სწორედაც რადიკალური შინაარსით გამოირჩეოდა: "მიწის ნაყოფი ყველა ჩვენგანს ეკუთვნის — მხოლოდ მიწა არ შეიძლება ეკუთვნოდეს ვინმეს", "ადამიანი თავისუფალი იბადება, ბორკილებს მას მერე ადებენ". ფრანგული ენციკლოპედიისათვის დაწერილ პოლიტიკური ეკონომიის ფორმატში შეჯამებულია მისი შეხედულება მმართველი კლასის დამოკიდებულებაზე სხვათა მიმართ: "თქვენ ჩვენ გჭირდებათ, ვინაიდან ღარიბები ხართ, ჩვენ კი — მდიდრები; შევთანხმდეთ: ნებას მოგცემთ ვვემსახუროთ, ოღონდაც ყველაფერი უნდა გადმოვცეთ, რაც კი რამ გავაჩნიათ — თქვენზე ბატონობის გასამრჯელოდ".

ახლა, რაკილა ჩავხვდით, რა ტიპის სახელმწიფოს აშენება სურდა რუსოს, მისი შეხედულებებიც გასაგები ხდება: საჭირო იყო არსებული საზოგადოების სრულიად სხვა, პრინციპულად ეგალიტარულ ჩარჩოში მოქცევა — ოღონდ ისე, რომ ჯანყსა და რევოლუციას მისი საფუძვლები ძირშივე არ მოერყია. მდიდართა და პრივილეგირებულთა მმართველობა შეიცვლებოდა საყოველთაო ნების გამომხატველი სახელმწიფო წყობით, რომლის მორჩილებაც ასევე საყოველთაო თანხმობით მიიღწეოდა; ამგვარი თანხმობა და მორჩილება კი ნებსითი და თავისთავადი მოთხოვნისგან იქნებოდა განპირობებული, რადგანაც თავად სახელმწიფო, კულტურის წარმართვის სისტემური პროცესის მეშვეობით, ყველა სულდგმულში სათნოებას დაამკვიდრებდა. სახელმწიფო მამა იქნებოდა — patrie, ხოლო მოქალაქეები — მის მეურვეობას თავშეფარებული ბავშვები (სწორედ აქედან მოდის დრ. ჯონსონის თითქოსდა ბუნდოვანი რემარკა, რომ **"გაიძვერას ბოლო თავშესაფარი — პატრიოტიზმი"**). რუსოს საკუთარ ბავშვებისაგან განსხვავებით, ამგვარ მოქალაქე/ბავშვებს მართლაც აწყობთ თავშესაფარ/სახელმწიფოში გაერთიანება — საერთო ნებით, მის კანონიერებას აღიარებენ და შედეგად, ხმაც აღარ ამოეღებათ: რაკილა კანონები მოითხოვეს, მორჩილებაც მართებთ.

მართალია, რუსო ამ საყოველთაო ნებას თავისუფლების გამოხატვად აცხადებს, სინამდვილეში ეს სხვა არაფერია, თუ არა ავტორიტარიზმის იარაღი, ლენინისეული "დემოკრატიული ცენტრალიზმის" პროტოტიპი. ჯერ ის რად ღირს, რომ ამ საყოველთაო ნებით მიღებული კანონები, უცილობლობის წესით, ზნეობრივადაც შეუვალად ცხადდება: "ხალხი, თუ საკუთარი თავისთვის ქმნის კანონს, შეუმცდარია"; "საყოველთაო ნება არ შეიძლება უსამართლო იყოს" და ა.შ. მეტიც, რაკილა "სახელმწიფო მუდამ საყოველთაო ნების ებგურია, მისი გააზრება-გადააზრებაც სავსებით შეგვიძლია ხალხის რჩეულთ გადავაბაროთ, რადგან ცხადია, საყოველთაო ნება ყოველთვის იმ გადაწყვეტილებისაკენ უბიძგებთ მათ, რაიც, სამომავლოდ, ყველასათვის სასიკეთო აღმოჩნდება". აქედან გამომდინარე, ნებისმიერი ინდივიდი, ვინც საყოველთაო ნებას არ ეთანხმება, ძირისძირშივე მცდარ გზას ადგას: "თუკი მე უმცირესობაში ვარ, ეს პირდაპირ მიმანიშნებს, რომ ვცდებოდი — ჩემი ნება საყოველთაო არ ყოფილა". აქ

უკვე ართურ კესტლერის "ბნელეთი" ან ჯორჯ ორუელის "ენახლი" გაგახსენდება კაცს...

რუსოს ნასურვები სახელმწიფო უბრალოდ ავტორიტარული კი არაა — იგი უკვე ტოტალიტარულის ნიშნებს შეიცავს, რადგანაც ადამიანის აქტივობის ყველა ასპექტს განაგებს, მათ შორის — აზროვნებასაც. საზოგადოებრივი ხელშეკრულების თანახმად, ინდივიდი ვალდებულია "ყველა უფლება და საკუთარი თავიც ერთიან საზოგადოებას (ე.ი. სახელმწიფოს) გადასცეს. რუსო იმაზე წუხდა, რომ ძირეულ უთანხმოებას ხელაგდა ადამიანის ბუნებრივ ეგოიზმსა და მის საზოგადოებრივ მოვალეობებს შორის, რაც, მისი აზრით, კერძო ადამიანს ზოგადად მოქალაქისაგან განასხვავებდა. სწორედ ამისათვის, ანუ ადამიანის "გასამთლიანებლად" იყო მოწოდებული სახელმწიფო: *"პიროვნება ერთიანი უნდა იყოს, და მხოლოდ მაშინ იქნება ნამდვილად ბედნიერი; ან თავ-ფეხიანად სახელმწიფოს უნდა ეკუთვნოდეს, ან მისსაკე თავს შეატოვო, მაგრამ თუ სურვილებს განუცალკევებ — ორად გახლეჩილი გულიდა შევრჩება ხელში. მაშასადამე, ნებისმიერ მოქალაქეს, როგორც ბავშვს, ისე უნდა მოეკიდო: გამოზარდო, აკონტროლო მისი ფიქრები, საზოგადოების კანონები გულის ფიცარზე ამოუჭრა; მაშინ გახდება ადამიანი "საზოგადოებრივი ცხოველი" თავისი ბუნებით და მოქალაქე — საკუთარი სურვილის თანახმად. ის ერთი მთლიანი იქნება, ზნეკეთილი, ბედნიერი და ამ ბედნიერებას სახელიც ექნება — რესპუბლიკა."*

დიადი მიზანი ტოტალურ მორჩილებას მოითხოვდა. რუსოს მიერ მომზადებული კორსიკის კონსტიტუციის პროექტში, საზოგადოებრივი ხელშეკრულების ფიცი ასე ჟღერს: "მე, ჩემი სხეულით, გულითა და სულით, ქონებითა და შესაძლებლობით, ყველა სიკეთით რაც კი გამაჩნია, ვუერთდები კორსიკელ ერს, მის მფლობელობაში გადავცემ ჩემს თავს და ყველას, ვინც კი ჩემზეა დამოკიდებული." ამგვარად, სახელმწიფო სრულად აკონტროლებს ეკონომიკასა და საზოგადოებას, ცხოვრება ხდება სპარტანული და ანტი-ურბანისტული, ხალხს მხოლოდ სპეციალური ნებართვით ექნება ქალაქში შესვლის უფლება — ამგვარი იყო რუსოს მიერ დასახული კორსიკის მომავალი... მოკლედ, კამბოჯაში პოლ პოტის რეჟიმის წინამორბედობას ბევრი არც აღარაფერი უკლდა! ახლა, იმასაც თუ გავითვალისწინებთ, პარიზში სწავლა-განათლებამიღებული "ხალხის რჩეულნი" უკლებლივ რომ იზიარებდნენ რუსოს იდეებს... თავად რუსოსაც გულუბრყვილოდ სჯეროდა, თითქოს ამგვარი სახელმწიფო "კეთილად ეთნეოდა ყველას, რაკილა ხალხი ნაწრთობი იქნებოდა სწორედ მის მიმართ სასიყვარულოდ". იგი არ წერს — *ტვიზგამორეცხილიო*, ეს ტერმინი ჯერ არც არსებობდა, მაგრამ აზრი ზუსტად იგივეა: *"ის, ვინც ხალხის აზრს წარმართავს, მის ქცევასაც გააკონტროლებს"*. ეს კი მოქალაქეებისადმი, როგორც სახელმწიფოს კუთვნილი ბავშვებისადმი მოპყრობით მიიღწეოდა, მათთვის *"სახელმწიფოს სხეულისადმი სრული თანშეწყობა უნდა შთაენერგათ ჩვილობიდანვე: ისინი არაფერს უნდა წარმოადგენდნენ მის გარეშე, და მაშინ მხოლოდ მისთვის იარსებებენ. ის იქნება მათი ყველაფერი და ისინიც ყველაფერს გაიღებენ მისთვის"* — ეს უკვე მუსოლინის მთავარ დებულებას ეხმიანება: *"ყველანი სახელმწიფოს ფარგლებში, არაფერი სახელმწიფოს გარეშე, არაფერი სახელმ-*

წიფოს საწინააღმდეგოდ". ამისათვის ისევ მოქალაქეების, როგორც ბავშვების, აღზრდის საკითხი დგება და ეს გახლდათ სწორედ საზოგადოების აზროვნებაში რუსოს მიერ რევოლუციური გადატრიალების გამომწვევი იდეა — პოლიტიკური პროცესი მან ადამიანური ყოფის ქვაკუთხედად აქცია და საყოველთაო კანონმდებელს, იგივე აღმზრდელს, მესიის როლი მიაკუთვნა — დილემა ახალი ადამიანის შექმნის გზით უნდა გადაჭრილიყო. "ყველაფერი პოლიტიკაზეა დამოკიდებული," — წერდა რუსო, — "სათნოება კარგი ხელისუფლების ნაყოფია მხოლოდ; ბიწიერება ზოგადად ადამიანებს კი არა, ცუდად მართულ მოქალაქეებს ახასიათებთ". მასსადამე, პოლიტიკური პროცესი და ეს ახალი სახელმწიფო პირდაპირ მისწრება იქნებოდა კაცობრიობის ყოველგვარი მანკიერების სამკურნალოდ. შეიძლება ითქვას, სწორედ რუსომ მოუშადა ნიადაგი აზროვნების იმ გზათა სიმრუდეს და ტვინთა ღრძობას, რამაც მერე XX საუკუნეში იჩინა თავი.

რუსოს ცხოვრებაშივე კერპად ქცევის, ასევე, სიკვდილის შემდეგ მისი იდეების ზეგავლენა საზოგადოებაზე დამთრგუნავ შეკითხვებს გვიჩენს ადამიანის უნარის თაობაზე, იოლად უარჰყოს ის, რისი დანახვაც არ სურს. რუსოს პოპულარობა ბევრად იყო დამოკიდებული მისმიერ მტკიცებაზე, რომ იგი არა უბრალოდ სათნო და უდრეკი ბუნების ადამიანია, არამედ უსათნოესია და სწორუპოვარი თანამედროვეთა შორის. როგორღა გაძლო ამ ხელთქმნილმა კერპმა, როცა მისი ხასიათის სისუსტეებიცა და ზნეობის ბიწიერებაც საყოველთაო განსჯის საგანი გახდა? ბოლო-ბოლო, ვინც მას ამხელდა, არც მისი პოლიტიკური მოწინააღმდეგენი იყვნენ და არც ვიღაც შემთხვევითი ხალხი — ყველა მათგანი მისი ყოფილი მეგობარი, შემწე და საზოგადოებისათვის ჩენილი პიროვნება გახლდათ. არც მათი ბრალდებები იყო რიგითი და საერთო დასკვნაც — უმკაცრესი. იგივე დევიდ ჰიუმი, ვინაც რუსო, ახლოს გაცნობამდე, ზრდილ, თავმდაბალ, მოსიყვარულე და ზემგრძნობიარე პიროვნებად მიიჩნია, საბოლოოდ იმ დასკვნამდე მივიდა, რომ "ეგ თვითონაა ნამდვილი ურჩხული, საკუთარ თავს ერთადერთ მნიშვნელოვან მოვლენად რომ სახავს სამყაროში"; არც დიდრო იშურებს უარყოფით ეპითეტებს: "მატყუარა, ამაოებით სავსე, უმადური, გულღრძო, გაქნილი და გულბოროტი..." გრემს ის მხოლოდ "საძაგელ და მიუღებელ" პიროვნებად უჩნდა; ვოლტერს — "ამაოების განმსახიერებელ გველეშაპად". ყველაზე სევდისმომგვრელი კი ქ-ნ დ'ეპინეს, იმ გულკეთილი ქალის ნათქვამია, ვინც იმთავითვე უანგაროდ გვერდში ედგა ახალგაზრდობაში: "ადარაფერი დამრჩენია თქვენთვის, სიბრაღულის გარდა". და ეს მძიმე ბრალდებებიც ფილოსოფოსის აზრებს კი არა, მხოლოდ მის ქცევას ეხება; ბოლო ორასი წლის განმავლობაში სწავლულთა მიერ განჩხრეკილი მასალებიც იგივე ჩამონათვალს გვთავაზობს — *მაზოხისტი, ეგ ზიბიციონისტი, ნევრასთენიკი, პიპოხონდრიით შეპყრობილი, ონანისტი, მამათმავლობისადმი მიდრეკილი, პარანოიკული იდეების მქონე, ნარცისიზმამდე მისული ინტროვერტი, კლექტომანიაკი, ინფანტილური, ყოვლად გამაღიზიანებელი ხასიათის მქონე, მედიდური და საცოდავი პიროვნება*. ვერაფერს იტყვი, შთამბეჭდავი სიაა...


მაგრამ ყველაფერი ეს არაფერს ნიშნავდა და ახლაც არაფერს ნიშნავს რუსოს იდეათა შთაბეჭდილების ქვეშ მოქცეული ხალხისთვის. ცხოვრებაში, რამდენ

მეგობარ-ახლობელს არ უნდა გადამტყერებოდა, მაღევე პოულობდა შემცველს — თავყანისმცემლებს, მოწაფეებს თუ უბრალოდ, მოდას აყოლილ დიდგვაროვანთ, ვინც ღამისსათევს, საჭმელ-სასმელსა და, რაც მთავარია, გუნდრუკის კმევას შესთავაზებდა. მისი საფლავიც უმაღლ მიმლოცველთა მოსახილავ ადგილად იქცა — ევროპის კიდით-კიდედან მოედინებოდა ხალხი, როგორც შუასაუკუნეების ხანის ვინმე წმინდანის სამლოცველოსთან. ამ თავგადაკლულთა მოგონებები, ერთის მხრივ, მართლა შთამბეჭდავი კია: *"მუხლებზე დავეცი... კვარცხლებების ცივ ქვას დავეკონე ტუჩებით... კარგა ხანს ვიყავ ასე, გარინდული"*. მისი ნივთები — სათუთუნე და ქოთანა "წმინდა ალაგს" (სწორედ ასე იხსენიებდნენ) ინახებოდა სასოებით. როგორ არ გაგახსენდეს ერაზმ როტერდამელი და ჯონ კოლეტი, წმ. ტომას ბეკეტის საფლავი რომ მოინახულეს კენტერბერიში 1512წ., და მომლოცველთა წრეგადასულმა თავყანისცემამ ორივე რომ აღაშფოთა. ყურებს თუ დაუჯერებდნენ, "წმ. რუსოს" სახელდება რომ გაეგონათ (სწორედაც ასე იხსენიებდა მას ჟორჟ სანდი) და ისიც რეფორმაციის 300 წლის თავზე? რაღა თქმა უნდა, მისი ნეშტის პანთეონში გადასვენება კიდევ ნავთზე ცეცხლის გადასხმას უდრიდა. თვით კანტისთვის იგი, თურმე, "მგრძობიარე სულის განუმეორებელი სრულყოფილების" განსახიერება ყოფილა; შელისათვის — "გენიის მწვერვალი"; შილერისათვის — ქრისტესმიერი პიროვნება, "ვისთვისაც მხოლოდ ზეციურ ანგელოსთა შორის იყო ადგილი"; ამათ, მაინცადამაინც, არც ჯონ სტიუარტ მილი, ჯორჯ ელიოტი, ვიქტორ ჰიუგო თუ ფლობერი ჩამორჩნენ. ტოლსტოიმ განაცხადა, *მხოლოდ რუსომ და საზარებამ იქონიეს ჩემს ცხოვრებაზე სასიკეთო გავლენაო*. ჩვენი დროის ერთი უგავლენიანეს ინტელექტუალთაგანი, კლოდ ლევი-სტროსი თავის ნაშრომში *Tristes Tropiques*, ამგვარ რამეს გვამცნობს: *"ის ჩვენი მასწავლებელი და სამარადღეამო მეგობარია... ამ წიგნის ყოველი გვერდი შეიძლება მისთვის მიმუძღვნა, მისი დიადი ხსოვნის ღირსად რომ მიმაჩნდეს..."*

გამაოგნებელია, რაღა თქმა უნდა; ისღა დაგვრჩენია ვადიაროთ, ინტელექტუალიც ისეთივე ალოგიკური, დაუჯერებელი, ცრურწმენებით აღსავსე არსებაა, როგორც ნებისმიერი სხვა ადამიანი. რუსოც, ჩანს, მწერლობის უადრესი ნიჭით იყო დაჯილდოებული, ოღონდ როგორც პირადი ცხოვრება, ასევე მსოფლმხედველობაც გვარიანად მოუწესრიგებელი ჰქონდა. ასე მგონია, ყველაზე უკეთ ბოლოს იგი ერთმა ქალბატონმა, სოფი დ' უდეტომ დაახასიათა (სწორედ მასზე უთქვამს რუსოს, *ჩემი ერთადერთი სიყვარულიო*) — ღრმა მოხუცებულობაში, სიკვდილის წინ მას შემდეგი დასკვნა გამოუტანია: "ისეთი უგვანი ვინმე გახლდათ, სიყვარულიც ვერ აკეთილშობილებდა; თან ძალზე მგრძობიარეც... მუდამ ვცდილობდი, ფრთხილად და ნაზად მოვპყრობოდი. ნამდვილი შერეკილი, მაგრამ საინტერესო ვინმე კი იყო..."

ᄋᄇᄆᄅᄄᄃᄂ

ᄁᄀᄉᄈᄇᄆᄅᄄᄃᄂ



მეზღვაური ამსტერდამიდან

ინდონეზიიდან მომავალი, სანელებლებით დატვირთული პოლანდიური ბრივი “ალკმარი” სისხამ დილით მოადგა საუთჰემპტონის ნავსადგურს. ინგლისში გემი დიდხანს დგომას არ აპირებდა — ტვირთს მოუთმენლად ელოდნენ როტერდამელი კომერსანტები; მაგრამ კაპიტანმა გადაწყვიტა, მომქანცველი რეისის შემდეგ ბიჭებს დასვენება არ აწყენთო.

როგორც კი ჩასვლის ნებართვა მიიღეს, “ალკმარის” ეკიპაჟი გუნდგუნდად დაიძრა ტრაპისკენ. მათ შორის ერთი ჟღალწვერა გოლიათი გამოირჩეოდა, სახელად ჰენდრიკ ვესტიგი: მარჯვენა მხარზე პატარა მაიმუნი ეჯდა, მარცხენაზე — მწვანე არრა, ზურგზე კი ინდური დიბა-ატლასით დატენილი აბგა მოეგლო.

ადრეული გაზაფხულის სადამო იდგა. ჰენდრიკ ვესტიგი არხეინად მიაბიჯებდა ქვაფენილზე, თუმცა გაზის ლამპიონების ბჟუტავი შუქი ძლივასდა ატანდა ქუჩებში ჩამოწოლილ ბურუსში. მიდიოდა მეზღვაური, აგონდებოდა მშობლიური ამსტერდამი, სახლი, სადაც დაიბადა და გაიზარდა, აგონდებოდა ერთი ქერათმიანი ქალიშვილი — მისი საცოლე, მესამე წელია რომ ელოდა ჰენდრიკის დაბრუნებას...

ებაგ-ბარ-როულზე ვილაც კარგად ჩაცმულმა მამაკაცმა გააჩერა:

— თუთიყუშს ყიდიო?

მეზღვაური შეყოყმანდა. უნდოდა ერთად დაეცალა ხელიდან მთელი ეს უცხო საქონელი. სწორედ ამ მიზნით გავიდა ქალაქში, წინასწარ დაიანგარიშა კიდეც, რამდენი ფუნტის მოგება შეეძლო. . .

გამოჩენილი ფრანგი პოეტის ამ პაწია მოთხრობას, რომელიც შაჰი ნოჰჰლის ცნობილ ანთოლოგიაშია შეტანილი, ედგარ პოს “დამზაფრაჟი ამბების” აშკარა გაეუენის დალი ატყვია და თან პაროდიული ჟღერადობაც ალაღად დაჰკრავს...

* მოლაპარაკე თუთიყუშის ჯიშია ერთგვარი (მთარგ. შენ.)

— თვალში მომივიდა ეგ თქვენი თუთიყუში, — განაგრძობდა უცნობი, — სწორედ ისეთია, მე რომ მჭირდება. მარტო ვცხოვრობ და ხმის გამცემი არავინა მყავს... მომიდიო?

როგორც ყველა პოლანდიელი მეზღვაური, ჰენდრიკ ვესტიგიც რიგ-ანად ლაპარაკობდა ინგლისურს:

— ბატონი ბრძანდებით, — უთხრა, — გააჩნია, რამდენს გადამიხდით.

თანხაზე არ უვაჭრიათ — უცნობი ჯენტლმენი შემოთავაზებულ საფასურს მაშინვე დაყაბულდა.

— ოღონდ ჩემსას წავიდეთ, ბარემ ქსოვილებსაც ვნახავდი, იქნებ მომეწონოს კიდევ რამე.

იღბლიანი დასაწყისით გახარებული ჰენდრიკ ვესტიგი დაუფიქრებლად მიჰყვა უცნობს. გზად მაიმუნს ყოველმხრივ უქებდა ხასიათს და ამტკიცებდა, ეს ჯიში სხვებთან შედარებით ინგლისის ჰავას უკეთ იტანს და იშვიათი ერთგულიცაა პატრონისო. მაგრამ ქება მალე შეწყვიტა — დარბაისელი ჯენტლმენი აინუნშიაც არ აგდებდა მეზღვაურის ლაქლაქს, თითქოს ხმაც კი არ ესმოდა მისი.

მთელი საათი იარეს ასე უბრად. მხოლოდ ნოტიო ნისლით შეწუხებული მაიმუნი წრიაინებდა დროდადრო, ან თუთიყუში თუ ააფრთხილებდა ფრთებს. უსაშველოდ გაჭიანურებული დუმილისგან მეზღვაურმა, ცოტა არ იყოს, უხერხულადაც კი იგრძნო თავი.

— საცაა მივალთ.

მეგზურის ასე მოულოდნელად დაგდებულმა სიტყვამ შეაკრთო კიდევ ჰენდრიკი. ისინი უკვე ქალაქის შემოგარენში იყვნენ და გზას ორთავე მხრიდან რკინის მესერიით შეღობილი სკვერი ჩასდევდა. ბურუსით მოცულ ხეებს შორის აქა-იქ მწვანეში ჩადგმული კოტეჯების საბუხრე მიწები ილანდებოდა, ხოლო უკან დარჩენილი ნავსადგურიდან ხანგამომკვებით აღწევდა ზღვაში გამავალი გემების გამყივანი საყვირის ხმები.

ერთ-ერთ ჭიშკართან უცნობი შეჩერდა. ჯიბიდან გასაღები ამოიღო, კარი გააღო და მეზღვაური თავაზიანი შესტით გაატარა წინ. მერე ისევ საგულდაგულოდ ჩარაზა კლიტე. ირგვლივ სრული სიჩუმე სუფევდა. ეზოს სიღრმეში პატარა, მოხდენილი სახლი იდგა, მჭიდროდ დახურული დარაბებიდან ოდნავი სინათლეც არ გამოკრთოდა.

უცნობი ჯენტლმენი, მისი სიტყვაძვირობა, უკაცრიელი სახლი — ყოველივე ამას იღუმალების ელფერი დაჰკრავდა. ჰენდრიკ ვესტიგი, ცოტა არ იყოს, შეჩქეფდა კიდევ, მაგრამ მყისვე გაახსენდა უცნობის ნათქვამი — მარტო ვცხოვრობო და გული დაიმშვიდა — რომელი ნაბობი მე ვარ, გაძარც-

ვის მეშინოდესო. “ერთი ვიღაც ახირებული მილიონერია ეტყობა.” — დაასკვნა ბოლოს და აწკმუტუნებულ მაიმუნს დაუცაცხანა.

* * *

მეზღვაური საბოლოოდ დამშვიდდა, როცა მასპინძელს ჰოლში შეჰყვა და სანათის შუქზე გემოვნებით მორთული ოთახს ჰკიდა თვალი — ასეთი მყიდველის ხელში გაუსაღებელი საქონელი მართლა არ უნდა დარჩენოდა.

უცნობი მცირე ხნით გავიდა ოთახიდან და მოოქროვილი გალიით ხელში დაბრუნდა.

— თქვენი ხელით ჩასვით, — თქვა და გალია მაგიდაზე შემოდგა. — არ მინდა მივეკარო, სანამ არ მომეჩვენება. მერე კი ლამფა აიღეთ და გამოძვევით, მეზობელ ოთახში დიდი მაგიდაა, ქსოვილებს იქ გავსინჯავ.

ჰენდრიკიც უსიტყვოდ დაჰყვა მასპინძლის ნებას, მაგრამ გადააბიჯა თუ არა ზღურბლს, ზურგსუკან გასაღების ჩხაკუნი გაისმა. მოიხედა — ოთახში მის გარდა არავინ იყო. შეცბუნებული გაჩერდა; მიხვდა, საგანგებოდ შემოიტყუეს აქ, მაგრამ რა მიზნით, ეგ კი ვეღარ ამოცნო.

მოულოდნელად, ოთახის მოპირდაპირე მხრიდან დაგუდული კენესა შემოესმა. ჰენდრიკმა მაგიდას შემოუარა, კედლის გასწვრივ გაბმული ფარდის კუთხე ფრთხილად გადასწია. ლამფის შუქმა ჩაბნელებული სივრცე გაკვეთა და მეზღვაურის წინაშე დამზაფრავი სურათი გადაიშალა...

უზარმაზარ, მთლიანი აბანოზის ხისგან გამოთლილი ჯვარცმის ქვეშ, თურანულ ტახტზე დედიშობილა დაეკრათ ნაცემ-ნაბეგვი ახალგაზრდა ქალი. უეცრად ჯვარცმამ დაიჭრიალა, ხე შუაზე გაიპო და გაოგნებული ჰენდრიკ ვესტიგის თვალწინ, კედელში დატანებული სარკელიდან დამბაჩიანი ხელი გამოჩნდა. ლულა მეზღვაურის ზედ შუბლს იყო გასწორებული.

— ახლა ყურადღებით მისმინეთ და რასაც გეტყვით, სიტყვაშეუბრუნებლად შეასრულეთ — ოდნავი შეყოვნება და ადგილზე გაგათავებთ!

ჰენდრიკმა თავისი იღუმალი მასპინძლის მჭაზე ხმა შეიცნო.

— სასთუმალთან ორღულიანი დამბაჩა დევს, ოღონდ ერთადერთი ტყვიანა შიგ... თუ სამსახურს გამიწევთ, არ დაგეკარგებათ, ან სხვა რა გზა გაქვთ? ჯერ კი ქალს პირი აუხსენით.

მეზღვაურმა სასთუმალისკენ გაიწია, დამბაჩის ცივ ტარს ჰკიდა ხელი და ერთი კი გაივლო გულში, იქნებ გასროლა დავასწორო, მაგრამ ეს ფიქრი იყო და იარაღის ტუჩი ზედ საფეთქელზე მიებჯინა.

— ნუ სულელობთ! თუ დამიჯერებთ, თქვენთვისვე იქნება უკეთესი.

ჰენდრიკს ცივმა ოფლმა დაასხა. სასწრაფოდ შეხსნა ქალს პირზე აკრული ხილაბანდი და ქანდაკივით გაირინდა.

— არა, მორის, ჩემი ბრალი არ არის. . . არაფერი დამიშავებია! ხომ მეუბნებოდი, დავივიწყოთ რაც მოხდა და თავიდან დავივიწყოთ ყველაფერიო! ნუთუ მატყუებდი, მორის?! — ქალის სასოწარკვეთილი სახე მხეცსაც კი მოუღობბდა გულს.

— თქვენი არაფერი მჯერა, — ცივად გაეპასუხა ხმა კედლის მიღმა.

— ჩემი ბრალი არ არის, მორის!

— ეს თქვენი უკანასკნელი სიტყვები იქნება... ჩემს გარდა მათ ველარავინ გაიგონებს, ველარასოდეს!

— ჩემი ბრალი არ არის მორის, — საწყალობლად გაიმეორა ქალმა. თმაგაშლილი, ნატანჯი, მაინც მომაჯადოებლად მშვენიერი იყო.

— მაგას უკვე აღარა აქვს მნიშვნელობა, გადაწყვეტილია ყველაფერი — ჩემი ხელით მოგკლავდი, მაგრამ... არ შემიძლია, ჯერ ისევ მივყარხარ!

ოთახში ავბედითი სიჩუმე ჩამოვარდა. ჰენდრიკს რაღაც მძიმე წინათგრძნობამ გული მოუკუმშა.

— ახლა შენი ჯერია, მეზღვაურო! — გაისმა ისევ, — სამამდე ვითვლი: თუ მესამე თვლახე, მაგ დედაკაცს შუბლში ტყვიას არ დაატყელებ, ძალივით მოგკლავ! ერთი... ორი...

ცხოველური შიშით ატანილმა ჰენდრიკმა აკანკალებული ხელით გამოჰკრა ჩახმახს. იმწამსვე სარკმლიდანაც იჭექა დამბაჩამ და საფეთქელგახვრეტილი მეზღვაური საკუთარ მსხვერპლს გადაემხო. სამარისებულ სიჩუმეში მხოლოდ პატრონის სვიტრის ქვეშ შემალული მაიმუნის წკმუტუნებდა ისმოდა.


* * *

მეორე დღეს, საუთჰემპტონის არისტოკრატიულ გარეუბანში, შემთხვევით გამვლელებს ერთ-ერთი კოტეჯიდან უცნაური ხმები შემოესმათ და მაშინვე კონსტებლს უხმეს. ცარიელ სახლში ახალგაზრდა, მომხიბვლელი ქალისა და ვიღაც მამაკაცის შიშველი გვაგამები აღმოაჩინეს. ჩაკეტილ ოთახში შიშისგან თავზარდაცემული პატარა მაიმუნი კედლებს აწყდებოდა.

გამოძიებამ დაადგინა, რომ მამაკაცმა ჯერ ქალი მოკლა, ხოლო შემდეგ თავიც მოიკლა. დაღუპულთა ვინაობა მალე გაარკვიეს, მაგრამ ამ უცნაური დრამის ზოგიერთი მხარე მაინც საიდუმლოებით მოცული დარჩა. გაუგებარი იყო, როგორ აღმოჩნდა ინგლისის პერის მეუღლე — ლედი ფინგალი მიტოვებულ კოტეჯში, ერთი დღის ჩამოსულ ვინმე ჰოლანდიელ მეზღვაურთან ერთად...

კოტეჯის მეპატრონის ჩვენებამაც ვერაფერი შემატა ძიებას. მისი თქმით, აქაურობა უბედურ შემთხვევამდე ათი დღით ადრე იქირავა ვინმე კოლინზმა მანჩესტერიდან, რომლის კვალსაც ვერ მიაგნეს. მეპატრონემ კოლინზი დაახასიათა როგორც ზრდილი, სიტყვაძვირი პიროვნება, ერთობ თვალშისაცემი ხუჭუჭა წვერით, თუმცა წვერი შეიძლება ყალბიც ყოფილიყო.

ლორდი ფინგალი შეტყობინებისთანავე ჩამოვიდა ლონდონიდან. უსაზღვრო იყო მისი მწუხარება — საბრალო პირდაპირ აღმერთებდა თავის ცოლს. ამ ტრაგედიის მერე იგი საერთოდ განერიდა საზოგადოებას, ხელი აიღო ბრწყინვალე კარიერაზე და განდეგილივით განმარტოვდა კენსინგტონის საგვარეულო ციხე-კოშკში, სადაც ახლა მხოლოდ მოხუცი, სმენანაკლული კამერდინერი ემსახურება. არავინ იზიარებს მის სიმარტოვეს — ჟამი-ჟამ მხოლოდ მწვანე თუთიყუშში ეხმიანება ინგლისის გულჩათხრობილ პერს: “ჩემი ბრალი არ არ-რი, მორრის. . . ჩემი ბრალი არ არ-რი, მორრის”...



პარამაზოვების საქმე

წლების მანძილზე ბ-ნ შერლოკ ჰოლმსთან ახლო ნაცნობობა და, გაგბე-
დავ ვთქვა, უჩვეულო მეგობრობა მაკავშირებდა. ჩვენმა ხანგძლივმა ურთიერ-
ობამ ერთი პირობა დღიურების წერაც კი მაფიქრებონა და ამას წინებზე,
ძველ ჩანაწერებს რომ ვათვალიერებდი, რამდენიმე გახუნებულ ფურცელს
გადავაწყდი. ფერგადასულმა სტრიქონებმა ნოემბრის ერთი შორეული,
წვიმიანი დღე გამახსენა, როცა მე და ჰოლმსი აგიზგიზებულ ბუხარს
ვუსხედით, ჩვენი კეთილი დიასახლისი, მისის ჰადსონი სამზარეულოში და-
ფუსფუსებდა, ხოლო გარეთ, ბეიკერ-სტრიტზე, გაზის ლამპიონების ისედაც
მქრქალი შუქი ღონღონის ნოტიო ნისლში ძლივსღა ბეუტავდა.

ის დღე ფათერაკებით სავსე ჩვენი ცხოვრების რიგით დღეებს რაღაც არ
ჰგავდა: ჰოლმსი უსაქმოდ იყო, თავის ცნობილ დედუქციურ მეთოდს ვერაფ-
ერში იყენებდა და უკვე იმასაც ვეჭვობდი, როდის გახსნიდა ნესესერს,
როგორც ეს ადრეც ბევრჯერ მოუშოქმედია და ყალიონს ჰაშიშით გააწყობდა.
დროადადრო მალულად გავხედავდი ხოლმე, მაგრამ ამჯერად ამ მანკიერი
ჩვევის დაყოლას, ეტყობა, არ აპირებდა — მშვიდად იჯდა სავარძელში, ნი-
კაპქემ თავისი საყვარელი, დი მაჯიოს ნახელავი ვიოლინო ამოედო და
თვალეზმინაბული, სიმებს აწრიპინებდა. ბოლოს სრულიად თავდაჯერებულმა
გადავწყვიტე, ჩემმა ადრინდელმა შეგონებებმა გაჭრა-მეთქი და გულდამშ-
ვიდებული, კვლავ იმ წიგნს მივუბრუნდი, მთელი ეს ბოლო კვირა რომ დიდის
ინტერესით ვკითხულობდი. როგორც იქნა, უკანასკნელი გვერდიც
გადავფურცლე და წიგნი დავხურე, თუმც ერთხანს კიდევ დავყურებდი მის
მოვარაყებულ გარეკანს. რახანია ლიტერატურულ ნაწარმოებს ასეთი შთა-
ბეჭდილება არ მოუხდენია ჩემზე: ავტორის პირქუშმა ნიჭმა შემძრა, გრძნო-
ბამორეული წამოვდექი და ფანჯარაში გავიხედე. უსიამოდ ცრიდა. ქუჩაში
კანტი-კუნტად თუ გამოჩნდებოდა ვინმე გამვლელი. კარგა ხანს ვიდექი ასე,
მდუმარედ.

ეს მოთხრობა (დედანი — “რუსი მემამულის სიკვდილი”) ჟურნალ *სტრენდ მეგეზინში* გამოქვეყნდა 1905 წელს და თავდაპირველად ავტორის მიერ “შერლოკ ჰოლმსის კრებულში” შესატანად იყო გამიზნული; მაგრამ როგორც ამბობენ, განაწყენებულ (!) მკითხველთა წერილებისა და გამანადგურებელი რეცენზიების გამო, შემდგომ აღარასოდეს დაუბეჭდავს...

— საოცარი ნაწარმოებია... — წამომცდა ჩემდაუნებურად.

— მე თუ მკითხავთ, დიდი არაფერი, — გაისმა უცემ ჰოლმის მშვიდი ხმა.

— რა ბრძანეთ?! ახლა არ მითხრათ, “ძმები კარამაზოვები” წაკითხული მაქვსო!. — ვინც შერლოკ ჰოლმსზე ჩემს ადრეულ ჩანაწერებს იცნობს, კარგად მოეხსენება, რომ ეს ყველასგან გამორჩეული კაცი ლიტერატურასა თუ ფილოსოფიას არად დაგიდევდათ, თუმცა მრავალ სხვა, საბუნებისმეტყველო დარგებში უბადლო ცოდნა ჰქონდა დაგროვილი.

— თქვენ წარმოიდგინეთ, ეგრუა, — გაეღიმა ჰოლმსს, — ოღონდ განა საზრისი შევიცვალე: ახლაც ძველებურად ვთვლი, რომ სისულელეა თავი ათასგვარი ფანტაზიებით გამოიტენო, მითუმეტეს, თუ უშუალოდ საქმეში არაფრად გარგია...

— მერე, ამხელა რომანის კითხვა ვინ დაგაძალათ? — ცოტა არ იყოს, ნიშნისმოგებით ჩავეკითხე და ისევ სავარძელში ჩავეშვი.

— ორმა გარემოებამ მაიძულა, უოთსონ, ორმა გარემოებამ: ერთი ის, რომ ყველა ინგლისელის მსგავსად, არც მე ვარ სენტიმენტებს მოკლებული — ბავშვობის მოგონებები ჩემში ჯერ კიდევ ცოცხლობს... არ ვიცი, მითქვამს თუ არა თქვენთვის, მამაჩემს ფრიად მოწინავე შეხედულებების კაცად მოჰქონდა თავი და იქნებ ამიტომაც მეგობრობდა ერთ რუს რევოლუციონერთან და მწერალთან, ვინმე გერცენთან; ხშირად დაიარებოდა მასთან სტუმრად, ზოგჯერ კი მე და ჩემს უფროს ძმას, მაიკროფტსაც თან წაგვიყვანდა ხოლმე. სწორედ ამ სტუმართმოყვარე ოჯახში ვიზიტის დროს შევხვდი დოსტოევსკის, “კარამაზოვების” მომავალ ავტორს.*

— გასაგებია... მეორე მიზეზი?

— ეს უკვე უმარტივესია, უოთსონ! ბოლოს და ბოლოს, წიგნი კრიმინალურ დანაშაულს ეხება... თანაც ეჭვი მაქვს, რომანს რეალურად მომხდარი ამბავი უნდა ედოს საფუძვლად.**

— ეგ საიდანღა მოიტანეთ?! სიუჟეტი ხომ გამოგონილია! — ვეღარ მოვითმინე.

ჰოლმსმა ვიოლინო გვერდზე გადადო, ჩიბუხი დატენა, გააბოლა, თამბაქოს კვამლში გაეხვია და მერეღა თქვა:

* 1862 წლის ზაფხულში დოსტოევსკი ლონდონს გაემგზავრა, სადაც ნამდვილად ინახულა გერცენი მის ბინაზე.

** “მკვდარი სახლის ჩანაწერებში” დოსტოევსკი იხსენებს ომსკის სატუსალოში გაცნობილ ვინმე ილინსკის, რომელიც საკუთარი მამის მკვლელობის ბრალდებით იყო მსჯავრდებული; მხოლოდ წლების მერეღა გამოირკვა, რომ მკვლელი მისი უმცროსი ძმა ყოფილა. რიგ მკვლევართა აზრით, სწორედ ეს ილინსკია დმიტრი კარამაზოვის პროტოტიპი.

— ასე მთელი მხატვრული ლიტერატურა გამოგონილია, უოთსონ! მაგრამ საქმეც ეგაა, სწორედ სიუჟეტში ვხედავ ამ ნაწარმოების ნაკლს.

— იქნებ თქვენი მოსაზრებებიც გვიბოძოთ?. — ირონიანარევი სკეპტიციზმი გამიკრთა ხმაში.

— აუცილებლად, უოთსონ, აუცილებლად! — ჩაეცინა ჰოლმსს. — ჯერ ერთი ეს მიბრძანეთ, თქვენის ღრმა რწმენით, ვინ მოკლა ბებერი კარამაზოვი?

— რაღა თქმა უნდა, ლაქიამ! ე-ე, რა ჰქვია იმას... ჰო, *სმერდიაკოვმა*. ღმერთმანი, ამ რუსულ გვარ-სახელებზე ენას მოიტეხ კაცი.

— მაგაში გეთანხმებით, ოღონდ რაც შეეხება ლაქიას, თქვენს ადგილას ამგვარი ნაჩქარევი დასკვნებისგან თავს შევიკავებდი...

— რატომ ვითომ?

— მოდით, ლოგიკურად ვიმსჯელოთ, უოთსონ: რის საფუძველზე ასკვნით, რომ მოხუცი მაინცადამაინც ლაქიამ მოკლა?

— თავად არ უამბო ყველაფერი ივან კარამაზოვს?!

— უამბო, კი — აბა, ისე საიდან გაიგებდით... უფრო სწორედ, ავტორი მისი სიტყვებით აღწერს მკვლელობის სცენას — ეს გასაგებია, მაგრამ თქვენ, ექიმ კაცს, ასეთი გულუბრყვილობა არ გეპატიებათ. ერთხელ მაინც როგორ არ დაეჭვდით, ლაქიას ასე უცებ როგორ დაუჯერეთ?

აი ახლა კი მართლა ამერია დავთრები და გაოგნებულმა, სიტყვაც ვერ დავძარი; აშკარად კმაყოფილმა ჰოლმსმა ბოლი ბოლქვებად გამოუშვა პირიდან და განაგრძო:

— კარგად დაფიქრდით, უოთსონ: სმერდიაკოვი ხომ ფსიქიკამოშლილი, ავადმყოფი ადამიანია. ბოლოს და ბოლოს, გონებასუსტ ლიზავეტა სმერდიაკოვასა და ფიოდორ კარამაზოვის შთამომავალი მთლად დალაგებული ჭკუისა ვერც იქნებოდა: გახსოვთ ალბათ, როგორი ფიცხი და თავშეუკავებელი, ლამის ისტერიული ტიპია მამამისი, თვით სმერდიაკოვი კი ნამდვილი ბნელიანია — მუდმივი შეტევებისაგან დაძაბუნებუნი სხეული, გატანჯული ტვინი — ეგაა თქვენი სმერდიაკოვი! დავუშვათ, სულაც არ ჩავარდნილა იმ სარდაფში, დავუშვათ, ის შეტევაც უბრალო თვალთმაქცობა იყო — ეგ ხომ არაფერს ცვლის და არც მისი სიტყვების დასტურად გამოდგება! აკი მეორე დილას ისე წამოუარა, საავადმყოფოში ორი დღე-ღამე უგონოდ ეგდო... როგორ ფიქრობთ, ყოველივე ამის შემდეგ მაგ კაცის სიტყვას დაუჯერება?

ჰოლმსის მახვილ თვალს ჩემი დაბნეულობა არც ამჯერად გამოჰარვია:

— ვიცი, ვიცი, ნამდვილი შეტევა დილით დაემართა, ანუ მკვლელობის შემდეგ, ესე იგი მკვლელობამდე სრულ ჭკუაზე იყო, ამიტომაც მის სიტყვებში

საეჭვო არაფერიაო, იტყვიო! მაგრამ ჩემგან არ გესწავლებათ, უოთსონ — არაიშვიათია, როცა საკუთრივ შეტყუებამდე ორი, სამი ან ზოგჯერ ოთხი საათით ადრეც კი ეპილეფსიით დაავადებულებს გონება ებინდებაო ხოლმე.

— თქვენ რომ გისმინოთ კაცმა, გამოდის, სმერდიაკოვმა საკუთარ თავს დასწამა ცილი...

— ნურას უკაცრავად! მან სრული სიმართლე თქვა, ოღონდ ის სიმართლე, რომელშიც თავად იყო დარწმუნებული! ჭიშკართან ივან კარამაზოვის ნათქვამმა ისე იმოქმედა მასზე, თავს შთააგონა, თითქოს თვითონ იყო მკვლეელი. აკი სმერდიაკოვს მართლაც სურდა ფიოდორ პავლოვიჩის მოკვლა, დიდხანს ემზადებოდა კიდევ ამისთვის და საკუთარ წარმოსახვაში იმდენჯერ ჩაიდინა ეს უმძიმესი დანაშაული, რომ როცა გარემოებათა გამო, მისსავე შექმნილი სქემიდან ამოვარდნილი აღმოჩნდა, ბნედიანის აღვზნებული გონება მოვლენებს უკვე რეალურად ვეღარც აღიქვამდა.

ჰოლმსის რბილი ხმა და მშვიდი, დამაჯერებელი ლაპარაკი მომწუსხავად მოქმედებდა ჩემზე.

— სავარაუდოდ, ყველაფერი შემდეგი თანმიმდევრობით განვითარდა, — აუჩქარებლად განაგრძობდა ჩემი მეგობარი, — სმერდიაკოვმა ჯერ მოხუცი კარამაზოვის ხმა გაიგონა, მერე გრიგორის ღრიალი. წუთიერი ყოყმანის შემდეგ ბაღში გადის, სახლის მოფიათებულ კარს ხედავს და შიგ შედის. იქ კი რა ხდება? იატაკზე უფროსი კარამაზოვის სისხლიანი გვაში გდაა. სმერდიაკოვი მიდის კანკელთან, კონვერტიდან სამი ათასი მანეთს იღებს, ცარიელ კონვერტს ძირს აგდებს, ვითომ ეჭვს დმიტრიზე გადასატანად და ოთახიდან გადის. მისი ყოველი ნაბიჯი ზუსტად ემთხვევა ათასჯერ წარმოსახული მკვლელობის სურათს და გონებაამღვრეულ ლაქიას მართლაც სჯერა, რომ თავად მოკლა მოხუცი.

მცირე ხნით ორივენი ვდუმდით, ბოლოს ისევ მე ვეღარ შევიკავე თავი:

— ჰოლმს, ეს ჰიპოთეზა ნებისმიერი ნევროპათოლოგიის ნაშრომს დაამშვენებდა... ოღონდ, აქამდე მუდამ უტყუარ ფაქტებს ეყრდნობოდით ხოლმე, ამჯერად კი ამდაგვარი არაფერი გაგაჩნიათ!

ჰოლმსი ჩემკენ გადმოიხარა და მოულოდნელად ერთი უცნაური შეკითხვა დამისვა:

— აბა თუ მეტყვით, რითი მოკლეს კარამაზოვი?

— რითი და ქვასანაყით, — ვუპასუხე გაკვირვებულმა.

— ვითომ?..

ის იყო წიგნს წავეტანე, რომ ჰოლმსმა შემაჩერა.

— ნუ შეწუხდებით. შეგახსენებთ, რასაც ამბობს სმერდიაკოვი: “*იმ თუ-ჯის პრესპაპიეს დავწვდი, მაგიდაზე რომ ედოთ, სამ გირვანქას მაინც იწონიდა მოგეხსენებათ, მოვეუქნიე და ზედ კეფაში ვთხლიძე, წვეტიით...*” — ხომ გესმით, უოთსონ, წვეტიით! სასამართლოზე კი ქვასანაყი ფიგურირებდა! და იცით რატომ? იმიტომ, რომ სწორედ ქვასანაყი ჩაარტყეს და არა პრესპაპიე. ამჯერად, თქვენდა უნებურად, სწორი აღმოჩნდით — ქვასანაყი! ეს ერთი ფაქტი. თუნდაც გამოძიებულს დაეშვა მიუტევებელი შეცდომა და გვამის დათვალიერებისას ამგვარი მნიშვნელოვანი დეტალი გამოპარვოდა — მოგრძო მრგვალი საგნით მიყენებული ჭრილობის ხასიათი — ნაფიც მსა-ჯულთა* ყურადღებას უთუოდ მიიპყრობდა ამგვარი შეუსაბამობა... აქედან ვასკენი, რომ თუ ფიოდორ კარამაზოვი ქვასანაყით მოკლეს და არა პრესპაპიეთი, მკვლეელი სმერდიაკოვი ვერ იქნებოდა. სხვათა შორის, ლაქიამ ისიც თქვა, პრესპაპიე გაეწმინდე და თავის ადგილზე დავდეო. თქვენ მაინც ხომ კარგად მოგეხსენებათ, უოთსონ, სისხლის კვალის მოშორება არც ისე ადვილია, როგორც ზოგიერთებს გონიათ. გამადიდებელი შუშა და მახვილი თვალი საკმარისია... მიმიხვდით? მოკლედ, უბრალო ამბავია, ძვირფასო უოთსონ, უმარტივესი!

დაბნეული და დათრგუნულიც კი ვუსმენდი ჰოლმსს, რომელიც მეთოდურად მახვევდა თავისი არგუმენტების ქსელში.

— ახლა სმერდიაკოვისა და ივან კარამაზოვის ბოლო შეხვედრაც გაიხსენეთ: ლაქია უკიდურესად აღზნებულია, შეიძლება ითქვას, სიციფის ზღვარზეა მისული; განა ლოგიკური არ იქნება იმის დაშვება, რომ ასეთ მდგომარეობაში მყოფი კაცის ტვინის ერთი უჯრედი მაინც აუცილებლად შეეწინააღმდეგებოდა ავადმყოფურად აკვიატებულ მტკიცებას — “*მე მოკალი!*” მაგრამ საქმეც ისაა, სმერდიაკოვის თვითმკვლელობა არც მონანიების შედეგია, არც იმედგაცრუების: ეს ერთ ადამიანში ორი საპირისპირო, ურთიერთგამომრიცხავი მე-ს შეუთავსებლობის ნაყოფს უფრო გავს: “*მე — მკვლეელი*” და “*მე — უცოდველი*”. ამგვარ გაორებას ვერ უძლებს ლაქიას გატანჯული ცნობიერება და თვითმკვლელობით იგი სასამართლოს ხელიდან აცლის არა დამნაშავეს, არამედ მოწმეს, რადგან ვიღაცა მაინც შესძლებდა მისი აბლაუბდა მონათხრობიდან საქმის ვითარების სწორად დადგენას. თუმცა საკითხავია, გაითვალისწინებდა კია სასამართლო სმერდიაკოვის ჩვენებას? ალბათ არა. ფსიქიურად დაავადებული ადამიანი მოწმედაც ვერ გამოდგება.

ვუსმენდი და ენაზე ერთი კითხვა მიტრიალებდა. ბოლოს მაინც ვეღარ მოვითმინე:

— მაშ, თქვენის აზრით, მკვლეელი ვინლაა?!

* არავითარი უზუსტობა: ნაფიც მსაჯულთა ინსტიტუტი რუსეთში 1864 წლის სასამართლო რეფორმის შედეგად შემოიღეს, დოსტოევსკის რომანის მოქმედება კი 1866 წ. ზაფხულსა და შემოდგომაზე ხდება.

— ძველი რომაელები იტყოდნენ: qui prodest, qui bono?* მოდით, ჩვენც ამ გზას დავადგეთ. რომანის მიხედვით აშკარაა, რომ მკვლელობის მოტივი ფულია და აქ ორი თანხა ფიგურირებს: სამი ათასი მანეთი, რომელსაც მოხუცი გრუშენკას აძლევს და კიდევ მემკვიდრეობა — ასოცი ათასი მანეთი, ამ თანხას ძმები მამის სიკვდილის შემდეგ მიიღებენ. ვის დააინტერესებდა პირველი თანხა, როგორ ფიქრობთ? სმერდიაკოვს! ეს სამი ათასი მანეთი და ის ფული, ივან კარამაზოვი რომ შეჰპირდა, ლაქიას პარიზში გასამგზავრებლადაც ეყოფა, ე.ი. დიდი ხნის ოცნებას აისრულებს... ოღონდ ჩვენ ხომ უკვე ვიცით, რომ მკვლელობა მას არ ჩაუდენია...

თანხმობის ნიშნად თავი დავუქნიე, მაგრამ ჰოლმსი უკვე იმდენად იყო საკუთარი მსჯელობით გართული, ამისათვის ყურადღებას არ მიუქცევია:

— კიდევ ვის შეიძლებოდა ამ მკვლელობით ხელი მოეხებო? — იკითხა და თავად გასცა პასუხი, — ვის და დმიტრის, შუათანა ძმას: სწორედ დმიტრის სჭირდება ეს თანხა, ამით გაისტუმრებდა კატერინა ივანოვნას ვალის ნაწილს და შელახულ თავმოყვარეობას ცოტათი მაინც აღიდგენდა; მაგრამ მიტიას იმდამინდელ მოქმედებას თავად ავტორი აღწერს — მოდი და ნუ დაუჯერებ... ასე რომ, მამა არც დმიტრის მოუკლავს. აქედან გამომდინარე, საფუძველი გვაქვს დავასკვნათ, მკვლელობის მიზეზი ის სამი ათასი მანეთი არ ყოფილა.

— მემკვიდრეობა?.. — ვთქვი ჩურჩულით.

— დიახაც! — საზეიმო იერით წარსთქვა ჰოლმსმა. — დამეთანხმებით, ასოცი ათასი გვარიანი თანხაა... მერედა, ვინაა მემკვიდრე? ძმები კარამაზოვები! დმიტრი, ივანი და ალიოშა... დმიტრი ამ საქმეში უბრალოა, ეს უკვე გაგარკვიეთ. რჩებიან ორნი — რომელი მათგანია მკვლელი?

ჰოლმსმა ბუნარში მოცეკვავე ცეცხლის ენებიდან მზერა ჩემზე გადმოიტანა.

— რომელია? — გაიმეორა მან და მცირე ხნის ღუმილის მერე თავად განაგრძო, — კეთილი, მოდით მამის მკვლელობაში ეჭვიმითანილი ორივე პიროვნების მოქმედება ცალ-ცალკე განვიხილოთ. როგორ ფიქრობთ, უოთსონ, შეეძლო ივანს მამის მოკვლა? რაღა თქმა უნდა, შეეძლო. მართალია, სმერდიაკოვს უთხრა, *ჩერმაშნიაში* მივდივარო, წავიდა, მაგრამ ვინ იცის, იქ რამდენ ხანს დარჩა? არავინ, იმიტომ რომ რომანში, მისი საკუთარი სიტყვიერი მტკიცების გარდა, ამის თაობაზე არანაირი დასტური არ მოიძებნება. იქნება და ღამით მამისეულ ბაღში იმალება, რომ საკუთარი თვალით ნახოს, ადასრულებს თუ არა მის ჩანაფიქრს სმერდიაკოვი? სავსებით ანგარიშგასაწევი ვარაუდია და აი, როგორ განვითარდებოდა ამ შემთხვევაში მოვლენები: ივანი ხედავს უფროს ძმას; დაინახავს, როგორ დააგდებს ბილიკზე ქვასანაყს და მერე გარბის; ოთახში გაცეცხლებული ფიოდორ კარამაზოვი კედლებს აწყ-

* ვის აწყობს, ვინ იხეირებს? (ლათ.)

დება. სმერდიაკოვი არა ჩანს. ივანს დაწყობილი გეგმები ეფუძნება და გადაწყვეტს თავად გამოიღოს ხელი: უჩუმრად იპარება სახლში და კლავს მამამისს, მერე ისევ ბაღში იმალება. ამ დროს გამოჩნდება კიდევ გონებაამღვრეული სმერდიაკოვი, ივანი ფართოდ გაღებული ფანჯრიდან უთვალთვალებს მას და ხვდება, დანაშაული ან დიმიტრის უნდა გადააბრალოს, ან სმერდიაკოვს. ერთი კია — მსჯავრდებულის სკაშზე ძმის დასმა უფრო აწყობს: ნა-სამართლევი დიმიტრი კარგავს თავის წილს და ივან კარამაზოვი დამატებით ოცი ათას მანეთს მიიღებს. ამიტომაც არ სურს დაეთანხმოს სმერდიაკოვს — *მე მოკვლიო*, რომ ირწმუნება. როგორია ოცი ათასის დათმობა?!

— მაშასადამე, სწორედ ივანია მკვლელი! — წამოვიძახე.

— ჩქარობთ ჩემო მეგობარო, მიუტევებლად ჩქარობთ! — კვლავ ნირ-მეუცვლელად მომიგო ჰოლმსმა. — რა თქმა უნდა, ერთი შეხედვით, ჩემ მიერ დახატული სურათი თითქოს საესეებით ლოგიკურია და ვერც ვერაფერში შემომედავება კაცი, მაგრამ ეს მხოლოდ ერთი შეხედვით! ანგარიში უნდა გავუწიოთ იმას, რომ მკვლელობაზე მსჯელობის დროს ივან კარამაზოვი საკუთრივ მკვლელობის უფლების იდეას იხილავდა, ანუ მკვლელობის, როგორც ბოროტების წინააღმდეგობის ზნეობრივად მისაღებ საშუალებას! ამ შემთხვევაში კი ბოროტება მამამისია — ფიოდორ კარამაზოვი... მეტად საგულისხმოა ივანისა და სმერდიაკოვის საუბარი ჭიშკართან, როდესაც იგი ლაქიას უფროსი კარამაზოვის მოკვლის აზრს შთაუწერავს, თუმცა *მიდი*, *მოკვლიო*, — ერთხელაც არ დასცდენია; ოღონდ მისი სიტყვების ქვეტექსტში ხომ სწორედ ეს თხოვნა გაისმის! აქედან გამომდინარე, თუ დავუშვებთ, რომ მკვლელობა სმერდიაკოვმა ჩაიდინა, მთავარ დამნაშავედ მაინც ივანი უნდა ჩავთვალოთ. მაგრამ აკი უკვე დავადგინეთ — ლაქიას აღნიშნული ბოროტმოქმედება არ ჩაუდენია. იბადება კითხვა: თავად ივანი თუ მოკვლავდა მამას? სიტყვიდან საქმეზე გადასვლას თუ შესძლებდა? ზოგადად ამ კითხვას უკვე გავეცი დადებითი პასუხი, ვიგულისხმებ რა დრო და ადგილი — კერძოდ, მისი გამგზავრება ჩერმაშნიაში, მაგრამ ფსიქოლოგიურ ასპექტს ჯერ არ შევხებივარ. ნუ გავიწყდებათ, უფროსი ძმა შედარებით გაწონასწორებული, საღად მოაზროვნე პიროვნებაა და ის სულიერი ფორიაქი, რომელსაც ბოლოს სიგიჟემდე მიჰყავს, მხოლოდ მამამისის სიკვდილის შემდგომ ეუფლება. ერთი მითხარით, უოთსონ, განა შეეძლო ასეთ კაცს დიმიტრის მიერ დაგდებული ქვასანაყი აუღო და ღვიძლი მამისთვის გულგრილად გაეჩეჩევა თავი? ივანმა ხომ მშვენივრად იცოდა, საკმარისი იყო ჩვენების მიცემის დროს ერთი უზუსტობა და ოცწლიან კატორღას ვედარ აიცილებდა... როგორ ფიქრობთ, ასეთი ადამიანი მკვლელობას ჩაიდენდა? არამც და არამც, უოთსონ! კარგად მოგეხსენებათ, რამხელა უფსკრულია სიტყვასა და საქმეს შორის; ხოლო ჩემი ხანგრძლივი დაკვირვებით, ნამდვილი მკვლელი წინასწარ არასოდეს გაიძახის, კაცი უნდა მოკვლიო; პირიქით, ხმას არ იღებს, რომ შემდეგ მასზე არ მიიტანონ ეჭვი — ასე არაა? სხვათა შორის, კარამაზოვის საქმის გამომძიებელ პერზონისათვის მთავარი ეჭვმიტანილი დიმიტრია, ანუ ის, ვინც მუდამ თავშეკავებული იყო მამასთან ურთიერთობაში; მაგრამ დიმიტრის მუქარები და ივანის თეორიული მსჯელობები მიჩანს სწორედ ორივეს უდანაშაულობის საბუთად... და კიდევ: აბა გაიხსენეთ, უოთსონ, ივანის მოქმედება *სკოტო-პრი*

-გო-ნვე-სკ... ფუი, დასწყევლოს ღმერთმა! — თავი ვეღარ შეიკავა ჰოლმსმა, — გვარებზე იოლი გამოსათქვამი არც მათი ქალაქების სახელწოდებებია... მოკლედ, დაბრუნების შემდეგ: გაიხსენეთ ივანის მოქმედება — ხაზს ვუსვამ, მოქმედება და არა სიტყვები — სიტყვებს, ბოლოს და ბოლოს, შეიძლება არც უნდო კაცი, მაგრამ მან ჯერ კატერინა ივანოვნა მოინახულა, მერე ორჯერ სმერდიაკოვი, მოკლე საუბარი ჰქონდა ალიოშასთანაც — ეს ყველაფერი კი იმას მოწმობს, რომ არათუ მას არ მოუკლავს, დარწმუნებულია, მკვლელობა დმიტრიმ ჩაიდინა და სხვათა შორის, ავტორიც იგივეს გვიდასტურებს... აქედან დასკვნა: სმერდიაკოვისა არ იყოს, ივან კარამაზოვიც მხოლოდ თავის წარმოსახვაში კლავს, თანაც არაერთგზის; მაგრამ ლაქიასთან საუბრის მერე იცნობიერებს დანაშაულს მამის, უფრო კი ტყუილუბრალოდ დაპატიმრებულ დმიტრის წინაშე და ამ კაცის რკინისებური ნებისყოფაც კი იბზარება — მის გონებას სიგიჟის მორევი ითრევს. “მშვიდობით, ოდესღაც გაბედულო ადამიანო!” — სწორედ ეს იყო სმერდიაკოვის მიერ ივან კარამაზოვისათვის ნათქვამი ბოლო სიტყვა...

ჰოლმსი დადუმდა. მე ჯერ ტანში გამცრა, მერე ენის ბორძიკით წავილულლურე:

— გამოდის, რომ... არა შეუძლებელია!..

— რატომ ვითომ?! — ჰოლმსმა წამით შემავლო თვალი და ისევ განზე გაიხედა. — რატომ ხართ ალიოშას უდანაშაულობაში ასე დარწმუნებული?

— აქამდე ასე ვფიქრობდი, ალიოშა კარამაზოვი ყველა ადამიანური სიკეთის განსახიერებაა-მეთქი! — იმდენად აღმაშფოთა ჰოლმსის ამ ყოვლად კომმარულმა ვარაუდმა, საკუთარი პოზიციის შენიღბვა აღარც ჩავთვალე საჭილოდ და პირდაპირ მივახალე:

— თქვენი არ იყოს, მეც ანგლიკანურ ეკლესიას ვეკუთვნი და ჩემთვის უცხოა ეს რაღაც *ჰუმანური მართლმადიდებლობის* დოქტრინა, თავის მხრივ კიდევ ოფიციალურ მართლმადიდებლობას რომ უპირისპირდება, მაგრამ თავად ამ მოძღვრების მიმდევარს, უმცროს კარამაზოვს მაინც თანავუგრძნობ; მეტიც, ბევრ რამეში ვეთანხმები კიდევ. გახსოვთ ეპილოგში ის სცენა ქვასთან? რაოდენი რწმენა, სიკეთე და თვინიერება გამოსჭვივის პატარა ბიჭვებით გარშემორტყმული ალიოშას სიტყვებში! განა...

— და ამავე სიკეთითა და თვინიერებით წარმოთქმული: “დასახერებია!” — სიტყვა გამაწყვეტინა ჰოლმსმა.

გაოგნებული მივაჩერდი და ვიგრძენი, ლამის სისხლი გამყინვოდა ძარღვებში.

— ესეც ხომ მისი სულის ამოძახილია. გახსოვთ ალბათ, ივანმა უამბო, ვიდაცამ ბავშვს რომ ძაღლები მიუქსია და მანაც უმაღლ დაივიწყა თავისი მრწამსი — უჭოჭმანოდ გამოიტანა სიკვდილის განაჩენი...

— ჩემის აზრით, ყველა ნორმალურ ადამიანს იგივე რეაქცია ექნებოდა, — განვაცხადე მტკიცედ.

— არა მგონია, ყველას არა.

— ეგ უკვე ცინიზმია, ჰოლმს!

— უბრალოდ, რეალისტი ვარ, უოთსონ. ალიოშას რაღაც განყენებულ, იდეალურ ადამიანად სახავთ და შექმნილი ხატის დამსხვრევას ვერ ეგუებით. არც მის სიტყვებში და არც მის ქცევაში მცირედი ხინჯის დანახვაც აღარ გინდათ. მე კი ვხედავ და იმასაც ვუშვებ, რომ იმ განაჩენის გამოტანით ალიოშამ წამით თავისი ნამდვილი სახე გვიჩვენა, ღვთისმოსაობით შენიღბული. გეთანხმებით, ალიოშას განაჩენი სამართლიანია, ის ვიდაც მემამულე მართლაც იმსახურებდა ყველანაირ სასჯელს, მაგრამ იცით რა არის მთავარი? ის რომ ალიოშას შეეძლო — გესმით, უოთსონ — *შეეძლო!* — სიკვდილი მიესაჯა ადამიანისთვის... თუმცა იმ კაცს მხეცი უფრო ეთქმოდა, გეთანხმებით, მაგრამ რა მერე? ძვირფასო უოთსონ, მე თუ მკითხავთ, ნებისმიერ ადამიანში სიკეთე და ბოროტება ერთნაირადაა დაბუდებული და მუდმივ ჭიდილში არიან ერთურთთან. ამ მხრივ არც ალიოშაა გამონაკლისი: სანამ მამა ზოსიმა ედგა გვერდში, ალიოშას სულში სიკეთე ზეიმობდა, მერე კი გამოჩნდა ივანი, იმ თავისი დამანგრეველი თეორიებით — მოსასპობია ყველა ბოროტი და ზნედაცემული ადამიანი, რადგან მათი არსებობა წამლავს და აკნინებს ირგვლივ ყველაფერს... რატომ არ გინდათ დაუშვათ, რომ უფროსი ძმის შეგონებას სმერდიაკოვსა და ალიოშაზე ერთნაირად ემოქმედა? იქნება და სწორედ ალიოშას გადაალახინა ის საბედისწერო ზღვარი, ჩანაფიქრსა და განხორციელებას შორის რომ ძვეს... თავად ივანმა ხომ ვერ გადადგა ეგ ნაბიჯი! შეგახსენებთ, რას წერს დოსტოევსკი ალიოშას განცდებზე მამა ზოსიმას სიკვდილის დამეს:

“ცხადად გრძნობდა რომ რაღაც, ცის კაბადონივით ურყევი და გამჭვირვალე ეფინებოდა მის სულს, თითქოს რაღაც განყენებული იდეა ისადაგურებდა მის გონებაში, ისადაგურებდა სამარადჟამოდ...” — ვინ იცის, ეგებ სწორედ იმ ბერის კუბოსთან, ვინაც მისთვის სიკეთესა და ზეგარდმო ნათელს განასახიერებდა, მიიღო კიდევ ალიოშამ გადაწყვეტილება, სამაგიერო მიეზღო მშობელი მამისთვის — სხვებისთვის მრავალგზის ჩადენილი ბოროტების წილ...

ხმელი ხელი ვიოლინოზე დაეშვა, მისი ჩამოქნილი, ნატიფი თითები სიმებს შეეხო.

— მამის სიკვდილის შემთხვევაში ალიოშა დიდძალი თანხის მემკვიდრე ხდება, — მცირე ხნით დუმილის მერე განაგრძო ისევ. — ალბათ იკითხავთ, ფული რაში სჭირდებოდაო, მაგრამ მაშინ ხომ მამა ზოსიმასეული მცნებების განხორციელებასაც შესძლებს! აი, თუნდაც ილუშენკას აღზრდა-განათლება, რასაც ვერასოდეს მოაბამენ თავს მისი ღატაკი მშობლები, ან, ვთქვათ, იგივე კოლია კრასოტკინის, სმუროვისა და სხვა ბიჭების მომავალი ადარდებს —

აკი ისინი, უმცროსი კარამაზოვისა და თავად დოსტოევსკის აზრით, რუსეთის მომავალია! ასე რომ, ჩემო უოთსონ, უკეთილშობილესი ბუნების მიუხედავად, შესაძლოა ალიოშასაც დაეჩქარებინა მამის აღსასრული... და ახლა ისიც ვიკითხოთ, სად იყო ალიოშა იმ საბედისწერო დამეს? არ ვიცით. ვაითუ ბაღში? ალიოშამაც ხომ იცოდა, როგორ ემუქრებოდა დმიტრი მამას. როგორ ფიქრობთ, შეუშლიდა ხელს? ალბათ არა. უმცროს კარამაზოვს მამის მკვლელობა უკვე მართალი სამართლის ქმნად ეჩვენება — ასე ვთქვათ, ავი მოხუცი თავის დათესილს იმკის... დაეუშვათ, ალიოშა მკვლელობის დამეს ბაღში იპარება და განაჩენის აღსრულებას უცდის. ხედავს ფანჯრის ქვეშ მდგარ დმიტრის, რომელსაც ქვასანაყი უჭირავს ხელში; გამოჩნდება გრიგორიც, დმიტრი მას თავში ქვასანაყს ჩასცხებს და უკანმოუხედავად გარბის. გრიგორი ეცემა, ქვასანაყი იქვე გდია. ალიოშა დაბნეულია — მამის მოკვლა განზრახული არა ჰქონია, ეგონა, ღვთის ნებას შუათანა ძმის ხელი ადასრულებდა, ახლა კი არჩევანის წინაშე დგება: თავად იქცეს უზენაესის იარაღად, თუ ბოროტება კვლავაც დაუსჯელი დარჩეს? იგი პირველ გზას ირჩევს, მით უფრო, რომ საშიში არაფერია — გრიგორი გადარჩა და ახლა დმიტრის უყოყმანოდ დაადებს ხელს. მოხუცი კარამაზოვი მხოლოდ სმერდიაკოვსა და თავის უმცროს ვაჟს ენდობა, ამიტომაც თამამად უღებს კარს; ალიოშა კლავს მამას, მერე გასისხლიანებულ ფილთაქვას ბილიკზე მოისვრის და წყვედიად მიიძალება... ასე და ამგვარად, მკვლელობა ჩადენილია. ეჭვი, როგორც ალიოშა ვარაუდობდა, დმიტრიზე მიაქვთ; შედეგი კი ის აგხლავთ, ჩემო კარგო, რომ ალიოშა უცებ გამდიდრდება: მკვლელობის ბრალდებით დაპატიმრებული დმიტრი, ბუნებრივია, თავის წილ მემკვიდრეობას კარგავს; შეშლილი ივან კარამაზოვის კუთვნილ თანხასაც ალიოშა იღებს — მოგეხსენებათ, ფსიქიურად დაავადებულთ მემკვიდრეობის უფლება ერთმევათ — ასე რომ, უმცროს კარამაზოვს ერთბაშად ასოცი ათასი მანეთი ერგება! როგორ ფიქრობთ, შესტკივა გული ძმებზე? არა მგონია. ალბათ მათაც “*ზედმეტ, მანე*” ხალხის კატეგორიას აკუთვნებს... უცნობ მემამულეს თუ დახვრეტის განაჩენი გამოუტანა, ვითომ საკუთარი ძმების მიმართ რატომღა იქნებოდა ნაკლებ პრინციპული? მერე რა, რომ იმ გარეწარზე ცოტათი მაინც უკეთესები არიან — მისთვის ორივე ძმა ყოველად უმაქნისი, ფუჭი, ურწმუნო და უსაზნო ადამიანია — რიდასთვის შეიცოდოს? მკვლელობის შემდეგ კი ალიოშას ქცევა მართლმსაჯულებისათვის თვალის ახვევის ცდას უფრო ჰგავს — გაიხსენეთ ავტორის ტექსტი: “...ალიოშამ ანაფორა გაიხადა. უნაკლოდ შეკერილი სერთუკი, მოკლედ შეკრეჭილი თმა, თავზე კი მრგვალი, რბილი ქუდი მეტად შევნიღდა და კოხტა იერსაც სძენდა. პირისახეზე ერთგვარი სილაღე დაჰყენოდა, მშვიდი, უდრტვინველი სილაღე”. შესაშური ამბავია, არა უოთსონ? მერე კი საქმე ისე შეტრიალდა, ადარც სიცრუის თქმის ცოდვა დაიდო და ადარც სინდისი აწუხებდა — სავსებით გულწრფელად ირწმუნებოდა, დმიტრი უდანაშაულოა...

ჰოლმსი მინავლებული ჩიბუხის გაჩაღებას შეუდგა.

მეც ჩემსას დავწევდი, მაგრამ შესანიშნავმა ჰოლანდიურმა თუთუნმაც ვერაფერი შეძწია, ისე ვიყავი ჰოლმსის ვარაუდებით, განსჯითა და ეჭვებით ნაქსოვ ბაღში გახლართული.

— თუმცა ისიც უნდა ვაღიარო, უოთსონ, რომანში ბევრი რამაა, ამ უკანასკნელ ვერსიას რომ გამორიცხავს, — ჰოლმსის ხმა ჩემს არეულ ფიქრებს შეერია, — გნებავთ, ახლავე ჩამოგიტოვლით ალიომას უდანაშაულობის დამამტკიცებელ უამრავ საბუთს, მაგრამ იქნებ მაინც სიტყვაზე მენდოთ?

დაბნეულმა გავხედე:

— თქვენი ველარაფერი გამიგია, ჰოლმს!

— ვინ იცის, იქნება ქ-ნი ხოხლაკოვა მართალიც იყო და და მოხუცი სწორედ გრიგორიმ მოკლა...

— იმას რაღა ძალა ადგა?!

— მსახური ერთი “პატარა კაცია”, ღირსებაშელახული, დაჩაგრული ადამიანი... იქნებ ამიტომაც ჰქონდა განსაკუთრებული ზიზღი ხეპრე და უხემ ფიოდორ პავლოვიჩის მიმართ; ან იქნებ არც ეს იყო მიზეზი, და მხოლოდ დმიტრის მიერ მიყენებულმა ტრავმამ დაუბინდა გონება — მთელი თავისი შიშები, ზიზღი, ტყვიელი უბრალოდ, უფროს კარამაზოვზე დაანთხია? იქნებ — იურისტთა ჩიქორთული ენით რომ ვთქვათ — მკვლელობა არამოტივირებული იყო და აფექტის მდგომარეობაში ყოფნისას იქნა ჩადენილი...

კრიჭა შემეკრა.

— ესე იგი, წარმოდგენა არა გაქვთ, ვინაა მკვლეელი?

— როგორც ხედავთ, არა. — ჰოლმსმა ეშმაკურად მოჭუტა თვალები და დასძინა — სამაგიეროდ, თქვენ იცით, უოთსონ.

— მე?!


— რა, საკუთარი რიხიანი პასუხი დაგავიწყდათ, *სმერდიაკოვმაო*, რომ მითხარიოთ? ჯერ-ჯერობით, ამ ვერსიის შეცვლის ვერავითარ აუცილებლობას ვერ ვხედავ.

— კი მაგრამ ჰოლმს, ახლა არ იყო რომ მიტკიცებდით...

— ჩემო კარგო, განა ვინმეს ბრალეულობის დამტკიცებას ვჩემულობდი? მხოლოდ ის ვცადე მეჩვენებინა, რომ დოსტოევსკის ამ რომანს, გარკვეულწილად, სრულყოფა აკლია — მთელ რიგ შემთხვევებში მიზეზ-შედეგობრივი კავშირებია დარღვეული — ეს არის და ეს! ახლა ვატყობ, სულ ტყუილად გავერჯილვარ და უნებურად, ასე ვთქვათ, თავად ნაწარმოების ღირსება დავაყენე ეჭვქვეშ... მერწმუნეთ, ამგვარი რამ ფიქრადაც არ გამოვლია. მოკლედ, პატიოსან სიტყვას გაძლევთ — ვეცდები მალე დავივიწყო ეს ყოველმხრივ შესანიშნავი წიგნი: როგორც ჩანს, ლიტერატურული ნამოღვაწარის ჩხრეკა მართლაც არაა ჩემი საქმე და წიგნის გმირებიც მათი ავტორებისათვის მიმინდვია — მომავალში მხოლოდ ცოცხალი ადამიანების

ნამოქმედარის კვლევას ვიკისრებ! იმასაც ვხვდები, მთლად რიგიანი მასპინძელი რომ ვერ გამოვდექი, უოთსონ — ლაქლაქით თავი მოგაბეზრეთ და მინდა ეს შეცოდებაც გამოვისყიდო: დარწმუნებული ვარ, ცოტაოდენი მუსიკის მოსმენაზე ახლა ნამდვილად არ იტყოდით უარს...

ჰოლმსმა ნიკაპქვეშ ვიოლინო მოირგო, ხეში მოიმარჯვა და ბეიკერ-სტრიტის 221^ბ სახლში მდებარე ჩვენს მყუდრო ბინას პაგანინის *კაპრისების* მომაჯადოებელი ჰანგები მოედო.



ბოლი

ანსელმ ჰოლენდი ჯეფერსონში კარგა ხნის წინ დაემკვიდრა. მართალია, არც იმის სადაურობა იცოდა ვინმემ და არც ავანჩავანი, მაგრამ მაშინ ჯერ ახალგაზრდა და თან, ეტყობა, რაღაცით გამორჩეული კაცი იყო — ყოველ შემთხვევაში, თვალ-ტანად ნამდვილად არ დაიწუნებოდა და სამიოდე წელიწადში ჩვენს მხარეში ორი ათასი აკრი საუკეთესო მიწის პატრონის ერთადერთი ქალიშვილი შეერთო ცოლად, სიმამრს ჩაესიძა, იმის სახლში გადაბარგდა, ორი წლის თავზე ცოლმა ტყუპი ბიჭიც გაუჩინა და მალე, სიმამრის სიკვდილის შემდეგ, ცოლის სახელზე ჩაწერილი მთელი ფერმის ბატონ-პატრონადაც იქცა. თუმცა, ჯერ სიმამრის სიცოცხლეშიც არაერთხელ გვსმენია ჯეფერსონელებს მისი ნათქვამი — რაღაც ძალიან ხმაძალა კი გაიძახოდა ხოლმე — ჩემი მიწა და ჩემი მამულიო; ამიტომაც ყველანი, ვისი მამა-პაპაც ამ მიწაზე დაბადებულიყო, ცოტა არ იყოს აღმაცერად უყურებდნენ, სინდისგარეცხილ და დაუნდობელ კაცად თვლიდნენ (თავისი თეთრკანიანი თუ ზანგი მოიჯარეებიც ასე ახასიათებდნენ — ყველა, ვისთანაც კი რამე საქმე აკავშირებდა), მაგრამ ცოლის სიბრალეულით და სიმამრის პატივისცემით, ცხვირს მანაც არ ვუბზუებდით, სალამს არ ვამადლიდით, თუმცა გულზე ნამდვილად არავის გვეხატებოდა. ბოლოს, როცა ცოლიც მოუკვდა და დაქვრივებულს ორი თითისტოლა ბიჭი დარჩა გასაზრდელი, ერთხმად დავასკვენიით — ყველაფერში ისევ და ისევ თვითონ მოუძღვის ბრალი, ამ უთვისტომო გადამთიელის სისასტიკემ და უხიაგობამ მოუწამლა ქალს სიცოცხლეო. მერე, ბიჭები რომ წამოიხარდნენ და (რიგრიგობით, ჯერ ერთი, მერე მეორე) უკანმოუხედავად გაიქცნენ შინიდან, ოდნავადაც არ გაგვეკვირვებია. და აი, როცა ექვსი თვის წინ ჰოლენდი მოულოდნელად მკვდარი იპოვეს, ცხენის უზანგეში ფეხგახლართული და ერთიანად დალილავებული — ეტყობა, ცხენს რკინის მესერის გასწვრივ ეთრია (ისე, ცხოველსაც სულ დაიარებულდასისხლიანებული ჰქონდა ფერდები და გავა, გაშმაგებულ ბერიკაცს დაუნდობლად ეცემა ჯოხით), არავის შეგვეცოდებია — არ შეგვეცოდებია, რადგან

მას შემდეგ რაც ფოლკნერის 'ნახევრადდეტექტიურმა' რომანმა — *გვამის შემკინებელმა* — თვით ავტორისათვისაც კი მოულოდნელი წარმატება მოიპოვა, მწერალს მოესურვა შეექმნა მეტ-ნაკლებად დეტექტიური მოთხრობების მთელი წყება, რომლის მთავარი გმირიც ვეჭვილი გვივინ სტივენსი უნდა ყოფილიყო. ეს მოთხრობა სწორედ ამ კრებულიდანაა აღებული ('მხედრის გამბიტი').

სიკვდილამდე ცოტა ხნით ადრე ისეთი რამ მოიმოქმედა, რაც ყველას, ვინც იმჟამად ჩვენს მხარეში სახლობდა და ჭკუა-გონებას ჩვენნაირად ჰქონდა მოწყობილი, ჯერ არგაგონილ, წარმოუდგენელ დანაშაულად მოეჩვენა. სწორედ იმისი სიკვდილის დღეს შევიტყვეთ, რომ საგვარეულო სასაფლაოზე, სადაც მისი ცოლის წინაპრები იყვნენ დაკრძალულნი, თურმე საფლავები გაეთხარა და ის სამარეც არ დაენდო, რომელშიაც, აგერ უკვე ოცდაათი წელიწადია, მისი ცოლი განისვენებდა. მერე ეს შეშლილი ბერიკაციც შერყენილ და წაბილწულ საფლავებს შორის დამარხეს, დანიშნულ დროს კი მისი ანდერძი გახსნეს და დასამტკიცებლად წარადგინეს. არც ამ ანდერძის შინაარსს გაგუკვირვებდით: არ გაგუკვირვებია, საფლავიდანაც რომ მოეხერხებინა აბუჩად აეგდო საკუთარი ღვიძლი შვილები, უკანასკნელად მოეგონიშნი იმათთვის, ვისი შეურაცხყოფაც და წყენინებაც ჯერ კიდევ შეეძლო.

მამა რომ გარდაეცვალათ, ტყუპებს სწორედ იმ წელიწადს შეუსრულდათ ორმოცი წელი. როგორც ხალხი ამტკიცებდა, ანსელმი, უმცროსი ძმა, დედის ნებიერა იყო — ალბათ იმიტომ, ძმაზე მეტად რომ ჰგავდა მამას. დედის გარდაცვალების შემდეგ, როცა ბიჭები ჯერ მთლად ბავშვები იყვნენ, ბევრჯერ გაგვიგონია, თურმე როგორ დაერეოდნენ ხოლმე ერთმანეთს დიდი ანსი და პატარა ანსი; ვირჯინიუსი კი, ანსის ტყუპისცალი, ერთთავად იმათ შერიგებას ცდილობდა, რისთვისაც მამაცა და ძმაც უკანასკნელი სიტყვებით ლანძღავდნენ და აგინებდნენ. ოღონდ იმას, იმ ჩვენ ვირჯინიუსს, სხვანაირად მაინც არ შეეძლო. ანსელმი, ვირჯინიუსის ტყუპისცალი, პირიქით, კერკეტი კაკალი გამოდგა: თექვსმეტი წლისა გაიქცა შინიდან და ათი წელი არამც თუ აღარ გამოჩენილა, ამბავიც არ შემოუთვლია. როცა დაბრუნდა, უკვე სრულწლოვანი იყო და მამასაც ოფიციალურად მოსთხოვა მიწის გაყოფა. უკვე გაეგო, მოხუცი ანსი მამულის მხოლოდ მეურვედ რომ ითვლებოდა და ახლა თავისი წილის მიღებას ცდილობდა. გაშმაგებული ბერიკაცი უარზე დადგა. ეტყობა, შვილიც არაფერს უთმობდა — შორი-შორს არ წაუვიდოდნენ ერთმანეთს. მერე ისიც შევიტყვეთ, სრულიად მოულოდნელად და ჩვენდა გასაოცრად, თურმე ვირჯინიუსსაც მამის მხარე დაეჭირა. ასე ამტკიცებდნენ და მართლაც, მიწისთვის არავის უხლია ხელი, იმასაც ამბობდნენ, მათთვისაც უჩვეულო, გააფთრებული ჩხუბის მერე — ისეთი ამბავი ატეხილა, ზანგ მსახურებს ძლივს გამოუსწრიათ შინიდან და მთელი ღამე სათოფეზე აღარ გაჰკარებიან სახლს — ზოგი სად დამალულა და ზოგი სად. ახალგაზრდა ანსმა მოჰკიდა ხელი თავის წყვილ ჯორს და სადღე გადაიკარგა... იმ დრიდან მოყოლებული მამის სიკვდილამდე, მას შემდეგაც კი, როცა უკვე ვირჯინიუსიც იძულებული გახდა მამას გაყროდა, აღარასოდეს გაუცია ხმა არც მამისთვის და არც ძმისთვის, თუმცა ამჯერად უწინდელივით არ გადახვეწილა. იქვე, მახლობლად, მთაში დასახლდა (*იქიდან უკეთესად უთვალთვალეებს მამასაც და ძმასაცო* — თქვა ვიდაცამ) და თხუთმეტი წელი პატარა, ოროთახიან მიწურში გაატარა, მარტოდმარტომ, განდევნილივით, საჭმელსაც თავისი ხელით იშნადებდა და ქალაქშიც წელიწადში ასე, ოთხჯერ თულა გამოჩნდებოდა ხოლმე წყვილჯორშებმული ფორნით. რამდენიმე წლის წინ დააპატიმრეს კიდევ, ვისკის უკანონოდ გამოხდისთვის გაასამართლეს. არც დამცველი იქირავა, არც არაფერი აღიარა: კანონის დარღვევისა და სასამართლოს უპატივცემულობისათვის ჯარიმის გადახდა დააკისრეს და როცა ვირ-

ჯინიუსმა შესთავაზა, მე გადავიხდი მაგ ჯარიმასო, ისეთმა სიშმაგემ დარია ხელი, მამამისი მონაგონი იყო. იქვე, სასამართლოშივე გაიწია ძმის საცემრად, თვითონვე მოითხოვა, ციხეში წამიყვანეთო და რვა თვის მერეღა გათავისუფლდა სამაგალოთო ქცევისათვის. მერე ისევ თავის მიწურს დაუბრუნდა: პირქუში, დაბლვერილი, სიტყვაძუნწი, არწივისცხვირიანი კაცი, ვინც მეზობლებსაც და შემთხვევით გამვლელებსაც ერთნაირად სცემდა ზაფრას.

მეორე ტყუპისცალი, ვირჯინიუსი, შინ დარჩა — მამულს უძღვებოდა, მიწას ამუშავებდა, რადგან მამამისს ფერმის საქმე მუდამ ფეხებზე ეკიდა (ამბობდა კიდევ ხალხი მოხუც ანსზე: ვინაა და სადაური არ ვიცით, ოღონდ ფერმერისა კი ნამდვილად არაფერი სცხიანო; მამა-შვილის წაკიდების მიზეზსაც ჩვენებურად ვხსნიდით: გულმა ვედარ მოუთმინა ახალგაზრდა ანსს, როცა ნახა როგორ უვერანებდათ ბერიკაცი დედის დანატოვარ მიწასო). მაგრამ ვირჯინიუსი მაინც მამასთან დარჩა. რა თქმა უნდა, არც იმას უღხინდა, მერე ხშირად გვითქვამს, უნდა მიმხედარიყო, ასეთ ცხოვრებას დიდი დღე არ ეწერაო. ხოლო როცა მოსახდენი მოხდა, იმასაც ვფიქრობდით, შეიძლება სხვაზე უკეთ ზღვებოდა კიდევაცო. რა ვქნა, ასეთი კაცი იყო. ვერავინ იტყოდა რას ფიქრობდა, რა ედო გულში. მოხუც ანსსა და ახალგაზრდა ანსს მოხარშულებს ვიცნობდით. იქნება, რაღაცა ჩვენც გვემლებოდა, ოღონდ იმათი გულისნადების ამოცნობას მაინც არ სჭირდებოდა ბევრი ტვინის ჭყლეტა. აი, ვირჯინიუსი კი გულში არავის ჩაახედებდა. მოგვიანებითღა აეხადა ყველაფერს ფარდა. ისიც ვერავინ გავიგეთ, ძმის წასვლისა და მამასთან ერთ ჭერქვეშ ათი წლის ცხოვრების მერე, ბოლოს და ბოლოს, იმანაც რად აიკრა გუდანაბადი. თვითონ არავისთვის არაფერი უამბია, ალბათ გრენბი დოჯთანაც არ დასცდენია სიტყვა. თუმცა, ჩვენ მოხუც ანსსაც ვიცნობდით და ვირჯინიუსსაც და იმათი განხეთქილების ამბავიც ჩვენებურად გვქონდა წარმოდგენილი.

ყველა ვხედავდით, მოხუცი ანსი მთელი წელი გიჟსა ჰგავდა, მას მერე, რაც ახალგაზრდა ანსმა ჯორები წაიყვანა და მთაში გაიხიზნა. ბოლოს ეტყობა, მთლად აევსო მოთმინების ფიალა და ვირჯინიუსს რაღაც ამდაგვარს ეტყობა, ნაღდად:

“გგონია, რახან შენი ძმა წაეთრა, ახლა მანამდე გაპარპაშებ აქ, ვიდრე მთელი მამული შენ დაგრჩებოდესო?”

“არა მჭირდება მთელი მამულიო — ასე მიუგებდა ვირჯინიუსი — ოღონდ კი ჩემ წილ მიწას ველირსებოდეთ”.

“ჰოოო, — ეტყობა, ალბათ, მოხუცი ანსი — მაშ, შენც მიწის გაყოფა გდომებია? მაშ, შენც იმის ჭკუისა ბრძანებულხარ? თქვენი აზრით, როგორც კი სრულწლოვანები გახდით, მაშინვე უნდა დაგვექუსტაცებინა მიწაო?”

“მე ბევრს არა გთხოვ, ცოტაოდენი მინდა, რიგიანად რომ დავამუშავო და გულხელდაკრეფილმა არ ვუცქირო, ტყუილად როგორ პარტახნებაო,” —

უპასუხებდა ვირჯინიუსი, როგორც ყოველთვის ჭკვიანურად, როგორც ყოველთვის მორჩილად: არავის ახსოვს, ვირჯინიუსს წონასწორობა დაეკარგოს, ან თუნდაც აღელვება შესტყობოდეს, მაშინაც კი მშვიდად იდგა, სასამართლოში, როცა ანსელმა გალახვა დაუპირა იმ ჯარიმის გამო.

“მაშ ეგრო! – იტყოდა მოხუცი ანსი — “კარგი, მაგრამ მთელი ეს წლები მე რომ წლებზე ფეხს ვიდგამდი, მიწას ვამუშავებდი, გადასახადს ვიხდიდი, შენ და შენ ძმას კი ფულის მოქუჩების მეტი სხვა დარდი და საფიქრალი არა გქონდათ, შენი აზრით, ამ საქმეს როგორღა მოევლებაო?”

“ჩემზე უკეთ მოგეხსენება, მთელი თავისი ცხოვრების მანძილზე ანსელმს ცენტიც არ გადაუნახავსო,” — მიუგებდა ვირჯინიუსი — “რაც გინდა დასწამე, ოღონდ თაღლითობას მაინც ნუ დააბრალებო”.

“ღმერთსა ვფიცავ, არც ვაბრალებ — იმას იმდენი გამბედაობა მაინც ეყო, რაც თავისად მიაჩნდა, დაუფარავად მოეთხოვა და პირშიჩალაგამოვლებული, კუდამოძუებული წათრეულიყო... აი, შენ კი სხვა ხარ. შენ ისეთი დაწყევლილი ხარ, მანამდე იყურეულებ აქ, მანამდე მოიცდი, ვიდრე სული ამომხდება! თუმცა, კაცმა რომ გისმინოს, ენა კი დათაფლული გაქვს... მოკლედ, დამიბრუნე რაც დედაშენის სიკვდილის მერე შენი მიწის გადასახადი გადამიხდია და გაყოფაზეც მერე მელაპარაკეო!”

“არაო,” — უპასუხებდა ალბათ, ვირჯინიუსი — არ დამიბრუნებო”.

“მაშ არ დამიბრუნებო?” — ჰკითხავდა მოხუცი ანსი — “არ დამიბრუნებ, არა? მართალიც იქნები, ნახევარს რატომ უნდა დაახარჯო ფული, როცა ერთ მშვენიერ დღეს მუქთად, არამად დაეპატრონები ყველაფერსო”. ამ დროს, ალბათ, მოხუცი ანსი ფეხზე წამოდგებოდა (ჩვენი ვარაუდით, მაამდე მაგიდას უსხდნენ, მშვიდად საუბრობდნენ, როგორც წესიერ ხალხს და მამა-შვილს შეეფერება), წამოიძვრებოდა გაბურძნული, კოპებშეკრული და — წაეთრეო ჩემი სახლიდანო — უყვირებდა ვირჯინიუსს. მაგრამ ვირჯინიუსი წარბსაც არ შეიხრიდა, ფეხსაც არ მოიცვლიდა, არც კი შეირხეოდა და მშვიდად მიაჩერდებოდა ძმას. მაშინ მოხუცი ანსიც უკვე ხელაწეული დაიძვრებოდა მისკენ:

“წადი, წაეთრეო აქედან, თორემო...” — დაემუქრებოდა შვილს.

ჰოდა, ვირჯინიუსიც წავიდა. ოღონდ არ გარბოდა, არ ფაციფუცობდა, ბარგი ჩაალაგა (იმას მეტი ბარგი ჰქონდა, ახალგაზრდა ანსისგან განსხვავებით, რაღაც-რაღაცების შეკოწიწება მოესწრო და მოეხერხებინა) და სამიოთხი მილის მოშორებით, ერთ ნათესავთან გადასახლდა — დედამისის ვილაც მოკეთის ვაჟიშვილთან. ნათესავი მარტო ცხოვრობდა, რიგიანი ფერმა ჰქონდა, ოღონდ არაერთხელ დაგირავებულ-გამოხსნილი, რადგან ფერმერობას მაინცდამაინც ვერ უდებდა გულს, ცხენ-ჯორის გადამყიდველობა და მქადაგებლობა უფრო იზიდავდა — საშუალო ტანის, წითური, უსახური კაცი იყო, ამისთანას შეხვდები სადმე და წუთის მერე ველარაფრით გაიხსენებ — ისე, კაცმა რომ თქვას, ალბათ მიწის დამუშავებაზე უკეთესად არც ვაჭრობა

და ქადაგება ეხერხებოდა. ძმისგან განსხვავებით, ვირჯინიუსი წყნარად, უჩხუბრად და უდავიდარაბოდ გაეყარა მამას; ჩვენში დარჩეს და, რაც არ უნდა უცნაური იყოს, არასოდეს არავის საყვედური არ დაგვცდენია ანსთან, რატომ ჩხუბობ, რატომ ვერ მორიგებიხარ მამაშენსო. პირიქით, ანსს კი არა, საცა სიმართლეა, ჩვენ მუდამ ვირჯინიუსს ვუცქერდით ხოლმე ცერად: ვერ შეატყობდი რა სწეინდა, რა უხაროდა, როდის რა ელო გულში. ეშმაკ კაცს ვემახდით და აღარც გაგვეკვირვებია, როცა მთელი თავისი დანაზოგი ნათესავის ფერმის გამოხსნას დაახარჯა... არც იმ ამბავს გაუუოცებია, როცა ერთი წლის თავზე მოხუცმა ანსმა უცებ ფერმის გადასახადის გადახდაზე თქვა უარი და ზუსტად ორი დღით ადრე კი, სანამ გაკოტრებულად გამოაცხადებდნენ, შერიფმა ფოსტით მიიღო ვიღაც უცნობისაგან მთელი თანხა — ჰოლენდების ფერმის მთელი ვალი.

“ვირჯინიუსი იქნება, აბა სხვა ვინაო” — ვამბობდით, რადგან, მართალია, ქადაგლი ხელმოუწერელი იყო, მაგრამ ჩვენის აზრით, გამომგზავნის ვინაობის დადგენა ბავშვსაც არ უნდა გასჭირვებოდა. ოღონდ ეს მერე იყო, მანამდე კი შერიფი მოხუც ანსს მიადგა გასაფრთხილებლად.

“საჯარო ვაჭრობის დღე დანიშნეთ და ჯანდაბამდის გზაც გქონიათო” — არც აცალა სიტყვის დამთავრება ანსმა. “იმ ჩემ ბედოვლათებს თუ ჰგონიათ, გულხელდაკრეფილი ჯდომა და ლოდინი დააყრიო ხეირს...”

შერიფმა ახალგაზრდა ანსსაც მიაწვდინა ხმა.

“ეგ მიწა ჩემი არ არისო” — შემოთვალა იმან.

ბოლოს, ვირჯინიუსსაც შეატყობინა. ვირჯინიუსი ქალაქში ჩამოვიდა და თავისი თვალთ ნახა დაეთრები.

“ასე გამოდის, დიდი მეურნეობა უნდა ჩავიბარო” — თქვა — “რა თქმა უნდა, მამაჩემი თუ ფერმას დაკარგავს, იქნებდა გამოვისყიდო კიდევ.... ასეთ კარგ ფერმას არც მუშტარი მოაკლდება და კაი ფასადაც გაიყიდებაო”.

ეს იყო და ეს. არც აღშფოთება შესტყობია, არც გაოცება და არც სინანული. იცოდა, ალბათ, თავისი საქმე კაცმა. ამიტომ ოდნავადაც აღარ გაგვეკვირვებია, როცა შერიფმა ფული და ხელმოუწერელი ბარათი მიიღო ფოსტით: ანსელმ ჰოლენდის ფერმის გადასახადი — ხელწერილი გადაეცეს ანსელმ ჰოლენდ-უფროსსო.

“ვირჯინიუსი იქნება, აბა სხვა ვინაო”, ვიმეორებდით ჩვენც ერთსა და იგივეს. მერე, მთელი ის წელიწადი სულ ვირჯინიუსი გვედგა თვალწინ: სხვის ჭერქვეშ შეხიზნული, სხვის მიწაზე ღვრიდა ოფლს და თან იმასაც ხედავდა, როგორ ეღუპებოდა საკუთარი კარ-მიდამო — პაპისეული სახლიცა და კანონიერი მამულიც. ბერიკაცმა ფერმას წირვა გამოუყვანა: ვრცელ, ნაყოფიერ მინდვრებს წლიდან წლამდე სარეველა ჭამდა და უწყალოდ პართახდებოდა იქაურობა, არადა, ყოველი წლის იანვარში შერიფი ისევ ფოს-

ტით იღებდა ფულსაც და მუდამ ხელმოუწერელ ქვითარს, ერთსაც და მეორესაც შინ უგზავნიდა მოხუც ანსს, რადგან ის უკვე საერთოდ აღარ ჩამოდიოდა ქალაქში, სახლიც თავზე ემხოვდა და მომკითხავიც აღარავინ ჰყავდა ვირჯინიუსის მეტი. ვირჯინიუსი კი ცხენდაცხენ მიადგებოდა ხოლმე პარმალს, წელიწადში ასე ხუთ-ექვსჯერ, ბერიკაციც გამოუვარდებოდა და უშვერი სიტყვებით თათხავდა. ვირჯინიუსი მშვიდად შესცქეროდა, დარწმუნდებოდა, ცოცხალია და არაფერი უჭირსო, ფერმაში დარჩენილ ზანგებს გამოელაპარაკებოდა და ისევ თავისი გზით მიდიოდა. სხვა მნახველი მოხუც ანსს არც არავინ ჰყავდა, თუმცა ბევრი კი უთვალთვალდნენ შორიდან, როგორ მოივლიდა ხოლმე გაველურებულ მინდვრებს სწორედ იმ ბებერი, თეთრი ცხენით, რომელმაც ბოლოს იმსხვერპლა კიდეც.

ერთ ზაფხულს კი გავიგეთ, თურმე კედრის ჭალაში, იქ, სადაც მისი ცოლის ნათესაობის ხუთი თაობა განისვენებდა, საფლავების თხრისთვის მიეყო ხელი.

ვიღაც ზანგმა მოიტანა ეს ამბავი და ქალაქის სანიტარულმა ინსპექტორმაც მაშინვე სასაფლაოს მიაშურა. ჯერ ჭალაში დაბმული თეთრი ცხენი დანახა, მერე კი თვითონ თოფიანი ბერიკაციც დაადგა თავზე. ინსპექტორი წამოვიდა, გამოეცალა, ორი დღის შემდეგ კი უკვე შერიფი გაემგზავრა სასაფლაოსკენ, ბერიკაცი მიწაზე იპოვა, ცხენის გვერდით, უზანგში ფეხგახლართული, ცხენს კი გავაზე და ფერდებზე ნაიარევეები აჩნდა — მათრახით კი არა, ჯოხით იყო ნაცემი — ისეთი ღრმა ნაიარევეები, ეტყობა გაშმაგებულ პატრონს კარგა ხანს გამეტებით ერტყა.

და აი, ეს შეშლილი ბერიკაციც იმ საფლავების გვერდით დამარხეს, რომლებიც თავადვე შეერყვნა და წაებილწა. ვირჯინიუსი თავის ნათესავთან ერთად დაესწრო დაკრძალვას. სიმართლე ითქვას, მთელი სამგლოვიარო პროცესის თავსა და ბოლოსაც მარტო ისინი შეადგენდნენ, რადგან უმცროსი ანსი საერთოდ არ გამოჩენილა, შინაც არ მისულა, თუმცა ვირჯინიუსი კარგა ხანს დარჩა იქ, ყველაფერი დააბინავა, გამოკეტა, ზანგებს ანგარიში გაუსწორა და მერე ისევ ნათესავთან გაემგზავრა. დანიშნულ ღროს კი მოსამართლე დიუკინფილდს მოხუცი ანსის ანდერძი წარუდგინეს დასამტკიცებლად. არავისთვის ყოფილა საიდუმლო, რა ეწერებოდა იმ ანდერძში: წინასწარ ვიცოდით ყველამ. წესისა და რიგის მიხედვით იყო შედგენილი და ისიც არ გაგვეკვირვებია, სათქმელი ნათლად და გასაგებად რომ იყო ნათქვამი: “...მომდევნო ორ მუხლში ჩამოთვლილის გარდა, მთელ ჩემ ქონებას ჩემს უფროს ვაჟს, ვირჯინიუსს ვუანდერძებ... თუკი დამტკიცდება და სასამართლოს თავმჯდომარეც აღიარებს, სწორედ ზემოხსენებული ვირჯინიუსი რომ იხდიდა ჩემი ფერმის გადასახადს, ოღონდ იმ ერთადერთი პირობით, თუ ამ საქმის გარკვევასა და განსჯას პირადად სასამართლოს თავმჯდომარე იკისრებს”.

მომდევნო ორი მუხლი ახლა ამას გვამცნობდა:

“ჩემს უმცროს ვაჟს, ანსელმს, ვუანდერძებ... ორ ხელ ჯორის სრულ აღკაზმულობას, რათა ზემოხსენებული ანსელმი ერთხელ მაინც ჩამოვიდეს ჩემი საფლავის მოსანახულებლად; წინააღმდეგ შემთხვევაში, ეს აღკაზმულობაც ჩემი ქონების განუყოფელ ნაწილად დარჩეს.

ჩემს მოკეთეს, გრენბი დოჯს, ვუანდერძებ ერთ დოლარ ნაღდ ფულს დავითნის შესაძენად, მაღლიერების ნიშნად, რაკილა სწორედ იგი აჭმევდა და ასმევდა ჩემს ვაჟს, ვირჯინიუსს, დღიდან მისი შინიდან წასვლისა”.

აი, ეს ეწერა ანსელმ ჰოლენდის ანდერძში. ჩვენც თვალუბად და ყურუბად ქცეულნი ველოდებოდით, რას იტყოდა ან რას მოიმოქმედებდა ახალგაზრდა ანსი. მაგრამ ვერც ვერაფერი დავინახეთ და არც არაფერი გაგვიგონია. სხვათა შორის, ვერც ვირჯინიუსს შევატყვევებ რამე. უბრალოდ, შეიძლება ჩვენ ვერ ვხვდებოდით მის გულისნადებს, ვერ ამოგვეცნო მისი ნაფიქრალი. რას იზამ, ასეთი კაცი იყო. თუმცა, ჩვენში დარჩეს, გასაკეთებელიც არაფერი დარჩენილიყო. ვირჯინიუსს მხოლოდ მოთმინებით უნდა ეცადა, როდის დაამტკიცებდა მოსამართლე დიუკინფილდი ანდერძს და მერე შეეძლო ანსისთვისაც მიეცა კუთვნილი ნახევარი – თუკი, რა თქმა უნდა, საერთოდ აპირებდა რამის მიცემას. “იმას და ანსს ჩხუბი არასოდეს მოსვლიათო”, ამბობდნენ ერთნი. “მასე თუა, ვირჯინიუსს ჩხუბი თავის დღეში არავისთან მოსვლია და ფერმაც მთელი შტატისთვის დაუნაწილებია და ეგააო”, ეჭვს გამოთქვამდნენ სხვები. “კი მაგრამ, ანსის ჯარიმის გადახდაზე განა ვირჯინიუსმა არ გამოიღო თავიო”, არ ცხრებოდნენ პირველები. “კარგი ბატონო, მაგრამ ანსმა როცა მიწის გაყოფა მოინდომა, ვირჯინიუსმა ვის დაუჭირა მხარიო?” – პასუხობდნენ მეორენი.

მოკლედ, ყველა რაღაცას ელოდებოდა. ველოდებოდით რას იტყოდა მოსამართლე დიუკინფილდი: უცებ გამოირკვა, მის ხელთ აღმოჩნდა თურმე ყველაფერი – განგების ცოცხალ განსახიერებად იქცა და იმას უნდა განესაჯა დაუცხრომელი ბერიკაცი, რომელიც სამარიდანაც კი დასცინოდა ყველას და ყველაფერს; უნდა განესაჯა შეურიგებელი ძმებიც, თხუტმეტი წლის წინ რომ დამდურებულიყვნენ, თითქოს თხუტმეტი წლის წინ რომ დახოცილიყვნენ ერთიმეორისთვის. თუმცა, ჩვენი ღრმა რწმენით, მოხუცი ანსის უკანასკნელი დარტყმა მაინც ასცდენოდა მიზანს, რისხვით დაბრმავებულს შეცდომა მოსვლოდა, როცა ანდერძის აღმსრულებლად მოსამართლე დიუკინფილდი დაენიშნა. ჩვენ მაინც ხომ ვიცოდით, მოსამართლე დიუკინფილდს ახლოსაც რომ ვერავინ დაუდგებოდით ვერც სიბრძნით, ვერც პატიოსნებითა და ვერც მიუდგომლობით – კანონთა გულმოდგინე შესწავლასაც კი ვერ შეერყია და ვერ დაეჩლუნგებინა მისი პატიოსნება და მიუდგომლობა.

ასეთი უბრალო საბუთის დამტკიცების უჩვეულოდ გაჭიანურებაც კიდევ ერთხელ გვიდასტურებდა, რომ მოსამართლე დიუკინფილდი იმ ხალხის რიცხვს განეკუთვნებოდა, ვისთვისაც მართლმსაჯულება სანახევროდ კანონთა ცოდნისგან, სანახევროდ კი – თავშეკავებისა და ღვთისა თუ საკუთარი თავის რწმენისაგან შედგება.

ანდერძის დამტკიცების დათქმული ვადა დასასრულს უახლოვდებოდა, ჩვენც სულ უფრო დადარაჯებულნი ვუთვალთვალვდით მოსამართლე დიუკინფილდს, ვხედავდით ხოლმე, როგორ გამოდიოდა შინიდან, როგორ გადაივლიდა მოედანს და როგორ მიაშურებდა სასამართლოს. აუჩქარებლად, მშვიდად მიაბიჯებდა — წარმოსადეგი, თმაშევერცხლილი, წელგამართული, ღირსებით აღსავსე, სამოცს გადასცილდებოდა უკვე და კარგა ხნის წინ დაქვრივებულიყო, — “აშოლტილი” — როგორც ზანგები ამბობდნენ მასზე. სასამართლოს თავჯდომარედ ჩვიდმეტი წლის წინ ავირჩიეთ; იურიდიული ცოდნის დიდი მარაგით არ გამოირჩეოდა, ოღონდ საღი აზრი კი ნამდვილად არასოდეს ღალატობდა და აი უკვე ზედიზედ ცამეტი წელიწადი, არჩევნებზე მეტოქე არ გამოსჩენია, ისინიც კი აძლევენ ხმას, ვისაც ცოტა არ იყოსდა აღიზიანებდა კიდევ მისი ღმობიერება და თავაზიანი შემწყნარებლობა, ყველანი ბავშვური ნდობითა და იმედით შესცქეროდნენ. ჰოდა, სულგანაბრებული ვადევნებდით თვალს, წინდაწინ დარწმუნებულნი მისი საბოლოო გადაწყვეტილების სამართლიანობაში, არა მარტო იმიტომ, თვითონ რომ არ იკადრებდა უსამართლობას, არამედ იმიტომაც, არც სხვას რომ დართავდა უსამართლობის ჩადენის ნებას. ყოველ დილით ვხედავდით როგორ გადაჭრიდა ხოლმე მოედანს ზუსტად ცხრის ათ წუთზე და როგორ გაემართებოდა სასამართლოსაკენ, სადაც უკვე ათი წუთია ზანგი კარისკაცი ელოდებოდა, რათა მატარებლის მოსვლის მაუწყებელი სემაფორის სიზუსტით, კარი გაეღო მისთვის. მოსამართლე კაბინეტში შედიოდა, ზანგი კი ძველ, დამტვერულ, მავთულით დამაგრებულ სავარძელში იკავებდა თავის ადგილს, კაბინეტსა და სხდომათა დარბაზს შორის მოქცეულ პატარა, ქვის იატაკიან დერეფანში და მთელი დღე ამ სავარძელში თვლემდა, თვლემდა ზედიზედ ჩვიდმეტი წელიწადი. ნაშუადღევს ხუთ საათზეა გამოერკვეოდა ხოლმე თვლემიდან, კაბინეტში შევიდოდა და, ალბათ, მოსამართლესაც აღვიძებდა, რომელსაც თავისი ზანგრძლივი ცხოვრების მანძილზე ერთი ჭეშმარიტება ურყევად ერწმუნა: ნებისმიერი საქმის გადაწყვეტას, ჩვეულებრივ, საფიქრალის და საზრუნავისგან თავისუფალი, მოფილოსოფოსო ჭკუისკოლოფების ნაჩქარევი დასკვნები აფერხებენ და ართულებენო. მერე ვხედავდით, ორი მოხუცი ხელახლა როგორ გადმოსერავდა მოედანს, ერთმანეთს თხუთმეტი ფუტით დამორებული, როგორ აუყვებოდა ხოლმე შინისაკენ მიმავალ ქუჩას, ორივე წინ იცქირებოდა, ისეთი წელგამართულები, ისეთი გაჯგიმულები მოაბიჯებდნენ, მოსამართლის ტანზე შეკერილი, ფიცარივით გახევებული იმათი სერთუკები ერთ ნაოჭს ან ნაკეცს არ გაიკეთებდა.

და აი ერთხელაც, დაახლოებით ნაშუადღევს ხუთ საათზე, მოედანზე ჩოჩქოლი შეიქმნა, ვიდაცვები სასამართლოსკენ გარბოდნენ, მერე იმათ სხვებიც მიჰყვნენ, ქვაფენილზე ფეხების ბრაგაბრუვი ატყდა: “რა მოხდა?”, “რა ამბავია?”, “მოსამართლე, მოსამართლე დიუკინფილდო... “ ისმოდა ნაწყვეტ-ნაწყვეტი ხმები და ხალხი თავპირისმტვერვით მიიკვლევდა გზას საბარგო მანქანებსა და ფორნებს შორის — სადაც, სხვის გამოწვევალ სერთუკში გამოწყობილი, შეძრწუნებული ზანგი ზეცისკენ ხელებაპრობილი გაქვავებულიყო. ბრბომ ზანგს ჩაუქროლა და კაბინეტში შევარდა. მოსამართლე დიუკინფილდი მაგიდასთან იჯდა, სავარძელში გადასვენებული. თვალები ღია დარჩენოდა, ტყვია ზედ ცხვირის ძვიდემი მოხვედროდა და თითქოს სამი

თვალთ შემოგვცქეროდა. ყველა ხედავდა ნატყვიარს, არადა, არც მოედანზე მყოფთ, არც მთელი დღე დერეფანში მჯდომ ზანგს, სროლის ხმა არ გაუგონიათ.

* * *

იმ დღეს გვეინ სტივენსს დიდი ჯაფა დაადგა – სტივენსსაც და ბრინჯაოს ზარდახშასაც. თავიდან ნაფიცმა მსაჯულებმა ვერა დ ავერ აუღეს მის ნათქვამს ალლო, ვერავენ მიხვდა რისი თქმა უნდოდა: ვერც მოსამართლე, ვერც ტყუპი ძმები, ვერც იმათი ნათესავი და ვერც ბებერი ზანგი – ყველა დაიბნა. ბოლოს, მსაჯულთა მამასახლისმა პირდაპირ ჰკითხა: “გვეინ, მიგაჩნიათ თუ არა, რომ მოხუცი ჰოლენდის ანდერძსა და მოსამართლე დიუკინფილდის მკვლელობას შორის რაიმე კავშირი არსებობს?”

“დიახ, მიმანია”, უპასუხა სტივენსმა, “და მე მარტო ამის დამტკიცებას არ ვკისრულობ”.

ყველა სტივენსს მიაჩერდა – მსაჯულებიც, ორივე ძმაც. მხოლოდ ბებერ ზანგსა და ძმების ნათესავს არ შეუხედავთ მისთვის. ბოლო ერთ კვირაში ზანგი, თვალსა და ხელს შუა, ორმოცდაათიოდე წლით დაბერებულიყო. როცა მისი ბატონი მოსამართლედ აირჩიეს, იმანაც სასამართლოში დაიწყო მუშაობა, რადგან, რაც თავი გვახსოვდა, მუდამ დიუკინფილდების ოჯახს ემსახურებოდა. მოსამართლეზე ბევრად უფროსი იყო, თუმცა ჯერ კიდევ ამ ერთი კვირის წინათ, იმ საბედისწერო დღემდე, გაცილებით ახალგაზრდულად გამოიყურებოდა – ხმელ-ხმელი, თავფეხიანად სურთუკში ჩამალული, ყოველ დილით მოსამართლეზე ათი წუთით ადრე მიდიოდა ხოლმე სასამართლოში, კაბინეტის კარს გააღებდა, იქაურობას გამოგვიდა, მაგიდაზე მტვერს გადაწმენდა, სხვას არაფერს მოჰკიდებდა ხელს – ჩვიდმეტწლიანი გამოცდილებით შეძენილი, ოსტატური დაუღვერობით მოითავებდა საქმეს და მერე თავის მავთულით ფეხებგადაბმულ, მოყანყალეულ სავარძელს მიაშურებდა, რათა მთელი დღე თვლემამი გაეტარებინა – უფრო სწორად, მხოლოდ ერთი შეხედვით ჰგავდა მთვლემარეს (კაბინეტში მოხვედრა სასამართლოს დარბაზიდან მომავალი ვიწრო გვერდითა კიბითაც შეიძლებოდა: ამ კიბით, ჩვეულებრივ, მხოლოდ სასამართლოს თავჯდომარე სარგებლობდა ხოლმე სესიების დროს, მაგრამ ამ გზით მოსულ კაცსაც მაინც მოხუცი ზანგისგან შვიდ-რვა ნაბიჯში უნდა გაეელო, თუკი, რა თქმა უნდა, დერეფნიდან პატარა ჩიხში არ შეუხვევდა – კაბინეტის ფანჯრის ქვეშ – და ფანჯრიდან არ გადაძვრებოდა) რადგან არავის ახსოვდა, როდისმე ისე ჩაველო სავარძლის შორი-ახლოს, ზანგს მაშინვე არ გაეხილა დანაოჭებული ქუთუთოები და ყავისფერი, ლიბრიანი, ბებრული თვალები არ მიეშტერებინა მისთვის. ხანდახან მოხუცს ლაპარაკსაც გაუუბამდით ხოლმე და სასაცილო მოსასმენი იყო, ერთბაშად დადარბაისლებული, როგორ ამახინჯებდა მედიდურ და გაუგებარ

იურიდიულ ცნებებს, ავადმყოფობასავით შეუმჩნევლად რომ გასჯდომოდნენ ძვალ-რბილში. ისეთი ენაწყლიანი ჰათოსით წარმოთქვამდა მათ, რომ მერე, ჩვენდა უნებურად, უკვე თვითონ მოსამართლე დიუკინფილდსაც უბოროტო ღიმილით ვუგდებდით ხოლმე ყურს. მოხუცი ზანგი ნელ-ნელა, თვალსა და ხელსშუა მოტყდა, ჩვენი სახელები ავიწყდებოდა, წლები ერეოდა და ჩვენც ვეშლებოდით ერთმანეთში: რინდიდან გამორკვეული, ზოგჯერ ისეთი კაცის მისვლას აუწყებდა მოსამართლეს, ვისაც კარგა ხნის წინ წაელო იმქვეყანას წერილი. ოღონდ შეუმჩნევლად მის გვერდით გავლა კი ჯერ მაინც ვერავის მოეხერხებინა.

დანარჩენი ყველა სტივენსს მიშტერებოდა – მსაჯულებიცა და გრძელი სკამის თავსა და ბოლოში ჩამოძვლარი ორივე ძმაც: ორივე ერთნაირად გამხდარი, ცხვირკეხიანი, მზემოკიდებული, ერთნაირად გულხელდაკრეფილი.

“მაშ, თქვენ ამტკიცებთ, რომ მოსამართლე დიუკინფილდის მკვლეელი აქ, ამ ოთახში იმყოფება?” – ერთხელ კიდევ ჩაეკითხა მსაჯულთა მამასახლისი.

ცოტა ხანს ოლქის პროკურორიც თვალებაღქცეულ ხალხს მიაჩერდა.

“ღიახ,” – თქვა მერე. – “და მხოლოდ ამის დამტკიცებას არ ვკისრულობ”.

“დამტკიცებას?” – ჰკითხა ანსელმმა, უმცროსმა ტყუპისცალმა. ის მართოდმართო იჯდა გრძელი სკამის ერთ ბოლოში და ბრახიანი, სუსხიანი თვალები მიეშტერებინა სტივენსისთვის; ცარიელი სკამის მეორე ბოლოში კი ვირჯინიუსი იჯდა, მისი ძმა, ვისთვისაც თხუთმეტი წელიწადია ხმა არ გაეცა.

“ღიახ,” – გაიმეორა სტივენსმა. მაგიდასთან იდგა და სანამ ლაპარაკს დაიწყო, ერთხელ კიდევ მოავლო ოთახს თვალი, მერე კი მშვიდად, ხუმრობანარევი ხმით დაიწყო ყველასათვის კარგა ხნის ნაცნობი ამბის მოყოლა – ხანდახან, ნათქვამის დასამოწმებლად, ვირჯინიუსს მიუბრუნდებოდა ხოლმე. უმცროსი ანსისა და მამამისის ამბავს გვიამბობდა. აუღელვებლად, ძალდაუტანებლად. ერთი შეხედვით, თითქოს მემკვიდრეთა დამცველობას კისრულობდა: ყვებოდა, როგორ წასულიყო უმცროსი ანსი შინიდან, როგორ წაჩხუბებოდა მამას – თანაც, სავსებით სამართლიანადაც წაჩხუბებოდა – რადგან იმას ცოლის დანატოვარი უაზროდ და დაუნანებლად დაენიავებინა და გაეპარტახებინა (იმ ღროისათვის, დედისეული მიწის ნახევარი უკვე კანონითაც უმცროს ვაჟს ეკუთვნოდა). სტივენსი ძალიან დამაჯერებლად ლაპარაკობდა, გულწრფელად და ალაღად, ოღონდ, იქნებ ცოტა ზედმეტადაც ქომაცობდა ახალგაზრდა ანსს. ყველაფრის თავი და თავიც სწორედ ეს გახლდათ. სწორედ ეს მოჩვენებითი კეთილგანწყობა, ეს მოჩვენებითი თანაგრძნობა ახდენდა რაღაც არასასურველ შთაბეჭდილებას, თითქოს ანსი რაღაცაში დამნაშავე იყო, ოღონდ რაში, ეს არავინ უწყობდა – დამნაშავე სწორედ სამართლიანობისკენ მისწრაფების, გარდაცვლილი დედის სიყვარულის გამო, იმის გამოც, ეს გრძნობები ხასიათის სიავესა და იმ კაცისგან

მიღებულ მემკვიდრეობას რომ დაემახინჯებინა და წაერყვნა, ვისი პატიება და შენდობაც ახალგაზრდა ანსს დღემდე ვერაფრით მოეხერხებინა. ძმები დრო-ჟამით გადაპრიალებულ-გადასლიპინებული გრძელი სკამის თავსა და ბოლოში ისხდნენ, უმცროსი ბრაზისგან აცახცახებული შესცქეროდა სტივენსს, ძლივს იკავებდა თავს, უფროსიც დაჟინებით მისჩერებოდა, თუმცა სახეზე არაფერი დატყობია. სტივენსმა გვიამბო, როგორ წავიდა შინიდან გაბრაზებული ანსი, ერთი წლის შემდეგ კი ვირჯინიუსიც, ძმაზე გაცილებით უფრო წყნარი, გაცილებით უფრო გულჩათხრობილი კაცი, ლამის მთელი ცხოვრება მამისა და ძმის გაშველება-შერიგებაში რომ გაეტარებინა, იძულებული გახდა მის კვალს გაჰყოლოდა. სტივენსმა ისევ მართალი, ისევ უტყუარი სურათი დაგვიხატა: ძმები მამას კი არ გაეთიშა ჯერ კიდევ თავის სიცოცხლეში, არამედ მისგან შექმნილი ხასიათის თვისებებს, და სწორედაც ამ თვისებების გამო წაჰკიდებოდნენ ერთმანეთს, ამის გამო დამდურებულიყვნენ, არადა, სინამდვილეში ორივეს თანაბრად, ორივეს ერთნაირად ძლიერად უყვარდა დედის დანატოვარი მიწა – არა მარტო მათი კანონიერი სამფლობელო, არამედ მისი საუკუნო განსასვენებელიც.

“...აი ასე ცხოვრობდნენ და შორიდან ადევნებდნენ თვალს, როგორ იღუპებოდა საუკეთესო მიწა, როგორ იშლებოდა ნაწილ-ნაწილ პაპისეული სახლი, სადაც თვალი აეხილათ და სადაც მათი დედა დაბადებულიყო; ასე ენება შეშლილ ბერიკაცს, შვილების შინიდან გაყრის მერე ეტყობა მიმზვდარიყო, გულს ვედარაფრით მოვუკლავო და ახლა იმასლა ცდილობდა სამუდამოდ მშრალზეც დაეტოვებინა — გადასახადს აღარ იხდიდა და მთელი ქონების საჯარო ვაჭრობით გაყიდვას აპირებდა. მაგრამ აქ ვიღაცამ ჭკუაში აჯობა ბერიკაცს, ვიღაც ძალიან შორსმჭვრეტელმა და წინდახედულმა, თავისი ვინაობის დამალვაც მოახერხა, თუმცა, ფული იყოს გადახდილი, თორემ გადამხდელის ვინაობა ვის რაში ენადვლება. მოკლედ, ძმებს ისდა დარჩენოდათ, მოთმინებით დალოდებოდნენ ბერიკაცის აღსასრულს. მით უმეტეს, უკვე კაი ხნისაც მოყრილიყო და, ეგეც რომ არა, უფრო ახალგაზრდაც რომ ყოფილიყო, აუღელვებელ და თავშეკავებულ კაცს ლოდინი მაინც არ გაუჭირდებოდა, გინდაც ანდერძის შინაარსი არა სცოდნოდა. რა თქმა უნდა, ფიცხი და ფხუკიანი უფრო ძნელად შეიკავებდა თავს, მით უმეტეს, ნაწყენად და შეურაცხყოფილადაც თუ თვლიდა თავს, ბოლმაც თუ ელო გულში იმ კაცის, ვინც ჯერ იყო და ცხოვრების საუკეთესო წლები დააკარგვინა, მერე კი ცარიელ-ტარიელიც დატოვა და კეთილი სახელიც შეუბღალა. ასეთ კაცს ძნელად რომ ლოდინის დრო და სურვილი გამოსჩენოდა”.

თვალმოუშორებლად შესცქეროდა ორივე ძმა. ანსელმის თვალები რომ არა, კაცს ქვის ქანდაკებები ეგონებოდა. სტივენსი ხმადაბლა ლაპარაკობდა, მზერას არავიზე აჩერებდა. პროკურორობის ლამის იმდენხნიანი გამოცდილება ჰქონდა, რამდენი წელიწადიც მოსამართლე დიუკინფილდი იჯდა თავის სავარძელში. ჰარვარდის უნივერსიტეტი დაემთავრებინა. მაღალ-მაღალი, აწოწილი, ჭადარაფაფრიანი კაცი იყო, უნივერსიტეტულ მეცნიერებთან აინშტაინის თეორიაზე კამათიც უყვარდა და სოფლის დუქნის ჩრდილში ჩაცუცქეული ჯდომაც, სოფლელებთან მასლაათი იმათებურ კილოზე. თვითონ ამას “ენის ფხანას” ეძახდა.

“...ბოლოს და ბოლოს, შორსმჭვრეტელთა ვარაუდიც გამართლდა, მოხუცმა უფალს მიაბარა სული. მერე ანდერძიც გახსნეს და ამ ამბავმა მთებშიც მიაღწია, იქაც გაიგეს, ახლა მაინც რომ ჩაუვარდებოდა ხელში მიწა კანონიერ მფლობელს. უფრო სწორად, მფლობელებს, რადგან ანს ჰოლენდმა ჩვენზე უკეთესად იცოდა, გინდაც ასი ანდერძი დაეწერა, ვირჯინიუსი მხოლოდ თავის კუთვნილ ნახევარს დაეპატრონებოდა. აკი მაშინაც ნახევარს ითხოვდა, როცა მამა მთელ მიწას იმას სთავაზობდა. ეს არც უმცროს ანსს ეეჭვებოდა, თვითონაც ასე მოიქცეოდა და იმიტომ. ვირჯინიუსის ადგილას რომ აღმოჩენილიყო, ისიც დაუფიქრებლად გაუყოფდა ძმას მამულს. მართლაც, მარტო ანსელმ ჰოლენდის ვაჟები ხომ არ იყვნენ, ძარღვებში კორნელია მარდისის სისხლიც დაუდიოდათ. გინდაც დარწმუნებული არ ყოფილიყო, იმდენს მაინც ხედებოდა, რომ დედისეული მიწა, მიწა, სადაც განისვენებდა კიდევ დედამისი, ბოლოს და ბოლოს რიგიან პატრონს ედირსებოდა. იცოდა და, შეიძლება ბავშვობის მერე, იმ დღეების მერე, როცა ჯერ დედა ცოცხალი ჰყავდა, როცა დასაძინებლად დაწოლილს დედა ერთხელ კიდევ ააკითხავდა ხოლმე ოთახში და ერთხელ კიდევ დახედავდა — სძინავს თუ არაო — პირველად დაიძინა მშვიდად. უკვე ყველაფერი წარსულს ჩაბარებოდა: წყენაც, უსამართლობაც, კეთილი სახელის დაკარგვაც, პატიმრობის სირცხვილიც — ყველაფერი სიზმარივით გამქრალიყო. უკვე ყველაფრის დავიწყება შეიძლებოდა, ყველაფერი შეიცვლებოდა, კალაპოტში ჩადგებოდა. ამ დროისათვის მარტომარტო, განდევნილივით ცხოვრებასაც ისე შეჩვეოდა, ყოფის გამოცვლა გაუჭირდებოდა კიდევ. მარტო დარჩენა ერჩია, მიყრუებულ მთებში. მთავარი იმის ცოდნა იყო, ყოველივე ცუდი სიზმარივით რომ დასრულებულიყო და დედისეული მიწაცა და მისი განსასვენებელიც იმ ერთადერთი სანდო და საიმედო კაცის ხელში მოხვედრილიყო, ვისაც თხუთმეტი წელიწადია არ დალაპარაკებოდა. ხომ გესმით, რისი თქმაც მინდა?”

ყველა სტივენსს მივჩერებოდით, სწორედ იმ მაგიდას ვუსხედით, რომელზედაც ყველაფერი ხელუხლებლად დარჩენილიყო მოსამართლე დიუკინფილდის სიკვდილის დღიდან. იგივე ნივთები ეწყო, რაც მაშინ, როცა მოსამართლემ დამიზნებული დამბაჩის ლულა დაინახა — კარგა ხნის ნაცნობი ნივთები: საქალაქდები, ობმოკიდებული სამელნე, პატრონის საყვარელი, დაბლაგვებული კალმისტარი და პატარა, ბრინჯაოს პაწია ზარდახმა, სხვა ვერაფერში რომ ვერ გამოეყენებინა მოსამართლეს და პრესპაპიედ ხმარობდა. ხის გრძელი სკამის თავსა და ბოლოში კი უმძრახად ისხდნენ ტყუპი ძმები და სტივენსს დაჟინებით მიშტერებოდნენ.

“ვერაფერც ვერ გავიგეთ,” — თქვა მსაჯულთა მამასახლისმა — “ამით რისი თქმა გინდათ? რა კავშირია ყოველივე ამასა და მოსამართლე დიუკინფილდის მკვლელობას შორის?”

“მოგახსენებთ.” — თქვა სტივენსმა — “მოსამართლე დიუკინფილდს ანდერძი უნდა დაემტკიცებინა, მაგრამ არ დასცალდა, მანამდე მოკლეს. გეთანხმებით, ცოტა უცნაური ანდერძია, ოღონდ მისტერ ჰოლენდისგან არც ეგ უნდა გაგვეკვირებოდა. მით უმეტეს, წესითა და რიგითაა შედგენილი და მემკვიდრეებიც კმაყოფილნი დარჩნენ: ყველამ მშვენივრად ვიცოდით,

როგორც კი მოითხოვდა, მიწის ნახევარი მაშინვე ანსის ხელში გადავიდოდა. მაშასადამე, ანდერძი სამართლიანია და მისი დამტკიცებაც – უბრალო ფორმალობა. არადა, მოსამართლე დიუკინფილდმა ქაღალდი თითქმის სამი კვირა დაიტოვა, მერე კი უცებ დაილუპა. მაშასადამე, ის კაცი, ვისაც ეგონა რომ მხოლოდ ლოდინი...“

“ვინ კაცი?” – გააწვევებინა სიტყვა მსაჯულთა მამასახლისმა.

“მოითმინეთ,” – თქვა სტივენსმა – “ამ კაცს მხოლოდ ერთი რამ მოეთხოვებოდა – ლოდინი. და ეს არც აწუხებდა – თხუთმეტ წელიწადში ლოდინს კარგად შესჩვეოდა. ეგ არ იყო საქმე. მთავარი სხვა გახლდათ, და ეს მთავარი მაშინ შეიტყო (ანდა, მაშინ გაახსენდა), როცა მიხვდა, უკვე გვიანაა და რა თქმა უნდა, ჯობდა არაფერი დამეინფებოდაო. ისე, ეშმაკობა, მოთმინება და შორსმჭვრეტელობა ნამდვილად არ აკლდა, იმდენად მომთმენი აღმოჩნდა – თხუთმეტი წელი იცადა მშვიდად, იმდენად შორსმჭვრეტელი – ყველაფრის გათვალისწინება მოახერხა ერთის გარდა – საკუთარი მახსოვრობისა. ხოლო როცა უკვე ძალიან გვიან იყო, მაშინდა გაახსენდა უეცრად, კიდევ არსებობს ერთი კაცი, ვისაც უთუოდ ემახსოვრება რაც მე დამავიწყდაო. მოსამართლე დიუკინფილდი იყო ის კაცი. მოსამართლემ ყველაფერი იცოდა, იცოდა, ის თეთრი ცხენი მისტერ ჰოლენდს ვერასდიდებით რომ ვერ მოკლავდა”.

სტივენსი გაჩუმდა, ოთახში სამარისებური სიჩუმე იდგა. მსაჯულები ენაჩვარდნილნი უსხდნენ მაგიდას და სტივენსს მიშტერებოდნენ. ანსელმმა ჯერ ძმას გახედა, ძმისკენ მიაბრუნა ბრაზიანი, ნაოჭებით დასერილი სახე, მერე კი, ოდნავ წინგადახრილი, ისევ სტივენსს მიაჩერდა. ვირჯინიუსი უძრავად იჯდა, ერთხელაც არ შესცვლია მშვიდი, ყურადღებიანი გამომეტყველება. გვერდით, კედლისკენ ახლოს, გრენბი დოჯი იჯდა, ნათესავი – ხელები მუხლებზე დაეკრიფა და თავი ჩაექინდრა, თითქოს ეკლესიაშიაო. გრენბისა მხოლოდ ის ვიცოდით, მოხეტიალე ქადაგი რომ იყო, ისეთი უხერხემლო, ისეთი გაუბედავი და მორცხვი, ადამიანებთან ნებისმიერი ურთიერთობა წამებად გადაექცეოდა ხოლმე და ჩვენც იმგვარი ზიზღნარევი სიბრაღულით გვებრალებოდა, რა სიბრაღულითაც გაჭყლეტილ ჭიკაძეს დასცქერის ხოლმე კაცი, და კიდევ ვერიდებოდით იმასთან გამოლაპარაკებას – ვხედავდით, როგორ ცოდვილობდა, როგორი ტანჯვით ამოღერღავდა ხოლმე პასუხს. მაგრამ ბევრჯერ იმის მომსწრენიც გავმხდარვართ, კვირლობით სოფლის ეკლესიის ამბიონზე როგორ გარდაიქმნებოდა ერთბაშად, სულ სხვა კაცი ხდებოდა: ხმაც უმტკიცდებოდა, სიტყვაც მოსდევდა და მრევლსაც მისი გარეგნობისა და ხასიათის კაცისათვის სრულიად უჩვეულო, შეუფერებელი გულითადობით მიმართავდა.

“ახლა წარმოიდგინეთ, როგორ ელოდა ის კაცი თავის დროს,” – სიტყვა გააგრძელა სტივენსმა – “იცდიდა, აბა ერთი, რა გამოვაო, ბოლოს კი მიხვდა რატომაც არ გამოვიდა არაფერი, რად ჩაუვარდა ანდერძი ხელში მოსამართლე დიუკინფილდს, მერე კი უკვალოდ გაქრა – მიხვდა, საკუთარი მახსოვრობა რომ იყო ყველაფრის თავი და თავი, ის დაივიწყა, რისი დავიწყე-

ბაც არამც და არამც არ იქნებოდა: დაივიწყა, მოსამართლე დიუკინფილდმაც რომ იცოდა, მისტერ ჰოლენდი თავის დღეში ჯოხით არ სცემდა თეთრ ცხენს. ისიც იცოდა, სწორედ იმ კაცს რომ მოეკლა ანსელმ ჰოლენდი, ვისაც ცხენი დაეიარებინა, ჯერ მოეკლა, მერე კი ფეხი უზანგში გაეყრევიანებინა და ცხენიც გამეჭებით ეცემა – უნდოდა როგორმე გაეჭენებინა. მაგრამ ცხენი ცოცხალი თავით არ იცვლიდა ფეხს. მკვლელმაც იცოდა, ასე მოხდებოდა, დიდი ხანია იცოდა, მაგრამ ბოლო წუთს დააივიწყდა. დააივიწყდა, სანამ ჯერაც კვიცი იყო, ის თეთრი ცხენი ვილაცამ რომ მიასიკვდილა ცემით და მერე, ჯოხის დანახვაზეც კი, მაშინვე მიწაზე წვეებოდა... ეს ამბავი მისტერ ჰოლენდისთვისაც კარგად იყო ცნობილი და საერთოდ ყველასთვის, ვინც მეტ-ნაკლებად დაახლოვებოდა იმის ოჯახს. იმ დღესაც იმიტომ დაეცა ზედ მისტერ ჰოლენდის ცხედარს. მაგრამ ეგეც არაფერი, ეს ჯერ კიდევ ნახევარი უბედურება გახლდათ. ასე ფიქრობდა ის კაცი ღამდამობით, ძილის წინ, და ახლაც, როგორც ბოლო თხუთმეტი წელიწადია, რაღაცას ელოდებოდა – მაშინაც კი, როცა საქმეს აღარაფერი ეშველებოდა, როცა საკუთარ შეცდომას მიხვდა, უცებ მაშინაც ვერ გაიხსენა ის, რისი დავიწყებაც არ შეიძლებოდა. მერედა მოეგო გონს, როცა უკვე ველარაფერს გამოასწორებდა, როცა მოკლულიც იპოვეს და ცხენის დაიარებული ზურგიც ყველამ ნახა, ყველას სალაპარაკო გაუხდა. იმ დროისათვის, როცა გაახსენდა, ნაიარევეები ალბათ შეხორცდებოდა კიდევ, თუმცა შეხორცებით კი შეხორცდებოდა, მაგრამ ხალხს მაინც ძნელად თუ დაავიწყდებოდა. წარმოიდგინეთ, რა დღეში იქნებოდა მაშინ, რა შიში შეიპყრობდა, როგორ შეზარავდა გამოუსწორებელი, დამღუპველი შეცდომის შეგნება, რა სასოწარკვეთილი სურვილი დაუფლებოდა თუნდაც წამით უკან დაებრუნებინა დრო, რათა გამოესწორებინა, გადაეკეთებინა ის, რისი გამოსწორებაც და გადაკეთებაც არასდროს ადარ მოხერხდებოდა. ყველაფერი კი იმიტომ აეწყო ასე, ძალიან გვიან გაიხსენა, მისტერ ჰოლენდმა ის ცხენი მოსამართლე დიუკინფილდისგან რომ იყიდა, სწორედ იმ მოსამართლისგან, ვინც ამ მაგიდასთან მჯდომი ამოწმებდა ანდერძის სისწორეს, ამ მაგიდასთან მჯდომი წყვეტდა, ვის უნდა რგებოდა მთელ შტატში საუკეთესო ორი ათასი აკრი მიწა. ის კაცი უცდიდა რა მოხდებოდა, . მაგრამ არაფერიც არ მოხდა, რადგან ხალხისთვის ცხენის ნაიარევეების დავიწყება მხოლოდ ერთი საშუალებით შეიძლებოდა. დიახ, არაფერიც არ მოხდა და იმან ამის მიზეზიც კარგად იცოდა. მაინც იცდიდა სანამ ღონე ეყო, სანამ არ მიხვდა, უფრო მეტი რომ იდო სასწორზე, ვიდრე რაღაც მიწის ბედ-იღბალი. სხვა რა გზა ჰქონდა? რაც ჩაიდინა, იმის მეტი რაღა დარჩენოდა?”

სტივენსმა დაღუპება ვერ მოასწრო, უცებ ანსელმის მჭახე ხმა რომ გაისმა ოთახში.

“გემლებათ!” – თქვა ანსელმმა.

ყველა იმას მივაჩერდით, იმის ჭუჭყიან ჩექმებს, ძველ ტანსაცმელს, ანსელმს კი სტივენისათვის მიეშტერებინა თვალი. ვირჯინიუსიც კი შეტრიალდა ძმისკენ. მარტო ნათესავი და ბებერი ზანგი არ შერხეულან. თითქოს არც არაფერი ეყურებოდათ.

“რა მეშლება?” — ჰკითხა სტივენსმა.

ანსელმა არ უპასუხა, თვალებით ჭამდა სტივენსს.

“მიწას მაინც ვირჯინიუსი დაეპატრონება? მამა რომ.. გინდაც...”

“გინდაც რა?” — ისევ ჰკითხა სტივენსმა.

“გინდაც ის... გინდაც...”

“იმ შემთხვევაშიც, თუ თავის სიკვდილით კი არ მოკვდა — მოკლეს, არა?”

“დიახ,” — ამოღერდა ანსელმმა.

“რა თქმა უნდა. იმის მიუხედავად, ანდერძი დამტკიცდება თუ არა, თქვენ და ვირჯინიუსი მიწას მაინც მიიღებთ — რასაკვირველია, ვირჯინიუსი თუ მოისურვებს გაყოფას. მაგრამ მამათქვენის მკვლელი ამაში დარწმუნებული არ იყო, კითხვა კი ვერ გაბედა. არ უნდოდა მიწა ორივეს დაგრჩენოდათ. ერჩინა, მთელი მიწა ვირჯინიუსს ჩაეგდო ხელში. ანდერძის დამტკიცებაც ამიტომ სურდა”.

“სცდებით,” — თქვა ანსელმმა. უხეში ხმა ჰქონდა, ნაწყვეტ-ნაწყვეტ ისროდა სიტყვებს. “მამა მე მოვკალი. ოღონდ იმ წყეული ფერმის გულისთვის არ მომიკლავს. მიდით, შერიფს დაუძახეთ!”

მაგრამ სტივენსმა, რომელიც დაჟინებით მისჩერებოდა ანსელმის ბრაზით დამახინჯებულ სახეს, მშვიდად განაცხადა:

“მე კი გეუბნებით, გეშლებათ-მეთქი, ანს!”

დამბლადაცემულებივით შევცქეროდით, დამბლადაცემულებივით ვუსმენდით იმათ ლაპარაკს — თითქოს გვეძინა, თითქოს სიზმარს ვხედავდით, წინასწარ ვიცოდით რაც მოხდებოდა და თან იმასაც ვხედავდით, უაზრობაა ყველაფერი, სისულელე, რადგან სულერთია, წამის შემდეგ გაგვეღვიძებაო. თითქოს დროის გარეთ აღმოვჩნდით და მომხდარს გვერდიდან ვადევნებდით თვალს; კი, დროის მიღმა ვიყავით და გვერდიდან შევცქეროდით იმ წუთიდან, როცა ანსელმს შეეხედეთ და თითქოს პირველად დავინახეთ. უცებ რაღაც ხმა გაისმა, ეტყობა ვიღაცამ ნელ-ნელა, ჩუმად, ლამის შევებით ამოისუნთქა. ვაკიფიქრეთ კიდევ, მორჩა, დასრულდა ანსის თვითგვემართ; ფიქრით იქნებ წარსულშიაც გადავსახლდით, იმ დროში, როცა პატარა ბიჭი იყო, თავის ბავშვურ საწოლში იწვა და ელოდებოდა როდის დახედავდა დედა, ვისაც ანსი ამქვეყნად ყველაზე მეტად უყვარდა, ვისი დანატოვარიც ანსისთვის არ შეერგოთ, ვისი მრავალტანჯული ნეშტი საფლავშიაც კი არ დაეყენებინათ. შორეულ წარსულში ხდებოდა ეს ყველაფერი, გზა იქედან იღებდა სათავეს და თუმცა გზა პირდაპირ წარსულიდან იწყებოდა, ის ლოგინში გატრუნული პატარა ბიჭი ამ გზას კარგა ხანია ასცდენოდა, დიდი ხანია გამქრალიყო, როგორც საერთოდ გაექრით, ვქრებით ანდა უნდა გაექრეთ ყველანი. ის ბიჭი

მოკვდა, თავისი სისხლით და ხორციით ნათესავეების მსგავსად, იმათ მსგავსად, ვისი სიმშვიდეც იქ, კედრის ჭალაში დაირღვა და ახლა ჩვენს წინ სხვა კაცი იდგა. პირდაფრენილი უფსკრული გვეყოფდა მასგან და შეიძლება, სიბრალულით კი გავცქეროდით გაღმა ნაპირზე დარჩენილს, მაგრამ დანდობას არ ვუპირებდით. ამიტომაც ვერ მოაღწია თავიდან სტივენსის სიტყვებმა ჩვენამდე, თავიდან ანსმაც ვერ გაუგო, რადგან სტივენსმა ერთხელ კიდევ გაუმეორა:

“გეუბნებით, გემლებათ-მეთქი, ანს”.

“რაო?” – წამოიძახა ანსმა. არ წამომდგარა, ოღონდ, თითქოს მთელი ტანით წინ გადაიხარა სტივენსისაკენ – “რას ბოღავთ?”.

“არა, თქვენ არ მოგიკლავთ მამათქვენი. მამათქვენიც იმან მოკლა, ვინც წინასწარი განზრახვით აქ, ამ მაგიდასთან მჯდომ მოხუცს მოუღო ბოლო, იმას, ვისაც ზანგი ბერიკაცი მოაკითხავდა ხოლმე, გამოაღვიძებდა და – შინ წასვლის დროაო, ეტყოდა. ის კაცი მოკლა, ვისაც ცხოვრების მანძილზე არავისთვის, არც ქალისთვის, არც კაცისთვის და არც ბავშვისთვის, სიკეთის მეტი არაფერი გაუკეთებია, ვისაც სჯეროდა, რომ მუდამ საკუთარი სინდისისა და ღვთის კარნახით იქცეოდა. არა, თქვენ მამათქვენის სიკვდილში ბრალი არ გიდევთ. თქვენ ის მოითხოვეთ, რაც კანონის ძალითაც თქვენად მიგაჩნდათ, ხოლო როცა უარით გიპასუხეს, წახვედით, სამუდამოდ მოიკვეთეთ მამა, მას მერე აღარც დალაპარაკებიათ. ხმები მოგდიოდათ, რა უაზროდ და უგულოდ აჩანავებდა მიწას, მაგრამ დუმდით, რადგან თქვენთვის მშობლიური სახლი “იმ წყეულ ფერმად” ქცეულიყო უკვე. დუმდით, ვიდრე არ შეიტყვეთ, თურმე შეშლილი მოხუცი საფლავებსაც რომ ბილწავდა, დედათქვენისა და საკუთარი წინაპრების საფლავებს. მაშინ – მხოლოდ მაშინღა მიხვედით მამასთან, გინდოდათ როგორმე დაგენამუსებინათ. ოღონდ თქვენ ის კაცი არა ხართ, ვისაც სხვისი დანამუსება ეხერხება და არც მამათქვენი გახლდათ მომსმენი. მერე სასაფლაოზე ჩაუსაფრდით, კედრის ჭალაში, დაინახეთ, როგორ მოდიოდა თოფით შეიარაღებული. თუმცა მეექვსეებს თოფი საერთოდ შეგემჩნით. თოფი ალბათ გაუაზრებლად, უნებლიედ გამოსტაცეთ, გალახეთ და იქ მიატოვეთ თავის ცხენიანად. შეიძლება, მკვდარიც გეგონათ. მაგრამ თქვენს მერე სხვაც მივიდა იქ, სხვამაც ნახა მიწაზე დაგდებული მოხუცი. ან, იქნებ, ის მეორე განუწყვეტლივ გითვალთვალებდათ კიდევ, იმას ხომ მოხუცის სიკვდილი სწყუროდა, ოღონდ წყენა ან რისხვა კი არ ამოძრავებდა, უბრალო ანგარება. ვინ იცის, იქნებ ანდერძის იმედიც ჰქონდა. სწორედ ის წაადგა თავზე მოხუცს თქვენს მერე, იმან მოუღო ბოლო, მერე კი უზანგში გააყოფინა ფეხი და ცხენს ჯოხით ცემა დაუწყო, უნდოდა ცხენი გაჭენებულიყო, მაშინ მართლაც კეთილად მოეწყობოდა ყველაფერი, მაგრამ სიჩქარეში სწორედ ის დაავიწყდა, რისი დავიწყებაც არ იქნებოდა... თქვენ არაფერ შუაში ხართ, ანს — თქვენ შინ დაბრუნდით და როცა მოხუცის სიკვდილის ამბავი შეიტყვეთ, არაფერი გაამხილეთ. არ გაამხილეთ, რადგან უეცრად ისეთმა ფიქრმა გაგიელვათ, ხმამაღლა საკუთარ თავსაც რომ ვერ გამოუტყდებოდით. მერე როცა ანდერძის შესახებაც გაიგეთ, გადაწყვიტეთ, მორჩა, უკვე გაირკვა ყველაფერიო. გადაწყვიტეთ და გაგიხარდათ. გაგიხარ-

დათ, რადგან მიეჩვიეთ სიმარტოვეს, რადგან დასრულდა ახალგაზრდობა, გაქრა სიცოცხლის წყურვილი. ერთიდა გსურდათ – წუთისოფელი მშვიდად გაგელიათ და დედათქვენის ნეშტსაც მშვიდად განესვენა სამარეში. მართლაც, რა არის მიწა და საზოგადოებრივი მდგომარეობა სახელგატეხილი კაცისთვის?”

სულგანაბულნი ვუსმენდით, ვიდრე სტივენსის ხმა საბოლოოდ არ მიწყდა პატარა ოთახის თაღებქვეშ, სადაც ჰაერი მუდამ გუბდებოდა და ორპირი ქარის ოღნავი ნასახიც კი არ იყო, რადგან მაღალ, ყრუ კედელს მიბჯვნილი შენობის სწორედ კუთხეში მდებარეობდა.

“არა, თქვენ არ მოგიკლავთ მამათქვენი, არც მოსამართლე დიუკინფილდი მოგიკლავთ, ანს. მამათქვენის მკვლელს დროზე რომ გახსენებოდა, ის ცხენი ადრე მოსამართლე დიუკინფილდისა იყო, მოსამართლე დღესაც ცოცხალი იქნებოდა”.

ხმაგაკენდილნი, სუნთქვაშეკრულნი ვუსხედით მაგიდას, სწორედ იმ მაგიდას, რომელთანაც ჩვიდმეტი წელი გაეტარებინა მოსამართლე დიუკინფილდს, იმ დღემდე, როცა დამიზნებული დამბაჩის ლულას დაინახავდა. მაგიდაზე ისევე ხელუხლებლად ეწყო ყველაფერი: ქაღალდები, კალმები, სამელნე და პატარა, ლამაზად მოვარაყებული ბრინჯაოს ზარდახშა. ეს ზარდახშა მოსამართლისთვის ქალიშვილს ჩამოეტანა საჩუქრად ევროპიდან, თორმეტი წლის წინ, ოღონდ არცერთმა არ იცოდა რა დანიშნულება ჰქონდა, რაში უნდა გამოეყენებინა კაცს. ასეთ ზარდახშებში, ჩვეულებრივ, თამბაქოს ან ბურნუთს ინახავენ ხოლმე, მოსამართლე კი ვერც ერთს ეგუებოდა და ვერც მეორეს, მაგრამ შვილის საჩუქარს მაინც ვერ ელყოდა და ბოლოს პრესპაპიეს მაგივრად ხმარობდა, თუმცა, სიო რაა, ოთახში სიოც კი არასოდეს უბერავდა. ზარდახშა მუდამ მაგიდაზე ედო, ყველა ჩვენთაგანს კარგა ხანია შეგვეჩვია მისთვის თვალი: რამდენჯერ გვინახავს, ლაპარაკისას როგორ ათამაშებდა ხოლმე ხელში, მერე სახსრიან თავსახურს ახდიდა და, თითის ოღნავი მიკარებისთანავე, ზარდახშაც ბრაზიანი ხმაურით თავისთავად იკეტებოდა.

ახლა, როცა ამ ამბებს ვიხსენებ, მეჩვენება, გაცილებით ადრე უნდა გარკვეულიყო-მეთქი ყველაფერი. ასე მგონია, თითქოს მაშინ მიმხვდარიც ვიყავით ყველაფერს; ჯერ კიდევ ვგრძნობ იმ სიბრაულეგარეულ, დაუძლეველ სიმულვილს, რასაც ნემსკავზე დაკლანილი მსუქანი ჭიაყელას დანახვისას განიცდის ხოლმე კაცი, როცა ლამისაა აღებინოს ყელში მოწოლილი ზიზღისგან და ხელში თუ არაფერი მოხვდა, მზადაა შიშველი ხელისგულით მოსრისოს ერთადერთი ფიქრით შეპყრობილმა: *ჩქარა! რაღას უცდი, დროზე გაჭყლიტე ევ საზიზღრობაო!* მაგრამ, სტივენსს სხვა გეგმა ჰქონდა. გეგმა კი ნამდვილად ჰქონდა, მოგვიანებით გაგვიმხილა (ვიცოდი როგორ გამიჭირდებოდა მკვლელის სააშკარაოზე გამოყვანა და მინდოდა იძულებული გამეხადა, თვითონ გამოემყდარებინა თავიო). საწადელს მართლაც მიაღწია, ოღონდ არც მთლად პატიოსანი გზითა და ხერხით. ასე ვფიქრობდით და არც მისთვის დაგვიმალა (“სისულელეაო – გვპასუხობდა,

— განა მართლმსაჯულება მუდამ პატიოსანი გზით დადის? განა სამართალი უსამართლობის, ბედნიერი შემთხვევითობისა და ათასი გაუგებრობისაგან არ შედგება და კაცი ვერ იტყვის, რა არის მასში უფრო მეტი?”).

მაგრამ თავიდან, როცა უწინდელივით ხუმრობანარევი ხმით, მშვიდად და ძალდაუტანებლად ალაპარაკდა და ხელი ბრინჯაოს ზარდახმას დაადო, მაინც ვერ მივხვდით საით უმიზნებდა. ადამიანი ხომ ყველაზე ძნელად ერთხელ ჯიუტად აკვიატებულ აზრს ელევა. ხშირად ჩვენ ფაქტი და სამხილი კი არ გვაოცებს ხოლმე, არამედ სხვისგან იმის გაგება გვზარავს, რასაც წესით, თვითონვე უნდა მივმხვდარიყავით, ჩვენი გონება სხვა ვარაუდით რომ არ ყოფილიყო დაკავებული და ეს ვარაუდიც, ყოველგვარი საფუძველის გარეშე, სიმართლედ არ მიგვეჩნია მართო იმიტომ, იმ წუთას რომ გვჯეროდა მისი უტყუარობა. სტივენსმა მოულოდნელად თამბაქოს მწვეველებზე ჩამოაგდო სიტყვა — კაცი თამბაქოს მანამდე ვერ ჩაატანს გემოს, ვიდრე იმის მანებლობაში არ დარწმუნდებოდ, არამწვეველი კიდევ ერთ-ერთ უდიდეს სიამოვნებას იკლებს — იმის შეგნებას, ნებაყოფლობით ვიქვეცი მხოლოდ და მხოლოდ ჩემთვისვე საზიანო მანკიერების მსხვერპლად.

“თქვენ თუ ეწევით, ანს?” — დაკითხა უცებ.

“არა.” — უპასუხა ანსმა.

“არც თქვენ, ვირჯ?”

“არა,” — თქვა ვირჯინიუსმა — “არამწვეველების ოჯახი ვართ — მამაც, ანსიც და მეც. ეტყობა, ასე მოგვღამს”.

“ეტყობა, ეგრეა.” — კვერი დაუკრა სტივენსმაც. “დედის მხრიდან როგორღაა საქმე? თქვენს ოჯახში თუ ეწევიან, გრენბი?”

ნათესავმა წამით ჰკიდა სტივენსს თვალი. არ განძრეულა, მაგრამ მოგვეჩვენა, თითქოს მთელი ტანით დაიკლაკნა კოხტა, სუფთა, ოდნავ შელახულ კოსტუმში.

“არა, სერ. თამბაქო არასოდეს მომიწევია”.

“აღბათ იმიტომ, ქადაგი რომ ბრძანდებით, არა?” — ჰკითხა სტივენსმა. ნათესავმა არაფერი უპასუხა, თუმცა ერთხელ კიდევ შეავლო თვინიერი, დაბნეული მხერა.

“აი, მე კი კარგა ხანია ვეწევი.” — თქვა სტივენსმა — “თორმეტი წლიდან, როგორც კი გულისრევას მოვერიე პირველი ნაფაზის მერე. დიდი ხანია ვეწევი და თამბაქოს ავ-კარგშიც გავერკვიე. ისე, მწვეველების უმრავლესობა საერთოდ წუნია და აზიზი ხალხია, თუმცა ფსიქოლოგები ამას უარყოფენ და ყველანაირი თამბაქოც, სინამდვილეში, სტანდარტულია. ან იქნებ მხოლოდ სიგარეტია სტანდარტირებული? იქნება განსხვავებას მართო მოყვარულები ვერ ამჩნევენ და არა თავგადაკლული მწვეველები? ბევრჯერ გამიგონია, რა

სისულელეს ლაპარაკობენ ხოლმე არამწვევლები თამბაქოზე, სწორედ ისევე, როგორც ჩვენ მივედ-მოვედებით ათასგვარ აბდაუბდას ჩვენთვის სრულიად უცხო და უსარგებლო საგნებსა თუ საკითხებზე – მხოლოდ იმ უბრალო მიზეზის გამო, რომ ეს ადამიანის ხასითშია... მაგრამ მოდით აბა, თამბაქოთი მოვაჭრეს ჰკითხეთ, გინდაც თვითონ არ ეწეოდეს, ოღონდ ყოველ დღე ხედავდეს როგორ ყიდულობს მუშტარი იმის საქონელს, იქვე, დახლთანვე როგორ ხსნის სიგარეტის კოლოფს და როგორ უკიდებს, ჰკითხეთ – ერთ-ნაირი სუნი აქვს ყველა თამბაქოს? შეუძლია სუნით გაარჩიოს ერთი ხარისხის თამბაქო მეორისაგან? თუძცა, არც ისაა გამორიცხული, ასეთ დროს კოლოფის ფორმასა და ფერსაც ჰქონდეს მნიშვნელობა, ფსიქოლოგებს ზომ დღემდე რიგიანად არ განუძარტავთ ჩვენთვის, სად მთავრდება მხედველობა და სად იწყება ყნოსვა, ანდა, სად მთავრდება სმენა და სად იწყება მხედველობა. ნებისმიერი იურისტიც იგივეს გეტყვით”.

ამის თქმა იყო და, მსაჯულთა მამასახლისმა ისევ შეაჩერა. დანარჩენები ჩუმად კი ვუსმენდით, მაგრამ მგონი ყველა ერთსა და იგივეს ვფიქრობდით: “მკვლელის დაბნევა ერთია და ჩვენ, ნაფიც მსაჯულებს რაღას გვერჩისო”.

“უმჯობესი იქნებოდა მთელი ეს კვლევა-ძიება მანამდე ჩაგეტარებინათ, ვიდრე აქ მოგვიწვევდით.” — უთხრა მამასახლისმა. “გინდაც სამხილი გაგაჩნდეთ, მოკლულის გვამის დათვალიერების გარეშე რა ფასი ექნება? მკითხაობა და ვარაუდი...”

“კეთილი”, გააწყვეტინა სტივენსმა. “ნება მომეცით, ცოტა ხანს კიდევ შეგაწყინოთ თავი ჩემი ვარაუდებით, ხოლო თუ ეს, თქვენი აზრით, არაფერს მოგვეცემს, შემაჩერეთ, მაშინ მეც ჩემებურად კი არა, თქვენებურად წავიყვან საქმეს. ვიცი, თავიდან ჩემი ვარაუდებიც დიდ სითამამედ მოგეჩვენებათ, ოღონდ ჩვენ ზომ საკუთარი თვალით ვნახეთ მოკლული მოსამართლე დიუკინფილდი, აქ, ამ მაგიდასთან. ეს ვარაუდი არ გახლავთ. მია ჯობი კი მთელი დღე დერეფანში იჯდა და ოთახში შემოსულ ნებისმიერ ადამიანსაც (თუკი, რა თქმა უნდა, გვერდითა კიბეს არ ამოჰყვებოდა და ფანჯარაში არ გადმოძვრებოდა), ორ ნაბიჯში უნდა ჩაეველო მისგან. არადა, ყველამ კარგად ვიცით, ჩვიდმეტი წლის განმავლობაში ჯობის შეუმჩნეველად დერეფანში ჯერ სულიერს არ გაუჭაჭანია. არც ესაა ვარაუდი”.

“მაშ რაღას ეძახით ვარაუდს?”

მაგრამ სტივენსმა არ უპასუხა, ისევ თამბაქოზე და თამბაქოს მწვევლებზე გაუბა ლაპარაკი:

“გასულ კვირას უესტის დუქანში შევედი თამბაქოს საყიდლად და უესტ-მაც ვილაც კაცზე ჩამომიგდო სიტყვა. ის კაცი, თურმე, ჩემზე დიდი წუნია ყოფილა თამბაქოს საკითხში. ჩემი შეკვრა მომაწოდა, მერე ხელი გადაიწვდინა და თაროდან სიგარეტის კოლოფი ჩამოიღო. მთლად დამტკვერილი,

გახუნებული, დიდი ხნის ნადები — ვიღაც ხელზე მოვაჭრეს მიესაღებინა ორი ცალი. “მოგიწევიათ როდისმე ასეთი სიგარეტიო?” — მკითხა. — “არა, ეგ, ეტყობა, ქალაქური სიგარეტია-მეთქი”. “სწორედ გუშინ გაკვიდე მეორე კოლოფიო” — მითხრა. შესვენებაზე ნოქარი სადილად რომ გასულა, უესტი თვითონ დამჯდარა დახლთან, გაზეთი გაეშალა, კითხულობდა, თან შიგადაშიგ კარებისკენაც აპარებდა თვალს, მაგრამ მუშტრის შესვლა არც გაუგონია და არც დაუნახავს; უცებ თავი აუღია — ის კი უკვე დახლთან დგას, ისე ახლოს, უესტი მოულოდნელობისგან შემხტარა კიდეც. ტანმორჩილი კაცი ყოფილა, ქალაქურ ყაიდაზე ჩაცმული, ისეთი სიგარეტი მოითხოვა, უესტს სახელიც არ გაეგონა თავის დღეში. “არა მაქვსო,” — უთქვამს — “ჩვენში ეგეთი არ იშოვებაო”. “რატომ არ იშოვებაო?” — უკითხავს იმას. “არავინ ეწევა და იმიტომო” — უპასუხია უესტს. ის კაცი კარგად ამიწერა: სუფთად გაპარსული სახე ცვილის თოჯინას მიუგავდაო, თვალებზე თითქოს ლიბრი გადაჰკვროდა და ხმაც დაგუდული ჰქონდაო. მერე, კარგად რომ დაჰკვირვებია, თვალი თვალში გაუყრია და იმის ნესტოებიც შეუთვალიერებია, ყველაფერს მიმხვდარა: მუშტარი ერთიანად კოკაინით ყოფილა გაჭყყპილი. “არა მყავს მაგის მუშტარიო,” — ერთხელაც გაუმეორებია უესტს. იმას კი: “როგორ არა გყავს, აბა მე რასა გთხოვ, ბუზის ქაღალდსო?” ბოლოს ერთი კოლოფი ის ძველი სიგარეტი უყიდია და წასულა.

უესტი ამბობს, სიბრაზისგან ოფლმა დამასხაო, საცა იყო, ზიზღისგან გული ამერეოდაო. “გულ-მუცელი ამოტრიალებაზე მქონდა, როცა ბოლო-ბოლო, დუქნიდან გაეთრაო”.

სტივენსმა ცოტა ხნით იყუჩა, შეგვათვალიერა. ჩვენც თვალმოუშორებლად შევცქეროდით.

“მანქანით ჩამოსულიყო საიდანღაც — ძვირფასი მანქანით, ის ქალაქელი კაცი. განსაკუთრებულ სიგარეტს მისჩვეოდა, სიგარეტი კი გასთავებოდა”. სტივენსი ისევ გაჩუმდა, მერე ნელ-ნელა ვირჯინიუს პოლენდისკენ მიაბრუნა თავი. მოგვეჩვენა, თითქოს მთელი წუთი თვალებში ჩასცქეროდნენ ერთმანეთს. “ერთმა ზანგმა მითხრა, ის ძვირფასი მანქანა ვირჯინიუს პოლენდის გარაჟში იდგა მოსამართლის მკვლელობის წინა დამესო”. ისევ ჯიუტად, ნიღბადქცეული სახეებით მიშტერებოდნენ ერთიმეორეს. მერე სტივენსი წყნარად, ფიქრიანად, ლამის მეოცნებე ხმით ალაპარაკდა: “ვიღაცამ დაუშალა იმ კაცს ქალაქში მანქანით შემოსვლა, ძვირფასი მანქანით, რომელსაც ნებისმიერი კაცი შეამჩნევდა და დაიმახსოვრებდა კიდეც. შეიძლება ვიღაცამ აუკრძალა აქ, ჩვენთან, მანქანით გამოჩენა, შეიძლება დააშინა კიდეც. თუმცა იმ კაცს, ვისაც ჩვენმა უესტმა სიგარეტი მიჰყიდა, ძნელად თუ შეაშინებდა რამე”.

“და თქვენი აზრით ის ვიღაცა მე ვარ?” — ჰკითხა ვირჯინიუსმა. არ განძრეულა, არც სტივენსისთვის მოუცილებია თვალი. აი, ანსელში კი მაშინვე ძმისკენ შეტრიალდა. ჯიქურ მიაშტერდა, ცოტა ხანს უცქირა და ისევ აარიდა თვალი. ოთახში სიჩუმე იდგა, მაგრამ როცა ნათესავი ალაპარაკდა, თავიდან მისი ხმა მაინც ვერ გავიგონეთ, ვერ გავარჩიეთ იმის ნათქვამი. მას

შემდეგ, რაც მოსამართლის კაბინეტში შევეგროვდით და სტივენსმაც კარი ჩაკეტა, მეორედ ამოიღო ხმა. მიკნავებული ლაპარაკობდა და თუმც კი ადგილიდან არ იძვროდა, მაინც მოგვეჩვენა, თითქოს მთელი ტანით იკლავებოდა; საწყლად, გაუბედავად აღულლულდა, როგორც ყოველთვის, ახლაც უჩინმაჩინად ქცევის მტანჯველი სურვილით შეპყრობილი.

“ის კაცი ჩემთან ჩამოვიდა”, ბუტბუტებდა დოდჯი, “მე შემომიარა. სალამო ხანს მოგვადგა, პატარა ცხენებს ვეძებო — იმისთვის, რა ქვია იმას... თამაშია რაღაც...”

“პოლო?” — ჰკითხა სტივენსმა.

“დიახ, სერ. ვირჯინიუსიც შინ იყო. ცხენებზე ვლაპარაკობდით. დილას კი ჩაჯდა მანქანაში და წავიდა. არ ვიცი, საიდან მოდიოდა, ან ჩვენგან საით გაემგზავრა.” — ლაპარაკისას სულ სადღაც გვერდზე იხედებოდა, თითქოს საკუთარ, მუხლებზე დაწყობილ, აცახცახებულ ხელებს მიმართავდა.

“და ან აქ ვის ნახვას აპირებდა, ან საერთოდ რა უნდოდა, თქვენ მაგისა არაფერი იცით,” — დაურთო სტივენსმა.

დოდჯმა არ უპასუხა. არც არავინ სთხოვდა პასუხს და ისიც კვლავ საკუთარ ფიქრებში ჩაიძირა, ტყის პატარა მხეცივით გაინაბა.

“ახლა ხედავთ, სად მიგვიყვანა ჩემმა ვარაუდებმა?” თქვა სტივენსმა.

აი მაშინ კი, წესით, ყველაფერს უნდა მივმხვდარიყავით. დღესავით ნათელი იყო ყველაფერი. უნდა გვეგრძნო, ოთახში, ჩვენს გვერდით, ვიღაცა რომ იჯდა, სტივენსის სიტყვებით შეძრწუნებული, გაოცებული, სასოწარკვეთილი, იჯდა და ნატრობდა, ნეტავი წამით მაინც დამბრუნებინა დრო უკანო, ნეტავი შემაძლებინა, ყველაფერი სხვანაირად ვთქვა, სხვანაირად გავაკეთო. თუმცა, შეიძლება იმ “ვიღაცას” ჯერ არც ვგრძნო საფრთხე, არ ვგრძნო ბიძგი, დარტყმა, როგორც ზოგჯერ, პირველ წამს, ტყვიის მოხვედრას ვერ გრძნობს ხოლმე კაცი; იმიტომ რომ უეცრად ვირჯინიუსი ალაპარაკდა, გაფიცხებული, წონასწორობიდან გამოსული:

“მერე, რით დაამტკიცებთ მაგას?”

“მაინც რას, ვირჯ?” — ჰკითხა სტივენსმა. ისევ თვალებში ჩახედეს ერთმანეთს, მშვიდად, მტკიცედ, ორ მოკრივესავით — სწორედაც რომ მოკრივესავით და არა, ვთქვათ, მოფარიკავეებივით ან დამბაჩებით შეიარაღებული დუელიანტებივით — “როგორ დავამტკიცებ ვინ იქირავა ის მემფისელი მკვლეელი, ის პირუტყვი? მე არც არაფერი მაქვს დასამტკიცებელი, ყველაფერი თვითონ აღიარა. აქედან მემფისისკენ მიმავალმა, ბატენბერგის მახლობლად ბავშვს დააჯახა მანქანა (ჯერაც არ გამონელებოდა კოკაინი — ეტყობა, აქაური საქმე მოითავა თუ არა, გული იჯერა ყნოსვით). დაიჭირეს, საკანში დაამწყვდიეს და როცა რინდმა გაუარა, ყველაფერი დაფქვა: სად იყო,

ვისთან სტუმრობდა. მაშობიან დამბახას რომ ართმევდნენ, თურმე ერთიანად ცახცახებდა და სიბრაზისგან ყმუოდა”.

“ჰოო,” — თქვა ვირჯინიუსმა — “ძალიან კარგი. მაშ დასამტკიცებელი ისლა დაგრჩენიათ, მართლა რომ იყო აქ, ამ ოთახში, მკვლელობის დღეს. მაგას როგორღა გამოარკვევთ? ამ ზანგს მისცემთ დოლარს, კარგად რომ გაიხსენოს?”

სტივენსს კი თითქოს არ ესმოდა მისი სიტყვები. მაგიდის კიდესთან იდგა, მოწმეთა და მსაჯულთა შორის. ისევ ბრინჯაოს ზარდანშმას დასწვდა, შეატრიალ-შემოატრიალა, შეათვალიერა, მერე უწინდებურად მშვიდად, ფიქრიანად თქვა:

“ყველას კარგად მოგეხსენებათ ამ ოთახის ერთი თავისებურება: თავისით არასოდეს ნიავდება და ვთქვათ, შაბათ საღამოს რომ ვინმემ თამბაქო მოწიოს, ორშაბათ დილასაც, როცა ძია ჯობი კარებს გააღებს, ბოლი ისევ მძინარე ძაღლივით იქნება წირთხლთან გაწოლილი. ყველას გინახავთ”.

ანსისა არ იყოს, ახლა ყველანი წინ წავცვივდით, თან სტივენსს არ ვამორებდით თვალს.

“დიხაც,” — თქვა მამასახლისმა. “ერეა”.

“ჰოო,” — თქვა სტივენსმა, თითქოს მამასახლისის პასუხი არც გაუგონიაო, თან დაკეტილ ზარდანშმას ათამაშებდა ხელში — “თქვენ მკითხეთ, რას ფიქრობო. მოგახსენებთ. იმის გაკეთება, რასაც მე ვვარაუდობ, მხოლოდ უადრესად გაქნილ კაცს შეეძლო — ისეთს, ვინც დახლთან მჯდომ მელუქნეს შეუმჩნევლად მიახლოვდებოდა. ქალაქელ კაცს, ქალაქურ სიგარეტს მონატრებულს. ის კაცი დუქნიდან გამოვიდა, მოედანი გადაჭრა და სასამართლოში შევიდა, სხვებივით აუყვა კიბეს. ალბათ ათმა კაცმა მაინც დაინახა, უფრო მეტმა კი საერთოდ არ მიაქცია ყურადღება, რადგან ამ ქვეყნად ორი ისეთი ადგილი არსებობს, სადაც სხვას ყურადღებას არ აქცევენ — მართლმსაჯულების ტაძარი და საზოგადოებრივი საპირფარეშო. სასამართლოს დარბაზში შევიდა, გვერდითა კიბეს აუყვა, დერეფანში ამოყო თავი და მძინარე ძია ჯობი დაინახა. შეიძლება, გვერდითაც ჩაუარა ჯობს. ხომ გესმით? არც ისე ძნელია მძინარე მოხუცის გვერდით შეუმჩნევლად ჩავლა, როცა დღისით-მზისით მელუქნე ვერ გებულობს დუქანში შენს შესვლას. შეიძლება კაბინეტში უესტთან ნაყიდი კოლოფიდან სიგარეტი ამოიღო და მოუკიდა კიდეც, ვიდრე მოსამართლე დიუკინფილდი შეამჩნევდა. ანდა, შეიძლება მოსამართლეს მაშინაც ეძინა. ის კაცი კი იდგა, ეწეოდა და ხედავდა ნელ-ნელა როგორ ეფინებოდა ბოლი მაგიდას და მერე კედელთან როგორ გროვდებოდა, ალბათ იოლად ნაშოვნ ფულზეც ფიქრობდა, სანამ ჩახმახს გამოკრავდა თითს. გასროლას ასანთის გაკვრაზე მეტი ხმა არც ჰქონია, მართლაც ისე ოსტატურად ახერხებდა ნებისმიერი ხმაურისთვის თავის არიდებას, აღარც სჭირდებოდა ზედმეტი ტვიინის ჭყლეტა — გასაკეთებელი უჩუმრად როგორ გავაკეთოო. მერე, როგორც მოვიდა, ისევე წავიდა. ალბათ, ათობით კაცმა მაინც დაინახა

და ვერც დაინახა. ხუთ საათზე კი ძია ჯობი შევიდა მოსამართლის გასალ-
ვიძებლად — შინ წასვლის დროაო — უნდა ეთქვა. მართალს ვამბობ, ძია
ჯობი?”

მოხუცმა ზანგმა თავი აიღო.

“როგორც შემიძლო ვპატრონობდი,” — თქვა — “აკი ქალბათონსაც
დავპირდი. კარგად ვუვლიდი. შემოვდივარ, მგონია ძინავს, სმირად იძინებდა
ხოლმე...”

“მოიცა,” — გააწყვეტინა სტივენსმა — “შემოხვედი, მოსამართლე
დაინახე და მაგიდის უკან, კედელთან კი ბოლი იდგა? ასე არ მიაბძე?”

გატეხილ სავარძელში მობუზული ზანგი უცებ ატირდა. ბებერ მაიმუნს
ჰგავდა, უხმოდ ტიროდა და სახეს დაკოჟრილი, სიბერისაგან მოცახცახე
ხელით იწმენდდა, ან იქნებ მარტო სიბერის ბრალი არც იყო ეს ხელის ცახ-
ცახი.

“კაბინეტში დილაობით შემოვდიოდი, აქაურობას ვალაგებდი. ბოლი
სმირად ჰაერში ეკიდა ხოლმე, მოსამართლე რომ შემოვიდოდა, ჰაერს დაყნო-
სავდა, თვითონ თამბაქო ცხოვრებაში არ მოეწია, ყნოსვა კი მახვილი ჰქონდა
და მეტყოდა: “ჰოო, მოგვიწამლია გუშინ საღამოს ჩვენი სასამართლოს
ბიჭბუჭობა და ეგ არისო”.

“მოიცა,” — ერთხელაც შეაჩერა სტივენსმა. “შენ ის მიაბძე, როგორ იდგა
ბოლი მაგიდასთან იმ დღეს, როცა მოსამართლის გასალვიძებლად შემოხვედი,
შინ წასაყვანად, როცა შენს გვერდით ღერეფანში მისტერ ვირჯინიუს
ჰოლენდის მეტს არავის გაუვლია. აგე, იქა ზის. მისტერ ვირჯინიუსი თამ-
ბაქოს არ ეწევა, არც მოსამართლე ეწეოდა, აქაურობა კი მაინც ბოლით იყო
სავსე. სხვებსაც უამბე რაც მითხარი”.

“კი, ნამდვილად — გაბოლილი იყო მთელი ოთახი. მძინარე მეგონა,
გასალვიძებლად მივედი...”

“ზარდახმა კი მაგიდის ნაპირზე იღო, არა? სანამ მისტერ ვირჯინიუსს
ელაპარაკებოდა, მოსამართლე ხელში ათამაშებდა, ხოლო როცა შენ გასალ-
ვიძებლად შემოხვედი და ხელი გაიწვდინე...”

“დიახ სერ, ზარდახმა მაგიდიდან გადმოვარდა. მე კი მეგონა, მოსამართ-
ლეს სძინავს-მეთქი და...”

“ესე იგი, ზარდახმა ხმაურით დაეცა, შენ გაგიკვირდა, რატომ მოსამართ-
ლეს არ გაეღვიძაო, მერე იატაკზე დავარდნილ ზარდახმას დახედე, ბოლში
გახვეულს, თავახდილს, და იფიქრე, გატყდაო. ასაღებად დაიხარე — მო-
სამართლეს ხომ ძალიან უყვარდა, მართალია არაფერში სჭირდებოდა, მა-
გრამ მისს ემას სახსოვარი იყო... სახურავი დახურე, ზარდახმა ისევე მაგი-
დაზე დადო და მაშინლა შეამჩნიე, ეძინა კი არა...”

სტივენსი გაჩუმდა. ვცდილობდით არ გვესუნთქა და საკუთარი სუნთქვა კი გვესმოდა. სტივენსი ზარდახმას არ აშორებდა თვალს, ხელში ატრიალებდა. ზანგს მაგიდისკენ ოდნავ ზურგშექცეული ელაპარაკებოდა და ამდენად, უფრო მოწმეთა სკამისკენ იყურებოდა, ვიდრე მსაჯულებისაკენ.

“ძია ჯობი ზარდახმას “მოოქროვილს” ეძახის – ზედგამოჭრილი სახელია. განა სულერთი არ არაა, რა ჰქვია. სიმართლე გითხრათ, ყველა ლითონი ერთნაირია. უბრალოდ, ზოგი მეტად სჭირდება ადამიანს და ზოგი ნაკლებად. მთავარია, ყველა მათგანს ერთი თვისება გააჩნია – ლითონის კოლოფში უფრო დიდხანს ინახება ყველაფერი, ვიდრე ხისაში ან ქაღალდისაში. მაგალითად, შეიძლება აი, ამის მსგავს, ყრუ თავსახურიან ზარდახმაში ბოლი ჩაკეტო და ერთი კვირის მერეა გამოუშვა. ეს ერთი. მეორეც – სთხოვეთ ნებისმიერ ქიმიკოსს, ნებისმიერ მწვეველს, ანდა ჩვენი უესტის მსგავს თამბაქოს სპეციალისტს და ისიც ბოლის მიხედვით იოლად დაადგენს თამბაქოს ჯიშს, მით უმეტეს, თუ იშვიათი ჯიშია, თუ ამგვარ თამბაქოს ჩვენთან, ჯეფერსონში არავინ ეწევა, თუ ამნაირი სიგარეტის გამყიდველს მხოლოდ ორად-ორი კოლოფი აქვს და ერთის მყიდველიც ძალიან კარგად ახსოვს”.

ადგილიდან არავინ დაძვრულვართ. გაქვავებულნი ვისხედით და უცებ სწრაფი, ბორძიკ-ბორძიკა ნაბიჯების ხმა გაეიგონეთ, დავინახეთ, როგორ მივარდა ვიღაცა სტივენსს და როგორ გააგდებინა ხელიდან ზარდახმა. თუმცა, განათუ მას ვუყურებდით — არა, მასთან ერთად შევცქეროდით, როგორ გაიხსნა ზარდახმის სახურავი, როგორ ამოვარდა იქიდან ბოლის ქულა და ნელ-ნელა როგორ დაიშალა ჰაერში. მერე მაგიდიდან გადავიხარეთ და გრენბი დოჯის უტყვ, მოწითალო კეფას მივაჩერდით, ის კი, დოჯი, მუხლებზე დაცემულიყო და ზარდახმიდან ამოვარდნილ ბოლს გამალებით ფანტავდა ხელებით.

* * *

“მაინც ვერაფერი გამიგია...” თქვა ვირჯინიუსმა. ხუთნი ვიდექით სასამართლოს ეზოში და გაოცებულნი, ბნელი გამოქვაბულიდან გამოსულუბიგით ვაფახულებდით თვალებს.

“თქვენ თუ დაწერეთ ანდერძი?” — ჰკითხა სტივენსმა. ვირჯინიუსი თოფნაკრავივით შეხტა.

“აი, თურმე რაში ყოფილა საქმე!” ამოდერდა ბოლოს.

“რა თქმა უნდა დაწერდით, ანდერძს კი არა, უფრო ალბათ ვალდებულების ქაღალდს — როგორსაც ჩვეულებრივ, საქმიანი პარტნიორები უცვლიან ხოლმე ერთმანეთს.” — თქვა სტივენსმა — “თქვენ და გრენბი გაცვლიდით ასეთ ანდერძებს, რომელთა თანახმადაც ყოველი თქვენთაგანი მეო-

რის მემკვიდრედ და ანდერძის აღმსრულებლად იქცეოდა, საერთო ქონება რომ ხელშეუხებელი დარჩენილიყო. ბუნებრივია. ალბათ გრენბი შემოგთავაზებდათ პირველი, გეტყოდათ, მე უკვე ჩემს მემკვიდრედ დაგსახეო. ასე რომ ახლა გირჩევნიათ დახიოთ, მოსპოთ ეგ ქაღალდი. თუ მაინცდამაინც ანდერძის შედგენა გინდათ, უმჯობესია ანსი აირჩიოთ მემკვიდრედ”.

“ანსს ლოდინი რად უნდა,” — თქვა ვირჯინიუსმა. “მიწის ნახევარი ისედაც იმისია”.

“მთავარია, ფერმას გაუფრთხილდეთ.” — უთხრა სტივენსმა. “ანსმა იცის, მიწას კარგად უპატრონებთ. თვითონ კი არაფერი სჭირდება”.

“ჰო,” — თქვა ვირჯინიუსმა. მერე სტივენსს შეხედა. “მე... მე თქვენი... უფრო სწორად, ჩვენ ორივეს თქვენი დიდი ვალი გვაღვეს...”

“უფრო დიდი ვიდრე გგონიათ.” — თქვა სტივენსმა მშვიდად, საქმიანად — “ჩემი და იმ ცხენისაც. მამათქვენის მოკვლიდან ერთი კვირის თავზე გრენბიმ იმდენი თავგის წამალი იყიდა, სამ სპილოს მოწამლავდა. ეს ამბავიც უესტმა გამაგებინა. მაგრამ ცხენის ამბავი რომ გაახსენდა, როცა მიხვდა, რაც დავიწყებოდა, თავი შეიკავა, ანდერძის დამტკიცებას დაელოდა. გრენბი ეშმაკი კაცია, ოღონდ თან უმეცარიც — ასეთი კიდე, მოგეხსენებათ, ორმაგად საშიშია. იმდენად უმეცარი გამოდგა, ეგონა კანონი დინამიტს ჰგავსო: ვინც პირველი სტაცებს ხელს, იმას დაუდგება მონადო, თუმცა ამ “მონასაც” შეუძლია აჯანყება. ეშმაკობა კი იმასაც აფიქრებინებდა, თითქოს კაცი მხოლოდ თავისთვის, თავისი პირადი მიზნებისთვის სარგებლობდეს კანონით. ამას მაშინ მივხვდი, როცა შარშან ზაფხულს ერთი ზანგი მომიგზავნა — დაავალა, გამიგე, ანდერძის დამტკიცებაზე თუ იმოქმედებს როგორი სიკვდილით მოკვდება ანდერძის დამწერიო. მივხვდი, ის ზანგი ვისაც მოეგზავნა, თან ისიც ვიცოდი, რა პასუხიც არ უნდა მიმეცა, გამომგზავნი მაინც არ დაიჯერებდა, მაინც არ ირწმუნებდა ჩემს ნათქვამს, რადგან კანონის, იმ “დინამიტის”, იმ “მონის” მსახურად მთვლიდა. მოკლედ, მამათქვენს რომ ჩვეულებრივი ცხენი ჰყოლოდა ან გრენბის დროზე გახსენებოდა იმისი ზნე, ახლა საფლავში იწვებოდით. იქნებ გრენბის ვერც ვერაფერი მოეგო, მაგრამ თქვენ კი ნამდვილად თავს წააგებდით”.

“ჰო,” — თქვა ვირჯინიუსმაც სტივენსივით მშვიდად, სტივენსივით საქმიანად. “მართლა ძალიან დავალებული ვარ...”

“რა თქმა უნდა,” — მიუგო სტივენსმა — “დიდი ვალი გადევთ. გრენბის ვალი”. ვირჯინიუსმა გაკვირვებულმა შეხედა. “ფერმის გადასახადი, ამ თხუთმეტ წელიწადში დაგროვილი თანხა”.

“ჰოოო,” — თქვა ვირჯინიუსმა. “მე კი მამა მეგონა... კი, გრენბი ყოველ ნოემბრის თვეში ფულს მესესხებოდა ხოლმე, არც ისე ბევრს, მუდამ სხვადასხვა თანხას. საქონელი უნდა ვიყიდოო. ნაწილ-ნაწილ მიბრუნებდა. თუმცა, ჯერ ბოლომდე არც გაუსწორებია ანგარიში. თუმცა რას ვამბობ,

ახლა ალბათ თვითონა ვარ იმის მოვალე”. ვირჯინიუსი დაფიქრებული ლაპარაკობდა, ყოველ სიტყვას სწონდა: “მე მგონი, კაცი რომ ავ საქმეს მოჰკიდებს ხელს, მთავარი ის კი არაა რას გააკეთებს, არამედ რა შედეგი მოჰყვება მის გაკეთებულს”.

“მაგრამ დასჯით მაინც ჩადენილისთვის დასჯიან, თანაც სხვები, გარეშენი, ისინი არა, ვისაც ავი საქმის შედეგი მოუტანს ვნებას. მოკლედ, ჩვენთვის, ყველა დანარჩენისათვის მაინც უმჯობესია, თავისი ბნელი ზრახვებისთვის სწორედ ჩვენს ხელში რომ მოხვდება. საბედნიეროდ, გრენბიც ხომ მე უნდა დავსაჯო და არა თქვენ, თუმცა ნათესავად კი გერგებათ. ხომ გესმით, რისი თქმაც მინდა?”

“მესმის,” — თქვა ვირჯინიუსმა. “თუმცა, მე მაინც არ..” — და უცებ პირდაპირ სახეში შეხედა სტივენსს — “მისმინეთ, გევიწინ!”

“რა იყო?” — ჰკითხა სტივენსმა.

ვირჯინიუსი დაჟინებით ჩასცქეროდა თვალებში.

“წელან ძალიან ჭკვიანურად მსჯელობდით ბოლზე, თამბაქოზე, ქიმიანზე და რა ვიცი — ათას რაღაცაზე. სიმართლე გითხრათ, ზოგი დავიჯერე და ზოგიც — არა. ახლა რომ მოვყვე, რა დავიჯერე და რაში შემეპარა ეჭვი, ალბათ დამცინებთ.” — მეტისმეტად სერიოზული სახე ჰქონდა, სტივენსიც სერიოზულად შესცქეროდა, თუმცა წამით მაინც რაღაც ნაპერწკალმა გაუელვა თვალებში — მოუხელთებელმა, კვიმატმა, ოღონდ — არა დამცინავმა. “ეს ამბავი ერთი კვირის წინათ მოხდა,” — გააგრძელა ვირჯინიუსმა — “თუკი თქვენ მაშინ ზარდანხმა გახსენით და ნახეთ, არის შიგ ბოლი თუ არაო — ბოლი უთუოდ გაიფანტებოდა. არადა, ზარდანხმაში ბოლი რომ არ აღმოჩენილიყო, მაშინ გრენბიც აღარ გაამხელდა თავს. თანაც, ყველაფერი ერთი კვირის წინ მოხდა-მეთქი. რა იცოდით, ზარდანხმაში ბოლი ისევ თუ დაგხვდებოდათ?”

“არც ვიცოდი,” — თქვა სტივენსმა. მაშინვე უპასუხა, სწრაფად, მხიარულად, ღიმილით, ლამის სიხარულითაც კი. “არაფერიც არ ვიცოდი. სწორედ სხდომის დაწყების წინ, თქვენს შემოსვლამდე გავაავსე ზარდანხმა ჩემი ჩიბუხის ბოლით და ისევ დავახურე თავი. ცოდნით კი ნამდვილად არაფერი ვიცოდი. იქნებ, გრენბიზე მეტად მეშინოდა. მაგრამ საბედნიეროდ, ყველაფერი კეთილად დასრულდა — ბოლმა ლამის მთელი საათი გაძლო ზარდანხმაში!”

თარგმანი: **ხ. ჟიჟაძე**





ჰიქა ღვინო

...კარგ დღეში კი ჩავვარდი, ღმერთმანი! ახლა რა გინდა რო ქნა?..

ყველაფერი კი ასე დაიწყო:

— ერთი იმ უმთავრეს პრინციპთაგანი, მე რომ სკოტლენდ-იარღში შევითვისე, — გულდინჯად წართქვა პოლიციის უფროსმა ინსპექტორმა, — მეტად მარტივია: დანაშაულის გარეგანი მხარე სავალდებულო არაა ყოველთვის მაცდური იყოს — ანუ, ბოროტმოქმედება შესაძლოა მართლაც ისე მომხდარიყო, როგორც ეს ერთი შეხედვით ჩანს, ხოლო პირდაპირი, თუნდაც რომ მეტისმეტად პირდაპირი სამხილი უცილობელ ინსცენირებად არ უნდა მივიჩნიოთ... მიმიხვდით?.

ღვინო დაისხა და ბოთლი აქეთ გადმომაწოდა.

— რაღაც ეჭვი მაქვს, რომ მთლად კარგად და ბოლომდე ვერა, — მიუვუგე იმ იმედით, იქნებადა რაიმე ამბის მოსაყოლად წავაქეზო-მეთქი. საქმე ისაა, მე დეტექტიურ მოთხრობებს ვაცხოვრებ ყოველკვირეული ჟურნალებისთვის და თუ ჩემი სახელი არ გეცნაურებათ, ეტყობა ამ სახის ლიტერატურას საერთოდ არ სწყალობთ. ყველა სხვას რომ თავი დაუხანებოთ, მოვიხსენიებ თუნდაც ჩემს ორ, განსაკუთრებით გახმაურებულ ნაწარმოებს: “მკვლელობა შავბნელ ხიდზე” და “გადამხმარი ასკილის საიდუმლო”. სწორედ ამით თუ აიხსნება პოლიციის უფროსი ინსპექტორის, ფრედრიკ მორტიმერის დიდად გულისხმიერი დამოკიდებულება ჩემს მიმართ და ასევე, ჩემი — მისდამი. თანდათან დაუახლოვდით ერთმანეთს და ბოლოს წესად დავდეთ, თვეში ერთ-ორჯერ მაინც გვესაძილა ერთად. სიამოვნებით იხსენებდა ხოლმე სხვადასხვა შემთხვევას საკუთარი საგამომძიებლო საქმიანობიდან, ჩემისთანა გულისყურიანი და ამასთანავე, საკითხით დაინტერესებული მოსაუბრე კი ალბათ არც არასოდეს ჰყოლია. ოღონდ იმ დღეს მაინც მეტისმეტი მოგვივიდა...

იქნებდა ქართველმა მკითხველმა არც კი იცოდეს, რომ დეტექტიური მოთხრობების პოპულარული ავტორი, ელიეზანდერ ა. მილნი იგივე ყველა უცხოელი ბავშვისათვის უსაყვარლესი ზინის — “ვინი პუჰის” შემქნელი, ალან ე. მილნია...

რალაც მთლად კარგად ვერ გაგიგეთ-მეთქი, გაუუმეორე ისევ.

— მე თუ მკითხავთ, ბოროტმოქმედისათვის სმირად დანაშაულის ჩადენის უმარტივესი გზაა ყველაზე ხელსაყრელი. იმას არ ვამბობ, თითქოსდა ამ შემთხვევაში დამნაშავეს უცილობლად პრიმიტიული აზროვნება უნდა ჰქონდეს: პირიქით, მახვილგონიერი თუ მიხვდება, რომ ამგვარი გადაწყვეტა სწორედ თავისი სიმარტივის გამოა დაუჯერებელი...

მოსაზრება თავისთავად წინააღმდეგობრივი მეჩვენა და ვთხოვე, იქნებ მაგალითი დამისახელოთ-მეთქი.

— აი, ლორდ ჰედინგემს რომ ბოთლი ღვინო მიართვეს დაბადების დღეზე — ეს ამბავი რა, ჯერაც არ მიამბნია თქვენთვის?

— არასოდეს, — მივუგე მე, ღვინო ჩამოვისხი და ბოთლი ინსპექტორს დაუბრუნე; მან კიდე ჭიქა შეივსო, მერე კი წუთით ჩაფიქრდა. — ერთხელაც სალამოხანს დაგვირეკეს და გვაცნობეს, ბრუკ-სტრიტზე, ლორდ ჰედინგემის სახლში მოულოდნელად გარდაიცვალა მისი ბრწყინვალეების ლაქია — სავარაუდოდ, მოწამლესო. საქმე ინსპექტორ ტოტმენს მიანდეს, სწორედ მისი ხელქვეითი გახლდით მაშინ, პოლიციის ახალბედა სერჯანტი. ეს ტოტმენი ერთი ენერგიული, მაგრამ ხეპრე ვინმე კი იყო და დიდის თავმოწონებით ატარებდა მოკლედ შეკრეჭილ, წითურა ულვაშს. სიმართლე ითქვას, გამოძიებას სხვებზე ნაკლებ არ უძღვებოდა ხოლმე, თუმცა მეტი სმეტად ჯიქურ იცოდა მიდგომა და არათუ სხვის, საკუთარ შეცდომებზეც კი არ სწავლობდა რაიმეს. თანაც ყველაფერს მუდამ ერთი კუთხით აფასებდა: რას გამოჩნებოდა ამა თუ იმ საქმიდან ინსპექტორი ტოტმენი საკუთარი კარიერისათვის. რაღა დაგიმალოთ, გულზე სულაც არ მეხატებოდა ეს ჩემი უფროსი, მაგრამ მისი კეთილგანწყობის შენარჩუნებას ყოველთვის ვცდილობდი; არც გამჭირვებია — იმდენად დიდი წარმოდგენისა ბრძანდებოდა საკუთარ თავზე, ფიქრად არ გაივლებდა, თუ მოჯადოებული არ გახლდით მისი პიროვნებით. სამსახურშიც ბევრად იოლად წავიწვედი წინ, მაგრამ ეს მელაძუა ტოტმენი გვერდიდან არ მიცილებდა და ერთთავად იმის ცდაში იყო, ჩემი ჭკუა-გონება თავის სახეიროდ გამოეყენებინა. კარგი, გვეყოფა ამაზე, ან ახლა რა გასახსენებელია... იმას გიყვებოდით, ლაქია იატაკზე დაგვხვდა გართხმული, სამხარეულში. “ტოკაის” საცობამოცლილმა ბოთლმა და გატეხილ ჭიქაში ჩარჩენილმა სითხემ ყველა სხვა მიზეზის ძებნის საბაბიც კი მოგვისპო — კაცი მოეწამლათ. დავადგინეთ, რომ ღვინო სულ ორი-სამი საათის წინ მიეღოთ, ბოთლს თან მოყვა სერ უილიამ კელსოს სავიზიტო ბარათი, რომლის მეორე მხარეზეც დაახლოებით ასეთი შინაარსის მილოცვა დაეებჭდათ: “მიიღე ჩემი ლოცვა-კურთხევა, ტომი — და მასთან ერთად ეს მცირედი ძღვენიც”. ახლა ზუსტად კი აღარ მახსოვს, რაღაც ამდაგვარი. იმას მივაქციე ოღონდ ყურადღება, რომ მილოცვის ტექსტი, საყოველთაოდ მიღებული ჩვეულების საწინააღმდეგოდ, ხელით არ იყო წარწერილი. როგორც გამოირკვა, სწორედ იმ საღამოს უფალი ლორდი თურმე საკუთარი დაბადების დღის აღსანიშნად პატარა ვანშმის მოწყობას ეპირებოდა ახლობლების ვიწრო წრეში; სერ უილიამ კელსო, მისი ძირძველი მეგობარი და იმავდროულად, ჰედინგემთა

საგვარეულოსთან დამოყვრებული პირი (ლორდის მეუღლე სერ უილიამის ღვიძლი და გახლდათ) საფიქრებელია, თავადაც დაესწრებოდა ამ საზეიმო თავყრილობას. შუახნის კაცი იყო, უცოლშვილო; ამბობდნენ, მეტად სათნო ძმა და დიდად მოსიყვარულე ბიძა თავის დისწულთა მიმართო. მოკლედ, საათის ექვსზე ლაქიას მისი ბრწყინვალეებისათვის მიურთმევეა სერ უილიამ კელსოს გამოგზავნილი ბოთლი და ბარათი. ლორდ ჰედინგემს ბარათი აუღია და უთქვამს: “აი, გულისხმიერი მეგობარი! ძალიან კარგი, პერკინს — მაგ ღვინოსაც საღამოს გამოიტანთ სუფრაზე”. “ბატონი ბრძანდებითო” — უპასუხნია ლაქიას და ბოთლი გაუტანია, სავიზიტო ბარათი კი მაგიდაზე დარჩა. მერე რაც მოხდა, ამის დასადგენად განა რა ტვინის ჭყელებია იყო საჭირო: პერკინსი, ეტყობა, ჰედინგემთა მონოგრამიან გრაფინში აპირებდა სასმელის გადაღებას, ბოთლიც გაეხსნა, მაგრამ ცდუნებისთვის ვეღარ გაეძლო, ჭიქა ღვინო დააჭაშნიკა და... იქვე მიაბარა სული უფალს.

— იღბალი ჰქონია, მე და ჩემმა ღმერთმა! — წამოვიძახე, — ლორდ ჰედინგემსა და მის ჯალაბს ვგულისხმობ, რაღა თქმა უნდა...

— ნამდვილად, — დამეთანხმა მორტიმერი, თან ცარიელ ჭიქას აწვალებდა ხელში. — ლაბორატორიული ანალიზის შედეგად ღვინოში ციანიდის ისეთი დოზა აღმოჩნდა, სტუმარ-მასპინძელს ერთიანად მოუთავებდა ხელს. როგორც წესია, ინსპექტორმა დაკითხა დიდი თუ პატარა, სერ უილიამისა და ლორდ ჰედინგემის ჩათვლით; მე კი რიგით რობერტსთან ერთად (პერსპექტიული ყმაწვილია, უნდა გითხრათ, ერთი სიამოვნებაა მასთან მუშაობა), ახლო-მახლო მდებარე უკლებლივ ყველა აფთიაქი და ღვინის სავაჭრო დავიარე. კვირის თავზე თუ რამ შეგვეძლო შეჭვოდ განგვეცხადებინა, სულ ეს იყო: მკვლელს ხელთ ჰქონდა სერ უილიამ კელსოს სავიზიტო ბარათი — ხოლო არისტოკრატია, მოგეხსენებათ, მათ ასე ჰაიპარად არავის ურიგებს — და ისიც იცოდა, რომ ჯონ რიჩარდ მარვინ პლანტაგენეტ კარლოუს, მეთე თაობის მარკიზ ჰედინგემს, ახლობლები რატომღაც “ტომის” ეძახდნენ. ამ საბაბით ტოტმენმა დაასკვნა, მკვლელი უეჭველად კელსო-ჰედინგემთა ახლო ნათესავ-მეგობრების წრიდან იქნებაო. მე კი კრიჭაში ვედექი და საწინააღმდეგოს ვამტკიცებდი, კერძოდ: ა) სავიზიტო ბარათებს სწორედ რომ გარეშე პირთ ურიგებენ და არა ახლობლებს, გარდა ოფიციალური მიწვევებისა და მაშინაც ეს ქაღალდები ან სადმე ლარნაკში იდება, ან ლანგარზე ჰოლში, საიდანაც ნებისმიერს შეუძლია მათი აწაპნა-მეთქი; ბ) ის ამბავი, რომ ლორდ ჰედინგემს შინაურები სწორედ “ტომის” უხმობდნენ, ვისთვის რა საიდუმლო იქნებოდა — მაღალი წრის წარმომადგენელთა ცხოვრებისადმი მიძღვნილ ქრონიკებში ჟურნალ-გაზეთები ხელიდან არ უშვებენ ასეთ მინიშნებებს. მაგრამ ყველაზე დამაჯერებელ მტკიცებად მაინც ის მიმაჩნდა, რომ მკვლელი ბაიბურში არ იყო, თუ სერ უილიამ კელსო თავად აპირებდა ვახშამზე დასწრებას: ასეთ დროს წარმოუდგენელია ნაბოძები ბოთლი ღვინო არ ეხსენებინათ — სუფრაზე მაინც; ხოლო როცა ის უარზე დადგებოდა — არავითარი ღვინო მე არ გამომიგზავნიანო, მაშინ ხომ ყველა იეჭვებდა რაღაცას. სხვათა შორის, სერ უილიამიცა და ლორდ ჰედინგემიც ერთხმად გვიდასტურებდნენ, ერთურთის დაბადების დღეებს მუდამ ერთად აღვნიშნავთ ხოლმე და ეს ამბავი ყველა ჩვენს ახლობელს კარგად მოეხსენე-

ბაო. საბოლოოდ, მკვლელობის ასეთი ვერსია წარვადგინეთ: ვიღაცას საკმარისად სძულდა ლორდ ჰედინგემი, რომ წინასწარ კარგად მოფიქრებული და აწონილ-დაწონილი მკვლელობა ჩაედინა; ბოროტმოქმედმა იცოდა — სხვა ახლობლების მსგავსად, სერ უილიამიც ლორდს შინაურულად “ტომის” ეძახდა და იმის უფლებასაც მისცემდა საკუთარ თავს, ერთი ბოთლი იშვიათი ღვინო გაეგზავნა მისთვის დაბადების დღის აღსანიშნად. არ იცოდა მხოლოდ, რომ სერ უილიამი თავად ესტუმრებოდა ვახშმად მის ბრწყინვალეობას — ესე იგი, მკვლელი ლორდ ჰედინგემის სახლეურებში არ უნდა გვექცია; ამავე დროს, ისიც გასათვალისწინებელი იყო, რომ მას უნდა შესძლებოდა სერ უილიამის სავიზიტო ბარათი მოეგლო ხელში...

ერთი პიროვნება მართლაც სავსებით ესადაგებოდა ყველა ამ მონაცემს. დაიცა, რა ერქვა? მერიველი... მენტოუნი... თუმცა ახლა ამას რა მნიშვნელობა აქვს. ჰო, მერტონი ერქვა, მერტონი! ექვსი თვე პირისფარეშად ემუშავა ლორდთან, ხელმძღვანელობაზე მიეტანათ ეჭვი და ისე დაითხოვეს, დახასიათებაც არ მიუციათ. ბუნებრივია, სწორედ ის ამოვიღეთ მიზანში, ორი კვირა ვეძებდით მის გზა-კვალს და როცა მივაგენით, იმისთანა ალიბი აღმოაჩნდა, უკეთესი ნუ გინდა, ქვას გახეთქავდა... — პოლიციის უფროსმა ინსპექტორმა ისე ასწია ხელი, ძველ დროში ტრანსპორტს რომ აჩერებდნენ ხოლმე, — მეტყვით ალბათ, რაც მეტად საიმედოა ალიბი, მით უფრო საექვოაო, ოღონდ აქ ამგვარი რამ გამორიცხული იყო: მერტონი ბოლო ორი თვის მანძილზე ციხეში მჯდარა სამსჯავროს მოლოდინში და რა გგონიათ, რისთვის ასამართლებდნენ?! განზრახ მკვლელობა ედებოდა ბრალად — კაცი მოეწამლა...

— რა არ ხდება ქვეყანაზე! — პათეტიკურად წამოვიძახე და დროით ვისარგებლე, მოსაუბრისათვის ჭიქა შემევსო.

— დიას, ბატონო ჩემო, — გააგრძელა მან მცირე პაუზის მერე, — წარმოიდგინეთ ერთი, გვეგონა ხელში გვეყავდა და იმაზე არც დაფიქრებულვართ, საერთოდ თუ ჰქონდა ამ ბოროტმოქმედების ჩადენის შესაძლებლობა! ჯერ იყო და ვამტკიცეთ, მის მეტი ამ საზარელი საქმის ჩამდენი არავინაათქო და გამოირკვა, სწორედ მერტონი რომ ვერ იქნებოდა მკვლელი! ვერ იყო კარგი ამბავი — რაღა დაგიძალოთ, მიკვირს, უფროსობამ თავზე რომ არ გადაგვანია ის ჩვენი პატაკი... ტოტმენს ვეუბნები — მოდით, ორი-სამი დღე შევიცადოთ, თითოეულმა ჩვენ-ჩვენთვის ავწონ-დავწონოთ შექმნილი მდგომარეობა, თუკი რამ აზრიანი მოგვივა თავში, ერთად განვსაჯოთ და მერე თავიდან დავიწყოთ ძიება-მეთქი. როგორც სჩვეოდა ხოლმე, ეს თავისი ნალოლიავეები უღვაშები მოიწიწნა და გულმოწყალებად გაიღიმა: “რაო, ძლივს საქმე გამიხსნია და ახლა გინდა თავიდან დამაწყებინო ყველაფერი?!” საერთოდ, ასე იცოდა: თუკი ერთხელ რაიმე მოსაზრებას მომიწონებდა, მერე თავისად ასაღებდა და აღარც იმას დაგიდევდათ, მართალი აღმოვჩნდებოდი თუ გუმანი გამიცუდლებოდა — კაცი ფენს ველარ მოაცვლევინებდა ამოჩემებული გზიდან. “მერტონის ამბავი ჩემთვის გარკვეულია — მაგან ლორდ ჰედინგემის მკვლელობა რომ ჩაიფიქრა, ეტყობა ჯერ იმ ვიღაცასთან ჰქონდა ანგარიში გასასწორებელი, და საწამლავი მასზე გამოსცადა; რომ ეგონა, ხახ-

ვივით შემრჩაო, მოწამლულღვინიანი ბოთლი გააშხადა, მაგრამ ცოდვებმა უწია და ჩაავლეს. ბოთლი კი ცოლმა ან ვინმე სხვამ...”

“...ჰედინგემისას მიიტანა წარწერით: *საწამლაგია — მიირთვიე მობადლეს...*” — გავაწვევტინე მე, რადგან ამ ზღვარდაუდებელ თვითკმაყოფილებას უკვე მოთმინებიდან გამოვყავდი. “ერთს გეტყვით, მორტიმერ, — მშვიდად მითხრა ჩემმა უფროსმა, — ნუ ცდილობთ იმაზე ზისთავა გამოჩნდეთ, ვიდრე სინამდვილეში ხართ და თავსაც ნუ იგდებთ, თორემ სამსახურეობრივი უსიამოვნებები არ აგცდებათ”. რაღა დამრჩენოდა, მორჩილებისა და თავმდაბლობის განსახიერებად ვიქეცი, ბოდიშიც მოვუხადე და ისიც შევაპარე, ჩემთვის დიდი სკოლაა თქვენთან მუშაობა-მეთქი. იქვე მოუბრუნდა გული, მხარზე ხელი მომითათუნა და მეუბნება: “წადით სოფელში, სადაც მერტონი ცხოვრობდა და დამიდგინეთ, ვინ გადაუგზავნა ის ოხერი ბოთლი ჰედინგემებს; მერე ერთი კარგი, აზრიანი ანგარიში წარმომიდგინეთ პარასკევ დილას. მე მანამ ლეიზერპედს გავემგზავრები, ხუთშაბათს ჩემი დაბადების დღეა და გული მიგრძნობს, როგორღაც გამიმართლებს”.

ლეიზერპედი ის ადგილია, მერტონმა რომ კიდე ვილაცა მოწამლა; თავის დაბადების დღეს კი ინსპექტორი ტოტმენი უკვე მესამედ მისხენებდა... ისე ამეშალა ნერვები, ომნიბუსს დავაჯექი და ჰემპსტედში წავედი დასამშვიდებლად. იქაური ტბორეების პირზე დავსვირობდი და რაც დრო გადიოდა, ტოტმენის საზრისი სულ უფრო სულელური მეჩვენებოდა. ის კი არა და ვრწმუნდებოდი რომ ბოროტმოქმედმა, ასე ვთქვათ, მის მიერვე წინასწარ გაკვალულ ბილიკზე გვიბიძგა და ახლა გვაიძულებდა, ყოვლად მცდარი, სწორედ მისთვის სახიერო მიმართულებით გვევლო. მერე მერხზე ჩამოვჯექი პარკში, ჩიბუხი გავაწვეე და გულში ვფიქრობ: “კეთილი და პატიოსანი, ვთქვათ მკვლელს სურდა ის გვერწმუნა, რაც ჩვენ მართლაც ვირწმუნეთ — გამოდის, ისე მარტივად არ მიჰყავდა თამაში; ეს კი იმას ნიშნავს, რომ ჭეშმარიტი სწორედ ისაა, რაც თავიდანვეა საგულისხმო და არა ის, რისკენაც ბოროტმოქმედი მიგვანიშნებდა. ახლა, ფრედი ჩემო, თავიდან ჩამოყვები და, გივარგა-არგივარგა, მაინც ყველაფერს საკუთარი ჭკუით განსჯი”. მოგეცათ ლხენა — იმწამს ვიანზე, რომ სწორედაც პერკინსის მოკვლა სურდათ! ისღა მაკვირვებდა, მანამდე როგორ არ მოგვაფიქრდა ასეთი შესაძლებლობა: აბა რომელი ლაქია იტყოდა უარს და ამ გადასხმა-გადმოსხმაში ნაბოძებ ღვინოს არ მოწრუპავდა?! ასე ვთქვათ, მკვლელს შეეძლო იმედიანად ყოფილიყო — ამ ძღვენს პერკინსი ვერ გადაურჩებოდა... ოღონდ ზოგი რამ ჯერ კიდევ დასადგენი მქონდა: ერთიც ვნახოთ, პერკინსი გამონაკლისი ყოფილიყო — ასე ვთქვათ, სულაც არ გახლდათ ბატონისეული ღვინოების დაჭაშნიკების მოყვარული? თუნდ ყოფილიყო კიდევ, ხომ შეიძლება სწორედ იმ სადამოს რაღაც უქეფოდ ეგრძნო თავი და ის ავბედითი ჭიქა ღვინოც მერმისისთვის შემოენახა? ეგეცაა — ცოტა არ იყოს, ალაღბელზე შეგდებული საქმე გამოდიოდა: თუ მხოლოდ პერკინსის მოკვლას აპირებდნენ და ლორდ ჰედინგემის ოჯახს არას ერჩოდნენ, ვინ დადებდა თავს, რომ მაინცა და მაინც სწორედ ლაქია გახდებოდა პირველი მსხვერპლი?! და უცებ თითქოს თავში დამკრა — არაფერი საეჭვო და საორჭოფო აქ არ იქნებოდა, თუკი: ა) მკვლელს დანამდვილებით ეცოდინებოდა, რა ზნეც სჭირდა ცხონებულს; ბ)

თუ ჩანაფიქრი გაუცუდდებოდა და გაუხსნელ ბოთლს შემოიტანდნენ სუფრაზე, უცილობლად თვითონაც შეესწრებოდა ამ ამბავს და თანამეინახეებს საკუთარ თავზე ეჭვის მიუტანლად ააცილებდა საფრთხეს; სხვაგვარად რომ ვთქვათ, იგი ან თავად ოჯახის წევრი, ანდა მის ბრწყინვალეობასთან მეტად დაახლოებული პირი უნდა ყოფილიყო. სწორედ ასეთი ვინმე გახლდათ სერ უილიამ კელსო. ქვეყანაზე მას ერთადერთს შეეძლო ამდგარიყო და ეთქვა: “არ გაეკაროთ ამ ბოთლს — არავითარი ღვინო მე არ გამომიგზავნია! ეს ან უგერგილო ხუმრობაა, ან იქნებ რაიმე უარესიც...” კაცმა რომ თქვას, რატომ თავიდანვე არ ავიღეთ მასზე ეჭვი? საქმეც ისაა, ცხადზე-ცხადი გეგეჩვენებოდა, თითქოს მიზანში ლორდ ჰედინგემი, ან სულაც მთელი მისი ოჯახი ჰყავდათ ამოღებული; ამ შემთხვევაში სერ უილიამი ლამის ოჯახის წევრად შეიძლებოდა ჩაგვეთვალა და მისი რეპუტაცია კეისრის მეუღლეზე მეტად ეჭვმიუტანელი ჩანდა. მაგრამ მთავარი მიზეზი ალბათ მაინც ის იყო, შეუძლებლად მიგვანდა მკვლელს მოწამლული ძღვენისთვის საკუთარი სავიზიტო ბარათიც ზედ დაერთო. როგორღაც მხედველობიდან გამოგვრჩა, რომ საზრიანი კაცის მხრივ სწორედ ყველაზე უფრო დაუჯერებელი ნაბიჯის გადადგმა მოსალოდნელი ყოველგვარი წინასწარმოფიქრებული ბოროტების ჩასადენად. ახლა ერთიღა დამრჩენოდა — მკვლელობის მოტივის დადგენა. თავს სიამოვნებას როგორ მოვაკლებდი და ლორდ ჰედინგემის სანდომიან მნეს სწორედ ნაშუადღევის ჩაისსმის დროს მივადექი. დამავიწყდა მეთქვა, მე და იმ ქალბატონმა ჯერ კიდევ მაშინ დავადგით ერთმანეთს თვალი, როცა ინსპექტორ ტოტმენთან ერთად პირველად გამოვცხადდი მისი ბრწყინვალეობის სახლში — ცოლვა გამხელილი ჯობია და ახალგაზრდობაში გვარიანი მექალთანე გახლდით... მოკლედ, იმ კეთილ ქალბატონს რომ დავცილდი, ორი რამ ვიცოდი დანამდვილებით: პერკინსის მიმართ მაინცა და მაინც არც ზედა სართულზე, სახლის პატრონები ყოფილან კეთილად განწყობილნი, და არც ქვევით, მსახურები იკლავდნენ მისთვის თავს. “ნეტა საერთოდ როგორ იტანდნენ მაგ მაიმახს! ლედი ჰედინგემი კი, ღმერთმა კეთილად გვიმყოფოს, მთლად გამოიცვალა ამ ბოლო დროს...” მაინც როგორ-მეთქი, ჩავეკითხე. “გამოხალისდა. აი, როგორც ქალიშვილობაში მახსოვს, იმას დაემსგავსა — გესმით ალბათ, რისი თქმაც მსურს, მორტიმერ!..”

მესმოდა, როგორ არ მესმოდა — ეს ამბავი სწორედ რომ ჩემს წისქვილზე ასხამდა წყალს. გუმანმა გამიმართლა, სწორ გზას დავდგომივარ: შანტაჟი. მერე და რა? განა რა სარგებელი მქონდა ამ ჩემი “ღრმად ფსიქოლოგიური” დასკვნებიდან? არავითარი. არც ერთი საბუთიანი მტკიცება. აი, სერ უილიამ კელსოს ერთი პირდაპირი სამხილი მაინც რომ დაეტოვებინა ჩემთვის, მაშინ კი ირწმუნებდნენ ნაფიცი მსაჯულები, თორემ ასე მკვლელობის მთელი ეს ვერსია ქვიშაზე ნაგებს გავდა. თუმცა... ერთი სამხილი მაინც მქონდა: სავიზიტო ბარათი; ოღონდ ბედის დაცინვაც ეგ იყო — სწორედ ჩემი ეს ერთადერთი სამხილი იმავე დროს სერ უილიამის სრულ უდანაშაულობაზეც მიანიშნებდა. რაც მე ინსპექტორ ტოტმენს ვიცნობდი, ყველაფერ ამიდან ქვას-ქვაზე არ დამიტოვებდა. გვარიანად ცხვირჩამოშვებული, ახლა რიჯენტ-პარკისკენ მიმავალ ავტობუსს დავაჯექი — იქნებ იქ მომხვლოდა თავში რაიმე სასიკეთო. ჰანოვერ-ტერასს რომ გავუყევი, ვხედავ — საპირისპირო მხრიდან ეს ჩვენი რობერტსი მოსეირნობს სტვენა-სტვენით.

შენ აქ საიდან-მეთქი, ვეკითხები. “მოგესალმებით, ჩემო სერჟანტო!” — აშკარად წრეგადასული სერიოზულობით მეპასუხება, თავი კი ისე უჭირავს, ბრალს ვერაფერში დასდებ — უფროს-უმცროსობის არაფერი ეშლება. — “ეს წუთია ჩემს ბავშვობის მეგობარს — პირადად სერ უილიამ კელსოს კამერდინერს ვესაუბრე. ინსპექტორის ღრმა რწმენით, მას მერტონი უნდა სცნობოდა. ასე ვთქვათ, ჩვენში, კამერდინერებში...” ინსპექტორი ტოტმენი თუ ჩამოვიდა-მეთქი, — გავაწყვეტინე ცივად. რობერტსი წამსვე სმენაზე დადგა და მიცხადებს: “არავითარ შემთხვევაში, სერ! ინსპექტორ ტოტმენის გარდამოსვლა ლეიზერპედიდან, სარის საგრაფო, მოსალოდნელია არა უადრეს დღესინდელი დღის მიმწუხრისა!”

“ესეც შენი ახალგაზრდა კადრი, — გავიფიქრე. — არავითარი რიდი და პატივისცემა; ეტყვი რამეს ამისთანას და ზურგსუკან სხვასთან გაგამასხრებს...” არადა კარგი ბიჭი იყო, გონებაც უჭრიდა, ყველაფერს ამჩნევდა და თვალმოკრულსაც კი იმასსოვრებდა...

“არ ვიცოდი, სერ უილიამ კელსო სადმე ახლო-მახლოში თუ ცხოვრობდა” — ვეუბნები. რობერტსმა გზის იქითა მხარეს, გამორჩეული აგებულების შენობაზე მიმითითა: “იმ სახლს ხედავთ? სულ რაღაც ნახევარი საათის წინ იქ სამზარეულოში შეგეძლოთ გენახეთ, ასე ვთქვათ, მოახლეს ვეკურკურებოდი... მისი ჭკუით, მერტონი ქალაქია სარის საგრაფოში! ისე, რაც ვერჩი, მართალს კი ამბობს და...”

უცებ ერთი ისეთი გეგმა დავაწყვე, ჭკუათმყოფელი კაცი ახლოსაც არ გაიკარებდა. “მაშ ასე, ახლა იქ ერთად მივალთ, — ვეუბნები რობერტსს, — სიტყვა მაქვს სახლის პატრონთან სათქმელი... თან იქნებ შენი სტუმრობაც როგორმე კიდევ აიტანონ სამზარეულოში, თუ უკვე მეტისმეტად არ მოაბეზრე ყველას თავი”. “რას ბრძანებთ, ჩემით უდგათ სული! რომ ვემშვიდობებოდი, ლამის იყო, ერთხმად შემომტირეს — ნუ დაგვივიწყებთ, მოგვხედეთ ხოლმეო...”

ჩვენთან, სკოტლენდ-იარდში იტყვიან: ერთხელ მკვლეელი სამუდამოდ მკვლელად რჩება და იქნებ ამიტომაც გადაწყვიტე, ახალგაზრდა რობერტსი ხმის მიწვდენაზე მყოლოდა — ჩაის სასმელად ხომ არ მივდიოდი სერ უილიამ კელსოს სახლში, პირში უნდა მიმეხალა კაცისთვის, წინასწარგანზრახულ მკვლევლობაში გდებთ ბრალს-მეთქი. თან ეგეცაა, ჩემზე სწორედ იმ კაცის შთაბეჭდილებას ტოვებდა, ვისთვისაც ადამისშვილის მოკვლა უფრო ადვილი მოსანელებელია, ვინემ ტყუილის თქმა. ჭიშკარს რომ მივადექი, საფულეში დავიწყე ქექვა, სავიზიტო ბარათს ვჩხრეკდი. ბედზე, ერთი ცალი შემომრჩენოდა. ცოტა შელახული კი იყო, მელნის ორი ლაქა აჩნდა ზედ, მაგრამ ახლა მაგას ვინ დაგიდევდათ. ოღონდ რობერტსმა, რომლის თვალსაც არაფერი გამოეპარებოდა, ვითომდა დიდად შეწუხებულმა გადააქნია თავი, აქაოდა არ გეკადრებათო. მოახლე გოგომ, თითქოს გველოდაო, ზარის ჩამოკვრის-თანავე გაგვიღო კარი. ბარათი ხელში მივაჩენე და ვუთხარი, სერ უილიამს სთხოვეთ, მიმიღოს-მეთქი. ამ გამოჯეკილმა რობერტსმა კი თვალი უყო და სამზარეულოში ჩამავალ კიბეზე ანიშნა. მოახლემ ჯერ იმას ჩაუღმიძლია, მერე

კიდე, უკარება სახით, მისაღებში შემოძღვა. რობერტსი ამ დროს უკვე კიბის თავზე იდგა. ჩემთვისაც ასე ჯობდა, უფრო გულმშვიდად ვიქნებოდი. სერ უილიამ კელსო დაახლოებით ჩემნაირი აგებულებისა იყო, ცოტა უფრო ჩაფსკვნილი, ერთხანს თითებში ატრიალა ჩემი ბარათი და ბოლოს მკითხა: “მაშ, რით შემოძლია გემსახუროთ? დაბრძანდით, დაბრძანდით.” — ზრდილად, კეთილგანწყობითაც კი ძელაპარაკებოდა, არავითარი ქედმაღლობა.

“ვეგონებ, ჯობია მაინც ფეხზე ვიდგე, სერ უილიამ, — ვეუბნები, — ნებას თუ დამრთავთ, ერთი შეკითხვა მაქვს...”

“ბრძანეთ, ბრძანეთ”, — მეუბნება, თუმცა დიდი დაინტერესება არ გამოუჩენია.

“როდის გაიგეთ, პერკინსი რომ ლედი ჰედინგემს ფულს ძალავდა?”

შეერთა, სავიზიტო ბარათიც თითქოს თითებში ჩაეყინა, მაგრამ ხმა არ გაუღია და ნაკვთიც არ გატოკებია სახეზე. უხერხული სიჩუმე ჩამოვარდა. “ესაა სულ?” — მეკითხება ცოტა ხნის მერე. გასაკვირი მისი ხმა იყო — ისეთივე მშვიდი, დაბალი.

“და ერთიც კიდეც... საბეჭდი მანქანა თუ გაქვთ სახლში?”

ამოიოხრა, ბარათი ნახმარი ქაღალდების კალათში მოისროლა და, ჯიბეებში ხელებჩაწყობილი, ჩემსკენ ზურგშექცევით ფანჯარასთან აისვეტა. ერთხანს იდგა ასე, ჩაფიქრებული, მერე უცებ მოტრიალდა და ჩემდა გასაოცრად, მეტად გულთბილი ღიმილით სავარძელზე მანიშნა: “მაინც მგონია, დავსხდეთ — ასე აჯობებს”. დავუჯერე. “როგორ არა, მაქვს საბეჭდი მანქანა და ხანდახან ვბეჭდავ კიდეც ზედ. დარწმუნებული ვარ, სკოტლენდ-იარღში არც თქვენ წერთ ყველაფერს ხელით” .

“კი, ასეა.” — ვეთანხმები.

“ასევე იქცევა ათასი სხვა და იქნებ ის მკვლელებიც, თქვენ რომ დაექებთ”.

“ათასი სხვა, და მათ შორის მკვლელებიც.” — ისევ ვეთანხმები. წამსვე დაიჭირა განსხვავება და ისევ გაიღიმა. მე არც *იქნებ* მითქვამს და არც *ძებნა* მისხენებია: დარწმუნებული გახლდით, მკვლელები უკვე ნაპოვნი მყავდა. “საქმეც ისაა, — ვეუბნები, — მისალოცი ტექსტი მანქანაზე იყო დაბეჭდილი”.

“მერე, ამას რაიმე განსაკუთრებული მნიშვნელობა აქვს?”

“დიდი არაფერი, თუ არ ჩავთვლით რომ ეზოპესული ენით გახლდათ შედგენილი”.

“ჩემო კარგო, ეზოპე აქ რაღა შუაშია? როგორც მახსოვს, სრულიად ჩვეულებრივი, ტრაფარეტული მილოცვა იყო, ყველა ასე დაწერდა”.

“ყველა თქვენი წრის წარმომადგენელი, სერ უილიამ, ვინც კი ორივეს გიცნობდათ — სხვა ვერავინ... აი, ხვალ ინსპექტორ ტოტმენის დაბადების დღეა (ემშაკსაც წაუღია მისი თავი, — გავივლე გუნებაში, — ტვინი წაიღო ამ ღირსშესანიშნავი მოვლენის შესვენებით) და მე რომ ბოთლი ვისკი გავუგზავნო საჩუქრად, რობერტსი — ეს ჩვენი კონსტებლია, ქვევით მელოდება (ხომ მოხერხებულად შევაპარე, მარტო არა ვარ-მეთქი!) — ეს ჩვენი კონსტებლი რობერტსი სულ იოლად გამოიცნობს მილოცვის ტექტს და ასევე ყველა ჩვენიანი იარღში. აი, თქვენ კი, სერ უილიამ, ვერასვხით ვერ გამოიცნობდით!”

ერთხანს მომჩერებოდა, მერე სადღაც ჩემს მიღმა გაექცა შხერა. ერთი გამაგებინა, რა უღვეს გუნებაში-მეთქი, გავიფიქრე და უეცრად მესმის: “თქვენ ალბათ, ასე დაწერდით — *დღევრძელობასა და ყოველგვარ სიკეთეს გისურვებთ, მარად თქვენი ერთგული...*”

არა, მართლა გასაკვირი იყო, ღმერთმანი — თითქოსდა სხვა რამ საზრუნავი არაფერი ჰქონდა — თურმე მართლა ცდილა გამოეცნო, რა შეიძლებოდა მიმეწერა ჩემი შეფისთვის. არადა, შიგ კაკალ გულში არ მოარტყა?! ეს “მარად თქვენი ერთგული” იმას ნიშნავდა, რომ პირველსავე შეხვედრაზე აულო აღლო ინსპექტორ ტოტმენისა და მისი უნიათო ხელქვეითის ურთიერთობას... ეტყობა, სახეზე მეწერა გაოცება და სერ უილიამ კელსომ ჯერ ღიმილი ვერ შეიკავა, მერე აქეთ გადმოვიდა შეტევაზე: “ხედავთ, არც ისე ძნელი ყოფილა! და ის ამბავი, ვიღაცამ ჩემი სავიზიტო ბარათით რომ ისარგებლა, სწორედ ჩემს უდანაშაულობაზე მეტყველებს, ასე არაა?”

“ნაფიც მსაჯულებისათვის შეიძლება ასეც იყოს, — ვეუბნები, — მაგრამ არა ჩემთვის.”

“რას იხამ, იქნებ სხვა ღროს დაგარწმუნოთ როგორმე... ახლა რას აპირებთ?”

“რა უნდა ვქნა რა — ხვალ ინსპექტორ ტოტმენს წარვუდგენ ამ ჩემს ვერსიას...”

“სწორედ რომ მოულოდნელი საჩუქარი იქნება დაბადების დღისთვის! როგორ ფიქრობთ, გაუხარდება?”

აი, ამაზე კი არაფერი მქონდა პასუხად...

“ისიც საკითხავია, დაგიჯერებთ ვინმე?”

“ე-ე... იცით, სერ უილიამ, აქ ერთი — როგორ გითხრათ — პატარა გარემოებაა გასათვალისწინებელი”.

“მინც?..”

“მოწმედ რომ დაგასახელოთ, ფიცის დადება მოგიწევთ სასამართლოში. არც გამიკვირდება, თუ ასეთ დროს ტყუილის თქმასა და ცრუ ჩვენების მიცემას თქვენისთანა კაცი მკვლელობის აღიარებას არჩევს”.

ხმა არ გაუღია.

“საცა სამართალია, ზოგ-ზოგი ცოტა დროზე ადრე რომ გამოეთხოვოს ხოლმე წუთისოფელს, არც ვინაღვლებდი, მაგრამ ეს ისე, ჩვენში ვთქვათ, სერ უილიამ... რა ვქნა, მე ერთი უბირი პოლიციელი ვარ და ჩემს პირად სიმპათია-ანტიპათიებს სათვალავში არავინ ჩააგლებს”.

თავი დამიქნია, ისევ ფანჯრისაკენ შებრუნდა და — “*ნერვული სისტემის სრული გამოფიტვა* — ასეთ დასკვნას გააკეთებენო” — წაიბურტყუნა.

როგორ ვთქვა და, მართლაც არ იყო გასაწირი კაცი — გული დამწყდა, მისი სიკვდილი რომ გავიგე: მეორე დილასვე შუბლში უზღია ტყვია... ფრედ მორტიმერი გაჩუმდა და გამომცდელად შემომჩერდა. ვერაფერი დასასრულია-მეთქი, ვეუბნები. — “რის დასასრული, მთელი ამბავი ახლა იწყება: პარასკევ დილით, ჯერ კიდევ სანამ სერ უილიამის სიკვდილის ამბავს შევიტყობდით, ინსპექტორ ტოტმენის კაბინეტში გამოვცხადდი მოხსენებით, ვერ ვნახე და კაციშვილმა არ იცოდა, სად იყო. რა მექნა, კონსტებლი სტაბსი გავიყოლიე და სახლში წავედით მასთან. ახლა კი მაგრად დადევით, ემანდ სკამიდან არ გადმოვარდეთ... სახლის პატრონმა, რაკი კაკუნზე არავინ გამოეხმაურა, თავისი გასაღებით გააღო ტოტმენის ბინის კარი და ის საცოდავი სამზარეულოში ვნახეთ იატაკზე გაშლართული — წინა დღის მკვდარი იყო, მაგიდაზე კი ვისკის ერთი ნაკლული ბოთლი იდგა და ზედ საეიზიტო ბარათი ქონდა შებმული. არა, მინც ვისი იქნებოდა, როგორ ფიქრობთ? ჩემი, რაღა თქმა უნდა! ზედ კიდევ ეს ეწერა: “*დღეგრძელობასა და ყოველგვარ სიკეთეს გისურვებთ, მარად თქვენი ერთგული...*” და ასე შემდეგ, ხელმოწერითურთ. ბედი ჩემი, სერ უილიამ კელსოსთან ვიზიტის დროს ის ახალგაზრდა რობერტსიც რომ თან მახლდა; ბედი ჩემი, იმ ბიჭის თვალს რომ არაფერი გამოეპარება ხოლმე და დამიდასტურა კიდევ, სწორედ ეს დათხაპნილი საეიზიტო ბარათი გაატანა მოახლეს სერჟანტმა მორტიმერმა სერ უილიამისათვის გადასაცემადო; და კიდევ ბედი, რომ საერთოდ ირწმუნეს სერ უილიამ კელსოსთან მისვლის მიზეზთა თაობაზე ჩემი მონათხრობი!

რა თქმა უნდა, უფროსობამ სამსახურეობრივი უფლებების გადაჭარბება დამდო ბრალად, ამის გამო ოფიციალურად მიმითითეს კიდევ, ოღონდ სინამდვილეში ძალიანაც კმაყოფილნი იყვნენ და როგორც გადმომცეს, კერძო საუბარში არც არავინ მალავდა ამას. მართალია, სასამართლოზე არაფრის დამტკიცება არ შეგვეძლო და სერ უილიამ კელსოს თვითმკვლელობაც ნევრასთენიას დააბრალეს, მაგრამ რა მერე — ერთი თვეც არ იყო გასული, ინსპექტორის ასე უდროოდ განთავისუფლებულ თანამდებობაზე თქვენი მონა-

მორჩილი რომ დაამტკიცეს. მორტიმერმა ღვინო ჩამოისხა და ჭიქის ჩაცლაც მოასწრო, ვიდრე მე ამ უცნაურ ამბავს გადავხარშავდი.

— თუ კარგად დავუფიქრებთ, — წამოვიწყე ბოლოს და ჩემი სიტყვებისათვის მეტი დამაჯერებლობის შესაძენად, დინჯად შევუდექი სათვალის შუშების წმენდას, — ზოგადად ის დასკვნა შეიძლება გამოვიტანოთ, რომ სამსალაგარეული ვისკის გაგზავნა იმდენად ინსპექტორ ტოტმენის თავიდან მოსაცილებლად კი არ იყო გამიზნული, რამდენადაც სწორედ თქვენი პიროვნების დისკრედიტაციას ისახავდა მიზნად; აქედან გამომდინარე, მერე ვეღარც პერკინსის მკვლელობის თქვენეულ ვერსიას შეასმენდით ვისმე.

— სავსებით გეთანხმებით.

— მაგრამ მიხვდა, რომ მისი რაფინირებული ფსიქიკა ვეღარ ზიდავდა ასეთ ტვირთს და...

— კი, რაღაც მაგდაგვარი სავსებით შეიძლებოდა მომხდარიყო, ოღონდ ახლა მარჩიელობაა ეგ ყველაფერი...

უცბად, ერთმა აზრმა თითქოს ელვასავით გამიარა გონებაში, წამოვიწიე და გაოგნებული მივაჩერდი ჩემს თანამეინახეს:

— გახსოვთ, რა გითხრათ სერ უილიამმა?! ჩემი სავიზიტო ბარათით რომ ისარგებლეს, ყველაზე უკეთ სწორედ ეგ ფაქტი მეტყველებს ჩემს უბრალოებაზე. თქვენ ამაზე გიპასუხნიათ — სხვებმა იქნებ ირწმუნონ კიდევ, მაგრამ არა მეო. მერე მან სიტყვა ბანზე აგიგდოთ, ოღონდ აკი წამოცდა — როგორმე დაგარწმუნებთ, იქნებ სხვა დროსო... აი, როგორ და რანაირად! საკუთარი უდანაშაულობის დამამტკიცებელი ერთადერთი საბუთიც სწორედ ის გქონდათ, რომ თქვენი სავიზიტო ბარათი იყო ბოთლის ყელზე შებმული!

— არა, აქ ცოტა სხვა ამბავია. ჩემი უდანაშაულობა იმან გახადა სარწმუნო, რომ კონსტებლ რობერტსის ჩვენებით, სერ უილიამს სწორედ ის, მეღნით ორ ადგილას დათხუპნილი ბარათი გადავეცი, რომელიც მერე ინსპექტორ ტოტმენის ბინაზე აღმოჩნდა. გარდა ამისა, პერკინსის მკვლელობის ჩემი ვერსიაც ბევრისთვის სავსებით დამაჯერებელი ჩანდა — ერთხელ მომწამლავი ვითომ სხვა დროს რატომ დაიხვედა უკან!

— ეგეც მართალია... ისე, თავად მოთხრობას რა უშავს, ოღონდ რაც თავში განაცხადეთ, იმის საილუსტრაციოდ ნაკლებად გამოდგება.

— ვითომ რატომაო?

— პერკინსის მკვლელობის შემთხვევაში უმარტივესმა ვერსიამ გაამართლა, გეთანხმებით, მაგრამ ტოტმენის სიკვდილთან დაკავშირებით კი — რა მოგახსენოთ.

— თქვენი გამკვირვებია! ეგ როგორ?

— ჩემო კარგო, — დაჯერებული ტონით დავიწყე და რაკი მომეჩვენა, ღვინომ ჩემს მეგობარს აღქმის უნარი ცოტა მოუჩლუნგა-მეთქი, საკუთარი საზრისის ხაზგასასმელად საჩვენებელი თითიც კი მოვიშველიე, — ინ-სპექტორ ტოტმენის მკვლელობის უმარტივესი ახსნა — გთხოვთ კარგად დაუკვირდეთ — ის იქნებოდა, რომ თითქოსდა სწორედ თქვენ გაუგზავნეთ მოწამლული სასმელი!

მორტიმერმა მხრები აიჩიჩა:

— მერე, განა მეც ეგრე არ მოვიქეცი?

ენა ჩამივარდა, საკუთარ ყურებს არ ვუჯერებდი. სამძებრო პოლიციის უფროსი ინსპექტორი მორტიმერი კი მშვიდად განაგრძობდა თავისას:

— ტოტმენი ისედაც ყელზე მადგა, ბოლო დროს კი მთლად შემაძულა თავი, გასაქანს ხომ არა და არ მაძლევდა; მაგრამ ასეთი რამ მანამდე ფიქრადაც არ გამივლია, ვიდრე ის დალაქავეებული სავიზიტო ბარათი ისევ ჩემს ხელში არ აღმოჩნდა: სერ უილიამმა კალათში რომ მოისროლა და ფანჯრისაკენ შებრუნდა, მაშინ გავიფიქრე — ეს ბოლო ცალი მქონდა და თუ ამ ვაჟბატონს არაფერში გამოადგება, ეს იმას არ ნიშნავს, მეც აღარ დამჭირდება-მეთქი. დავიხარე, ვითომდა ფეხსაცმლის თასმის შესაკრავად, თან კალათას ჩამოვეფარე — აბა, ვერაფერ მოსაწონ საქმეს რომ ჩავდიოდი, თვითონაც კარგად მესმოდა, — ბარათი ამოვქექე და ის იყო, ჯიბეში უნდა მეკრა, თვალი ვკიდე მელნის ლაქებს და ისიც გამახსენდა, როგორ გამკენწლა რობერტსმა ჩემი ფეთხუმობის გამო. იმ წამს ვიაზრე, ამ შანსის ხელიდან გაშვება არ იქნებოდა...

ერთხანს ისევ ცარიელ ჭიქას აწვალვდა ხელში.

— მთავარი ისაა, სერ უილიამისა არ იყოს, დიდად არც მე მეხერხება ტყუილი. აქ კი მისხალის თქმაც არ დამჭირებია — მივივის მარცვლებივით აეწყო ყველაფერი: არც დამიმაღლავს, საიდან გაიგო სერ უილიამმა ტოტმენის დაბადების დღის ამბავი, ან ზედმიწევნით როგორ გამოიცნო მისალოცი ტექსტი... გეფიცებით, ამ კაცის მიმართ ამკარად კეთილად ვიყავი განწყობილი და სხვა შემთხვევაში ასე ვერც გავწირავდი, მაგრამ აკი თვითონ მიმახვედრა, მოსამართლეებამდე ექიმებს მოუწვევთ ჩემი განსჯაო — სწორედ ამ ერთმა ფრაზამ გადამაწყვეტინა ყველაფერი: საღამოხანს, ლეიზერპედიდან დაბრუნებულ ინსპექტორ ტოტმენს საფოსტო ყუთში შეფუთული ბოთლი და ბარათი დახვდა...


მორტიმერი წამოდგა და ერთი გემრიელად გაიზმორა.

— გათავდა ამბავი, ანკი რამ გამახსენა ამდენი წლის მერე!. მასპინძლობისთვის მაღლობა მომიხსენებია, შემდეგ პარასკევს ერთად ვისადილოთ — მე გპატიჟებთ. ბოთლი ბურგუნდიული მაქვს გადანახული თქვენთვის.

ჭიქა ჩაცალა, შეტრიალდა, მძიმე ნაბიჯით გავიდა დარბაზიდან და, გაოგნებული, საკუთარ ეჭვებს შემატოვა.

“...ერთხელ მომწამლავი ვითომ სხვა დროს რატომ დაიხვეს უკან!”

არა, პარასკევს მაინც რა გინდა რო ქნა?!



3 0 2 6 2 0



31 ივნისი

საახალწლო ფერია 10 სურათად და 5 მოქმედებად

(ვინდა, პირუკუ)

მოქ. I სურ. I: *“შავმა რაინდმა წარიტყვევებნა გული ჩემი...”*

31 ივნისია, მთვარის დღე, და პირადორის ქვეყანაში სწორედ ისეთი ზღაპრული ამინდი დგას, ძველ კარგ დროს რომ შეეფერება. კამელოტის მეუფე ართურის წილხვდომილი ეს პაწია ვასალური სახელმწიფო ნელი-ნელ, მთქნარებ-მთქნარებით იღვიძებს ოქროსფერი დილის ბინდ-ბუნდში. იმხანად პროგრესის ცნება უცხო რამ გაგება გახლდათ და გარეშემო ყველა მშვიდად და წყნარად ეზიდება ცხოვრების ჭაპანს: თავ-ქალაქ *ჰენდრაგორში* ფართხა-ფურთხით არავინ ღებავს ახალ შენობებს და არ ანგრევს ძველს, კონკურენტუნარიან გარემოში სხვის ცოცხლად შეჭმას არავინ ცდილობს, ტრანსპორტთან დაკავშირებით ამტყდარი ყალილას გამო არავის უჩნდება კუჭის წყლული და არც ბუნრის საკვამურს უქოლავს ვინმე ვინმეს — აქაოდა, კვადრატულ მეტრ ბოლზე დავალიანების გამოისობითო; რაკილა არც ეკონომიკის საფუძვლებზე აქვთ წარმოდგენა, ექსპორტ-იმპორტს შორის არსებული შეუსაბამობის საკითხითაც თავს არავინ იტკიებს. ისიც ითქვას, დაგეგმარების თაობაზე აქ საერთოდ არაფერი სმენიათ — თუკი, რაღა თქმა უნდა, სამეფო სუფრისთვის ყოველდღიური მენიუს შედგენას არ მივიჩნევთ ასეთად.

მეფე-ხელმწიფე *მელიოტის* კუთვნილი ციხე-კოშკის დასავლეთი მხარე მის ერთადერთ ასულსა და შესაბამისად, ერთადერთსავე მემკვიდრეს — *მელისენტას* უკავია, საკუთარი ორი სეფე-ქალითა და რამდენიმე მოახლით. მთავარ სამყოფელში, ე.წ. *ხალიჩებიან დარბაზში* ახლა ერთი ვინმე კარის მუსიკოსი ზის, სახელად *ლემისონი*, და რაღაც გიტარისდაგვარ ინსტრუმენტზე აჟღერიალებს სიმებს. ეს ერთი იმ ჭმუნვაშეპყრობილ, გაფუყულ და მარად უკმაყოფილო ახალგაზრდა კაცთაგანია, მხოლოდ საკუთარ თავს რომ სცემენ პატივს, და ისიც სრულიად უმიზეზოდ — სიმართლე ითქვას და, დაკვრაც კი არ იცის ხეირიანად...

შემოდან მელისენტას სეფექალები — ლედი ნინეტი და კეთილშობილი ელისონი. პირველს ასხლეტილი ტანი, მწვანე თვალები, ჟღალი თმები და წიწმატი ხასიათი აქვს, მეორეს — პუნტულა ლოყები, თაფლისფერი თვალები და ქერისფერი თმა; ხასიათი — შესაბამისი. აღრიანი დილის მიუხედავად, ორივეს უკვე მოწყენილობა სტანჯავს, ამიტომაც ნინეტი გაღიზიანებული გამოიყურება, ელისონი — დაღვრემილი.

ნინეტი: *(დაუყოვნებლივ ეძგერება ლემისონს):*

კარგით რა, ლემისონ-ბატონო! აღარ მოგებზრდათ ამ ძველმანების პარტყუნი?! ახალი არაფერი იცით?..

ელისონი: *(უფრო რბილად, მაგრამ მაინც საველეურით):*

ჯერ კიდევ იმ კვირას არ დაგვკვირდით, რაიმე ახალს გაგარჩევო — აი, რა ქვია იმას — **‘შავმა რაინდმა წარიტყვევნა გული ჩემი...’**

ლემისონი რაღაცას ჩაიბურტყუნებს თავისთვის და ინსტრუმენტის წვალვას შეეშვება, ოღონდ ადგილიდან ფეხს არ იცვლის — მეფის ასულის გამოჩენას ელოდება. გოგოები აინუნშიც აღარ აგდებენ, დგანან თავისთვის და ერთმანეთს ეჩურჩულებიან.

ნინეტი: მელისენტა თუ იმ თავის ჯადოსნურ სარკეს გამოიტანს, ვეტყვი მეც ჩამახედოს შიგ!

ელისონი: კარგი ერთი! რა, მართლა გაუბედავ?!.

ნინეტი: რატომ არა ვითომ? მაგისია თუ რა — ისევ იმ ჯადოსანს არ უნდა დაუბრუნოს? მერე, თუ მაგან მართლა მოკრა შიგ ვიღაცას თვალი, იქნება და მეც...

ელისონი: ე-ეჰ, მაგის ბედი ჩვენ ვინ მოგვცა — ისევ ალბათ ხელსაქმეზე დაგვსვამენ და ისევ შაკიკი დამეწყება... ღმერთო, ამ ჩვენს პირადორში რატო არასოდეს არაფერი ხდება? აი, დეიდაშვილი მყავს კამელოტში და სულ იმას იწერება, *არაჩვეულებრივ* დროს ვატარებთო: ეს ჯადოქრებიო, ეს მუშაითებიო, იქით ორი დეკაკაცი სულ ახლოში, ტყის იქით და ერთიცი ვეებერთელა გველეშაპი მდინარის გაღმაო, მთელი ოთხი მოჯადოებული კოშკი და მრგვალი მაგიდის რაინდები ყოველ ფეხის ნაბიჯზეო — სულ იმის ცლაში არიან, ვინმე კეთილშობილი ასული რაიმესაგან გადაარჩინონო... ყოველ საღამოს კიდე წვეულებები, სტუმრიანობა და რა ვიცი! *(ოხრავს)*.

ნინეტი: *(ერთი ბრაზიანად ჩაიფხუკუნებს):* არა, ჩემო კარგო! ასე არაფერი გამოვა! თავად უნდა მივადწიოთ ყველაფერს — მოსახდენი უნდა მოხდეს!

ელისონი: ჩემი სათნო ხასიათისა და სპეტაკი ბუნების გადამკიდელე...

ნინეტი: *(მწვანე თვალები უელავს):* არ გაგკარი მაგ სისპეტაკეს თუ რა ქვია იმას — არც ერთი მაქ, არც მეორე და ჩემსა გარყვნილებას არ აქვს სამძღვარი! შანსი გამიჩნდეს, თუნდაც ნახევარშანსი და მერე მე ვიცი და ჩემმა ქალობამ: აი ნახავ, პენდრაგორში სულ მოვლენებმა იწყონ ცვენა!

ნარნარი ნაბიჯით შემოდის მელისენტა, თან აბანოურის ხეში ჩასმულ ლითონის პაწია სარკეს აპრიალებს ნატის ნაჭრით. მეფის ასულს ოქროსფერი თმა, დიდრონი, ზღვისფერი თვალები აქვს და საერთოდ, თავადაც ჰგავს ზღვას — ოღონდ ამჯერად რაღაც ქუშტად და მოქუფრულად კი გამოიყურება.

მელისენტა: დმერთმანი, აუტანელი ამბავია! მთელი დილაა ვიხედები შიგ და — არაფერი! ამ დროს კი სრულიად დარწმუნებული ვარ — ის ისევ ჩემზე ფიქრობს! იქნებადა ჯალოს მოქმედების ვადა გაუვიდა...

ნინეტი: მე რომ მეცადა?

მელისენტა: არავითარ შემთხვევაში! მაგისტრმა მალგრამმა უმ კაცრესადგამაფრთხილა, სარკე მხოლოდ ერთჯერადი ხმარებისააო... არა — *ერთპიროვნადიო* — უნდა მეთქვა. *(მუსიკოსს მოკრავს თვალს)* მიბრძანდით, ლემისონ! თავისუფალი ხართ... ამ დილით რაღაც უხასიათობა გვჭირს და როგორმე მუსიკის გარემეც იოლად გავალთ. დღეს რა დღეა?

ელისონი: მთვარის დღე გახლავთ, 31 რიცხვი, და ამინდიც რომ შესაფერისი დაიჭირა! სადმე არ გავიარო-ო-თ?..

მელისენტა: არა-ა-ვითარ შემთხვევაში! მამა-ბატონს სურთ ჩვენთან საუბარი... *(ძალზე მომხიბვლელად იჭმუნის ცხვირს)* მერე ისევ ხელსაქმე და ისევ ის — რა ქვია იმას — *ყაისნადი* და ჩხირები და საერთოდ, არ გააწყალეს გულები?!

ნინეტი: *(შემპარავად)* იმ თქვენი რაინდის აღკაზმულობაზეც რომ ჯერ არაფერი გითქვამთ...

მელისენტა: ვაიმე, რა უყუო, რა... იცით, თეთრი ისეთი რაღაც ემოსა, გარე რაღაცის ტყავისა და კიდე საერთოდაც არა ჰგავს არავითარ რაინდს! **საჭურჭველთმტვირთველსაც** (თავისთვის: ღმერთო, რა უბედური სიტყვაა...) არა ჰგავს! ერთს ვისმე მხატვარ-ქანდაქარს უფრო მაგონებს... თანაც სახელიც ისეთი არაჩვეულებრივი აქვს — **ჯიორჯი!!** ხო მა-გარია? მოფერებით კი ჯანოს ემახიან.

ნინეტი და ელისონი: (ერთხმად) მერე?!

მელისენტა: მერე კიდეც და — პირიდან ბოლს უშვებს!

ელისონი: (გაოგნებულია) გ-გველემაპივით?!

მელისენტა: თვითონა ხარ გველემაპი! ძაან-ძაან ლამაზად და ლაზათიანადაც გამოსდის!

ნინეტი: (ეჭვიანად) იქნება და ჯადოსანია?.

მელისენტა: კიდე რა გნებავს! და საერთოდ, ლედი ნინეტ, უნდა მოგახსენოთ რომ რაც დიდებათქვენსას მჩხიბაობაში დასდეს ბრალი და კოცონზე დასწვეს, მის მერე სულ ვიღაც ჯადოქრები, ჯადოსნები თუ კუდიანები გელანდებათ!

კარზე გამაყრუებელი ბრახუნი გაისმის, მერე ფართოდ იღება და ღიობში მელიოტ-მეფის ჰეროლდი ჩნდება — ერთი ზონზროხა, ბუხუნახმიანი ლოთის ვინმე.

ჰეროლდი: თქვენო მშვენიერებაე, პრინცესსა მელისენტა... და თქვენც, სეფე-ასულნო! ნაბოძები უფლებითა და დაკისრებულ მოვალეობათა თანახმად, მაქვს პატივი მოგახსენოთ: მისი უდიდებულესობა მეფე მელიოტი გეაზღვრებათ — მეუფე პირა-დორისა, პატრონი ბერგამორისა, მარრალორისა და პარ-ლოტისა, მფლობელი ქვემო ლანსინგტონისა, ზემო ტყისა და სამი გზისა — ხიდების ჩათვლით!!!

მელისენტა: წყალსა და მეწყერს წაუღია ეგ თქვენი ხიდები, გზების ჩათვლით! ლამისაა, დაეყრუედეთ!

ჰეროდის ის იყო, მობოდიშებას ეპირებოდა (*მამისერთა მეფისწულია მაინც, რა იცი, რა ზღება*), რომ სადღაც კარსმიღმა დაფ-დაფ-საყვირებმაც დასცხეს. მელიოტ-მეფეზე, *შემობრძანდაო*, ენა არ მოგვიტრიალდება – იმგვარი ფართხა-ფურთხით შემოჯლივინდება შიგ. ის ერთი იმ ასაკოვან, ხანმოთეულ, ძალაუფლებით მხრებ-დამძიმებული კაცის შთაბეჭდილებას ტოვებს, ერთთავად რომ ეროვნულ და საშვილიშვილო საქმეებში ჰკონია თავი ჩარეული, სინამდვილეში კი ყოფით წვრილმანებს ვერ გასცილებია. გვირგვინი კინკრიხოზე მოღრეცია, მოსასხამი დაჭმუჭვინია, კოტიტათითებიან ხელებს ქარის წისქვილივით იქნევს და წუთში აურაცხავ სიტყვების რაოდენობას ისვრის – ასე რომ, ხანდახან საკუთარ აზრებსაც კი უსწრებს ხოლმე წინ...

მელიოტ-მეფე: მშვიდობა დილისა — დილაშვიდობისა მელისენტა-ჩემო და თქვენც, ასულნო პირადორისაო! ხელსაქმეს არ მისხლომიხართ ჯერ? რომ იცოდეთ, რაც ჩვენი მეუღლე, უფალმა აცხონოს, მიწას მივაბარეთ, მას მერე ფარდაგების წარმოება ჩვენს საუფლოში მთელი 75%-ით შეგვიცმირდა — იცოდით ესა?! ეგრე არაფერი გამოვა. დასხედით და გულისხ მაჰყავით საკითხი ესე... ჰო მართლა, ეს-ესაა კამელოტ-ქალაქიდან მოგვივიდა მიწვევა, რაღაცის კონფირენციაზე გვეპატიჟებიან.

(ქალიშვილებს სახეები გაუნათდათ)

ერთხმად: როდის მივემგზავრებით?

მელიოტი: ვერ მოგართვეს, არსადაც არ მიემგზავრებით! მხოლოდ კაცებს გვიხმობენ... ერთობლივი თავდაცვის დოქტრინის ამბავია თუ რაღაც მაგდაგვარი. და საერთოდ, ახლა კამელოტი ის აღგილი არაა, კაიოჯახიშვილი გოგონები რომ დაიარებოდენ! დედოფალი ჯინევრა, თქმა არ უნდა, მომხიბლავეის რამეა, მაგრამა... აქედან გამომდინარე და იქიდან შემდინარე, ასე ვთქვათ... *(ენა ებმის, ატყობს, დაუკრეფავში გადავიდა)*

მელისენტა: კარგი რა მამა, მოგცლია ერთი! იტყვი ხოლმე რაღაცა უცნაურს! თორე ვინმე დარჩა, მისი და სერ ლანსელოტის ამბავი რომ...

მელიოტ-მეფე: *(რაც შეუძლია, მრისხანედ)* ც-ი-ი-ც!!.. მაგი არაა შენი საქმე!
და საერთოდ, ჭკორი და მოგონილია ეს!

მელისენტა: მერე, თუ ჭკორია და მოგონილი... ჩვენ რაღაზე...

მელიოტ-მეფე: *(არაფრის გავონება არ სურს)* მორჩა კამათი! და საერთოდ,
აქ რისთვისა ვართ? ხო, აი რა – ჩვენი კარის ქონდრისკაცის
– გრუმეტის – წაყოლიებას ვეპირებოდით კამელოტს... რა
იქნა?

(ქალიშვილებს წამსვე სახეები მოემმარათ)

ნინეტი: *(ნიშნისგებით)* ვინ, მეფე-ბატონო – კამელოტი?!

მელიოტი: ახლა გავგიჟდები! კამელოტი კი არა, გრუმეტი-
მეთქი!!!

მელისენტა: კარგი რა, მამაჩემო, ეს ერთი გასაერთობი დაგვრჩენია
– თანაც რაღაც დახვესებული პროვინციული
ლაზღანდარობების იმედით მაგის დედაქალაქში წაყვანა
იქნება?

მელიოტი: ერთი ამას დამიხედეთ! აკი წინა ჯერზე სერ პელეასი
მასში ორ ჯორკიდებულს მთავაზობდა! მარტო სუფრიდან
პაშტეტის გაქრობის ამბავი ერთ რამედ ღირდა – იმ შენმა
ქალაქელებმა სიცილისაგან სულები ძლივას მოიბრუნეს...
მაშ! არა-ა, გადაწყვეტილი ამბავია – გრუმეტი უცილობლად
გვჭირდება! სადაა-მეთქი?!

მელისენტა: *(დიდ შეჭირვებაშია)* იცი რა, მამიკო... ე-ე... მე ის ერთი კაცის
საძებნად გავაგზავნე და.....

მელიოტი: ვინაო?! ვინ კაცი, რა კაცი, გრუმეტი მინდა-მეთქი!

მელისენტა: დაიცა მამა, მაგისტრი მალგრამი ხომ გეხსომება –
აი ისა, ჯადოქრად რო მოაქ თავი...

მელიოტი: ა-ა, ეგ ახლახან რო გამოჩნდა და სარეკომენდაციო უსტარიც კი მოგვართვა, ჩვენს კარზე სურს მოტმასნება... აბა კი, ვერ მიართვეს ხონჩით, ლანგარზე!. სულაც არ მოგვივიდა თვალში – დიდი ჭიფხია ვინმე ჩანს — აქაოდა ცხვირზე ბუზს არ ღავისვამო... რა მერე?

მელისენტა: რა და ის რომ ჯადოსნური სარკე მათხოვა – ჩაიხედავ შიგ და ვინც ახლა, სწორედ ამ წუთში შენზე ფიქრობს, სწორედ იმას დაინახავ...

მელიოტი: ღმერთო შენ მიშველე! ქალები მართლა ყველა ერთნაირი ხართ, სახელები გაქვთ მარტო სხვადასხვა! მაიბა აქ! *(სარკეში ჩაიხედავს ცალი თვალით)* ეგრეა – საკუთარ თავს ვხედავთ! ანდა სხვა რა უნდა დავინახო?

ნინეტი: *(ეუცნაურა, რაღაც დიდხანს ვარ ჩუმადო)* აბა ყურადღებით დააკვირდით, თქვენო უდიდებულესობავ!

მელიოტი: დიდაც რომ მთელი ჩვენის გულით-ყურით ვაკვირდებით, მაგრამა..... დაიცა, *ე-ეს* ვინლაა?! არ მითხრათ ახლა, თავად სერ რუჯერიანო – კამელოტის სასახლის მოურავი! კი, მართალია, ჩვენზე ფიქრობს! კი, ეგრეა – და ისევ იმ ჩრდილო მხრის აპარტამენტებში თუ გვიპირებს დაბინავებას! ეგონოს! შარშან ამ დროს იქ იმისთანა გამჭოლი ნიაგ-ქარები უბერავდა, მტრისას! პირდაპირ სერ ართურთან ვიჩივლებ! შიგ პირში ვეტყვი... დაიცა, ეგ მერე, და გრუმეტი მაინც რა უყავი? ჰა?.

მელისენტა: *(მინაბულ-მეოცნებე გამომეტყველებით)* გუშინ ჩავიხედე შიგ და ვიდაც უცხო მოყმე ვინმე დავინახე, *ჯიორჯი* ჰქვია, ჩემზე ფიქრობდა... ისეთი სანდომიანი გამოხედვა ჰქონდა, ისეთი.....

მელიოტი: არა-ა, ჩვენ ეგეთს არავის ვიცნობთ... და რა მერე?

მელისენტა: მერე მაგისტრ მალგრამს ვთხოვე, ჯადოს დახმარებით მაინც ეპოვა... იმიტო რო... აი, როგორ ვთქვა – ეს ჯიორჯი არც ჩვენის სამეფოს მიწა-წყალზეა და არც სხვაგან...

- მელიოტი:** აბა, სად ბებიჩემთანაა?
- მელისენტა:** მამიკო, ის საერთოდ ამ ჩვენი სამყაროს მიღმაა!
- მელიოტი:** აჰაა, ეგრე გეთქვა, შე ქალო! *(აღტაცებულია საკუთარი მიხედვრილობით)* თავი სულ ამ ზღაპრების სერიალებით გაქვს გამოტენილი! მერე კიდე ეს მითებიო, ლეგენდებიო, ანდრეზებიო... მოკლედ, ჩვენი ქონდრისკაცი გვინდა, მორჩა და გათავდა!
- მელისენტა:** რა ვქნა მამიკო, მალგრამმა ის ჯანოს საძებნად გააგზავნა!...
- მელიოტი:** დაიცა, რა – ორნი არიან?!
- მელისენტა:** არა, ერთია – ჯიორჯი, მოფერებით კი ჯანოს ეძახიან!
- მელიოტი:** რითი-რითი?!
- ნანეტი:** *(ჩუმად, თავისთვის)* მოკლედ, სულ იმ მალგრამის ბრალია ყველაფერი.....
- მელიოტი:** დაიცა, ჯერ ეს გამირკვიეთ ერთი, რა აზრი ქონდა ჩვენი კუთვნილი, სავსებით არსებული ქონდრისკაცის გაგზავნას იმ კაცის საძებრად, რომელიც სინამდვილეში არ არსებობს?
- მელისენტა:** ის ჩვენს სინამდვილეში არ არსებობს-მეთქი, მინდოდა მეთქვა!
- მელიოტი:** *(უაღრესად ღრმააზროვანი სახით)* გინდა ჩვენი იყოს და გინდაც თქვენი! თუ ის სინამდვილეში არ არსებობს, ე.ი. არც არსებულა და ეგაა!
- (უცბად წამოუვლის და აყვირდება)* ხოდა, წარმოსახვითი ქონდრისკაცები აგზავნე მაგ შენი წარმოსახვითი კაცების საძებნელად! ღმერთმა ხელი მოგიმართოს! ჩვენს გრუმეტს კი

შეეშვი! არა, ნამდვილად რომ რაღაცა ჭირს ამ ბავშვს... აბა ერთი, კარის მკურნალს მიხმეთ აქა!!

კარში მალევე ჩნდება ჭადარათმეგობრობის მკურნალი, აუტანლად წარბ-შეუხრელი სამეფო მკურნალის წოწოლა ფიგურა.

მელიოტი: აი, უფალო ჯარვი, ამ უგზო-უკვლო განათლებას რა შედეგეც მოაქვს!! ხილვებით, ვიღაც ჯანოო... რაღაც მთლად ჯანზე ვერ უნდა იყოს, ასეა ეს!!

მელისენტა: მამა, *სრულიად* არაფერი მჭირს.

მელიოტი: შენ გაჩუმიდი!

ჯარვისი: (*წარსთქვამს დინჯად, საზეიმო ხმით*) მაქვს პატივი მოგახსენოთ, პრინცესსა ჩემო, რომა მცირედთ თუ ძალუძს ამგვარი რამ დარწმუნებით განაცხადონ გამოჯვკილი მკურნალ-ექიმის თანდასწრებით!. განა არა – თქვენ შესაძლოა გრძნობდეთ კიდევ თავს სავსებით ჯანმრთელად, ოღონდ თავს გრძნობდეთ ჯანმრთელად და აყოთ ჯანმრთელი – ეს ორი სრულიად სხავასხვა რამეა! ნება მიბოძეთ, მეფისწულო.....

მელიოტი: წყნარად დაუდექი, ნუ ცქმუტავ! შენთვის ვზრუნავთ, შენთვის კარგი რომ გვინდა, იმიტომ!...

(მისი უნასწავლესობა, უფ. ჯარვისი ჯერ მაჯისცემას უსინჯავს, მერე შუბლზე დაადებს ორ თითს, თვალის უპეშიც ჩახედავს, პირში კოვზსაც ჩაუთხრის, “ა-ა-ა-ა”-საც ათქმევენებს და თან ერთსა და იმავეს იმეორებს, მკმუნვარედ: “კმ-კმ...”)

მელიოტი: აბა, ერთი თქვენი მოსაზრებანიც გვიბოძეთ, ჯარვისი! მთელი დღე აქ ხო არ ვიდგებით! სადა გვაქვს მაგის დრო!

ჯარვისი: ოთხს პირველად სითხეთა ბუნებისმიერი ჰარმონია მცირედ-ნავ დარღვეულია... ნაღვლისბუშტისშიდა ცირკულაციით განწმენდილ მკერვს, შავ და მჟავე სითხეთა ერთობლიობა კმასაყოფელად ვერ უზრუნველყოფს ტფილი სითხის მიწოდებას, ანუ – როგორცა რომ გალენი გემოდვრავს, იგივე ბუნების-

მიერი პნევმა, გულსშიგან ჩენილი, ველარ აკავებს პნევმას
ცხოვრებისმიერს, რომელიც უკვე ღვიძლსშიგან მოედინება...
ამრიგად, ტვინის არეში ზედმეტად სწრაფად გამოთავისუფლე-
ბული სულიერი პნევმა სწორედ რიოშ წარმოსახვათა თამაშსა
და იმის სრულ ილუზიას იწვევს, რომ.....

მელიოტი: აგაშენა ღმერთმა! მეც მანდ არა ვარ?! გაიხარე...
წარმოსახვო, ილუზიო, ფანტაზიო... სწორედ ეგა სჭირს
ჩვენს გოგოს!
ა-რა-ა, მეცნიერების გარეშე მაინც რა გვეშველებოდა – ჰა,
ჯარვის ჩემო?! ახლა, რას გვირჩევ?

ჯარვისი: *(ძაან-ძაან ღრმაზროვნად)* სამსალა-შეჭამანდი უნდა
დავაშნალოთ, *in vitro* — ანუ შიგან მისაღებად, სამჯერ
დღეში...

(საზეიდო ხმით):

“ჭაობში მბუდავ მცურავის სუკი,
მოხარშული და ჩახრუკული,
ბაყაყის ცერი და ხელიკის თვალი,
ღამურას ბურტყელი, ჩამონათალი
ძაღლის ენისა — გველის ნეშტარი,
ჯოჯოს ფეხი და ჭოტის ფრთა-მხარი
უნდა აღუდღეს ჯოჯოხეთურად,
რომ გასჭრას ჯადომ უფრო ერთგულად...”

მელისენტა: *(თავისთვის)* არ აგიდგა გვერდები, სანამ მე ეგ არ დავლიო!!!

მელიოტი: მაშ ასე, გაირკვა ყელაფერი – ჩვენი ქალიშვილი
სამკურნალოა, მალგრამი – შარლატანი, ის ვიღაც ჯონდო-
ბონდო – მითი, ლეგენდა, ზღაპარი, მონაგონი და
მისუსტებული ფანტაზიის ნაყოფი! ჩვენი გრუმეტი კი — ერთი
ლოთისა და უსაქმურის ვინმე! ვიპოვით სადმე კუნტულში
მიძინებულს, გავადვიებთ და ყურებს ავახევთ! დი-ი-ახ!!!
თქვენ კიდევ, სეფე ასულნო, ნემსი-ძაფი ხელში და — საქმე,
საქმე, საქმე!! *(კარს მოაფიათებს, გარეთ გაიჭრება და იქიდან*

მოისმის მისი ხმა) მორჩით ჩემს ყოველ გასვლა-გამოსვლაზე ამ საყვირების ჭყვიტინს! არ წაიღეს ტვინი!..

ელისონი: *(დაღვრემილი) ესეც ესე-ე.....*

ნინეტი: *(მის ხმაში ახლა არავითარი სიმტკიცე თუ მზაკვრობის ნიშან-წყალიც აღარ მოისმის) არა, ასე ცხოვრება აღარ შეიძლება, რაღაც უნდა ვიღონოთ!.*

მელისენტა: *რა ვქნა, რა წყალში ჩავვარდე?! ‘მე აღარაფრის იმედი არ მაქვს და მუხლმოდრეკით ველი უარესს...’*

(აცრემლებული გავარდება დარბაზიდან).

*ნინეტი და ელისონი ერთმანეთს გადაუჩურჩულებენ, თეტრალურად:
“საბრალო მელისენტა!” — თვალები კი უბრწყინავთ, დაინტრიგებულებს.
სადღაც კარი გაიჭახუნებს, მძიმედ.*

სურ. II: ჯანო და ქონდრისკაცი

სარეკლამო-დეველოპერული კომპანია ერმიკო & Co.
პრეზიდენტს, ბ-ნ ერმიკოს (*“შინაურულად ძმაო, ჩვენებურად, იკა დამი-
დახეთ!”*), შესანიშნავი კაბინეტი კი აქვს საკუთარ ოფისში, ევრორე-
მონტიტა და მისთანებით, მარა რად გინდა – *ამ ქვეყნად პროგრე-
სული წინსვლის პროცესი შეუქცევადი გამხდარა და დიდრონ, თუნ-
დაც მჭიდროდ დაგმანულ ფანჯრებში უახლოესი ნგრევა-
აღშმენებლობის ობიექტიდან წამოსული პნევმატური ჩაქუჩების ყურ-
თასმენის წამლები ხშიერება ავსებს იქაურობას. ბ-ნი ერმიკო მასიურ-
ფეხებიან მაგიდას უზის, წინ რაღაც ესკიზი უდევს, შავი კოსტუმი,
წითელი ჰალსტუხი და თეთრი შარფი მოსავს მის ახოვან ანაგობას,
შიგადაშიგ რაღაც ტაბლეტების კოლოფს დააძრობს ხოლმე და ყლა-*

პავს ინდაურივით. გვერდით, აქეთ-იქიდან, მისი აღმასრულებელი მენეჯერი — ლიკა და სარეკლამო საქმეების უსტაბაში — ზუკა უდგანან.

ბ-ნი ერმიკო: არც არაფერი აქედან არ გამოვა — არ მომწონს და მორჩა! და კლიენტსაც არ მოეწონება — ვინ ჭამს ახლა ამას!

(პნევმატური ჩაქუჩების ხმა მთელ მის დანარჩენ მონოლოგს ფარავს).

ლიკა: *(როგორც კი სიჩუმე დაისადგურებს)* სავსებით გეთანხმებით, ერმიკო-ბატონო, ს-ავ-სე-ბით!

ბ-ნი ერმიკო: სხვა?

ზუკა: *“ჩემი მშვენიერი წინდა”* — მაგაზე ახლა ჩვენი ჯანო მუშაობს.

ბ-ნი ერმიკო: ჯანოს დამიძახეთ ერთი!

(ისევ ჩაქუჩების რაზრახი. ბ-ნი ერმიკო კიდევ ერთ ტაბლეტს დაარტყამს და ჭიქიდან წყალს აყოლებს).

ბ-ნი ერმიკო: ერთი მაგარი პროტესტი კიდევ აფრინეთ მერიამში! *(თავისთვის)* მეტი არაა ჩემი მტერი, მაგათ შეაგონო რამე...

(შემოდის ჯანო, ორივე ხელით დიდრონი საქალაქო უჭირავს, კბილებით კიდევ — ჩიბუხი).

ჯანო: კაი გამარჯობა თქვენი, თუ გინდათ! მშვენიერი დარია!

ბ-ნი ერმიკო: რაღაც ვერ ვამჩნევ, ამათი გადამკიდევ...

ჯანო: მე კიდევ ერთი ვიღაც ჯუჯა გადამეკიდა, რაღაც რეკვიზიტის შარვალ-ხალათი აცვია და სულ იღმიჭება... ეგ არაფერი, შენ ისა თქვი, დღეს 31 ივნისი როა.

ბ-ნი ერმიკო: რასაა რო ბოდილობ?!

ლიკა და ზუკა ერთდროულად გახედავენ შიშლიკანაქალებიან კალენდარს, კედელზე.

(მერე ერთხმად): ჯანო, კარგადა ხარ?.

ბ-ნი ერმიკო: *(ავტორიტეტულად)* 31 ივნისი არ არსებობს და არც არასოდეს არსებულა — არც გრეგორიანული და არც მართლმადიდებლური კალენდრით!

ჯანო: ვიცი, მარა დღეს რაღაც ისეთი შეგრძნებით გავიღვიძე, ნაღდად 31 ივნისია-მეთქი...

(ნახატს ამოიღებს და კედელზე კიდებს).

ბ-ნი ერმიკო: არის ამაში რაღაც რენესანსული.

ლიკა და ზუკა: კაკალ გულში მოარტყით, ბ-ნო ერმიკო!

ბ-ნი ერმიკო: და მეორეს მხრივ — არ ვიცი, ა-არ ვიცი...

ზუკა: სწორედაც რომ, ერმიკო ბატონო.

ბ-ნი ერმიკო: შენი აზრი, ლიკა?

ლიკა: ერთი-ერთზე ემთხვევა თქვენსას, ბ-ნო ერმიკო!

ბ-ნი ერმიკო: ჯანო, ეს გოგო ვინაა?

ჯანო: არც არავინ. ყოველ შემთხვევაში, ჩვენებური არაა, წარმოსახვით დავხატე.

ლიკა: მდიდარი წარმოსახვა კი გაქ, აი!

ჯანო: გაიხარე! წარმოსახვის უნარი ჩვენს საქმეში მთავარია... მოკლედ, გუშინ სახატავს ჩავუჯექი და თავში სულ პირმშვენიერნი ასულნი და აბჯაროსანი რაინდნი, გველემპები და ციხე-კომკები, მეფისწულეები და სხვა ამდაგვარი სისულელეები მომდის... მერე უცბად, ვხედავ – კედელზე ვიღაც გოგონა ისახება თავისით, რაღაც შუასაუკუნეების დროინდელ სამოსით მორთული და მიღიმის... გეუბნებით, ფერებში ვხედავდი-მეთქი ყველაფერს – ჩანახატის გაკეთებაც კი მოვასწარი, ვიდრე გაქრებოდა! მერე უკვე, ფუნჯზე და საღებავებზე რო გადავედი, კიდევ ორჯერ გამოჩნდა – ისეთივე მომხიბვლელი ღიმილი დასთამაშებდა ტუჩებზე... და სულ მე მიყურებდა, მონა ლიხასავით... ოღონდ, ჩემდათავად, უფრო სექსუალურად კი გამოიყურებოდა.

ბ-ნი ერმიკო: ჰ-ჰმ! არადა, ცარიელა წარმოსახვის ამბავია!

ჯანო: მერე, წარმოსახვა რაღაა? ვერც ერთი ჭკუათმყოფელი მაგას ვერ გეტყვით, თუ, რა თქმა უნდა, თავად არა აქ ატროფირებული... ასეა თუ ისე, დილით იმგვარი შეგრძნებით ავდექი, დღეს ნაღდად 31 ივნისია-მეთქი.

ბ-ნი ერმიკო: *(აწვევტილებს)* ჯანო, ხო იცი, მე შენი ბოსიცა ვარ და მეგობარიც... მეცი პატივი და ჯარვიშვილს ენახვე. *(ინტერკომში ჩახდახებს):* თაკო, ექიმი ჯარვიშვილი იყო აქ, არ წასულა ჯერ? თხოვე ერთი, ჩემთანაც შემოიხედოს.

ჯანო: ვინ ექიმია... დაიცა, საექიმო რა მჭირს?! და სერთოდ, სარეკლამო კანტორაში რა დაკარგვია მაგ ჩემისას?..

ბ-ნი ერმიკო: აბა შენა ხარ, აი! იმას რა, ჩვენა ვართ ყველა სააქიმო! ისე, რო იცოდე, მაგარი ვინმეა – *“ჩვენი ოჯახის უ-უდიდესი მეგობარი”* – ხო იცი, წამლების კომპანია – იქიდანაა...

(ლიკა და ზუკა დელიკატურად გადიან; შემოდის ექიმი ჯარვიშვილი – პერადორელ მაგისტრ ჯარვის ალი-კვალია, ოღონდ მოსასხამის მაგივრად ჟილეტ-კოსტუმშია გამოკვართული)

ბ-ნი ერმიკო: მოგესალმებით, ექიმო! გაიცანით – ჩვენი საუკეთესო მხატვარ-მოდელიერი, გიორგი; ამ ბოლო დროს რაღაცეები დასჩემდა – ვიღაც გოგოები ელანდება, ჯუჯები... და საერთოდ — დღეს 31 ივნისიაო, გვიმტკიცებს.

ჯანო: რა მერე?! ცუდია თუ? ჯანმრთელი ვარ, საესებით!

ექიმი ჯარვიშვილი: ბატონო ჩემო, საკუთარი გამოცდილებიდან გამომდინარე მოგახსენებთ, ცოტაა ის ხალხი, ვისაც რომ სრულად ჯანმრთელი შეიძლება ვუწოდოთ. თქვენ კიდევ, რამდენადაც ვიცი, ჰიპერ-წარმოსახვის მქონე შემოქმედთა რიცხვს განეკუთვნებით...

ბ-ნი ერმიკო: განეკუთვნება, აბა არა?!

ექიმი ჯარვისი: მაშ ასე, ბატონო ჩემო, ნება მიბოძეთ.....

(მაჯისცემას გაუსინჯავს, თვალის უპეშიც ჩახედავს, ენას გამოაყოფინებს, “ა-ა-ა”-საც ათქმევინებს და სულ “ჰმ-ჰმ-ჰმ”-ს გაიძახის)

ექიმი ჯარვიშვილი: ეიდიტიზმი, ეჭვი არაა! საესებით შესაძლოა, ფარისებრი ჯირკვლის ჰიპერფუნქციითა და ზოგადი ნივთიერებათაცვლის არამდგრადობით იყოს გამოწვეული — რაც, თავის მხრივ, იოდისა და კალციუმის დეფიციტს იწვევს... არც თირკმლისზედა ჯირკვალთა ჰიპერფუნქციითა და ფარისებრი ჯირკვლის ასევე ჰიპერფუნქციით გამოწვეული ეიდეტური წარმოსახვითი მეხსიერების წრეგადასული აღგზნებადობაა გამოსარიცხი... მეორეს მხრივ — საპირწონე მდგრადობის მოშლა ჯირკვალთა საერთო პარაფუნქციური აქტივობის ადეკვატურობის ამბავში... ამას კიდევ, თავის მხრივ, ეიდეტური წარმოსახვითი ხატების ობიექტივიზაცია ერთვის, ანუ — ე.წ. *ჰალუცინაციები*...

ბ-ნი ერმიკო: აბა, მე რას ვამბობდი?! ვინ აღმოჩნდა მართალი, მე თუ შენ! ახლა თქვი — “ა-ა-ა!” — სულ მაგ ოხერი ვირტუალური თამაშების ბრალია! ჯერ ვირტუალური რეალობა, მერე ჰალუცინაციები... ახლა რას ვშვებით, ექიმო? ეშველება რამე?

ჯარვიშვილი: რაზეა ლაპარაკი! ჩემისთანა ნასწავლ-ნაცადი მკურნალის ხელში კვირისთავზე ყველაფერი გაუვლის. აფთიაქარს ვე-

ტყვი, კალცის გლუკონატი და ა, ბ, და ც ვიტამინების...
თუმცა არა, ც არ გვინდა, ღ იყოს... მოკლედ, ვიტამინების
კოქტეილს დაგიმზადებთ და დღეში სამჯერ (იწერს) ჰმ,
ღიახ... და კიდევ მიქსტურა აუცილებლად: უროტრობინი,
შენ ხარ ჩემი ბატონი, ქინაქინის მჟავა და ბლომად ტეობრო-
მინი 2-ჯერ დღეში – უზმოზე და ვახშმის წინ... არავითარი
სასმელი და ნაკლები ნახშირმჟავები!

ბ-ნი ერმიკო: გაიხარე! ა, კაცი! მადლობა დიდი, ექიმო, ჩვენზე იყოს...

ჯარვიშვილი: მუდამ ხალხისა და ელიტის სამსახურში მიგულებთ!

(გადის, რომ ახლა სადმე ხალხს ემსახუროს).

ბ-ნი ერმიკო: აბა, ჯანო-ბიჭი, კვირისთავზე შუშა კიტრივით იქნები
და არავითარი ეს შენი ხილვა-წარმოსახვები!

ჯანო: დამრხევია და ეგ არი!

ბ-ნი ერმიკო: ბიჭო, სად ხვდებიან ის ტიპები, ისეთ რამეებს რო
ხედავენ, სხვები რო აზრზე არ არიან?!

ჯანო: ეროვნულ გალერეაში, კედელზე, და სიგნალი-
ზაციასაც უყენებენ...

ბ-ნი ერმიკო: ე-ე, კარგი რა, კაცი რო იჩემებს, 31 ივნისიაო, მერე კიდევ ვი-
ლაც ჯუჯები ელანდება...

*(თავად ამ დროს ქაღალდებში იქექება, თორემ რომ აიხედოს, დაინახავს კიდევ, გრუ-
მეტი როგორ გამოძვრება ჩაკეტილი კარადიდან, ჭრელა-ჭრულა ხიფთანი და წვერ-
წამახული ქოშები აცვია, თავზე კიდევ რაღაც მაზალო ჩაჩი ხურავს)*

... საღი აზრი, ჩემო, მაგარი რამეა, — უიმისოდ ჩვენს
საქმეში...

(თავს მადლა სწევს, ჯანოს მხერას გააყოლებს თვალს და უცებ იბდავლებს):

... ღმერთო დიდებული! რომელი ხარ მანდ?!

(ქონდრისკაცმა ჰაეროვანი კოცნა გაუგზავნა ჯანოს, მერე სურათს დაავლო ხელი, ილღიაში ამოიწარა და ისევ კარადაში გაუჩინარდა)

ჯანო: შენ ეი! ნახატი სად მიგაქ?!

ბ-ნი ერმიკო: ჰკა მაგასა!!! ატუ!

(ორივენი კარადას ეცემიან, გამოადებენ და შიგ, რაღა თქმა უნდა, საქაღალდეებისა და დისკეტების მეტი არაფერია — ჯუჯას ნასახიც კი არაა. ბ-ნი ერმიკო ჯანოს მიაშტერდება):

ბ-ნი ერმიკო: არ-ა-ა, აქედან ვერსად წავილოდა...

ჯანო: წავილოდა, კი – ისე წავილოდა, როგორც დაგიბარებია... სულაც აქედან არ შემოვიდა?

ბ-ნი ერმიკო: ახლა არ გადამრიო, გავგიჟდები, გავგიჟდები, გავ...

(ისტერიულად აჭერს ზარს, შემორბიან ლიკა და ზუკა)

ჯანო: აბა, მეყოლეთ ვარდივით... წავედი მე და დღეს, 31 – დი-ი-აზ, **31 იენისს**, ფზიზელს ველარავინ მნახავს!

(გაფლიგინდება კაბინეტიდან).

ლიკა: *(საყვედურით)* არ უნდა გაგეშვათ, ერმიკო-ბატონო, ჯერ იმ “მშვენიერი ქალბატონის” ამბავი არც გადაგვიწყვეტია... სადაა? თან წაიღო?

ბ-ნი ერმიკო: არა, იმას არ წაუღია.....

ზუკა: კი მაგრამ, ერმიკო ბატონო, აქ აღარაა, ე.ი. ვიღაცამ წაიღო და არ მითხრათ ახლა, იმ ჯუჯამო... *(იღიშება სარდონიულად)*

ბ-ნ- ერმიკო: კი, ეგრეთ. *(ქშინავს, მძიმე-მძიმედ, სახე ნელი-ნელ უჭარბალდება)* წითელ-ყვითელ-აღისფერში იყო გადაწყვეტილი... ხელი დაავლო და აი იმ კარადაში ღურთა თავი... გაუჩინარდა...

ლიკა: კარგით ახლა, ერმიკო-ბატონო!..

ბ-ნი ერმიკო: *(იფეთქებს)* გეუბნებით, ჯუჯამ წაიღო ნახატი-მეთქი! უხ, თქვენი...

(პნევმატური ჩაქუჩების ხმა ავსებს იქაურობას; ბ-ნი ერმიკო სავარძელში ეშვება, ლოყებს ბერავს და თითებს მაგიდაზე ათამაშებს — რბილად რომ ვთქვათ, ნერვიულად).

სურ. III

იგივენი და ორიც ჯადოსანი

მელიოტ-მეფის ციხე-კოშკის ხალიჩებიან დარბაზში მელისენტა და ნინეტი სხედან, ვითომცდა ლემისონის პარტყუნს უსმენენ, თანაც ასევე ვითომდა ხელსაქმით იყვანენ გართულნი. ლემისონი რაღაცას ჩაახუჭუჭებს უგერგილოდ, ბოლოში რამდენიმე ყალბ აკორდსაც დაურთავს და საკუთარი თავით ნაამები, თავმდაბლად მოიხრება წელში.

მელისენტა: *(გულსგარეთ)* კეთილი, ლემისონ ჩემო. ოღონდ ეგაა, დღეს რაღაც ხასიათზე ვერა ვართ, შაკიკმა შეგვაწუხა მცირეოდნავ. შეგიძლიათ მიბრძანდეთ.

ნინეტი: ... და ბოლოსდაბოლოს, იქნებ ის *“შავმა რაინდმა წარიტყვევნა გული ჩემი”* მაინც დაისწავლოთ ვინმესგან!...

(ლემისონი გადის, წარბშეკრული, მელისენტა კიდე, ჭირვეული ხმითა და შესაბამისივე გამომეტყველებით წართქვამს):

მელისენტა: არა, მაინც ვის რაში დაკარგვია ეგ შავი რაინდი თუ ვილაცა? ან გინდაც ნებისმიერი სხვა ფერისა იყოს! თან სულ რაღაცას აფლრიალებენ, აფლარუნებენ, არი ერთი ჯახა-ჯუხი და უბედურება! სისულელეა!

ნინეტი: მაგას არ ვამბობ? მე უბედურმა ფრჩხილები მოვიმტერიე, სანამ სერ მარისს აბჯარს აეხსნიდი ეშტონის ტურნირზე! მერე კიდე მთელი დღე ტვინი გამიბურდა ჰერალდიკაზე ქაქანით, ლაპარაკობდა და ლაპარაკობდა, ენა არ გაუჩერებია, და სულ დერბებზე და წარწერა-დევიზებზე და მოკლედ, მე ჯადოსნები მირჩევნია, ალაღაღ. ...

მელისენტა: ოჰ, კარგი ერთი! ეგენი ვის არ მოსწონს...

... — *რა ბრძანეთ, თქვენო უდიდებულესობაე?*

(ამის მთქმელი, ეტყობა, სიცარიელედან გამოტყვერა – მაღალია და თავისებურად მომხიბვლელიც, ოღონდ რაღაც ავბედით სტილში – ცხვირწაგრძელებული და ყორნისფერი თმა-წვერით პირსახედამშვენებული. მდიდრულ, ოქრომკედით ნაქარგ მოსახამშია გახვეული და იმგვარი გამოკვეთილი დიქციით ლაპარაკობს, უცხოელი გეგონება).

მელისენტა: მაგისტრ მაღგრამ! – *(მეფური გულმშვიდობით წარსიტქვამს)* – რაღაც არ გვახსოვს, ასე არსაიდან გამოშპობის ნება მოგვეცა თქვენთვის... დი-იახ, ლედი ნინეტ, გაიცანით – მაგისტრი მაღგრამი, ჩვენი ახალი ჯადოსანი; მაგისტრ მაღგრამ – ლედი ნინეტი.

(მაღგრამი მდაბლად ხრის თავს, ნინეტი მომხიბვლელად უდიდის)

ნინეტი: ამას როგორ აკეთებთ, მაგისტრ?

მალგრამი: სულ იოლად, მიღედი. უბრალოდ, უჩინარი გახლდით. გაგებდავ მოგახსენოთ, ფართოდ გავრცელებული მეთოდად გახლავთ. ჩვენს დროში მხოლოდ ძა-ალზე ძველმოდური ჯადოსან-მჩხიბაენი და მოგენი თუ მიმართავენ გარდასახვის ხერხებს... აი, ვთქვათ, ბიძაჩემი — ნამეტნავად სურდა თქვენი ხილვა, ოღონდაც ისევ თავისებურად, რუს ვირთხად სურდა მოგველინებოდათ... ჰმ, არ ვიცი, არ ვიცი... რამდენად ეს-თეატურია ეს ძველი ესთეტიკა... ასეა თუ ისე, ხომ ჯერაც არა ჩანს? ესეც კიდევ ერთხელ ამტკიცებს ჩემს საზრისს! სარისკო მეთოდაა, მეტად. გაიჭედებოდა ალბათ სადმე, იატაკქვეშ...

მელისენტა: ახლა არ გვითხრათ, მართლა ვირთხადქცეული გამოგეცხადებათო!

მალგრამი: რა გითხრათ, ხანდისხან ეშმა შეუჩნდება ხოლმე... თუმცა რა, ერთი წაიკვლეოცეს და ეგაა. ნუ გაუწყრებით, თქვენო უდიდებულესობავ — მაინც ძველი მერლინური სკოლის მოხუცია...

ნინეტი: მოჯადოებული ვარ თქვენის დიდსულოვნებით, მაგისტრ მალგრამ!

მალგრამი: ეგ ჩემი პროფესია გახლავთ, მიღედი — მოჯადოებას ვგულისხმობდი, რაღა თქმა უნდა... ახლა კი, პრინცესა, გთხოვთ ჩემი პაწია სარკე დამიბრუნოთ. და ნუ სწუნართ, ხომ თავადაც დარწმუნდით — გარკვეული დროის შემდეგ, ძალების აღდგენა სჭირდება.....

მელისენტა: ა-ჰა-ა! ესე იგი, ჯანო ისევ ისევე ფიქრობს ჩვენზე — უბრალოდ, ეს ანტიკვარიატი ვერ გვიჩვენებს?! მერე, გრუმეტი სადღაა? გვითხარით რამე, მაგისტრ მალგრამ, ნუ გადაგვაყოლებთ!

მალგრამი: *(მხრებს იწურავს, ხელებს განზე შლის, თითებს ათამაშებს — მოკლედ, ძალზე არაბრიტანული უჭირავს)*

ე-ეპ, ჩქარობთ, თქვენო უდიდებულესობავ, რა სულს-
წრაფი ხართ!... ჩემთვის კიდევ, სხვათა შორის, კარის
გრძნეულისა და მოგვის საშტატო ერთეული ჯერაც არავის
უბოძებია... ყოველ შემთხვევაში – აქ, პენდრაგორში მაინც.
ჰმ, დაახ..... იმას ვამბობდი, ჩემის ძალისხმევითა და ჯადოს-
ნობით, ქონდრისკაცი, გრუმეტად წოდებული, უკვე დაბრუნდა
მიღმეთიდან და თან განსაცვიფრებელი, პირდაპირ ითქვას,
არაჩვეულებრივი საბოძვართ გეახლათ!

მელისენტა, ნინეტი: *(ერთხმად)* მერე, სადაა?!

მალგრამი: აბა რა გითხრათ, მეფის ასულო – რა გამკითხე ვარ
მე გრუმეტის? გამიგზავნია, ჩამომიყვანია... ახლა თქვენ
იციით.

მელისენტა: *(რალაცას ხვდება)* კეთილი და პატიოსანი, პირდაპირ ბრძანეთ
— რას მოითხოვთ?

მალგრამი: *(აკვანშივე ინტრიგანად ჩაწვნილი, მალგრამი წაშში იცვლის
იმიჯს – ახლა ერთის ვინმე საქმიან მენეჯერსა ჰგავს)*

წლების წინ, თქვენო უდიდებულესობავ, დიდმა მერ-
ლინმა მამათქვენს ოქროს ძეწკვი უსახსოვრა... ჰმ, ცოდვა
გამხელილი სჯობს და ჩემი ნება იყოს, მაგ ძეწკვს უბრალოდ,
აეწაპნიდი, ოღონდ საქმეც ეგაა – მერლინის რა გნებაეთ რა
საჩუქრის მოპარვა შეუძლებელია, ფიზიკურად. ან თავად
თქვენ უნდა გადმომცეთ, ან მამათქვენმა. *დაიფიცეთ*, რომ ეგ
სამშვენიისი ჩემი იქნება და გრუმეტსაც იხილავთ, საბოძვარ-
საც და საერთოდ, ვითანამშრომლოთ, ასე ვთქვათ...

მელისენტა: *(ჭოჭმანობს)* არ ვიცი, ასე, მამიკოს დაუკითხავად...

სად იყო და სად არა, ამ დროს საიდანღაც *(უფრო სწორედ, ისიც არსაიდან)* ერთი
ტანმორჩილი, ეშმაკუნა, მუღამ კაი ხასიათზე მყოფი, ჩიტირეკია ბერიკაცი გაიჩითა.
მაგისტრი მალრაგრაში თავის წარმოსადგე დისშვილს, პირდაპირ ითქვას, არაფრით
ჩამოგავს — არც ჩაცმულობით, არც იერსახითა და არც ლაპარაკის მანერით. ამას
კიდევ მისი მაზალო სიცილ-ხითხითი დაამატეთ და რა გასაკვირია, თუ ბიძა-
დისშვილი ერთანეთთან, ასე ვთქვათ, ცოტათი უბრად არიან.

მარლაგრამი: არავითარი ფიცი-მტკიცი მე არ ვიცი! *ჰი-ჰი-ჰი!*
ჰუ-ჰუ-ჰუ! ჯერ შეიცადეთ, ჩვენც გვათქმევინეთ ორიოდ სიტყვა!

მალგრამი: *(ცალებად)* იცნობდეთ, ბიძაჩემი — მაგისტრი მარლაგრამი...

მარლაგრამი: ხმა-კრინტი! ახლა არ მითხრა, დისწულო — ეს მომხიბლავი გოგონები უნდა გაგაცნო... *ჰი-ჰი-ჰი!* ოღონდ კი მაგას მოვესწრებოდე შენგან... ან რა შენი დახმარება მინდა რა — ისედაც ვიცნობ ორივეს, დაუსწრებლად! *ჰუ-ჰუ-ჰუ!* ე-ეჰ, ახლა ისევ ოთხმოცისა რო ვიყო, რის ჯანო, რა ჯანო — თავად მოგხედავდით, პირადად!

მელისენტა: *(არცთუ ისე განაწყენებული)* დიდი ვირეშმაკა მოხუცი ხართ, გატყობთ!

მარლაგრამი: *(მხიარულად)* აბა არა? *ჰი-ჰი-ჰი!* მაგრამ თქვენთვის, მეფის ასულო, თავს დავდებ — აი, ნახავთ თუ არა! *ჰუ-ჰუ-ჰუ!*
(უცბად მოისხეპს სიცილს) აი, ესა კიდე *(ნინეტს დაარჯობს მხერას)* ს-უუ-ლ სხვა ვინმეა, რა თვალეები, რა ტან-ფეხი... რა გვეშველება? ისევ ჩემს დისწულს თუ გაგაყოლებ, სხვა შენ ვინ აგიტანს! ან ვინ გაგიტანს ბოლომდე... *ჰი-ჰი-ჰი!*

ლელი ნინეტი: *(გაყინული სახით)* აი, მაგასაც ვნახავთ!..

მარლაგრამი: ვნახავთ, აბა არ ვნახავთ?! *(ღიღინებს)* “**დავლეუთ, აბა რას ვიზამთ?..**” *ჰუ-ჰუ-ჰუ!* შენს ქორწილში-მეთქი, მინდოდა მეთქვა... მაგრამ ჯერ ჯიორჯი-ბიჭს საქმე უნდა გავუჩარხოთ! *ჰი-ჰი-ჰი!*

მალგრამი: *(ცოვად)* თვალეებში ნაცრის შეყრა კი ეხერხება, ნამდვილად. მთელს ჩვენს კორპორაციას არცხვენს, რეგიონალური მასშტაბით... რამე რო იყოს, აქამდე სადა ხართ, ბიძაჩემო? გზად კატა შემოგეფეთათ?

მარლაგრამი: ხედავთ, მეფისწულო, საით უბერავს ქარი? *ჰი-ჰი-ჰი!* ჩემი დისკრედიტაცია არ ჩაუდვია გულში ყმაწვილს! *ჰუ-ჰუ-ჰუ!* ეგ ჯერ კიდევ ქოთანზე იჯდა, მე რომ დიდ მერლინთან გამოცდას ვაბარებდი! აბა, ახლა სადაა ის ქონდრისკაცი?

მელისენტა: მართლა, მაგისტრ მალრაგრამ, სადაა?!

მალგრამი: ამწამსვე აქ გავაჩენ, როცა კი შემომფიცებთ, რომ...

მარლაგრამი: ვერ მოგართვეს ნიახური! გააჩენ არა... *ჰი-ჰი-ჰი!*

მალგრამი: კარგით რა, ბიძაჩემო, კონვენციის თანახმად...

მარლაგრამი: კონვენცია არა, იხვი! *ჰუ-ჰუ-ჰუ!*

მალგრამი: ჩემზე აპირებ ძალების მოსინჯვას, ბებერო?!

მარლაგრამი: რატომაც არა, რა! *ჰი-ჰი-ჰი!* წმინდად სპორტული ღონისძიება, ნამდვილად — შევერკინოთ ერთმანეთს, მალგრამ! სულ ერთი რაუნდი, მერლინისეული სისტემით... გამარჯვებული ის იქნება, ვინაც მეფის ასულს ჯანოს მიჰგვრის პატარძლად! *ჰუ-ჰუ-ჰუ!*

მალგრამი: *(წელში იმართება, წარბებს ქუსტავს და მზერაც ერთ წერტილში ეყინება)*

... ასე და ამგვარად, ყოველთა ძალთა მოგიხმობთ შველად!!

(გოგონები ერთი დაიწიკვინებენ და შეშინებულნი, დარბაზის დედაბოძს ამოეფარებინან; გარშემო ბინდი ჩამოწვება)

მარლაგრამი: მიდი, მიდი, მოუხმე და მოუხმე — აბა ჰე, აბა ჰო!

*(მალგრამი სულ უფრო საზარელი შესახედი ზღება და მისი
ხმაც კი დამზაფრავია)*

მალგრამი: ვარგა გრაკკა, მარლაგრამ, ოუ ტერარმა ვავა
მარვაგისტა დემოგორგონა!

*(მთლად ჩამობნელდა, დაიჭექებს, ელვაც გაიკლაკნება სადღაც შორეთში, დარბაზში
კი გოგირდის სუნი დგება)*

ოლონდ არც მარლაგრამია ჯაბანი და:

*“ვარგა გრაკკა, მალგრამ! ოუ ტერრა მარვინა
გრულუმავისტერრა ბელზებუბ, მაგალითად!”*

*(ისევ იქუხებს, ისევ გაიკლაკნება ელვა და როცა ჩამოწოლილი ბინდი გადაიყრება,
ალარც მალგრამია იქ, მხცოვანი ბიძამისი კი ასკინკილა დახტის და თავისთვის
ხითხითებს – ჰი-ჰი-ჰი, ჰუ-ჰუ-ჰუ!)*

მარლაგრამი: რა იყო, გოგონებო — რამ დაგაფეთათ?! ფა-ფუ
თქვენი მალგრამი — ახია მასზე! არც უფროს-უმცროსი იცის,
არც ზრდილობა... მაშ, ახლა მე ვიქნები თქვენი კეთილი
ჯადოსანი! ჯანო გინდათ — ჯანო იქნება! თანაც — გთხოვთ
ყურად იღოთ — არავითარი წინაპირობა! თქვენ მე მენდობით,
მე — თქვენ... სინდის-ნამუსის ამბავია, ბოლო-ბოლო! ე-ეჰ,
არადა, ორივე ეს სიტყვა რო სპარსულია — იცოდნენ იქ
ამათი მადლი... ან რა ჯადოსნები ჰყავდათ — ეს ფარსმანიო,
ის ბიძამისი — ფარსასმანიო... ე-ეჰ, ის დრო სჯობდა! დაი-
ცათ, სად გავედი — ქონდრისკაცს არ ეძებდით თქვენა? გრუ-
მეტ! გრუუმე-ეტ! აქ მო!

(ვაბადრულსახიანი ქონდრისკაციც წამსვე იქა ჩნდება, ხელში ნახატი უჭირავს)

მელისენტა: გრუმეტ, საყვარელო! ნახე?! როგორი ბიჭია... ეს რა-
ღაა? ნინეტ, ჩემი პორტრეტი! ღმერთო, მართლა
არაჩვეულებრივია!

ნინეტი: *(თვალს შეავლებს მხოლოდ)* ცხვირი ვერ გამოსვლია...

მელისენტა: ბევრი გესმით სახვითი ხელოვნების, ლედი ნინეტ!
სწორედ ცხვირია ზედ ნეოკლასიკურ სტილში გადაწყვეტილი!
უბრალოდ, გშურთ ჩემი... ჩვენის აზრით, ნაღდად
არაჩვეულებრივია, ჯანოს ვენაცვალე... *(წაიღიღინებს)*
“რაბიჭია და რაბიჭია და რაბიჭია ჯანო!!!”

მარლაგრამი: კარგით ახლა, გეყოფათ! თუ მისი *ლაიეში* ნახვაც
გინდათ, უნდა გავეშადოთ... საღდაც აქვე, ორ ნაბიჯში კი
არაა... ყოველ შემთხვევაში, “ორი ნაბიჯი”, რომ იტყვიან,
მანძილის ამბავია, დროში კიდევ... მოკლედ, ერთი საათი თავად
მჭირდება. გრუმეტ, შენ აქ ღარჩი! *(გაქრება)*.

მელისენტა: ბოდიშს გიხდი, ნინეტ, მაგრამ მარტოდ-მარტო
გვსურს საკუთარი პორტრეტით დავტკბეთ... *(გადის)*.

ნინეტი: *(გრუმეტს შეყურებს)* ლაპარაკი მაინც შეგეძლოს, შე
უღლეურო!
არა, ის ჯანოა თუ ვიღაცა, მართლა ასე ძნელია მისი პოვნა?

(ქონდრისკაცი ენერგიულად უქნევს თავს)

ჯადოსნობის გარეშე მართლა არაფერი გამოძივა?

(გრუმეტმა ლამისა თავი მოიძროს კისრიდან)

არა, რამე რო იყოს, მე რა — იმაზე მწყდება გული,
მაგისტრი მალგრამი ასე იოლად რომ დანებდა...

მალგრამი: *(კარადიდან გამოდის, მოსასხამს იფურთხავს; მცირეოდნავ გა-
ნაწყენებული გამომეტყველება ადევს სახეზე)*

მომიტყვეთ, ლედი ნინეტ, არც მთლად მასეა საქმე!
მართალია, ზედ ბეწვის ხიდზე მომიწია გავლა — რას იზამ,
ძველი სკოლა აქ გამოვლილი ბიძაჩემს, არც სტაჟი აკლია და
არც უნარი... ოღონდ მთავარი ისაა, წინასწარ კარგადაც
მოემზადა, მე კიდევ რაღაც ჰაიჰარად მოვეკიდე ამ ამბავს...
მაგიორში, ახლა ჩემი სვლაა და იმასაც ვნახავთ...

ნინეტი: მე ვერ გამოგადგებით რამეში? მიმსახურეთ.

მალგრამი: *(აზლა უკვე ნაღდი შეთქმულის გამოძეტყველებით უახლოვდება, ჩურჩულებს)*

როგორც კი მეფის ასული და მიძაჩემი თავიანთ გზას დაადგებიან, ჯანოს დასახვედრად მოემზადეთ! მე მაგას მათზე ადრე ვიპოვი, აქ ჩამოვაცუნცულე და მერე შენ იცი და შენმა ქალობამ...

ნინეტი: ჩემი ოცნების მამაკაცი ხართ, მაგისტრ მალგრამ!

მალგრამი: *(ძან-ძან სვეტურად)* რაზეა ბაზარი, მილედი! ეგეც თუ ვერ მოგვიხერხებია და... *(ქონდრისკაცს მიუბრუნდება)* გრუმეტ, წავედით!

(მხარზე დაადებს ხელს, უეცრად ქარი ამოვარდება, წამით ისევ ჩამობნელდება და ორივენი გაქრებიან)

ნინეტი: *(აშკარად კმაყოფილია ვითარებით; სურს რაიმე თქვას ისეთი, შესაფერისი, ბრძნული, სამარადჟამო)*

ომი თუ ზავი — საკითხავი აი, ეს არის!

სურ. IV

ყავახანა “თეთრი რაში”

ტანთხელი, ჯერეთ სრულიად ახალგაზრდა, ჯინსებსა და ტოპიკაში გამოკვართული მიმტანი გოგო ბართან დაყურსულა. მისგან ვერც მახვილ სიტყვას გაიგონებ, ვერც რაიმე ხალხურ სიბრძნეს გამოკრავ ხელს და ხელისუფლების გააზრებული კრიტიკა ხომ საერთოდ... მოკლედ, ტიპიური ქალაქელია, “ისინი ჩამოვიდნენ მთიდან” ხარისხისა.

კარში ჯანო ჩნდება.

ჯანო: ყველას გაგიმარჯოთ, თქვენის დილა მშვიდობისათი!

მიმ. გოგ.: *(პასპორტში ტანოტატანო უწერია, შინაურულად ტანოს ეძახიან):*

გაუ!..

ჯანო: მთლად გარდასარევი ამინდია პირდაპირ! ლუდი და ყავა, ყავა და ლუდი, დაგენაცვლე! ამისთანა 31 ივნისი ჯერ არ მახსოვს!

(კუთხის მაგიდას მიუჯდება)

ტანო: არც მე...

(ქილა ლუდს გამოიღებს მაცივრიდან, მერე რაღაცა დააეჭვებს თითქოს და TBC ბანკის კალენდარს გახედავს კედელზე, თან თითებზე ითვლის; ამ დროს ვიღაც ჯეელი შემოჯლიგინდება, იფიქრებთ, მატარებელზე აგვიანდებაო. მაღალ-მაღალია, ხმელ-ხმელი; გადახარშული ჯინსები და ეგრეთივე ქურთუკი მოსავს, გადაკრულშია, წყალი არ გაუვა)

დილერი გოგიტა: აბა, ჩემი ცუნცულები, ჯინ-ტონიკი, ლიმნით, მაღალ ჭიქაში, სწრაფად და ტემპში! *(ჯანოს):* ძმაკაც, შენთვისაც არ დაუუკვეთო რამე?

ჯანო: მადლობელი. ჯერ მაქვს აგერ... *(ლუდის ქილას წევს მისალმების ნიშნად)*

დ.გ.: *(ჯანოს მიუჯდება, დაუკითხავად)* აფრიან ნაკვებთან თუ გქონია როდისმე საქმე?

ჯანო: მადლობა ღმერთს, ჯერ არა.

დ.გ.: არც წამოიწყო. ვერაფერი ხეირია. ვიცნობდეთ ერთ-მანეთს — დილერი გოგიტა. გოგიტა დილერი კი არა, დილერი გოგიტა, არაფერი შეგეშალოს.

ჯანო: რას ბრძანებთ!

დ.გ.: აი ის ფილმი არ გინახავს, ხეზე გასულ ვირზე რო იყო? მე ვიყავი მაგის პროდუსერი. *(მთელ ჰაიბოლოს ერთბაშად ყლურწავს)* დღეს რა რიცხვია?

ჯანო: 31 ივნისი, გინდ დაიჯერეთ, გინდ არა.

დ.გ.: რაზეა ლაპარაკი! წესით, ახლა უკვე ბათუმ-ქალაქში უნდა ვიყო — ანტალიაში ვარ გადასასვლელი — იქ 80 ყუთი ლაყე კვერცხი მელოდება, ერთ ტიპს გაუურიგდი... ნაღღში

რო არცერთი არ ვიყავით ფხიზელი... ახლა 80 ყუთ ლაყე კვერცხს რა ვუყო?! ცალობით 16.000 გამოდის...

ჯანო: მერე, რა პრობლემაა — აიღეთ და ლაყე კვერცხების ტაფამწვარს გაუკეთეთ რეკლამა. *(ჩაფიქრებით)* ვთქვათ, ასე: “თქვენ რა, ჯერ კიდევ ჩვეულებრივი კვერცხით იკეთებთ ომ-ლეტს?!” ან რამე ამდაგვარი. სარეკლამო ბიურო ერმიკო&Cო. არ გაგიგიათ? მიგასწავლით.

დ.გ.: აგაშენა ღმერთმა! რა თქვი, რა მქვიაო?

ჯანო: არაფერი მითქვამს. ისე, ჯანოს მეძახიან.

დ.გ.: ა, ასე კეთდება საქმეები, ჯანო ჩემო. კაი გამახსენდა, პანამის საელჩოს ტელეფონი იცის აქ ვინმემ?

ჯანო: ნაღღში არა. აი, შენ კიდევ ერთი ვინმე მახალოდ გა-მოწყობილი ჯუჯა რო გიტრიალებდეს ცხვირწინ და ში-გადაშიგ საკუთარ ნახატებსაც გაპარავდეს, რას იტყვოდი?

დ.გ.: *(წარბშეუხრელად)* ეგ რომელი, შენ რო დაგეძებდა? რა ვი-ცოდი,
ქურდი თუ იყო, მე მაგისი...

ჯანო: *(პირდაღებული)* გინდა თქვა, მეც ვნახეო?!

დ.გ.: აბა, არა? კარში შემეფეთა — აქეთ-იქით აპარპალებდა თვალებს და შენ რო დაგინახა, ყურებამდე გაეხა პირი... დაიცა, ახლავე მოვალ, ფეხი არსად გაადგა უჩემოდ!

(გავიდა და იქაურობაც დაცარიელდაო თითქოს)

ჯანო: როგორი ამბავია, ჰა?

ტანო: რა ამბავი?

(კარებში ქონდრისკაცი ჩნდება, ჯანოს თვალს ჩაუპაჭუნებს და წამსვე გაქრება)

ჯანო: გაფიცებ ყველაფერს, დაინახე?!

ტანო: რა?

ჯანო: რა კი არა, ვინ — ჯუჯა, ჭრელ-ჭრულებში...

ტანო: კარი გაიღო, დავინახე, ოღონდ არავინ შემოსულა...

(ამ დროს ჯანოს მაგიდასთან და მის ბირდაბირ, ვინმე იმპოზანტური იერის, ინკლიკანტური ჩაცმულობისა და ფრიალ შთამბეჭდავი გარეგნობის მასტი იჩითება. თავის შავ-თეთრში გადაწყვეტილი სამოსის გამოისობით მავან ძველი ყაიდის ფოკუს-ნიკსა ჰგამს, სცენაზე გამოსასვლელად რომ ეშხადება)

უცნობი: გამარჯობა შენი, ჯიორჯი!

ჯანო: გაგიმარჯოს, თუ გინდა... ისე, *ჯიორჯი* კი არა, გიორგი მქვია. მოკლედ, ჯანო. თქვენ კიდე, ისა... რაღაც მეცნობითსავით. თეატრალური საზოგადოება... ნინისთან ხო არ განახეთ, *ფართიზე?* ილუზიონისტი არა ხართ?

უცნობი: მახვილი თვალი გაქ, ჯანო-ბიჭი! ილუზიონისტობა სწორედაც რომ დამშვენდებოდა... მალგრიმს მეძახიან (*ტანოს გასძახებს*): ერთი ის ბოთლი მომაწოდე, კარგო! ეგა, ეგა, მწვანე ფერისა...

ტანო: (*ჭკუაზე არაა*) არ მითხრათ ახლა, *მთელი* ბოთლი პიტნის ლიქიორი უნდა გამოვცალო!

მალგრამი: რატომაც არა, რო-ო? სწორედაც მისწრებაა ამ სიცხეში. (*თაროდან დიდრონ ტოლჩას ჩამოიღებს და ბოთლს შიგ ჩაცლის; მერე ჯიბიდან ასიგნაციების დასტას დააძრობს და დახლზე აგდებს, დარდიმანდულად*) ამათგან ხელი მალე დაიცალე, კარგო — შუაღამეს ხმელ ფოთლებად გადიქცევიან... ოღონდ სანამ 31 ივნისია, არაფერი უჭირთ.

ჯანო: შენცა, ბრუტოს? და ჯუჯაც ხო არ გინახავთ სადმე ახლოში?

მალგრამი: მინახავს რა თქმაა — სამსახურში მიდგას. გრუმეტს უხმობენ.

ჯანო: მაგ ვირიშვილმა ნახატი ამწაპანა!

მალგრამი: ჰო-ო, ვერ იყო კარგი საქციელი... ვწუხვარ, ნამდვილად. მაგრამ საქმე მოითხოვდა ასე. პრინცესა მელის-ენტამ საკუთარი თვალით იხილა და უნდა გითხრათ, აღტაცებულა პირდაპირ, აღტაცებული... შენი გაცნობაც კი ისურვა! ამიტომაც გეახელით ამ სამიკიტნოში. *პროზიტ!* (*კათხას მოიყუდებს და ძირამდე დაიყვანს*).

ტანო: ღმერთო, შენ უშეგლე ყველა ლოთსა და უბედურს!

მალგრამი: ჰოდა, იმას ვამბობდი — დროისა და სივრცის ფარდობითობის საკითხში როგორა ხარ?

ჯანო: გმადლობთ, კარგად... ე-ე... ეგ პრინციპა მელისენტა ვინაა?

მალგრამი: წარმოიდგინეთ ექვსგანზომილებიანი სამყარო, სადაც, მოგეხსენებათ, პირველი სამი — ესაა სივრცე, სივრცე და სიმაღლე, ხოლო დანარჩენ სამთაგან პირველი — ეს ყურადღების გაამახვილებიან და ქმედების სფეროა, მეორე — მესიერების, ხოლო ბოლო, მაგრამ არა უკანასკნელი — წარმოსახვისა. გესმით ჩემი? ხომ ნათლად და გარკვევით ვლაპარაკობ?

ჯანო: ისე, რა... აი, მელისენტა...

მალგრამი: სწორედ მაგ საკითხს მივადექით: ყოველივე წარმოსახვითი სადღაც სამყაროში ხომ რეალურად უნდა არსებობდეს!

ტანო: მაშ, ეგრეა.

მალგრამი: თქვენა გგონიათ, პრინციპა მელისენტა — ეს რაღაც მხოლოდ წარმოსახვითი არსებაა, ფანტაზიის ნაყოფი, ასე ვთქვათ...

ჯანო: (ფრთხილად) ე-ე... ერთის მხრივ, რაღა თქმა უნდა... ოღონდ, ე-ე... სხვა მხრივაც თუ შევხედავთ...

მალგრამი: ... და მართალიც იქნები — ერთიც სწორია და მეორეც. და რაკილა ის დარწმუნებულია, ჩემი ცხოვრებაა რეალობა, ცხადია, თქვენ ამ რეალობის მიღმა იმყოფებით და სწორედ რომ ასე და ამგვარად აღვიქვამ ამას მეც!...

ჯანო: დაიცა ე-ე! გინდა თქვა, ჩვენ ცხოვრებაა ირეალური?!

მალგრამი: აბა, რას გიჩიხინებ ამდენ ხანს? ფუჭი იმედების, ზმანებების, ილუზიებისა და ფანტაზიების სამყარო! თუმცა, სწორედ რომ მეორეს მხრივ, ეს სამყაროც არსებობს, რეალურად... და თქვენც მასში!. და თქვენც, ჩემო პატარა ქალბატონო.

ტანო: მადლობელი, დიდად. თორემ უკვე ეჭვი მომერია...

ჯანო: ჩემმა ნახატმა რაღა დააშავა?

მალგრამი: არც არაფერი, გეკადრება?! უბრალოდ, იმას გიხსნი რომ ჩემი, რეალური სამყაროდან ამ წარმოსახვითში გადმოვ-
ედი და შენ გნახე; და ახლა როცა ამ რეალური სამყაროდან
იმ წარმოსახვითში გადავალთ, მელისენტასაც შეხვდები! მოკ-
ლედ, რომელია აქედან ნამდვილი და რომელი — ილუ-
ზორული, ეს უკვე, ასე ვთქვათ, ტექნიკის საკითხია... მე თუ
მკითხავთ, ორივე რეალურია და, ორივე — წარმოსახვითი,
იმავდროულად.

ჯანო: აი, ის ჯუჯა კიდე რომელს ეკუთვნის?

მალგრამი: ამჟამად — არცერთს: ეს-ესაა შინ გაავაგზავნე და
ახლა ზედ შუაგზაშია გახილული.

(კარი მოიფიათება და ბრუნდება დილერი გოგიტა)

ტანო: აჰა, ჯოჯოხეთს ერთი მაშხალა აკლდაო...

დ-გ-: აბა, ორი შოტლანდიური, ცუნცულ! *(მალგრამს და ჯა-
ნოს):* რას დალევთ?

ჯანო: მაღლობელი, ჩვენ უკვე. გაიცანით — დილერი გოგიტა,
ბ-ნი მალგრამი, ილუზიონისტი.

დ-გ-: ვიცნობთ, ვიცნობთ, გვსმენია! *(ენერგიულად ართმევს
ხელს მალგრამს)* პენ-კლუბში გიხილეთ. მგონია, “თეთრ ყუთ-
შიც” — შავ სტუმრად... გადასარევი ნომერი იყო! *(ტანოს):*
აჰა, ცუნცულ, ხურდა შენთვის დაიტოვე. აბა, ვიფოთ წიე,
კარგათ! *(ელურწავს).*

ჯანო: ჯუჯა სად შინ გაგზავნეთ?..

მალგრამი: პირადორის ქვეყანაში, რასაკვირველია.

დ-გ-: ეგეთი არ ვიცი. *იკ!* *(ასლოკინებს)* ისე, პიდორებით კი
გაივსო ქვეყანა...

ჯანო: ეგ სადაა? იქ როგორ მოვხვდებით?

მალგრამი: მესამე სფეროში გარდასახვით, რაღა თქმა უნდა. ანუ,
ზომ არსებობს დრო პარალელური, ასევე კონვერგენტული და
კვლავ ასევე, დივერგენტულიც და სწორედ ეს დრონი გადაიკ-
ვეთებიან, უსასრულობაში.

ღ-გ-: მაგარია, წყალი არ გაუვა! ჰო, წყალსა და დროზე გამახსენდა: ერთი კაცს ვიცნობ, აფრიან ნაეზე, წყლის სათადარიგო ბალონში 40 ცალი ნაღდი “როლექსები” აქ გადაძალული... განბაჟება არ აწყობს... ე-ეჰ! არ დავლიოთ სადმე?

მალგრამი: *(ქუშტად გახედავს)* მე და ჯანოს პირადორში...

ღ-გ-: *(აწყვეტილებს)* მერე, მე?! აქ ხო არ დამტოვებთ?..

მალგრამი: ისე დაგტოვებთ, როგორც დაგიბარებია.

ღ-გ-: შანსი არაა! *(ჯანოს მხარზე მოხვევს ხელს)* მე და ეს ბიჭი ახლა კვერცხების რეკლამის ბიზნესში ვართ ჩართული და სადაც ის, იქაც მე!

მალგრამი: თქვენი საქმისა თქვენ იცით, ოღონდ არ დამიწყოთ მერე — ესაო, ისაო...

(საიდანღაც ქარი და ბორიო დაბერავს, კედელს გაიტანს და სამი ზრდასრული მამაკაცი უზარმაზარ ხვრელში გაქრება. უკანასკნელი, რაც ცნობამისუსტეებული მიმტანი გოგონას გონებაში ჩარჩება, “ილუზიონისტის” შეძახილია: “კეთილი იყოს თქვენი ფეხი პირადორის სამეფოში, ბატონებო!”)

ის იყო, ჯერ არც მთლად ჭკუაზე მოსულმა და წმინდად სამკურნალო მიზნებით, ტანომ ერთი კარგა მოზრდილი ყლუპი “კონიაკისებური” ჩამოისხა ჭიქაში, რომ ყავახანაში ლიკა და ზუკა შემოლაგდნენ — მაღლები, ტანთხელნი, ენერგიულები, ჯერ-ჯერობით მომდიმარენი.

ლიკა/ზუკა: დილა მშვიდობისა!

ტანო: *(ცდილობს, სრულ ჭკუაზე მოვიდეს)* კი, ნამდვილად... მაგარი ამინდია, რომ იცოდეთ... დღეს.

ზუკა: აბა, აბა! უკეთესი არ გინდა.

ლიკა: კარგია თქვენთან, სიმშვიდეა.

ზუკა: *(მოშხიბლავი ღიმილით, თუმცა სულ ტყუილად — ტანოს თვალები ჯერ ისევ მიბნედილი აქვს)* ე-ე, ჩვენ ერთ ჩვენს მეგობარს ვეძებთ, აქ ვიქნებო, დაგვიბარა...

ტანო: წერეთელია?..

ლიკა: არა, სიღამონ-ერისთავი. არ შემოსულა? ჯანო ჰქვია.

ტანო: კი, ახლახან იყო აქ.

ზუკა: სადაა მერე?

ტანო: *(გაჭირვებით)* გინდ დაიჯერეთ, გინდ არა... ეგა და კიდე
ორი

დარეხვილი მასტი აი, იმ ხვრელში გაქრნენ... რაღაც საჩქარო
საქმეზე... პრინციესაო, სფეროებიო... ორი ჯუჯა და შვეი-
ცარიული საათები, ბლომად...

ლიკა: ვერ გავიგე-ე?!

(ორივენი ნაპრალს მიაშტერდებიან კედელში, მერე – ერთმანეთს)

ლიკა: ზუკა, დაგვაზეთ ოფისში! ბ-ნ ერმიკოს ნაღდად არ
გაუსწორდება...

სურ. V **მშვენიერი დილის მძიმე დასასრული**

სწორედ ამ დროს, ბ-ნი ერმიკო გასწორებულში ნაღდად რომ არ გახ-
ლდათ: ტელეფონზე ლაპარაკობდა, უფრო სწორად, *ცდილობდა* ვი-
ლაციისთვის რაღაცა გაეგებინებინა, მაგრამ უშედეგოდ: პნევმატური
ჩაქუჩების დაგადუგს მიჰქონდა იქაურობა. ერთი ღრმად რომ
დაფიქრებულყო ვითარების გასაანალიზებლად, იოლად მიხვდებოდა
რომ ყურმილში სულაც არაა საჭირო გარე ხმა გადაფარო, მაგრამ
ისეთი გავეშებული გაჰყვიროდა რაღაცას, იქითა მხარეს სიტყვა ვერ
გაეგოთ მისი.

ბ-ნი ერმიკო: ამ დილას ვნახე თქვენი ესკიზი... გავეცანი, ასე
ვთქვათ! *ჰინ* კი არა, თქვენი ესკიზი-მეთქი! არაფრად ვარგა! ა
-რ-ა-ფ-რ-ა-დ!! რის აფრა, რა იახტა... პაკეტებისათვის არ
გამოდგება-მეთქი!. რაკეტები კი არა, *პაკეტები!!* მომხმარე-
ბლზე უნდა იყოს გამიზნული... დამიზნული არა, ის... მყიდ-
ველი უნდა გვყავდეს მიზანში... არ გადამიყვანოთ ჭკუაზე,
ირაღით არ ვვაჭრობ!. დმერთო, რა შეგცოდე ასეთი... მერე
დაგირეკავთ! *გადმოვირეკა*-მეთქი, გეუბნებით!!

*(ყურმილს მაგიდაზე დაახეთქებს და ახლა კარადას გახედავს. როგორც
ვითხარით, ჩვეულებრივი კარადაა — საოფისე, ფოლდერებისა და
ათასგვარი ქაღალდ-დოკუმენტების შესანახი. ოღონდ ბ-ნ ერმიკოს მაგის
ჯავრი ჭამდა მაინც...)*

... და სწორედ ამ დროს ვირთხას დაინახავს — დიდრონი, ნა-
პატიები, რუხი ფერის ცხოველია, მღრნელთა ოჯახიდან. აშკარა იყო,
კარადიდან გამოვიდა, ოღონდ როგორ — ეს უკვე სხვა საკითხია,
რადგან კარადის არც ერთი კარი ნაღდად რო არ გაღებულა. ვირთხა
უკანა თათებზე ჩაჯდა, ბ-ნ ერმიკოს გაუსწორა თვალი და — “**ჭი-ჭი-
ჭი**”-ო, დაიწრიპინა. ეს უკვე მეტისმეტი იყო! ბ-ნმა ერმიკომ კალკუ-
ლატორს წამოავლო ხელი და აბეზარ სტუმარს თავში გაუქანა,
ოღონდ ააცილა, თანაც — გვარიანად.

ბ-ნი ერმიკო: *(ღრიალებს) თა-აკო!!!*

*(ოთახში რეფერენტი თაკო შემოიჭრება, მადალქუსლიანი ფეხსაცმელების პაკა-
-პუკით)*

... ღმერთმანი თაკო, ოფისში ვირთხები გვყავს!!!

თაკო: კი, ორი. რა მერე?

ბ-ნი ერმიკო: გაგვიჟღები, ნამდვილად გაგვიჟღები... ქალო,
ზუკასა და ლიკაზე კი არ გეუბნები, ნამდვილი ვირთხა
ვნახე ამწამს, კარადიდან გამოშპა!

თაკო: რას ბრძანებთ, შეუძლებელია!

ბ-ნი ერმიკო: ჰო-მეთქი, მე გეუბნები! იჯდა აქ ჩაცუცქული
და შიგ თვალებში მიყურებდა... ერთი სიცოცხლე გა-
ვათავე! თან რო დამცინოდა კიდეც!. მერე ისევ
კარადაში შეხტა! ამაზე რას იტყვი?!

თაკო: რასა და შინ უნდა წახვიდეთ, ბ-ნო ერმიკო...

ბ-ნი ერმიკო: გადამრევს ეს ხალხი! სახლში რა დამრჩენია?!
აქ საქმე მაინცა მაქ, ოხრად...

თაკო: ჯანმრთელობის ფასი არაფერია, ბ-ნო ერმიკო!

ბ-ნი ერმიკო: თქვა ამანაც... მერე, ვირთხა რა შუაშია?.

თაკო: სწორედაც რომ, ბ-ნო ერმიკო... ამდენი მუშაო-
ბაც არ შეიძლება, სულ გამოიფიტებით... თქვენს
მეუღლეს დაეურეკავ და...

ბ-ნი ერმიკო: ახლა შენზეც აეჭვიანე! მე შენ მოგცემ მეუღ-
ლეს! რა მოხდა, ბოლო-ბოლო, ქალაქი სავსვა

ვირთხებით — გინდა პირდაპირი, გინდა
გადატანითი...

თაკო: *(ორი კურცხალი ვადმოუვარდება თვალებიდან)* ვირთხა რა
შუაშია... აკი ჯუჯაც იყო...

ბ-ნი ერმიკო: იყო, კი... რა მერე?!

თაკო: და ისიც კარადაშიო...

ბ-ნი ერმიკო: *(უცებ იყვანს თავს ხელში, ოფიციალური ხმით)* კარგით,
გეყოფათ! თქვენ თქვენს საქმეს მიხედეთ, ქ-ნო!

*(თაკო გატრიალდება, ტოპ-მოდელის ნაბიჯით გადის კაბინეტიდან; ოღონდ კარს
მიღმა მისი ხმაძალი, თეატრალური ჩურჩულით დაგდებული სიტყვა მოისმის:
უგულო!)*

ბ-ნი ერმიკო კარადასთან მივიდა და იჭვიანად გამოაღო ცალი
კარი. ფოლდერები, ქაღალდები, დისკეტები და არავითარი ვირთხა...
დაფიქრებით მოათვალიერა თაროები, მერე... და უცებ ოთახში ისევ
რაღაც ფაჩუნს გაისმა. მოტრიალდება დაფეთებული და ხედავს —
ძან ლამაზი კუკლა-გოგო იჩითება მის წინ: უცნაურად აცვია, დგას
და უღიმის, ასევე ძან მომხიბვლელად... ბ-ნი ერმიკოს კვლავ კარა-
დისკენ გაექცევა თვალი, იჭვნიულად, მაგრამ იქვე მოთოკავს თავს.

ბ-ნი ერმიკო: *(არცთუ ძან ზრდილობიანად)* აბა? გისმენთ!

მელისენტა: ეს მე ვარ. თქვენ ვინა ხართ?

ბ-ნი ერმიკო: ამასაც მოვესწარი... საკუთარ კაბინეტში... ასე
თუ იარა აქ ყველამ... სუფთა ბარდაგია...

მელისენტა: რა არის “ბარდაგი?”

ბ-ნი ერმიკო: მინდოდა მეთქვა... კაროჩე, რა გნებავთ?

მელისენტა: ჯანოს ვეძებ.

ბ-ნი ერმიკო: *(ცოტა გულზე მოეშვება)* ა-ა, გასაგებია — **“ჩემი
მშვენიერი წინდა!”** მართლა მშვენიერი ნატურა
ხართ, ღმერთმანი! ჯანო მალე მოვა,
მის მოსაძებნად უკვე გავაგზავნე ხალხი... მოვა თუ
არა, საქმეს შეუდევით, დრო არ ითმენს!

მელისენტა: მე მგონი, შეყვარებული ვარ...

ბ-ნი ერმიკო: თქვა ახალი ამბავი! არც პირველი ხარ და არც უკანასკნელი — ჯანო კიდე სხვებს ჯობია... რა თქვით, რა მქვიაო?

მელისენტა: პრინცესა მელისენტა, თქვენის ნებართვით.

ბ-ნი ერმიკო: ძალიანაც კარგი! შარშან დიდი რუსის მთავრის შვილიშვილი მუშაობდა ჩვენთან მოდელად, მანამდე კიდე — ნუციკო ჩოლოყაშვილისა და ლიზიკო, მგონი ბაგრატიონი... საერთოდ, ყოფილი არისტოკრატებისაგან რატომღაც მშვენიერი მოდელები გამოდიან — გენეტიკის ამბავია, ალბათ...

მელისენტა: *ყოფილი* არისტოკრატი რა უბედურებაა?! *რაინდყოფილებიც* გყავთ?.

ბ-ნი ერმიკო: რამდენიც გინდა... *(აქ პნევმატური ჩაქუჩების ისეთი რახრახი ატყდა, საბრალო მელისენტა შიშით კუთხეში მიიკუნტა)* ყურადღებას ნუ მიაქცევთ, ჩემო კარგო — ჩვეულებრივი ამბავია, აღმშენებლობის გზას ვაღდავართ, მოგეხსენებათ...

მელისენტა: მაპატიეთ, ოღონდ... ჩვენთან, სი-ნამდვილეში, ასეთი რაღაცეები...

ბ-ნი ერმიკო: სადა, სადა?

მელისენტა: სინამდვილეში. აქ სადმე მაგისტრი მალრა-გრამი არ გინახავთ?

ბ-ნი ერმიკო: აზრზე არა ვარ, ვინაა. საუნივერსიტეტო წრეებს და საერთოდ, *ნაღდ უნივერსიტეტელებს* ახლოში არ ვეკარები! იმედი მაქ, რეფორმების მერე, იქ საერთოდ აღარაფერი დარჩება...

მელისენტა: მეცნიერი კი არა, ჯადოსანია!

ბ-ნი ერმიკო: ჯადო-შელოცვებილა მაკლდა! ისე, ერთი ძაან-ძაან უცნაური ვირთხა კი დავინახე, შუა კაბინეტში წამომისკუპდა და ხითხითებდა...

მელისენტა: ეგ იქნებოდა სწორედ! მითხრა კიდეც, ვირთხად გადავიქცევი და ასე უფრო იოლად შევად-წევ იქო...

ბ-ნი ერმიკო: *(წამოჭარხალდება, მძიმე-მძიმედ სუნთქავს)* ერთი წუთით, პრინცესა! ახლა ჩემს მდივანს დავუძახებ და მეცით პატივი, რაც ახლა თქვით, ერთი იმასაც გაუმეორეთ... შიგ პირში უთხარით! *(ინტერკომში)* თა-ა-კო!

თაკო: რაო, ბატონო... უი, ეს ვინაა? ჯანოს ახალი მუზა? მერე, აქ რა გინდა? მაკიაჟი კი სულ გადაგსვლია — მოდი საყვარელო, ჩემთან... *(კუთხეში მიღებთან, სარკესთან).*

ბ-ნი ერმიკო გაოგნებული მისჩერებია მათ, მერე მაგიდის უჯრას გამოადებს, ტყავით გაწყობილ ლითონის მათარას დაადრობს და ერთს კარგად მოიყუდებს. სწორედ ამ დროს შემოდის ლიკა და ზუკა.

ბ-ნი ერმიკო: აბა, რა ქენით, მოძებნეთ ჯანო?

ლიკა: არა, იკა ბატონო, ერთი დარეხვილი მიმტანი გოგოს გარდა არავინ იყო...

ზუკა: იმან კიდე ასე თქვა, კედელში გავიდა და გაქრაო... ვიდაც პრინცესას საძებნელად გაემართა, ძან მაღალ სფეროებშიო...

ლიკა: სწორედ ეგრე თქვა, იკა ბატონო, არაფერს ვიგონებთ...

ბ-ნი ერმიკო: *(წარბეუხრელად)* აგერ აქ ჯანოს ნატურა გამოგვეცხადა, ამბობს, პრინცესა მქვიაო...

(მობილური ი.ს. ბახის Badinerie-ს ან, უკეთეს შემთხვევაში, მოცარტის “თურქულ მარშს” რეკს)

... რაო? მე ვარ... *(ზუკას)* ისევ ტელევიზიიდან! არ წაიღეს ტვინი! დაელაპარაკე ერთი — სარეკლამო აგენტი არა ხარ, ბოლო-ბოლო?

ზუკა: *(ტელეფონს გამოართმევს)* დიას, დიას... რაო? კარგით რა — ასეც ხო არ შეიძლება, ცოტა ადრე გაგეფრთხილებინეთ! სანამ წკიპზე არ მიიყვანთ საქმეს... თოქ-მოუ არა, ბლოკ-მოუ... *(უცბად, მელისენტას დაადგამს თვალს და სახე გაუნათდება)* კარგი, კარგი, ერთი გუნდი ვართ, ბოლო-ბოლო... *(მობილურს თიშავს, ახლა ბ-ნი ერმიკოს აბამს, ყელგაწვდილი)* SOS, იკა ბატონო! ეგ გოგო უნდა მათხოვოთ ერთი საათით! კლიენტს

დავკარგავთ... თან რა კლიენტს! *(პასუხს არც ელოდება, მელისენტას ავლებს ხელს)* წამო, ჩემი კარგი გოგო, ისეთი საქმეა, სულ ერთი საათის...

მელისენტა: მერე, ჯანოს ვნახავ იქ?

ზუკა: შანსი არაა, მაგიორში — დიდი შანსია რომ ჯანომ გნახოს...

მელისენტა: *(ბ-ნ ერმიკოს, მხარსიქით)* თუ მარლაგრამ-ჯადოსანი გამოჩნდა, უთხარით სად ვიქნები... და ნუ შიშობთ — რაკი ვირთხის ქურქშია გახვეული, სულაც არ ნიშნავს რომ ადამიანურად ლაპარაკი არ შეუძლია! *(გადიან)*

ლიკა: *(ცოტათი დაბნეული)* ე-ე... რა თქვა, რა მინდაო?

ბ-ნი ერმიკო: *(ძლივს იკავებს თავს)* რაო ვითომ — უბრალო, მარტივი, სადი აზრის გაგებაც აღარ შეგიძლიათ არავის?. აკი ითქვა — თუ ვირთხადქცეულ ჯადოსან მაგისტრ მარლაგრამს ნახავ, ადამიანურად დაელაპარაკეო... და არ დამიწყით ახლა!.. მორჩა კინო, გაიასნებულა ამბავი!

ლიკა: კარგი, კარგი... და აქ საიდან გაჩნდა?

ბ-ნი ერმიკო: საიდან, საიდან... კარადიდან! რაა აქ უჩვეულო?! *(მაგიდის საეკლესიო კალენდარს დახედავს და უცებ სახე შეეცვლება)* ე-ეს რაღაა?! *(დაავლებს ხელს და კუთხეში მოისვრის. კალენდარი 31 ივნისზე აღმოჩნდება გადაშლილი...)* როდისმე მოედება ამას ბოლო?! *(მაგიდაზე თითებს ათამაშებს, ნერვიულად)* არა, ეს ვირთხა მაინც...

ჰი-ჰი-ჰი!..

ბ-ნი ერმიკო: არა, *გაივონეთ?*

ლიკა: თითქოს ვიღაც...

ბ-ნი ერმიკო: ჩუმად!!!

ჰუ-ჰუ-ჰუ!

(ბ-ნ ერმიკო თავს ხრის, სახე ეღრიცემა, ბანდერილით "დამუშავებულ" მიურის ხარს წააგავს)

ბ-ნი ერმიკო: დაიცა, მე შენი!.. *(კარადას ეცემა, კარს გამოაღებს და გაუჩინარდება კიდევ შიგ)*

ლიკა და თაკო: *(ერთხმად)* ვაიმე, იკა ბატონო, არ შეძლება თქვენნი ასე გარეთ გასვლა — წნევა, გული... *(ორივენი კარადას ეცემიან და თავადაც გაუჩინარდებიან. ამ დროს შემოდის ექიმი ჯარვიშვილი, დინჯად)*

ექიმი ჯარვიშვილი: *(პროფესიული სიმხნევით)* აბა, ამჯერად რას უჭივით?

...ოღონდ იმასლა მოჰკრა თვალი, ქალის ორი წყვილი, ჩამოქნილი ფეხი როგორ გაუჩინარდა კარადაში. შეიცადა, გონება მოიკრიბა და კარადის კარი გამოაღო, ფრთხილად. ოღონდ შიგ თაროებისა და ზედ დაწყობილი საკანცელარიო საჭურველის მეტი ველარაფერი ნახა.

მოქ. II, სურ. VI

სადაც ჩვენს ჯანოს მაგრა ერხევა

ა-რა-ა, ჩვენი ჯანო სულაც არ გახლდათ კმაყოფილი — გზაში, რატომღაც, თავის დოსტებს აცდა და ახლა მარტოდმარტო მიიკვლევდა გზას ჩაბნელებულ, ნესტიან, დახვეულ და № რაოდენობის საფეხურებიან კიბეზე. არა, ბაზარი არაა, მელისენტას ნახვა როგორ არ უნდოდა, ოღონდ ამკარად რომ გზა-კვალი ჰქონდა აბნეული და ეს უფორიაქებდა სულს. კიბის რომელიღაც, მორიგ ბაქანზე ვიდაცა გიტარას აკვნესებდა და რაკი დაუპატიჟებელ სტუმრად იგრძნო თავი, ჯანოშაც თავი ვალდებულად ჩათვალა, ზრდილობისთვის მაინც მოესმინა ბოლომდე.

ჯანო: მადლობელი, დიდად. რამეს კიდევ არ დაუკრავდით?

(მუსიკოსი წამოდგა, გაუღიმა, თავი დაუკრა).

ჯანო: ერთი წუთით... ახლა გამახსენდა, ამასწინებზე ერთ ახალ ჰიტს ატრიალებდნენ — დაიცა, რა ერქვა? ჰო — *“შავმა რაინდმა დაატყვევა გული ჩემი”*... ეჭვი არაა, გეცოდინებათ...

(მუსიკოსი ერთი კი გაიჭყანა, “მეხი და მედგარიო” — ჩაიბურტყუნა, დაავლო თავის ინსტრუმენტს ხელი და უკანმოუხედავად გაძვრა რაღაც ტალანში).

ჯანო: როგორა?! ეგ გამოთქმა კი წამიკითხავს სადღაც, ოღონდ... დაიცა ძმაკაც, გაწყენინე რამე?.. *(უკან მიხლევის, მაგრამ რომელიღაც დარბაზში იმისთანა კუკლას გადააწყდება, კი ღირს ფეხს შეუნელოს)*

ლელი ნინეტი: ვითარ გრძნობს თავს კეთილშობილი რაინდი ჩვენი, მრავალთა დიდ-დიდთა ჭირთათმენათა და საქმეთა საგმირონთა შემდგომ?

ჯანო: *(აშკარად რომ ჭკუაზე ვეღარ არი)* ჩვენ... ე-ე... მუნ ვმყოფობთ ვითარ ეგების... ე-ე...

ნინეტი: *(ჩვენს წამხდარ დროშიც კი წარმოუდგენელი სიღრმის დეკოლტეს ვითომდა ისწორებს)* ... გმირთა საღმობაგამოვლილთა და უამესთა ჭირ-ვარამთა გარდასახადად თავგადადებულთა, ესე არა არს, მაღალო ბატონო ჩემო?

ჯანო: საქმე ის გახლავთ, ე-ე... კეთილმოსილო ბანოვანო, რომელიცა რომა... ე-ე...

ნინეტი: კარგი ახლა, ჯიორჯი-ბატონო, ემანდ ენა არ მოიტეხო... ლელი ნინეტი გახლავართ, სეფექალი — თქვენ კი, გატყობთ, შიმშილით სული გძვრებათ...

ჯანო: აგაშენათ ღმერთმა! არ მოისხით ჩემი მადლი?! მშია და ეგრე? სადილის დროა უკვე, მე კიდე თამბაქოს ბოლისა და ყავა-ლულის მეტი დღეს პირში არაფერი ჩამსვლია...

ნინეტი: *(საზეიმო იერით, ფარდას გადასწევს და ნიშაში გაშლილ მაგიდასთან მიიყვანს, ხელკავით)* დიდი კი არაფერი, მაგრამ რაც შემიძლო ასე, თათარიახნად...

ჯანო: ეუფ! ეს სულ ჩემს საპატივცემულოდ, ლელი ნინეტი?!

ნინეტი: აბა, მექორწილე გენერალს ხომ არ დაგისვამთ სუ-ფრაზე? ასე, *a l'amur* არა ჯობია? ცივად მოხარშულ გედის ან ფარშევანგის ხორცს ეცით პატივი, არაა ურიგო... აი, ბატის პაშტუტი კი ნამდვილად რომ საუცხოოა — მეფე-ბატონი მას შინაურებს პირს არც კი აკარებინებს და უცხოებს — მით უმეტეს...

ჯანო: *(ისე ილუკმება, ხმის ამოსაღებად ვერც იცლის)* მაგარია, ნამდვილად.

ნინეტი: აი ეს ღვინო დაისხით, ჯიორჯი — 2-წლიანია!

ჯანო: ნამდვილად. ორმაგად ურტყამს თავში. *(ცოტა ხნის მერე აზრზე მოდის, რაღაცა მაინც უნდა უთხრას მშვენიერ მასპინძელს)* რამე რო იყოს, ლედი ნინეტი, სადა ვართ, რა დროში ვართ?

ნინეტი: *(ცალ წარბს ზევით აზიდავს გაკვირვების ნიშნად)* ანუ?..

ჯანო: მინდოდა მეთქვა, ე-ე... ხელმწიფედ ვინ ზის თქვენთან?

ნინეტი: *(იცინის)* რა უცნაური გამოთქმაა! მეფე ართური, რაღა თქმა უნდა!

ჯანო: აჰა, ე.ი. ლეგენდარული მეფე ართურის ხანა... მრგვალი მაგიდის რაინდები, მერლინი, ფერია მორგანა, გვე-ლეშაპები და გოლიათები...

ნინეტი: მაშ, სრული სტაბილურობა და წესრიგი... თქვენს მითიურ ქვეყანას ვინღა განაგებს, ჯანო? ნებას მომცემთ, ასე დაგიძახოთ, შინაურულად?

ჯანო: რაზეა ბაზარი... მოკლედ, არის მმართველი პარტია და მართავს... როგორც შეუძლია. ან როგორც უნდა — გააჩნია, რა თვალთ შეხედავ საკითხს. მერე, ნომინალურად ანუ ვითომ — ხალხის არჩეული საკრებულოები, ალაგ-ალაგ — დანიშნული გამგებლები, გუბერნატორები... ოღონდ თავი და თავი პრეზიდენტი — ხომ გაგიგიათ, თევზი... თუმცა არი კიდე ორი ნაზირ-ვეზირი, ეგენიც თავისას აწვებიან. ოღონდ წეს-კანონებს, წესითა და რიგით, პარლამენტი იღებს, ან ვერ იღებს ხოლმე... ე-ე... მართალი გითხრათ, ლედი ნინეტი, ამ საკითხებში მაგრა ვსრიალებ! რამე უფრო სასიამოვნოზე ვილაპარაკოთ ჯობია — აი ვთქვათ, პრინცესა მელისენტას იცნობთ?

ნინეტი: ო-ო-ო, ჯანო-ბიჭი! შიძლება ერთ ქალთან მეორეზე ლაპარაკი? თანაც უფრო სასიამოვნოდ — ეგ როგორღა გავიგოთ? მე ნაკლებ სასიამოვნოდ გამოვიყურები? (*მწვანე თვალებს დააკვესებს*)

ჯანო: (*მცირედანვე შეჩქეფებულია*) რას ბრძანებთ, ლედი ნინეტ — თქვენისთანა ლამაზმანი ერმიკოს სარეკლამო კანტორაში ერთი არ დაიარება! უბრალოდ, მისი პორტრეტი დაეზატე და მოსწონებია, მერე მარლაგრამმა მითხრა, დაგაჯახებო...

ნინეტი: (*ქუშტად*) სნობი ხომ არა ხარ, ჯანო ჩემო?

ჯანო: არავითარ შემთხვევაში!

ნინეტი: აბა, რა გვიშლის ხელს? აი, მაკბეთებს იცნობთ?

ჯანო: როგორ გითხრთ, ე-ე... პარადად — არ...

ნინეტი: შოტლანდიაში დაქალი მყავს ერთი, ოჯახთან ახლოსაა — ის მწერს, ცოტა ხნის წინ მაგათი არაუინ არაფერი იცოდლო — ერთი უბრალო, გაღლეტილი აზნაურები იყვნენ — ახლა კი... და სულ იმ ქალის მეცადინეობით! მაგარი გამტანი ვინმეა, გონებაც უჭრის და ხასიათიც მტკიცე აქვს, ჩემსავით...

ჯანო: (*წინასწარმეტყველურად*) “დრო, დრო აღნიშნეთ!..”

ნინეტი: (*თავისას ერეკება, როგორც ყველა იდეა-ფიქსშეპრობილი მანდილოსანი*)

... ცხადია, შოტლანდიას ვერ დამიგდებთ ფერხითთ, ოღონდაც ჭკუიანი და საკმარისად გარყვნილი ქალი აქაც გაახერხებდა რამეს! ერთი ნახეთ, ფერია მორგანა გინდა, ჯინევერა, ორკნის დედოფალი — საიდან სად გაიქაჩნენ! ასევე — ნაღდი შეთქმულებისათვის მხოლოდ ჭკუადამჯდარი ქალები და ჯადოსნები თუ გამოდგებიან!

ჯანო: (*მხრებს იჩეჩავს*) მაგისთანა ქალებისთვის ჯადოსნები რიდას მაქნისია?..

(*გაისმის ჰეროლდის ხმა*):

— მისი უდიდებულესობა მეფე მელიორტი — მეუფე პირადორისა, პატრონი ბერგამორისა, მარრალორისა და პარლოტისა, მფლობელი ქვემო ლანსინგტონისა, ზემო ტყისა და სამი გზისა, ხიდების ჩათვლით!!!

დასცხეს საყვირებმა და შემოდის, უფრო სწორად, შემობრბის მეფე მელიოტი, ერთის ვინმე გადამღებელი მრჩეველისა, შავ-თეთრ-ვერცხლისფრად დაზმანულ, ზოდიაქოს ნიშნებით მოსირმულ მოსასხამში გახვეული მალგრამისა და ორიც რიგითი ჯარისკაცის თანხლებით. მეფეს იმგვარი გამომეტყველება აღბეჭდვია სახეზე, ნაშუადღევს კარგად ნაპატიებსა და გკარიანად ღვინოდალელულ კაცს რომ კეთილად წაძინების საშუალებას არ მისცემენ და ახლა ვერც იმას ტვინავს კარგად, რა ხდება მის თავს და ხასიათზე ხომ — ვერ არი და ვერა.

მელიოტი: აქ რა სმა-ჭამა გაგიმართიათ უჩემოდ? (*ჯანოს მიათითებს*) ეს ვინდაა? თუმცა ეგ მერე... ჩვენი ქონდრისკაცი რა იქნა — ეგაა მთავარი!

ნინეტი: აქ გახლავთ, მეფე-ბატონო — მაგისტრმა მალგრამმა, ჯადოსანმა დააბრუნა უკან.

მელიოტი: ა-ა, იმ ტიპმა, არა?! იმას ვერ ვენდობით! აი ეს ვინდაა?!

მალგრამი: სწორედ მე გახლავართ მალგრამი, თქვენო უდიდებულესობავ, თქვენი მონა-მორჩილი.

მელიოტი: ფუი! ისევ ამერ-დამერია ყველაფერი! არა უშავს რა, მალევე დავალაგებ — მოგხედავთ სუყველას... დაიცათ, ა-ა-ის ტიპი ვინდაა?

მრჩეველი: ეგ თქვენს ქვეშევრდომთა რიცხვს არ უნდა განეკუთვნებოდეს, ასე მგონია მე...

მელიოტი: მე კიდე არაფერი არ *მკონია*, ისედაც ვხედავ! ან რა აცვია, ან — როგორ... შევიშლები, ნამდვილად შევიშლები... არც ჩაცმა-დახურვა უვარგა, არც თავი წარგვიდგინა, ზის და ათოხლავებს... (*შხერა გაეყინება*) ე-ეს რადაა?! სამეფო სუფრის კუთვნილი პაშტეტი! სულ ნარჩევი ბატების ღვიძლისა!! არა, გავგიჟდები, ნამდვილად გავგიჟდები!!! მოდის აქ ვიღაცა, არც რამე სიველ-გუჯარს გვაჩვენებს, არც ჩაცმულობა უვარგა, ზის აქა და ჩვენის საუკეთესო პაშტეტითა და რჩეული ღვინით... ვინ მიგდია ბოლო-ბოლო, აღარ იტყვიო?!

მალგრამი: ფრიად საეჭვო ვინმეა, თქვენო უდიდებულესობავ! მეფის ასულ მელისენტას დაეძებს... ისაა, პრინცესამ რომ იხილა სარკეში. ჯანო-ჯიორჯის უხმოვენ.

მელიოტი: დაიცა, აკი წარმოსახვითი, ილუზორული... მოკლედ, მითოლოგიური პერსონაჟიაო!? ყოველ შემთხვევაში, ჩვენ ასე გავიგეთ... ეს კიდევ ვინმე სხვა უნდა იყოს. აბა, რა გქვია შენ?

ჯანო: გიორგი. მოფერებით — ჯანო... სწორედ ისა ვარ, ვისზეც მელისენტა გეუბნებოდათ. ოღონდ ნამდვილი ვარ, რეალურად არსებული და მგონი, თქვენი ქალიშვილი მიყვარს... იმასაც, თითქოს...

მელიოტი: ა-ახლა კი ნამდვილად გავგიჟდები! მე შენ მოგცემ მოფერებით! არა, რასაა რო ბოდილობს, ჰა?! ან როგორ აცვია, ან როგორ იქცევა, არც რამ სიგელ-გუჯარი... ახლა შენი მამისერთა და დედისობოლი ქალიშვილიო... არა, გავგიჟდები, ნამდვილად გავგიჟდები!.. მელისენტა!! მელისენტა-მეთქი!!!

ნინეტი: ამჟამად აქ არ გახლავთ, მეფე-ბატონო, სწორედ ჯანოს საძებრად გაემგზავრა...

მელიოტი: ჰოდა, გადაეცით რომ ეს მისი ჯაჯანოა თუ ვიდაცა, სუ-უ-ლ იოლი საპოვნელია-თქო! აგერ მეყოლება დილეგში ჩამწვედელი! და საძებნელიც ადარავის გაუხდება!
(*ჯარისკაცებს*) ეი თქვენ, ყველაზე ღრმა ხაროში უკარით მაგას თავი!

(პაშტეტიან ლანგარს ხელს წამოავლებს და გათრიხინდება ვარეთ. ჯანოს გასკვანჩავენ და ყველანი, რაღა თქმა უნდა, კვალში მიჰყვებიან — ნინეტისა და მალგრამის გარდა).

ნინეტი: (*სუპერ-მომხიბლავი ღიმილით*) აბა, მაგისტრ მალგრამ, ახლა თქვენ მომიჯექით გვერდში და ეს მშვენიერი ღვინო დააჭაშნიკეთ! დაბრძანდით, დაბრძანდით, რაა მოსარიდებელი! უნდა გითხრათ, შეთქმული ქალის როლი ჩემთვის შედგამოჭრილია... თუმცა, ასეთი ნიჭიერი რეჟისორის ხელში...

მალგრამი: (*თავპატივი არ გაუდვია*) ა-ხმ, აბა, რა გითხრათ — როგორცა რომ ხუთსართულიანი კოშკის ქონგურიდან თავქვე მომფრინავი ჯველი იტყოდა — ჯერ-ჯერობით ყველაფერი კარგად მიდის... ერთი სვლით მაინცა ვართ წინ — ჯანო აქაა, დილეგში, მეფისწული — იქ, ღია ეთერში...

ნინეტი: ეგ რაღა ხრიკია, მაგისტრ?

მალგრამი: ტანჯვის ახალი ხერხია — ზოგს მოსწონს კიდევ, სადო-მაზოხისტურ ამბავში... ოღონდ მელისენტას ეგ ისევე მოეწონება, როგორც ჯანოს — მისი ახალი სამყოფელი!

ნინეტი: (მოეხვევა) არა, მაინც რა არაჩვეულებრივი ვინმე ხართ, მაგისტრ!

სურ VII. ვზი ღრმასა, ბნელსა ხაროსა...

დილეგი მართლა უსიამოს რამე ადგილი აღმოჩნდა: რაღაც ჯირკო — სკამის მაგივრად, ნესტი და უბედურება... ფრიად საეჭვო შრაშა-შრუშა ხმებზე, შორეული ბნელი კუთხეებიდან რომ გამოდიოდა, აღარას ვამბობ! იჯდა ჩვენი საცოდავი ჯანო და ვეიკურად ილანძლებოდა. უცბად (აი, ეს უცბად რო არ არსებობდეს, ამბის თხრობას რა ეშველებოდა) ზემოდან ხმა მოისმა: “გზა, გზა სამეფო გვარდიის თავს!” რკინით აჭედილი მძიმე კარი გაიღო და კიბეებზე, ჟღარუნითა და ჟღიალით, თავ-ფეხიანად აბჯარმოსილი ფიგურა დაეშვა. ხელში ორი იმისხელა მახვილი ეკყრა. მძიმე-მძიმედ მოიხადა ჩაფხუტი და ხენეშა-ხენეშით ჩამოჯდა ჯორკოზე.

ჯანო: გოგიტა დილერო — მართლა შენა ხარ თუ სულ გავრეკე?!

ღ-გ-: დილერი გოგიტა-მეთქი, გითხარი! კი, მე ვარ — არა ბიჭო და კურდღლებს დავაგლეჯინებდი თავს! ვიდაცა ღლაპი ამ რკინა-კავეულობას წმენდა — ვეუბნები, აჰა შენ ჩემი საათი — გამდიდრდები-მეთქი... დაავლო ხელი და მის მერე აქ აღარავის უნახავს. მე კიდე ამათი ჩამოფხატება ძლივს მოვასწარი და ადგილობრივი მეფე არ წამომადგა? მეკითხება — კამელოტიდან გამოგზაუნესო? ჰო-მეთქი, მე ვეუბნები. გადაიღო კონფერენცია, ჩემს ჯინაზო? ეგრეა-მეთქი... საერთოდ, უარის თქმა არავისთვის მიყვარს — გეკითხებიან? — შენც თავი დაუქნიე... მერე მკითხა, მეფე ართური როგორ არისო; აზრზე არ ვიყავი, მაგრამ ერთ წყენას მეორესაც ხო არ მივუმატებდი და — გადასარევედ-მეთქი, ვუთხარი; მოკითხვას გითვლით-მეთქი. ამან ისე გაახარა, სადილზე დამ-პატიჟა. არ ვიცი რა მოელანდა, რატომღაც თავად გადაწყვიტა, გვარდიის თავი ვიქნებოდი. ეტყობა, ამაზე ნაკლები ჩინ-

რანგის მაცნეს არ მაკადრებდნენო, ფიქრობდა... დარდი გაუშვი, დავათრობ და ყველაფერსაც მოვაგვარებ.

ჯანო: ფრთხილად იყავი, აქეთ არ დაგათროს...

დ-გ-: შანსი არაა, მაგარ ფორმაში ვარ! საერთოდ, ვარდების რევოლუციის მერე ჯერ არც კი გამოვფხიზლებულ-ვარ ხეირიანად... ისა, შენი ბოსი ყოფილა, ვინმე ერმიკო — ისიც აქაა. მაგარი უნიათო ვინმე კი ჩანს, ღმერთმანი. ისიც უნდა გავაცნო. რამეს გამოვდნებით ერთად...

ჯანო: მე რაღა?..

დ-გ-: ვირის თავ-ფეხი! შენ ჯერ დაიცა ცოტა ხანს. შენი სახელის გაგონებაც არ უნდა ფხიზელზე. პაშტეტი შემიჭამაო, გაიძახის. გიჟია, ოხერი.

(შორიდან მოისმის მელიოტ-მეფის ყვირილი: “სერ დი-ჯი! სად ჯანდაბაში დაიკარგე? როცა მჭირდებიან, მაშინ ქრება ყველა! დი-ჯი!”)

დ-გ-: აბა, წავედი მე და მეყოლე ვარდივით! *(აბრაზუნდება კიბეებზე)*

ჯანო ერთ ამოღვრასაც ვერ მოასწრებს, რომ ჩვენთვის ნაცნობი “ჰი-ჰი-ჰი” გაისმის საკნის კუთხეში.

მარლაგრამი: ჰესეც ჰესეე, ჩემი ჯანო-ბიჭი!

ჯანო: *(გვარიანად გაღიზიანებული)* შენ ვიღას ტიკი-ტომარა ხარ, ბიძაჩემო?

მარლაგრამი: შენი და მელისენტას ერთობლივი ჯადოსანი, თუ გინდა!

ჯანო: არა, არ მინდა! შენისთანა ჯადო-შემლოცავეები კონა შაურია ბაზარში... მე დილეგში ჩამაგდეს, მელისენტა კაცმა არ იცის სადაა...

მარლაგრამი: გოგოზე ნუ დარდობ, ცოტას გაერთობა და მანამდე მეც მოვაკვარახჭინებ ყველაფერს! *(მოხერხებულად მოკალათდება ჯორკოზე — აშკარაა, დრო მისთვის შეფარდებითი ცნებაა)* ეს

ჩემი დისწული მალგრამიც კიდევ კაი ოხერი ვინმეა — რას იზამ, ჩემი გაწვრთნილი გახლავთ — ხელი ეტყობა... მაინც არაფერი გაუვიდოდა, ოღონდ შოტლანდიაში მომიხდა სასწრაფოდ გამგზავრება — ჩემი ძველი სიყვარულები, სამი კუდიანი დაიკო...

ჯანო: რაო, მაკბეთების საქმეზე?

მარლაგრამი: *(წარბებს შეიერის)* ვინ ჩამიშვა?

ჯანო: ე-ეჰ, ახლა ამას რაღა მნიშვნელობა აქვს... ისე, კარგია რომ დისშვილისა არ გშურთ და რაკი გაჯობათ, მოკაკვეთ თითი და ამით დავამთავროთ!

მარლაგრამი: *(ლამისაა, წყობიდან გამოვიდეს)* რასაა რო ბოდილობ, თუ იცი! მერლინი უკვე შეეშვა ჯადოსნობას, მის გარდა კი აქედან და ორკენის კუნძულებამდე ჩემი დარი არავინაა!

ჯანო: აბა, ახლა განტვირთვის დღე გქონიათ და ეგაა...

მარლაგრამი: მიდი, მიდი — სუ ეგეთები ხართ ეს ახალგაზრდები — არავითარი მოწიწება... კიდევ სთქვი რამე და ჩემს დაუხმარებლად მოგიწევს აქედან გაძრომა!

ჯანო: *(გონს მოდის)* ეს ისე რა, ვიხუმრესავით, ბიძაჩემო...

მარლაგრამი: ზოგიერთს ძვირადაც დაჯდომია მაგისთანა ხუმრობები... აი, მერლინის დროს... თუმცა, გვეყო ლაყაფი, ჩემს გეგმას მივეყვით!

ჯანო: აგაშენა ღმერთმა! რა გეგმაა?

მარლაგრამი: მაგი არაა შენი საქმე! ყველაფერს კი თანმიმდევრულად უნდა კეთება!. ესე ჩემი დისწული მუშაითობს — ერთ-ორ რამეს გააჩალიჩებს და თავი ქულში ჰგონია! ცარიელ იმპროვიზაციასზე ზის! მაგარი ბიჭია, მარა რად გინდა...

ჯანო: თქვენ რაღას აპირებთ?

მარლაგრამი: გითხარი, არაა-მეთქი ეგ შენი სადარდებელი!

ჯანო: გადამრევს ეს კაცი! აბა, ვისია?

მარლაგრამი: ჯანო-ბიჭი, ალაღად მითხარი — გამოდგები რაინდად და გმირად თუ — არც ისე?

ჯანო: ე-ე... რა ვიცი, აბა... ეგეთი რო ვიყო, ერმიკოსთან რა მინდოდა...
ბ-ნი ერმიკოც რო აქ ყოფილა, იცოდით?

მარლაგრამი: ვიცოდი და ეგრე?! *ჰი-ჰი-ჰი...*
(თქვა და გაქრა. საკნის შორეული, უბნელესი კუთხიდან მხოლოდღა მისი “ჰუ-ჰუ-ჰუ” მოისმა)

ინტერმედია — ისევ ყავახანა “თეთრი რაში”

... შხერა მისი *(ტანოს ვგულისხმობთ)* ისევ ფუყეა და არაფრისმთქმელი. შემოდის *მალგრამი* — ისევ ისე აცვია, როგორც დილით; მაგარი მხნე და ენერგიული უჭირავს.

ტანო: ახლა მიტირეთ რუსულად!

მალგრამი: სადამო მშვიდობისა, ჩემო კარგო! თორმეტი შუშა ბენედიქტინი ცივ რძეში, 50/50, შეაჯანჯღარეთ, ოღონდ არ ადღვიბოთ!

ტანო: თორმეტიო... რძეშიო... fifty-fifty... აი, ახლა ნაღღში გავრეკავ!

მალგრამი: სწორედაც რომ თორმეტი — რა იყო, რა გემცხეთათ? ჯერ ეს, მერე ვნახოთ...

(ტანო ერთს ამოიკვნესებს და დახლის უკან გაუჩინარდება).

მალგრამი: რა სჭირს ამ ბაღანას — რაღაცა ფერზე ვერაა...

(კედელი გაირღვევა და სცენაზე ყურებაძლე გაღიმებული მარლაგრამი ჩნდება)

მარლაგრამი: რაო, ჩემი ბიჭი, არ მელოდი?

მალგრამი: კარგი რა, ბიძაჩემო, ეტყობადა მართლა დაბერდი — პატრიოტულ ბანაკებში, რეზერვისტებთან თუ გაგეგა ეგეთები... ახლა ხომ ხვდები, მთელი სვლით რომ გისწრებ ყოველთვის?

მარლაგრამი: მართალს ამბობ თუ? ერთი თქვენი მოსაზრებანიც გვიბოძეთ...

მალგრამი: რა, მართლა არ გეცხმით თუ თავს იკატუნებთ? პირადორში დაბრუნდებით და — მეღისენტა ჩემს ხელშია...

მარლაგრამი: აბა კი, სულ მაგ ჭკუაზე ვარ!

მალგრამი: აქ დარჩებით — მე წავალ იქ და მერლინის ძეწკვი, გინდა-არგინდა, მაინც მე დამრჩება!

(ელეგანტური სვლით, კედლის ნაპრაღში უჩინარდება).

მარლაგრამი: უყურე შენ! მართლა არ უსწავლია რაღაც-რაღაცეები! ე-ეჰ, ახალგაზრდობას მაინც თავისი გააქვს... ოღონდ, სანამდე? ეს ბრიყული თავდაჯერებაა სწორედ, რომ დუპავთ... არცოდნა არცოდვაა, მაგრამ მცირე ცოდნა — დიდი უბედურება! ვნახოთ, ვნახოთ...

(ამ დროს დახლზე ლანგარი ჩნდება, ზედ 12 ჰიქით. მათ უკან ტანოს დაბანტურებულმზერიანი თავი იჩითება)

ტანო: წმიდაო მარიამ... ის შავი კაცი რაღა იქნა? ამას... თქვენ დალევთ?.

მარლაგრამი: *(განაწყენებული სახით)* გადირიე შვილო?! ბავშვობიდან ვერ ვიტან რძეს!

ტანო: აგაშენათ ღმერთმა!.. *(შვებით წაიჩურჩულა და მანაც კედლის ნაპრაღში დურთა თავი... ამ დროს კარში მეღისენტა და მაგრა ცხვირჩამოშვებული ზუკა ჩნდებიან)*

ზუკა: არა, მაინც რა მიქენით ეს, ა? ერთი-ორი წელი TV-ში აღარ მიმესვლება, არც ერთი არხი ჩვენს რეკლამას...

მელისენტა: მაგისტრ მარლაგრამ! არავის ნახვა ასე არ გამიხარდებოდა, ღმერთმანი!

მარლაგრამი: *ჰი-ჰი-ჰი...* არა, ლამაზი ქალისაგან ტყუილიც კაი მოსასმენია, მერლინის შხემ... აბა, ახლა შინისაკენ — ჰერი, ჰერი! *ჰუ-ჰუ-ჰუ-უ-უ!*

(ყველანი ნაპრალში უჩინარდებიან)

სურ. VIII

მელიოტ-მეფის შუადღისშემდგომი მინახეობა

მელიოტ-მეფე, უნდა გითხრათ, გვარიან ხასიათზე ბრძანდებოდა — რა ეღარდებოდა რა — კაის ჭამდა და კაის სვამდა — განსაკუთრებით კი აი ამ მეორე ვარიანტს აწვევებოდა უკვე ნასადილევს. პირდაპირ სერ დი-ჯი და ბ-ნი ერმიკო უსზდნენ; სამივე ცდილობდა, თავისი წვლილი შეეტანა საერთო მხირულებაში და როგორც ასეთ დროს ხშირად ემართებათ ხოლმე ხანმოთეულ და ღვინომოკიდებულ მამაკაცებს, ხვალინდელი დღის დადგომისა გაფიქრებაც აღარ უნდოდათ.

მელიოტი: აი ჩვენ კიდე ერთი ნაღდი ამბავი ვიცით, ჩაიფსამთ სიცლით! კამელოტ-ქალაქში სამი მოხეტიალე ვაჭარი ხვდება ერთმანეთს — ინგლისელი, ირლანდიელი და მთიელი... *(როხროხებს)* მერე აღარ მაგონდება როგორ იყო იქ საქმე — გამახსენდება და გეტყვით, არ დაგიძლავთ! ჰეი, მერიქიფე! დაგეძინა მანდ?! *(მერე ერმიკოს მიაჩერდება ვაკ-ვირვებული, წარბებს ქუშტავს)* უკვე მეორე ამისთანას ვხედავთ

დღეს — რაღაც უწესოდ აცვია... *იკ!* ის პირველი აკი დილეგში ჩავაყუდეთ, სერ დი-ჯი — ესეც ხომ არ... ჰა? არა, თქვენი ქალიშვილი ცოლად უნდა გამატანოთ — რავარია?!

დ-გ-: რა გეჩქარებათ, თქვენო უდიდებულესობავ, ჯერ ნაზია ღამე... მე და ერმიკომ ერთი ისეთი კარგი კომბინაცია ჩავიფიქრეთ!

მელიოტი: კომბი... *იკ!* ერმიკო ვილაა?.

ბ-ნი ერმიკო: მე გახლავართ, მეფე-ბატონო!

მელიოტი: ხოდა, ძანაც ცუდი! რა გაცვია, კაცი ვერ გაიგებს... მოკლედ, რა მინდაო, სერ დი-ჯი?

დ-გ-: იდეა გვაქვს, მელიოტ-ჩემო იმისთანა, თითებს ჩაიკვნეტ! ფარა მოვა — ოხრად...

მელიოტი: ოხრად რად მინდა... სადაა მერე?

დ-გ-: ერმიკოსა აქვს თავში.

მელიოტი: ერმიკოს თავში ფულს რა თავში ვიხლი! მოვიდეს აქ და მომიტანოს... ე-ე... ისა — ამიხსნას!

ბ-ნი ერმიკო: მეც მანდა ვარ, მეფე-ბატონო!

მელიოტი: შენ ვინდა ოხერი ხარ?.

ბ-ნი ერმიკო: ერმიკო მქვია, შეგიძლიათ იკა დამიძახოთ...

მელიოტი: იმასაც რაღაც ორი ეგეთი სახელი ერქვა — ვერ გავიგე, ეს ორი სახელი რა საჭიროა... მოკლედ, ძან უხეიროდ გაცვია, ღმერთმანი! ასე ჩაცმული ჩვენს კარზე... *იკ!*

დ-გ-: იმას ვამბობდი რომ ჩვენში, მეფე-ბატონო, ხალხი ერთთავად იმის ცდაშია, ფული დააგროვოს და სადმე წავიდეს, სხვა ქვეყანა ნახოს... ჩვენ კიდე გვგონია, პირადორზე უკეთესს რას ნახავს კაცი!

ბ-ნი ერმიკო: ორგანიზებული ტურიზმი! ციხე-კოშკები, რაინდთა ტურნირები, გველუშაპების კვლა!..

დ-გ-: ოღონდ ტრანსპორტირების ამბავი თქვენზეა — ერთი-ორი კარგი ჯადოსანი დაჭირდება ამ საქმეს... რეკლამას კი ჩვენ ვკისრულობთ.

მელიოტი: რასა-რასა?

დ-გ-: ჰეროლდებს და გზირებს ოთხივ კუთხით დავაგზავნით -მეთქი, მინდოდა მეთქვა!

ბ-ნი ერმიკო: ჰოდა, ფულიც წამოვა, ჩეჩქივით! სულ ოქრო-ვერცხლი, ჩხრიალ- ჩხრიალით...

მელიოტი: სად, მერე?

ბ-ნი ერმიკო: ქვეყანაში!

მელიოტი: ასეც ვიცოდი... *ოჰ!* მერე, მე რა ხეირი?

დ-გ-: გადასახადები...

მელიოტი: კარგი ერთი, თუ ღმერთი გწამს!..

ბ-ნი ერმიკო: ჩვენის ანგარიშით, მოგების ნახევარი ერთ წელიწადში მთელს თქვენს ხაზინას გაავსებს, თუ გამტარობაც კარგი იქნა, რაღა თქმა უნდა... ამას კიდე ცალკე სასტუმროების აშენება დასჭირდება, სამიკიტნოების გახსნა, კარგად

აღკაზმული ტურისტული ცხენების მომრავლება... მოკლედ, ინდმეწარმეობაც გვარიანად გაშლის ფრთებს... აი, მაშინ კი გადასახადების ამკრებნიც გაილაღებენ!

დ.გ.:

ახლა მებაჟეებისაც თქვი?! მოკლედ, სულ მალე მთელი კამელოტის მაღალი საზოგადოება აქ მოაწყდება და დედაქალაქსაც აქ გადმოვიტანთ, მოსახლეობის მოთხოვნით...

მელიოტი:

(ცოტა არ იყოს, თავბრულახვეული ამგვარი მომავლის ჭკრეტით)

დაიცათ, ჰო — ცოტა მეც მოვიფიქრო... ნაღდად რა-
ღაცას მაბოლებთ... ემანდ რწმენა არ შემაცვლევინოთ!¹

(სწორედ ამ დროს შემოდიან ლედი ნინეტი და მალგრაში — რაღა თქმა უნდა, არა შემთხვევით — აკი მალგრაშის თავი ყინჩად ეჭირა, ყველაფერი გეგმისა და გრაფიკის მიხ. მიმდისო)

მალგრაში:

თქვენო უ-უდიდებულესობავ, ნება მიბოძეთ ამ აფერ-
ისტებს და ავანტიურისტებს² თავად მივხედო — ჩვენი ხელო-
ბისა და მეცნიერების სასახმილოდ!

მელიოტი:

ა-ჰაა, თეთრ თავგებად გინდა აქციო?... რას ერჩი, მომწონს იდეა... ფეშქეშ! აი შენ კი სულაც არ მომწონხარ! იმედი ნუ გექნება, ჩვენს კარზე... *(ახლაღა შეამჩნევს ნინეტს)* ლედი, ჩვენი პირშო სადაა?.

ნინეტი:

(დათაფლული ხმით) ყველაფერს წვრილად მოგიყვებით, მეფე-
ბატონო — როგორც კი რომ მარტონი დაერჩებით...

¹ მთარგმნელის თვითნებობა აქ არაფერ შუაშია — ძველად ორივე ეს სიტყვა ხმარე-
ბაში გახლდათ: მაგ. Faith (რწმენა, სარწმუნოება) სწორედაც რომ “ჭეშმარიტების”
მნიშვნელობით მოიხმარებოდა. შდრ. ჩვენებური “სარწმუნოდ იხანს”.

მელიოტი: მომკლა ამ საიდუმლო თათბირებმა... მოკლედ, ახლა გაიკრიფეთ ყველანი — ლედი ნინეტი მომხედავს...

(ყველანი გადიან, ოღონდ არა ყველა თავისი ნებით — ასეთებს სასახლის გვარდიელები აშველებენ ხელს)

მელიოტი: გაგიჟდები კაცი! ჯერ კამელოტში გვიხმობენ, მერე გადაიფიქრებენ და ამ ვიღაც დი-ჯის გვიგზავნიან, ტვინი რომ აგვიმღვრიოს... ჩვენი ქალიშვილიც გვარიანად აფრენს — ვიღაც არარსებულ რაინდს დაეძებს, ის კი თურმე აგერაა, ჩვენთან, დილეგში და უმსგავსოდ აცვია... ეს ჯადოსნები კიდევ ხან გაჩნდებიან, ხან გაქრებიან — ეშმაკსაც წაუღია მაგათი თავი! არა, ამკარად დავბერდი, რაღაც უნდა ვიღონო! დილაობით სირბილი ხომ არ დამეწყო, ჰა?.

ნინეტი: რა ბრძანებაა — ისედაც შესანიშნავად გამოიყურებით! უბრალოდ, გადაიღალეთ ამდენი ზრუნვა-გარჯით — ყველაფერზე თქვენ ხომ არ უნდა იფიქროთ!

(ნარნარი ნაბიჯით უახლოვდება, ცხვირსახოცი თნაზად უმშრალებს დაცვარულ შუბლს)

მელიოტი: *(ვითომ ვერც ამჩნევდეს და არც ეამოს)* მართალია, ჩემი ასაკისთვის

კიდევ ჯანზე ვარ... არა, ეგ ჩემი ქალიშვილი მაინც სად გადაიკარგა?

ნინეტი: გრძელი ამბავია... *(შემელოტებულ თმას უსწორებს)*

მელიოტი: კარგი, სხვა დროს იყოს...

ნინეტი: საქმეც ეგაა, მეფე-ბატონო, რომ თავკერძაა, თქვენსავეთ დაუჯერებელი...

² ეგვნიც ძირბველი ფრანგულ-ნორმანული სიტყვებია, ევროპეიზმის შემოტანის მცდელობად ნუ მიიხნევთ.

მელიოტი: *(განაწყენებული)* მე რა — სულ დედამისსა ჰგავს, აცხონოს უფალმა!

(ცრემლი მოადგება თვალზე)

ნინეტი: ეგ არაფერი, იმ აუტანელ ბებრუხანას, მალრაგრამს რომ არ ჰქონდეს მასზე ასეთი ცუდი გავლენა!

მელიოტი: ვინ მალრაგრამს... ისა რა, კიდე ცოცხალია?! აუტანელი ქირქილი იცის და ბავშვობაში სულ მისით მაშინებდნენ — ფაფა ჭამეო...

ნინეტი: ... და რა კარგი იქნება, მეფე-ბატონო, ვთქვათ, სიტყვაზე, თქვენ რომ გადადგეთ და მაგისტრ მალგრამს დააკისროთ ყოველდღიური სახელმწიფო საზრუნავის საკუთარ თავზე აღება — თქვენც მოისვენებლით და მარლაგრამსაც დავიფრენდით აქედან...

(კელიდან გამოდის მელისენტა, უკან მარლაგრამი მოკუსკუსებს)

მელისენტა: არ აგიდგა გვერდები, სანამ მამაჩემი არ გადადგეს! ნახე, რა ინდომა!

მელიოტი: ციც! რასაც მინდა, იმას ვიზამ! მეფე ვარ თუ ნაქურჩალი! და საერთოდ, ხვალ თხოვდები! ასეა ეს!

მელისენტა: ვისზე?!

მელიოტი: არ ვიცი მე! ვინც ტურნირზე გაიმარჯვებს, იმას გავატან შენს თავს!

მარლაგრამი: *(ყურებს ცქვიტავს)* რაის ტურნირზე?!

მელიოტი: შენღა მაკლდი ერთი! რაინდთა ტურნირზე-მეთქი — მეც ახლა მომივიდა თავში... და ასე მოვუვლით ბაკ-ინგემს!³

მელისენტა: *(მალგრამს)* ჩვენი პირობა გახსოვთ? მერლინის ძეწკ-ვიო... აი, მალგრამს რო უნდოდა...

მარლაგრამი: მაგას რა დამავიწყებს, *ჰი-ჰი-ჰი!*

მელისენტა: დამეხმარეთ, ჯანოს გამაყოლეთ და ძეწკვიც თქვენია!

მარლაგრამი: მოსულა! და ყველას ყურადღებას ვითხოვ — მე ჩემით არაფერი — თავად შემომთავაზა! *ჰუ-ჰუ-ჰუ!*

მელიოტი: მორჩი, ბებერო! ვინ რა ძვირფასეულობას არიგებს აქ ჩვენი ზარდახშიდან?! ვფიცავ, შანსი არაა...

(უეცრად ჩამობნელდება, იჭუხებს, იჭეჭებს, იელვებს და კედელზე მარლაგრამის 10-ჯერ გადიდებული ლანდი ჩნდება)

მარლაგრამი: სდექ, მელიოტ! გატეხილ ფიცს გატეხილი თავი გერჩივნოს!

მელიოტი: ისა... ე-ე... კარგი რა... ეგ მერლინური ოინები აღარ მოგბეზრდა?. ამ ხნის კაცი ხარ... გული გამიხეთქე!

მელიოტი: ჯერ სადა ხარ, მეფეო — სოლომონის ბეჭდით დაღდასმულს, ხილვა მაქვს ერთი — დი-ი-დი განსაცდელი ელის ჰენდრაგორს! და თანაც ორი: ერთი მეწამული რაინდია — ხვალინდელ შერკინებაში ის ყველას დასცემს, თვინიერ

³ იდიომატური გამოთქმაა, ქადილს გულისხმობს.

ერთისა... ხოლო მეორე — გავეშებული, პირით ცეცხ-
ლისმფრქვევი გველესაპია! ოდენ მას, ვინაც მეწამულ
რაინდსა სძლევს, ძალუძს დაამარცხოს იგი და მელისენტას
გულის რჩეულიც მაშინ ის ხდება...

მელიოტი: აგაშენა ღმერთმა! თავიდანვე ვგრე გეთქვა, შე
კაცო... ვინაა უარზე?! სიტყვას გაძღვე... *(მაგრამ დარბაზში
უკვე აღარავინაა)* უფ! მითქვამს, ძველი მერლინური სკოლა
მანც სულ სხვაა-მეთქი! ცოტა ძველმოდურია — მთელი ეს
ხმაური, ბახა-ბუხი, მეხი და მედგარი, მაგრამ... ბოლო-ბოლო,
ის მანც იცი, რას ელოდო კაცი...

ნინეტი: და რას უნდა ელოდოთ?.

მელიოტი: *(უდარდელად)* რა იყო, რა ვერ გაიგე? ერთი რაინდი, მეწა-
მული ფერისა და ერთიც გაუმაძლარი გავეშებული გველე-
საპია... დიდ ამბავი — ეგეთები გვინახავს? ახლა კი წავალ,
ჩემს ხვალისდელ მიმართვას უნდა ჩაუუჯდე. ხანდახან მანც
ხომ უნდა მივაწვდინო ხალხს ხმა...

ინტერმედია: **საიდუმლო სერობა დილეგში**

მარლაგრამი: აბა, ჯანო-ბიჭი, ხომ კარგად მოვაკვარახჭინე
საქმე? აჰა, ესეც შენ ნაღდი ვახშამი — მეფის ღვინო
და სამეფო პაშტეტი — ხელს გამოვავოლე, ასე
ვთქვათ... სხვა რაღა გინდა?

ჯანო: ...მელისენტა...

მარლაგრამი: აქაა, აქა-მეთქი! მოვა მალე... ასე დამაბარა, არსად
წავიდესო.

ჯანო: სად ბებიანთან უნდა წავიდე! ისე, ნეტა რა ნახა მეფის ასულმა ჩემში...

მელისენტა: *(კიბეებზე ჩამორბის)* არ გეტყვი და ვერც გაიგებ! არცაა საჭირო... საბრალო, ეს რამხელა ხუნდები დაუდვიათ მაგ უღმერთოებს! მაგისტრ მარლაგრამ, რას შევებით, თუ იცით?!

მარლაგრამი: მეთქი, ჯერ ჭამოს — ხასიათზე მოვა...

მელისენტა: ახლავე აყარეთ ეს რკინები!!

მარლაგრამი: ენკი, ბენკი, სიკლისა!.. *(ბორკილები ძირს ჩამოცვივა, ჟღარუნით)*

ჯანო: აი, სალოლ! მცოდნოდა ერთი, ეგ გათვლა ამისთანა საქმესაც თუ რგებდა... *(მარლაგრამს ხელს ართმევს, მერე მელისენტას გადაეხვევა)*

მარლაგრამი: ხოდა, ისა... დამაცათ, რა მოხდა, რა ცეცხლი გიკიდიათ! ხვალ ტურნირზე გამოსვალ — მეწამულ რაინდს უნდა შეერკინო, მერე — გველეშაპი დგას რიგში...

ჯანო: *(მელისენტას)* რასაა რო ბოდილობს?

მელისენტა: საყვარელო, მამაჩემმა დაიფიცა, ვინც ტურნირს მოიგებს და გველეშაპს თავს წააცლის, ქალსაც იმას გავატანო... დიდი უჯიათი ვინმეა!

ჯანო: მაგარი ხარ, მარლაგრამ! მერე, როგორ უნდა ჩავაწყოთ ეგ საქმე?

მარლაგრამი: არაფრის “ჩაწყობა” არ დაგჭირდება, ყველაფერი ჩემმა დისწულმა გააჩალიჩა, ოღონდ ჩემს ჭკუაზე, რაღა თქმა უნდა... ახლა ნახავს, როგორია...

ჯანო: დაიცა, რა — ნაღდი იქნება ყველაფერი?!

მარლაგრამი: არა ბიჭო! ნაღდზე-უნაღდესი! თუ გმირი ხარ და რაინდი — დაამტკიცე!

ჯანო: შენა, ცხელება ხო არ შეგყვრია?! რომელი წმინდა გიორგი მე მნახე?!

მელისენტა: თუ ფიქრობ, რომ ასეთ თავგანწირვად არა ვღირვარ...

ჯანო: ღირხარ, როგორ არა, ოღონდ თუ მკერდი შემინგრიეს ან თავი წამაჭამეს, მერე რაღაში გინდივარ?.

მარლაგრამი: ნუ წუწუნებ! ახლა კარგად უნდა გამოიძინო, ტურნირი ექვსზე იწყება!

ჯანო: მეყოლეთ ვარდივით...

მოქ. III.

ღიადი შეხლა

ჯანო კარავში ზის, თავჩაქინდრული. გარედან ტურნირის ხმები აღწევს — ყვირილი, გამამხნეველები შეძახილები, ჯახანის ხმა და ცხენების ჭიხვინი. კარავი მდიდრულადაა შორთული, ოღონდ ჯანოს თვალს ეს არ ახარებს: მის წინ დახვავებულ აბჯარს დასცქერის და არც ეს ზიზილ-ჰიპილოთი გაწყობილი რკინის გროვა ეჭაშნიკება მაინცადამაინც. ამ დროს ხალხი იხუვლებს და რაღაც ბრაგანის ხმა მოისმის. წუთის მერე ოთხი საჭურველმტვირთველი გონდაკარგულ რაინდს ჩაატარებს საკაცით — მეწამული რაინდის რიგით უკვე მეთოთხე მსხვერპლს. ჯანო ერთს კარგად შეუკურთხებს ყველა ჯაღოსანსა და მთელს მათს სამყაროს...

კარვის კალთა ჩაიკარაბაკება და *ტანო* შემოდის, ლანგრით ხელში.

ტანო: ერთი კათხა “სატურნირო” — მეზობელი მაგიდიდან...

ჯანო: ვა, ეს შენა ხარ?!

ტანო: მგონი, კი...

ჯანო: გაიხარე. *(კათხას ჩაეკლის)* კაია, ხო იცი, ცივია... ისე, ბოთლისაა თუ ჩამოსახმელი?

ტანო: მე არაფერი მკითხოთ, აი იმ შავმა კაცმა გამოგიგზავნათ, რაღაც უბედურებებს რო ურახუნებს დილაუთენია...

ჯანო: *(დაფეთებული მიაშტერდება)* ვინა... მალგრამამ?!

ტანო: ეგრეა. რა იყო, ცუდადა ხარ?.

ჯანო: ჯერ არ ვიცი — ცოტა ხანში გამოჩნდება... ისა, აი ის მასტი არ გინახავს სადმე ახლოში, ჯინ-ტონიკს რო ყლურწავდა?

ტანო: ერთი ვიღაც ტიპი კი ვნახე, ჩვენიანი უნდა იყოს... ოღონდ მეწამულ რაინდზე ჩამოდის ფსონს — ერთი/ათზე! მაგისი მომრევი არავენააო, გაიძახის.

(კარავში ჯანოზე გაწერილი საჭურველთმტვირთველი შემოიხედავს)

სჭ.: შენა ძმაკაც, ამხედრებული გახვალ თუ ქვეითად? ჩემდათავად, ქვეითობას გირჩევდი — რაც ნაკლები სიმაღლიდან დაეპერტყები ძირს, მით უკეთესი!

ჯანო: ენის ჭარტალს ის გირჩევენია, ამეების ასხმაში დამეხ-
მარო — რაღაც ხეირი მაინც მექნება შენგან...

(გარედან ჰეროლდის ხმა ისმის: სერ ჯანო-ჯიორჯი! თქვენი გამოსვლაა!!)

ჯანო: *(მიკნაევებული ხმით)* ახლავე-ე... მოვდივა-არ!..

ტანო: გული არ გაიტეხო, შენთანა ვარ! გახსოვდეს —
იბერია გაბრწყინდება! აწმყო თუ არა გეწყვალობს...

(ჯანო უიმედოდ ხელს ჩაიქნევს და გარეთ გაბლაყუნდება; ხალხი ქოქოლას აყრის. ისმის ერთი ჯახა-ჯუხი, ბრბოს ღრიალი, აბჯრის ზრიალი და მახვილთცემის ხმა, რაიც ახლოვდება და ბოლოს კარავში შემოიჭრებიან მეწამული რაინდი და ჯანო; ამ უკანასკნელს სული კბილებითდა უჭირავს, ძლივს დააბოტებს, მისი მეტოქე კი — ერთი ბეხლეწი, ასე, ორმეტრიანი მჯგბ, ამოსუნთქის საშუალებას არ აძლევს; ოღონდ შემოვლენ თუ არა, გაჩერდება, ტანოს მიაშტერდება და...)

მეწ. რაინ: ორი კათხა “სატურნირო”, ფიცხლად!

ტანო: ახლავე მოგართმევთ, ბატონო!

(გარეთ გაეარდება; მაგიორში, ახლა სხვა ვიდაც-ვიდაცეები ცდილობენ კარავში თავის შემოყოფას)

მეწ. რაინ: *(გრგვინავს)* მოუსვით აქედან, თორე აგახევთ ლაყუჩებს!!!

(მივა, კარვის კალთას გაასწორებს, მერე იქვე ჩამოჯდება და მუზარადს თავიანად იძრობს; რკინის საყელოდან ახლა დიღერ გოგოტას გაბადრული სახე მოჩანს)

დ.გ.: კაი გამარჯობა შენი... ახლა, ერთი ეს აღკაზმულობა მომხსენი როგორმე, დავიღჩვი კაცი!

⁴ მურდალი ჯანების პატრონი (ყავლაგასული სლენგია).

ჯანო: *(ეხმარება, მერე თავდაც მოიხსნის მუზარადს და ძირს დაახვევებენ ყველაფერს)* დაიცა, ეგ როგორ?! საიდან სადაო?

დ.გ.: აბა მე რავი! სულ იმ მაღგრამის ოინებია — არ დამიჯერებ და სანამ ეს თავი არ მოვიხსენი, მართლა ვილაც რაინდი ვიყავი, გიჟი და გადარეული... ახლა მომეშვა ცოტა.

ჯანო: მარა რო უნდა მოგკლა...

დ.გ.: დარდი გაუშვი, მაგას მე მოვაგვარებ — ეს მოსახსნელი თავიცი, ეტყობა, სწორედ მაგისთვის მება! შენ ოღონდ ხმალი აბრაზუნე ცოტა ხანს ამ რკინებზე — ემანდ რამე არ იფიქრონ და შესამოწმებლად არავინ შემოიჭყიტოს... მე კიდე ცოტა ყელი თუ არ გავისველე... *(ტანოს)* ჭირიმე შენი... მაიტა აჟ! *(კათხას დააყუდებს)* შენ არ გინდა?

ტანო: ალკოჰოლს არ ვეკარები... მარტო სუფთა ჯინი, წიწკით... ისიც მუცლის გვრემისათვის...

დ.გ.: არა-ა, მუცლის საუკეთესო წამალია Tequila Camino, რო იცოდე... *(ჯანოს):* ახლა ამყევი პაწაზე, ხალხს ხმა მივაწვდინოთ უნდა! *(ბღავის):* დამნებდი, შე უჯიშო შენა! მაინც ვერსად წამიხვალ! *(ჯანოს):* რაღაცა შენც იყვირე, რა... წამეხმარე მაინც!

ჯანო: *(ყვირის, რაც შეუძლია)* ვერ მოგართვეს! ეგეთები შენკენ მოიკითხე — აქეთ დაგაყრევიანებ ნაწლავებს!

დ.გ.: ხო, ეგრე — გამოგდის, ხო იცი... ახლა ეს თავი აიღე და გარეთ გადი, ყველას დაანახე, შენ კიდე *(ტანოს)* წინ გაუქეხი და იძახე ხმამაღლა — სერ ჯანომ მეწამული რაინდი სიცოცხლეს გამოასალმა-თქო! აბა ჰე, მიდი! *(გადიან, ისმის შედახილები).*

(იგივენი და მელიოტი მელისენტათურთ)

მელიოტი: კაი მაგარი ბიჭი ყოფილხარ შენ, აბა! ახლა ცოტა დაისვენე და მერე გველემშაპი გელოდება — ტვინი წაიღო, ისე

ხვრინავს. ციხე-კოშკამდე აღწევს მაგისი ხმა... (ჯანოს მუხლები მოეკეცება; მელიოტი არასწორად გაიგებს მის ბანცალს) ჰო, და რა თქმა უნდა, რაინდობაც უნდა ეუბოდოთ, დაიმსახურა უკვე! (ხმალს დაავლებს ხელს და ჯანოს სამჯერ დაჰკრავს ბეჭებზე) აღსდექ, სერ ჯანო-ჯიორჯი, თუ როგორცაა... ადექი-მეთქი, შენ გეუბნები!

მელისენტა: კარგით ერთი, მამა-ბატონო, აღარ შეეშვებით ამ სისულელეებს?! ვერ ხედავთ, ქანცი აქვს გაცლილი... ვაიძე, იქნება დაჭრილიც კია! აქეთ წამოიყვანეთ! (თავის კარავში შეაყვანინებს).

სურ. IX

გველეშაპოგრაფია

(ჯანო მხართეძობზეა წამოწოლილი, დიდი ტაფა ომლეტი დაათოხლავა და ახლა წყალღვინოთი იკოკლოზინებს ყელს. შემოდიან მელისენტა და მელიოტი; ერთს უზარმაზარი, ხბოს ტყავის ყდაში ჩასმული ფოლიანტი უჭირავს, მეორეს — რაღაც ფუთა)

მელისენტა: როგორ ხარ, ჯანო?.

ჯანო: რა მიშავს, რა...

მელიოტი: მოკლედ, ახლა ასეა საქმეები: მეწამული რაინდის მძლეველის ისევ დილეგში დაბრუნებაზე, ცხადია, ლაპარაკიც არაა... თუ ინებებ, შემიძლია მეფე ართურთან გაგიშვა სარეკომენდაციო წერილით — იარე მერე ღუნიაზე და ეძებე შავ ბედში ჩავარდნილი და გადასარჩენად განწირული ვინმე ქალწული, როგორც რომ ეს რაინდთა წესია...

- მელისენტა:** არავითარი ვიღაც გომბიოების საძებრად ხეტიალი!
ვიცნობ მაგათ... ჯანო გველეშაპს დაამარცხებს და მე შემირ-
თავს ცოლად!
- ჯანო:** უამისოდ არ გამოვა?.
- მელიოტი:** რა, ქორწილს უარობ?!
- ჯანო:** არა, გველეშაპზე გეუბნებით...
- მელიოტი:** აბა ეგ როგორ იფიქრე! მოკლავ გველეშაპს და მელის-
ენტაც შენია, არადა — გზა ხსნილი გაქვს, ასე
ვთქვათ, ოთხივ კუთხით...
- მელისენტა:** მძიმე არჩევანია, ჯანო — შესმის... იქნება და მართლა
არ ვღირდე ასე თავის გადაღებად...
- ჯანო:** ეგრე ფიქრობ?
- მელისენტა:** რა თქმა უნდა არა! ქალი თუ ასეთ რაიმეს
გაივლებს გულში, მაგისტანასთვის გველეშაპთან კი
არა, ჭრელ მამალთან არ ღირს გაბრძოლება!
- ჯანო:** გა-ასაგებია... ისე, შორიდან როგორი შეს-
ახედია ეგ თქვენი გველეშაპი? იქნება და არც ისე დიდია —
ადგილობრივები ყველაფერს აჭარბებენ ხოლმე, მოგეხსენე-
ბათ...
- მელიოტი:** ვერ მოგართევს! უმაღლესია თავის ფასში!
უკეთესს ვერც ინატრებ! მარტო ბოლს უშვებს იმხე-
ლაზე...
- ჯანო:** კარგით, ჰო... მაგარი ხართ, ფსიქოლოგიურ
მოშხადებაში...

მელიოტი: ოღონდ ეგაა, ხალხი ვერ დაესწრება! გულშემატ-კივრების დასტას ჰეროლდის სინქრონული რეპორტით მოუწევთ დაკმაყოფილება... ახალი წესია — არც ერთი ქომაგი 5 მილის მანძილზე! თორემ წინა ჯერზე, დღესავით მასსოვს, მხეცს მხარი ეცვალა და 59 დაშავებული გაიტანეს ტრიბუნებიდან...

მელისენტა: მამა!

ჯანო: ესე გამიგია მე, რაინდს ან რამე ჯადოსნური მახვილი უნდა ეპყრას, ან უჩინ-მაჩინის ქული მაინც ეხუროსო.....

მელიოტი: აგერ, ა! *(ფუთას გახსნის და ერთ ძველისძველ, ჩრჩილნაჭამ მოსასხამს გაუშლის)* ე-ეჰ, ვერ მოვუარეთ, წამალი უნდა დაგვეყარა იმ ზაფხულს... რაც შეუძლებელი გარდაგვეცვალა...

ჯანო: არა უშავს, ნაწილობრივ მაინც დამიფარავს.

მელიოტი: ე-ე... ახლა, როგორაა საქმე, თუ იცი... ეს მოსასხამები ორგვარიაო, გამიგია: ერთნი გფარავენ, მეორენი კი პირიქით — რაღაცნაირად, გველეშაპების დამატებით გასაღიზიანებლადაა მოგონილი, მთლად რომ დააკარგვინონ ჭკუა...

ჯანო: გნებავთ მითხრათ, რომ ამას ინსტრუქცია არ მოყოლია?.

მელისენტა: ნახე, საყვარელო, სულ დაფხავებულია და იქნებ ძანაც არ გადარიოს — ისე, საშუალოდ...

ჯანო: არ წავა! სხვა რამე არაფერი გაქვთ?

მელისენტა: აი, ნახე! *(ფოლიანტს გადაუშლის)* ეს კიდევ სახელმძღვანელოა: **“ვითარ მოვაკვდინოთ გუელვეშაპნი და მოვაშოთ დრაკონნი ზეცად მფრინავნი”** *(დასხდებიან და წიგნს შუაში დაიდებენ)* მაშ ასე, ვიცით რომ დიდია — შესაბამისად, ზნეც ავი უნდა ჰქონდეს...

ჯანო: მსხვილ სახეობებში ეძებე...

მელისენტა: *(კადაფურცლავს)* აქა სწერია, რომ “...თუ მხეცი ესე მახვილკუდაა, ჯერ არს ხელმარცხნივ გვერდზე გასწლტომა დარტყმისა მომაკვდინებლისა აცილებად...”... დაიმახსოვრებ?

ჯანო: ან-ან... და თუ მახვილკუდა არაა?

მელისენტა: *(კითხულობს)* “... და თუ ხმალკუდაა ანთუ ფაშესა მას ზედა იაგუნდისა ფერი ზოლი გასდევდეს, მაშეინ პირუკუ — ხელმარჯვნივ ეგების თავის განრიდება...”

ჯანო: და რა ვქნა, გავაღვიძო და ვკითხო, ემანდ მუცელზე იაგუნდისფერი თუ რაღაცა ზოლი ზომ არ გაგდევს-მეთქი?! ვთქვათ და მიპასუხა კიდეც, ზრდილი ვინმე აღმოჩნდა — დაე-ჯერება?! რო მომატყუოს...

მელისენტა: *(კითხვაშია ჩართული, არაფერი ეყურება)* “...ხოლო თუ გუელვეშაპი იგი რქაკუდაა, მარდი სირბილით ხამს გაქაფვა მისი და ძლის მიხდომა...” ეს რაღაც მთლად კარგად ვერ გავიგე.

მელიოტი: არცაა საჭირო! მთავარია, ჩვენმა მეიარაღემ იმგვარი მახვილი გასჭედა, კედელს გაიტანს! ორპირაა და ორივე ხელით სახმარი, რაღა თქმა უნდა — სხვა იმის ჯავშანქერცლში ვერც გატანს...

ჯანო: გაიხარე. ისევ ვლობია, სირბილით განცი გავაცალო და იქნებ თავისით ჩაძაღლდეს! ოღონდ მაგის ბედი მე ვინ მომცა.

მელისენტა: ბედს ნუ უჩივი, ჩემო ყველავე, მეწყინება იცოდლე!

ჯანო: თუმცა დაიცა, ნახე აქ კიდე რა წერია: “...ნუუკუე მხეცსა მას უცხოსა, დრაკონად ხმობილსა, კუდნი თევზთა მსგავსი აქუნდეთ, უამესია მალლა-მალლად ხტომა, დაღა-

*თუმცა ზოგ-ზოგნი მათგანნი ცბიერობენ და ამხტარსა თავი-
ანთი ხანჯალ-კლანჭებით...”*

მელისენტა: St. George,⁵ შენ გვიშველე და შეგვეწიე!

*(მელისენტი უკვე კარში დგას და მოუთმენლობის ნიშნად,
დელიკატურად ხაზველებს რამდენიმეჯერ)*

ჯანო: ახლა ერთი კარგი ჯადოსანი თუ მიშველის...

მელისენტა: აბა, გავიქეცი მე! შევეცდები, მაგისტრი მარლაგრამი
ვიპოვო სადმე!

*(სასწრაფოდ გადიან, შემოდის მეიარაღე, ორი ჯანოსხელა მახვილი
აქვს ზურგზე გადაებული)*

მეიარ.: მაგარი რამის რამეა, ღმერთი ნუ გამიწყრება!
ბუმბულს გააპობს შუაზე!

ჯანო: საქათმეთში კი არ მივდივარ... შენ ისა თქვი,
გველემშაპის ქერცლს თუ უზამს რამეს?

მეიარ.: აბა რა გითხრათ, ელიას მადლმა, თუ
ხსენებული გველემშაპი ხმალკუდაა ან თუნდაც რქა-
კუდა, კიდე არი შანსი...

ჯანო: კარგი რა, დაახვიე აქედან!

მეიარ.: გარნა თუ წაღლკუდაა ანდა გინდაცა ჭახრაკკუდა...

(ჯანო ყურებში თითებს დაიცობს და “თავო ჩემოს” ლიღინს მოჰყვება)

⁵ წმინდაო გიორგი (მთარგმნ. შენ.)

ხასხასა მდელი ტყის პირას; ხავსმოდებულ ქვაზე დილერი გოგიტა ჩამომჯდარა; “შავი პანტერას” კოლოფიდან უკანასკნელ სიგარილიოს დანანებით დააძრობს და ნაღვლიანი სახით გააფუილებს. მოშორებით, ერთი ასწლოვანი მუხის ქვეშ, გველეშაპის თავი მოჩანს. აუტანლად ხვრინავს, ნესტოებიდან წარამარა გამოსდის ცეცხლოვანი გამონაბოლქვი.

ბილიკზე ლიკა და ზუკა გამოჩნდებიან; **დ.გ.** მისაგებებლად წამოხტება და უფრო ლიკას უღიმის, რატომღაც.

დ.გ.: დილა მშვიდობისა! როგორ გეძინათ?

ზუკა: საზიზღრად! გზა აგვერია და ვიღაცის მიტოვებულ ქონში მოგვიწია ღამის გათევა! რა უბედურებაა...

(ლიკა ინტერესით აათვალ-ჩაათვალიერებს დ.გ.-ს უცნაურ სამოსს — თანამედროვე ზმანებისა და შუასაუკუნეებისდროინდელი Fashion-ის ძაან მაზალო რამ ნაზავია)

ლიკა: *(კეკლუცად)* ბოდიში, თქვენ ჩვენთაგანი ხართ თუ იმათგანი?

დ.გ.: *(გაბადრული სახით)* დილერი გოგიტა, თქვენის ნებართვით...

ლიკა: უიმე, აკი გიცნობთ! თქვენ ის პროდიუსერი არა ხართ, ხეზე გასულ ვირზე რომ გამოუშვა ფილმი?!

დ.გ.: აჰა! ძლივს არ ვნახე ვიღაც, ეგ რო აქ ნანახი?. თანაც თქვენისთანა მომხიბვლელ მაყურებელს...

ლიკა: არა, მართლა არჩვეულებრივი იყო, ნამდვილად!
ოღონდ ბოლოს ვერ გავიგე, ის ვირი მართლა გავიდა
იმ ხეზე?!

ღ-გ-: ე-ე... როგორ გითხრათ — აი, საავტორო ფილმის
კონცეფციიდან გამომდინარე, ტემპლეიტური აზროვნების
დურაციისას, შეიძლება ითქვას რომ კი — ანუ, საქსეს-
ორიენტირებული არსება ეგზისტენციურად ყოველთვის
მიილტვის და აღწევს კიდევ დასახულ მიზანს!

ზუკა: (მცირედნაღვი გაღიზიანებით) ბ-ნი ერმიკო თუა აქ?

ღ-გ-: იყო, კი! გუშინ თითო თლაშო დავკარით აქვე ერთ მო-
ფარებულ სამიკიტნოში... მერე ეტყობა, რაღაც ჯადო გაუ-
კეთეს და უეცრად, თვალსა და ხელს შუა არ გამიქრა!

ლიკა: არ მითხრათ ახლა, აქ ჯადოქრებიც არიანო!

ღ-გ-: რა მოხდა რა — აქ ეს სრულიად ჩვეულებრივი ამ-
ბავია... მიეჩვევით. აი, ამ ხვლიკს მოვუვლი და ბ-ნ ერმიკოსაც
მოგიძებნით, არ დაიდარდოთ!

ზუკა: (ეჭვიანად) რა ხვლიკს?

ღ-გ-: აგერ, ა — იმ დიდრონი მუხის ქვეშ ხვრინავს.

ლიკა: ნუ, რა არჩვეულებრივია! მეგონა, დიდი ხნის წინ
გადაშენდნენ — “დისკავერიში” ვნახე...

ღ-გ-: (საქმის ცოდნით) ეგ დინოზავრებზე იქნებოდა, ეს კიდევ ნაღდი
გველემპაპია და სერ ჯანომ უნდა განგმიროს... აჰა, სიტყვაზე — ჩვენი
ჯანოც გამოჩნდა!

(ბილიკზე ჯანო მოდის, ფეხათრევით, ცალ ხელში ფოლიანტი უჭირავს,
მეორეთი უზარმაზარ მახვილს მოახოხიალებს)

ზუკა: ასეც ვფიქრობდი! მაგას ჯერ ესკიზიც არ დაუშთავრე-
ბია, ეგ კიდე აქ გველეშაპებთან... შვებულება კი აგვისტოში
ერგება...

ლიკა: *(თვალების ყუყუნით)* გოგითა ბატონო, რამე რო იყოს, წესიერმა
ტურისტმა რა უნდა ნახოს აქ პირველ რიგში?
ალბათ, ციხე-კოშკი? გზას ხომ ვერ...

დ.გ.: რაზეა ლაპარაკი! აი ამ ბილიკს დაადექით და მეც
მალე დაგეწევით, ყველაფერს განახებთ, აქ მე ჩემი ნაცნობები
მყავს... ჯერ ოღონდ ორიოდ სიტყვა მაქ ჯანოსთვის
სათქმელი.

ლიკა: დიდად დაგვაკალებთ... ხომ იცით, უცხო მხარეში რომ
ვინმე ახლობელს ნახავ... *(ზუკას, თეატრალური ჩურჩუ-
ლით)* ნუ, რა არაჩვეულებრივი ვინმეა, არა?.

ზუკა: არ ვიცი, არ ვიცი... *(მიდიან)*

(შემოდის ჯანო)

ჯანო: რას შვება ეგ ჩემის დრაკონისშვილი, აღარ იღვიძებს?

დ.გ.: შენც რა გეჩქარება რა... თანაც წესი ეგეთია, უნდა
გააღვიძო და ბრძოლაში გამოიწვიო.

ჯანო: წესები არა... გამომიჩნდა ესეც კუინსბერის მარკიზი!
ისე, რომელ სახეობას განეკუთვნება, თუ იცი?

დ.გ.: უხერხემლო გაზისებრთა ოჯახისა არ უნდა იყოს, ასე
მგონია... აბა ჰე, არ შეგვარცხვინო! *(ბილიკზე და-
გაზავს)*

*(ჯანო მახვილის ვადას ორივე ხელით ჩაებლუჯება, ნაბიჯს წინ წარსდგამს
და ცდილობს, ხმაშიც ლითონი გაურიოს)*

ჯანო:

შენ ეი, ისა... დამიგდე ყური! ალაგობრივ უნდა შევერკინოთ!! თუ როგორცაა... ოღონდ ისა... პირველ სისხლამდე — მოსულა? აბა მართლა თავს ხო არ შევაკლავთ ერთმანეთს! წყლის დაღვევას შენ არავის უშლი ბოლო-ბოლო და არც გოგოებს ჭამ... მე კიდე, ხელმწიფის სიძე რომ გავხდები, მერე ნახე ჩემგან შენი პატივისცემა! ჰა, რას იტყვი?

(გველეშაპმა თევზისტოლა ცალი თვალი გაახილა და ამოიქშინა; ჯანოს ცოტა ნირი წაუხდა, წინ წადგმულ იმ ერთ ნაბიჯს ახლა ორი უკან გადადგმული გამოაკლო)

ჯანო:

ჰო, რა იყო, რა ვთქვი ისეთი?! ორი-სამი რაუნდი, გასახურებლად... თუმცა ამას კიდე რაღა გახურება ჭირდება... სამაგიეროდ, ძან ბევრს ეწევი და ცოტა თათების განძრევაც მოგიხდებოდა...

გველეშაპი:

მორჩი ახლა, ჯანო-ბიჭი, ჩემი მეყოფა...

ჯანო:

(ება ჩამოუვარდა) რა ბრძანეთ?!

გველეშაპი:

მე ვარ, ერმიკო...

ჯანო:

ვინ... მანდ რას აკეთებთ, ერმიკო ბატონო — გველეშაპის ფაშეში?!

ბ-ნი ერმიკო:

(გალიზიანებული ხმით) მე კი არა ვარ გველეშაპის მუცელში, თავად ვარ გველეშაპი! და არ დამიწყო ახლა ლაი-ლაი — შენ გგონია, დიდი კაი რამეა ეს გველეშაპობა?! კუჭში მძმარავს, ყელი ჩახეული მაქ ამდენი ბოლისაგან და 104° სიცხე მიწევს, ქრონიკულად.⁶

ჯანო:

(გონზე ვერ მოდის ბოლომდე) ეგ როგორ... რანაირად?

⁶ იგულისხმება, ფარენჰეიტით — ანუ 40° ცელსიუსით (მთარგ. შენ.)

ბ-ნი ერმიკო: სულ იმ გაიძვერა მალგრამის ოინებია! ჯერ გოგიტას მისდგა და მეწამულ რაინდად აქცია, მერე მე — გველემშაპად... ამაზრზენი ტიპია!

ჯანო: გამოდის, ახლა თქვენ უნდა მოგკლათ?!

ბ-ნი ერმიკო: ე-ე, დაიცა ახლა — ხომ იცი, ყოველთვის გაფასებდი, შვეებულების მერე ხელფასების მომატებაც იგეგმებოდა და საერთოდ...

ჯანო: ახლა რა ვქნა?

ბ-ნი ერმიკო: შვილო, რას გადამეკიდე — წადი, სადმე ახლოში ნამდვილი გველემშაპი იქნება და იმას გაუსწორე ან-გარიში...

ჯანო: ბ-ნო ერმიკო, სასახლეში სწორედ ამ გველემშაპის თავს ელიან...

ბ-ნი ჯანო: კაცო, თუ ჯადოს ამხსნიან და ისევ იმ ერმიკოდ ვიქცევი, ამის ტყავი და მოჭრილი თავი კიდე აქ დარჩება, ვისთვის რაღა მნიშვნელობა აქვს, თავად გველემშაპს რა მოუვიდა?! პოდა წადი ახლა, ის ვირთხა მარლაგრამი იპოვე და მიხედოს საქმეს... უთხარი, თუ უნდა სამომავლო პროექტში ჩავისვამ მოწილედ! ანდა სულაც მმართველ საბჭოში შევიყვან — ჩვენს საქმეში ერთი-ორი კარგი ჯადოსანი კი უნდა გვეყავდეს, ნამდვილად... დაიცა, ჩემი მდივანი სადაა? *(ხახას დააფრენს და დაიბღაველებს, საზარლად) თაკო-ო!*

თაკო: *(თითქოს მიწიდან ამოძვრავო, ორგანაიზერით ხელში)*

გისმენთ, ბატონო ერმიკო!

ერმიკო: სასწრაფოდ ერთი წერილი გვაქვს მისაწერი ყველა ჩვენი ბიზნეს-პარტნიორისათვის, უკლებლივ! ჩინურ ცერემონიებსაც შევეშვათ, პირდაპირ დაიწყე: “ბატონებო! მე აქ, პირადორის მხარეს, ერთი პატარა უსიამოვნება შემემთხვა, ოღონდ...” რა თვალეებს აპარპალეებ, ჯანო?

ჯანო: ერთი საკუთარი თავისათვის შეგახედათ, გველემაპი რო საკუთარ მდივან გოგოს წერილს კარნახობს და მაშინ გნახავდით...

ბ-ნი ერმიკო: მიდი, მიდი — დრო ფულია! ის ბებრუხანა მოძებნე და მომიხერხოს რამე. შენც მიეხმარე, დი-ჯი.

დ-გ-: ე-ე... ერმიკო ბატონო, მეცნიერებისა და მომავალი თაობებისათვის... ე-ე... მაინც რომელ ჯიშს განეკუთვნებით?

ბ-ნი ერმიკო: *(ცუდად შენიღბული პატივმოყვარეობით)* გოლიათ ცელაკუდა დაცეცხლისმრქვეველთა გვარისა — ე.წ. Gigantus Rex, მაშ! ჰო, სად გავეჩრდით, თაკო?

თაკო: “ოლონდ...”

ბ-ნი ერმიკო: “...ოლონდ თუ საქმე აღჩუზე დამიჯდა, მერე მე ვიცი... უდიდესი პერსპექტივებია და ჩვენი ფირმაც რეორგანიზაციას საჭიროებს, ახალი რეალიების კვალად. ჯადოქარ-ჯადოსნების ნაკლებობა აქ არ იგრძნობა და ზოგიერთი მათგანის საბჭოს სრულუფლებიან წევრად შემოყვანაც არ იქნებოდა ურიგო, აქციების შესაბამისი პაკეტით, რაღა თქმა უნდა...”

თაკო: ჯადოქრებიო, სწორედ ასე მოვიხსენიოთ, ბატონო ერმიკო? ვერ გაგვიგებენ...

ბ-ნი ერმიკო: გავაგებინებთ! ვინც არა და — გზაც დამილოცნია...
(ჯანოს და დ-გ-ს): რა იყო, ბიჭებო? ვერა ხედავთ...

ჯანო: ერთი დელიკატური საკითხია გასარკვევი, ერმიკო-ბატონო: თუ მართლა მოვკალი გველემაპი, მახვილის პირზე მისი სისხლი უნდა იყოს, თუნდაც შემხმარი... თან მაგათი სისხლი სხვანაირიაო, გამიგია.

დ-გ-: ეგრეა, წყალი არ გაუვა. პატარა ნაკაწრი და...

(ერმიკო-გველეშაპს იქნებ რაღაცის თქმა უნდოდა, ოღონდ ისეთი ბღაველი აღმოხდა, ციხე-კოშკში უეჭველად იფიქრებდნენ, სულს ღაფავსო)

ჯანო: კარგი ახლა, ერმიკო-ბატონო — საქმე მოითხოვს ასე, თორე მე რა... და ნუ იღრინებით, გაფიცებთ, გოგირდით აყროლდა აქაურობა!

ბ-ნი ერმიკო: რა ჩარაა, სადმე კულზე გამჩხაპნეთ!

ღ-გ-: არაფერი გამოვა — რაღა თქვენი კანი და რაღა “აბრამსის” ჯავშანი! ღრმა ნაჭრილობევია საჭირო...

ბ-ნი ერმიკო: *(დისკუსიით გულგაბეზრებული)* მაიტა აქ! *(უზარმაზარ თათს მახვილს წამოავლებს, პირისაკენ გააქანებს, შუაში გადაკენეტს და გადმოაფურთხებს)* აჰა თქვენ! ესეც თუ არ ეყოთ საბუთად და აღარ ვიცით... *(კარნახს განაგრძობს):* “...ზოგ სხვას კიდევ ფინანსური ანგარიშგებისა და საგადასახადოსთან ურთიერთობის საკითხებსაც გადავაბარებდი...”

ღ-გ-: *(ბილიკს დაადგება)* ა, კაცი! კაჟია ნამდვილი... სხვათა შორის, ეგ ლიკა კიდევ რა მასტია?..

სურ. X

სრული არეულობა

ლიკა: ბატონო გოგიტა, უნდა გამოგიტყდეთ, მთელი ამ ჯადო-გარდასახეებისა ბევრი არაფერი გამეგება და...

ღ-გ-: ახლავე ყველაფერს დალაგებით აგისხნით, ჩემო კარგო! რა პრობლემაა! მალგრამამ რო ნახა, მე და ბ-ნ

ერმიკოს მეფე მელიოტი ჯანოსავეთ საკანში გვიპირებდა გა-
მომწყვდევას, ჩვენი თავი გამოსთხოვა და ჯადო დაგვადლო —
თქვენი მონა-მორჩილი მეწამულ რაინდად აქცია, ის კიდე —
გველუშაპად. დიდი გამოქეჩილი ვინმე კია, უნდა ითქვას...
ოლონდ არც ბიძამისი — მარლაგრამია ჯაბანი და მის ათიანს
ჯვრის ტუხით გადაუჯოკრა...

ლიკა: ოლონდ ტერმინების გარეშე, თუ შეიძლებოდეს
— ვერ ვიტან ბრიჯს რომ მიუსხდებიან და...

ღ-გ-: ვერც მე! საერთოდ, ბანქო რა კაცის საქმეა,
პოკერის გამოკლებით, რაღა თქმა უნდა... კაროჩე, ამ ჩვენმა
მონუცმა იწინასწარმეტყველა: პირადორს ორად-ორი
უბედურება ემუქრება — მძვინვარე მეწამული რაინდი და პირ-
სისხლიანი გველუშაპი, და ვინც მათ სძლევეს, ქალიც იმას
უნდა შევრთოთო. მელიოტ-მეფე, მეტი რა ჩარა იყო,
დაეთანხმა და ჯანოც მოახტა თავის ცხენჯოხას, გააჭენ-
გამოაჭენა...

ლიკა: ა-ა, ამასაა რომ ზეიმობენ? რას ერჩი, ჯანო
ძან ზმანად კი გამოიყურება...

ღ-გ-: აბა, აბა! მელიოტ-მეფეც კი ველარ იტყვის — უხეიროდ
აცვიაო...

ლიკა: ვკვდები ისე მაინტერესებს, მელისენტა რას შემოისხამს!

მელიოტი: სადაა ეს გოგო?! ჯერ იყო და თავი წაგვაჭამა, ამ
ტიპს უნდა გავყვე ცოლადო, და როცა ჩვენი თანხმობა მიიღო,
ახლა სადღაც გაქრა! სუფთა ცხონებული დედამისია!

ვეზირთუხუცესი: *(ძან ბრძნული სახით)* თქვენო უდიდებულესობავ, მე
მუდამ იმ აზრზე გახლდით, რომ ქალები, სა-
ზოგადოდ...

მელიოტი: ჩვენც, ჩვენც! ოლონდ ახლა მაგის დრო არაა — ან
ქალიშვილი მიპოვე, ან ერთი ჯადოსანი მაინც მომგვარეთ აქ!

რა უბედურებაა — როცა არ გინდა, ფეხებში გედებიან, დაგ-
ჭირდება და — არაა არცერთი...

ინტერმედია

მრგვალ ბალან

(უკვე სალამოვდება; ჯანოს ნაცნობი ხითხითი ჩაესმის და იდუმალი ხმა ეუბ-
ნება, ღვინის სარდაფში ჩადიო... მაშხალას ამოაძრობს კედლის სამაგრიდან,
კიბეებზე ჩადის; ფეხი დაუცდება და... უცებ ხალხმრავალ ქუჩაზე აღ-
მოჩნდება, ქვაფენილზე გართხმული. წამოაყენებენ, ურჩევენ, ნაკლები
დალიეო... მის წინ ტაქსი ჩერდება)

ტაქსისტი: *“მიმაქროლე-ებს ჩემი რაში-ი...”* ჰი-ჰი-ჰი!

ჯანო: მარლაგრამ, თქვენა ხართ?

მელისენტა: კარგი ახლა, საყვარელო — დაჯექი დროზე!

მარლაგრამი: *(როლშია შესული)* საით ინებებთ?

ჯანო: ორი-სამი წრე დაარტყვი აქაურობას და მერე პირდაპირ
პირადორში!

*(სწორედ მრგვალი ბალის გარშემო მესამე წრეზე აჩერებთ
პატრული)*

პატრული: თქვენი საბუთები!

მარლაგრამი:

რა პრობლემაა, მეგობარო! რამდენ ცალად? 500 გეყოფათ? *(ჯანოს და ტელისენტას):* გუგულებო, ჩვენ კიდე — ჰაიდა პირადორში!

* * *

— შერე კიდე, — უყვებოდა პატრული სერჟანტს, — შოფერმა დასტა ქაღალდები შემომაჩენა ხელში და გაქრა... ცარიელი მანქანა, არც ნომრები, არც არაფერი... დედას გეფიცებით, სიმართლეს ვამბობ! ისიც დააყოლა, მახსოვს — ავუღეთ “პირადორშიო”... ოღონდ ეგეთი რესტორანი არ ვიცი...

— მაგიორში, *მე ვიცი* სულ მალე სადაც აუღებ, ეგეთი ბლაყუნა თუ დამირჩი!..

(მაგრამ, მკითხველო — რანი ვართ ჩვენ პატრულისთვის, ანთუ პატრული — ჩვენთვის? ჩვენ ჩვენს ამბავს მივყვებით...)

სურ X

ჯადოსნების იდუმალი სერობა

(მალგრამისა და მარლაგრამის საგვარეულო სახლი; საუზმის დროა. შემოდის მარლაგრამი.)

მარლაგრამი:

ერთი თეფში მანი-ფაფა, დროზე!

*(დიდი მათლაფა თვალის დახამხამებაში ჩნდება მის წინ; შემოდის
მალგრამი, ისიც სუფრას მიუჯდება)*

მალგრამი: შემწვარი იხვი, თავისი საწებლით! და ერთი
ბოთლიც ანჟურის ღვინო! (პაუზა) შენ რა, არ გეყ-
ურება?!

მარლაგრამი: ჰი-ჰი-ჰი! ჰუ-ჰუ-ჰუ!

მალგრამი: *(გაცოფებულია)* კარგი რა, ბიძაჩემო! აკი შევთანხმდით,
შინაურ საქმეებში...

მარლაგრამი: მერე, პირველმა ვინ დაარღვია ფიცი-მტკიცე?
შენა, დისშვილო, შენა! გზა რაზე გადამიჭერი?! ვიღაც
მეწამულ რაინდად გადააქციე, ვიღაც — გველეშა-
პად... რა ეშმაკად გინდოდა?! მერე საბრალო
მელისენტა იქითა სამყაროში გადაისროლე მოტყუე-
ბით, და ახლა ისევ იქ მომიხდა დაბრუნება და რაღაც
უცხენო ფაეტონების მართვა... დავბერდი, ამდენიც კი
აღარ შემძლია!

მალგრამი: მერე, ვინ რას გაძალებთ...

მარლაგრამი: სუ-მეთქი, მოთმინებიდან არ გამომიყვანო! ისე,
არ გაინტერესებს, ის შენი გულის მურაზი,
ლედი ნინეტი სად გადაიკარგა?

მალგრამი: ბიძაჩემო! არ მითხრათ ახლა...

მარლაგრამი: გეტყვი, რატო არ გეტყვი რა! ციხე-კოშკის
წინ, დიდ ტბორზე რო ბატები ბინადრობენ, იმათში
ექებე! ჰი-ჰი-ჰი!

მალგრამი: ოხ, შე ბებერო...

მარლაგრამი: სუ! რას მეუზრდელები აქა! ორჯერ ასი ცალი მაინც იქნებიან — წადი და გამოარჩიე! ზვალ დილაძე მოგიწევს ჩალიჩი! ოღონდ თუ წესიერად მოიქცევი, ამ საქმესაც გამაჩარხინებ და ბ-ნ ერმიკო/ გველემაჰსაც...

მალგრამი: ა-ჰა-ა! პრობლემები გაქვთ, ბიძაჩემო?

მარლაგრამი: რაის პრობლემები — შენ რო არ გამომტყვერალიყავი, ყველაფერიც მძივივით მქონდა გაწყობილი!⁷ ჯვრისწერაც და საერთოდ... ახლა კი მელიოტი ჯა-ჯღანებს — სადაა იმის საბუთი, ჯანო/ჯიორჯიმ თუ მართლა სძლია გველემაჰსო! მოკლედ... აჰა, მალე ჯანო და დი-ჯიც გვესტუმრებიან...

მალგრამი: რა იცით?

მარლაგრამი: როგორ თუ — რა ვიცი?! ბოლო-ბოლო, ჯადოსანი ვარ თუ რა? აი, შენ კი ჩემამდე ჯერ ბევრი გიკლია... მერე, შვილი რომ გეყოლება, ისიც შენზე კნინი იქნება და ვიქნებით ასე... ჩვენი ხელობა, ბაბა, რეგვენებისთვის კი არაა მოგონილი. ამიტომაცაა რომ პროგრესის მაგივრად ახლა რეგრესა აქვს ალაგი... და რაც უფრო ხანიერია ჯადოსანი, მით უფრო გა-მოირჩევა იგი თავის ამქარში. ასეა ეს.

მალგრამი: მერედა, გესმით ეს რას მოასწავებს? პროცესის არა-დისკრეტულობის შემთხვევაში, სულ რაღაც ასწლეულებია საკმარისი და...

მარლაგრამი: ეგრეა! ჯადოსნები საბრალობელ თვალთმაქცებად გადიქცევიან, ხალხს კი ჩვენი რწმენაც დაეკარგება და რიდიც... მობრძანდით!

(შემოდინ ჯანო და დ.გ.)

⁷ იმხანად გამოთქმა “სათივით მქონდა აწყობილი” — გასაგები მიზეზების გამო, არ არსებობდა (მთარგ. შენ).

მარლაგრამი: რას ინებებთ?

დ.გ.: ორი ორმაგი მალვაზიის ღვინო, თუ არი შესაძლებლობა...

მარლაგრამი: *(ტაშს შემოკრავს)* ორი თასი მალვაზია, ცქაფად!

(სქელი ლივლივით სითხით სავსე ორი ბარძიმი ციმ-ციმ ჩნდება მაგიდაზე)

დ.გ.: აი მესმის, სერვისი-ი! ოღონდ ამათთვის წყვილი სიგარილიოც რომ დაგერთოთ...

მალგრამი: *(დანანებით)* უკვე ვცადე, არაფერი გამოდის... დროით-სივრცითი კონტინიუმის მოცემულ მონაკვეთში მატერიალურ ფასეულობათა... მოკლედ, ჯერ რამდენიმე საუკუნე კიდე უნდა გავიდეს, ეგრეა.

დ.გ.: ე-ეჰ, არაა სრულყოფილება დედამიწაზეო — თქვა მელაკუდამ... თქვენ გაგიმარჯოთ! *(ბარძიმს მოიყუდებს)*

ჯანო: ახლა ისა... როგორ იქნება ჩვენი საქმე? ფაქტია, ბატონ ერმიკოს ჯადო უნდა ავხსნათ როგორმე — მელიოტი არაფრით იჯერებს, მე რომ გველეშაპს ვძლიე. არადა, ბრძოლაში რო ვიწვევდი, რა ვიცოდი თუ ნამდვილი არ იყო? ასე რომ, ისეთი მატყუარაც არ გამოვდივარ, რამე რო იყოს...

დ.გ.: ცხადია, ჩვენი ძმა! ორთქმავლისა და ნიანგის ემაგ ნაჯვარს ბ-ნ ერმიკოს ვინ მიაღსგავსებდა! ე.ი. ნამდვილი გმირი ხარ — წყალი არ გაუვა! ის კიდე წევს ახლა იქ და მდივანს წერილებს კარნახობს — გადაირევი კაცი...

მარლაგრამი: მორჩი წუწუნს! მე აქ ფირმა უნდა გავხსნა და იკასთანაც ყველაფერზე მოვილაპარაკეთ უკვე, ასე რომ ის კაცი მე თქვენზე ნაკლებ არა მჭირდება! ოღონდ ეგაა რომ...

მალგრამი: ბატონებო, საქმე ის გახლავთ, ბიძაჩემს ჩემი დანმარე-ბის იმედი აქვს... მე კიდე მხოლოდ მაშინ გამოვიღებ ხელს, თუ ამ ახალი კომპანიის საბჭოში შემიყვანენ და... ნინეტსაც დამიბრუნებენ!

(ყველასათვის მოულოდნელად, შუა ოთახში მელისენტა ჩნდება)

მელისენტა: მოგესალმებით, ბატონებო! მართლა შეთქმულებივით არ გამოიყურებით? ერთი მამაჩემს ენახეთ!

მალგრამი/მარლაგრამი: *(ერთ ხმაში)* დაიცათ, აქ საიდან გაჩნდით?

მალრაგრამი: არავის ძალუძს აქ შემოდწევა, თვინიერ ჩვენი ნებართვისა!

მალგრამი: ჯადისნები ვართ, ბოლო-ბოლო — ჩვენი სიტყვა საკუთარ სახლში მაინც ჭრის, ჯერ კიდე!

მელისენტა: *(იღიმება, მომხიბვლელად)* ახლახან ჩემი დეიდაშვილი მესტუმრა, ფერია მორგანას მოწაფეა...

მალგრამ/მალრაგრამი: ესლა გვაკლდა!

მალგრამი: ავალონის ბოლო სრულუფლებიან კონფერენციაზე ეს ტერიტორიები ჩვენს განმგებლობაში გადმოვიდა, ერთიანად...

მალრაგრამი: ქალების ამბავი არ იცი, მაგათთვის სიტყვა და საქმე... *(დამსწრეებს)* ჩვენ ბოდიში, მცირე ხნით... თავი ისე იგრძენით, როგორც საკუთარ... *(ვაქრებიან)*.

მელისენტა: უ-უჰ! ესეც ასე! როგორა ხარ, ჯანო? არ მოგენატრე?

ჯანო: მაგარი ხარ, მეტა!

მელისენტა: არავითარი დეიდაშვილი მე არა მყავს და აქაც სულ უპრობლემოდ შემოვედი — მაგათ მცველ სულებს, ეტყობა, წათვლიმათ...

ღ-გ-: ფრთხილად იყავ მეგობარო, ფრთხილად... ნებისმიერი ქალს შეუძლია კუდიანად გადაიქცეს, თუ მოინდომა... ჰო, რას ვამბობდი? მოდი ერთი, ამ უჩინარ ლაქიას დავებაზრები, ეგება მეც გამოვრჩე რამეს... *(მაგიდის კიდე დააშტერდება, მერე — მბრძანებლურის ხმით):* კიდე ერთი დიდი თასი მალვაზია, ტემპში!

(თქმა და თავზე მთელი დოქი ღვინო გადაესხმება, საიდანღაც დემონიური ხარხარი ისმის. ღი-ჯი თავს ძლივს იკავებს, მელისენტას დანდასწრებით ერთი გემოზე არ შეიკურთხოს)

მელისენტა: კარგით რა, თქვენც რა პატარა ბავშვივით იქცევით — ცოტაც მოგეთმინათ, მასპინძლების დაბრუნებამდე... ჯანო, ძვირფასო — როგორც კი მთელი ეს არეულობა დალაგდება, ქორწილი უნდა დავთქვათ და ჩემი საქორწილო კაბის საკითხიც...

ჯანო: კაბის ამბავი შენ უკეთ იცი, ჩემო...

მელისენტა: რა თქმა უნდა ვიცი, მაგაზე არც იღარღო.

ჯანო: ქორწილი კი შერეული უნდა იყოს, ასე მგონია — ისე შეერია ერთმანეთს ეს ორი სამყარო, ამათი გაყოფა ახლა აღარც გამოვა!

ღ-გ-: *(ამასობაში თძების გამშრალება, პერანგის გახლა და მალგრამის გარდერობიდან რაღაც მოსასხამის დათრევაც მოუსწრია)*

კარგი აზრია — ახალ კომპანიასაც წაადგება...

(უეცრად ისევ ჩამობნულდება, პაერი ერთი შეირყევა და ორი ჯადოსანი წყვილად დაერჭობა შუავულ ოთახში; მიიმე-მიიმედ კი

სუნთქევენ, ნაჯაფარი ხალხივით, ოღონდ სახეებზე მაინც კმაყოფილების ღიმილი დასთამაშებთ)

მარლაგრამი: სუფთად ვიმუშავეთ, მერლინის მზემ! *ჰი-ჰი-ჰი!* ბ-ნი ერმიკოცახლავე აქ გაჩნდება. გველეშაპის მხოლოდ თავი დავტოვეთ მდელიხზე, მელიოტის თვალის გასახარად...

მელისენტა: მე კიდევ ბოდიში უნდა მოგიხადოთ, სულელურად ვიხუმრე... აი, ფერია მორგანას... რა იყო, რას მიყურებთ?

მალგრამი: სულ ერთი დღით შეგეშალათ, მეფის ასულო! მართლა აქეთ მოფრინავს, ხვალისთვის ველით... ახალგაზრდები ახლა, მოგეხსენებათ, ბევრად სწრაფად დაფრინავენ, არაფერს ერიდებიან. ჰო, ისა... ჯანო უნახავს თავის ჯადოსნურ სარკეში და ფრიად დაინტერესებულა! ხომ არ გამაცნობთო, შემოგვითვალა...

მელისენტა: კიდევ რა უნდა?! ვერ მიართვეს! ნახა სარკეში და ეყოფა... აქ კი მე მნახავს, ძან თუ გამოიდო თავი! წამოდი, ჯანო — მამაჩემს უნდა მოველაპარაკოთ ქორწილის თაობაზე!.

(გადიან. წამსვე შემოდის ბ-ნი ერმიკო, ძან საქმიანი უჭირავს და პირდაპირ მაგიდის თავში იკავებს ადგილს)

ბ-ნი ერმიკო: აბა, ბატონებო, სანამ საქმეს შევუდგებოდეთ, თითო ხომ არ — ჰა?.

მალგრამი: ბატონი ბრძანდებით!

მარლაგრამი: რატომაც არა!

დ.გ.: ა, კაცი! ოღონდ ყოველგვარი თქვენი ჯადოსნობების გარეშე, თუ შეიძლებოდეს...

მალგრამი: ადვილი სამსახურია!

(ცალი ხელისგულით ორჯერ შემოჰკრავს ტაშს და შემოდის ტანო)

დ-გ-: ასე არ ჯობია? თქვენდამი სრული პატივისცემის მიუხედავად, უნდა შევნიშნო რომ ჯადოსნობაშიც ხანდახან ზომიერებაა საჭირო... ცუნცულ, თითო კათხა ორმაგი გინესი ყველას!

მარლაგრამი: ახლა, თავმჯდომარეობას ვინ კისრულობს? არჩევანი მე! *ჰი-ჰი-ჰი!* უფროსი ვარ ყველაზე!

მალგრამი: იყავით ბატონო, ვინ გიშლით... მაშ ასე, ბ-ნო ერმიკო: ჩვენ, ორი ჯადოსანი, მმართველ საბჭოში შეკვივართ სრული პაკეტით. კომპანია ოდნავ იცვლის სახელს და იწოდება როგორც *მალრაგრამი, მალგრამი, ერმიკო & Co...*

ბ-ნი ერმიკო: არავითარ შემთხვევაში! სარეკლამო ბიზნესში, შეიძლება ითქვას, ჭიპი მაქვს მოჭრილი, საკმაოდაც მიცნობენ და ვერაფრით მოგცემთ უფლებას, *თქვენი* სახელი ჩემსაზე წინ დააყენოთ! წინადადება შემომაქვს, ვიწოდებოდეთ როგორც *მარლაგრამი, ერმიკო, მალგრამი & Co.*

ყველანი ერთხმად: მიღებულია!

მარლაგრამი: ჩემი წინადადებაა, ბ-ნი გოგიტა ჩვენი ტურის-ტურული სააგენტოს მთავარ რეგიონალურ მენეჯერად დაინიშნოს...

დ-გ-: აქ მტოვებთ — სამარადჟამოდ?! დიდი სიამოვნებით.

მარლაგრამი: და აი კიდევ რა — რასაც პირადორის ქსელი მოგებას მოგვცემს, თანაბრად გაგვიყვია, ოღონდ შოტლანდიიდან 70% ჩემია — მე იქ ჩემი კავშირები მაქვს...

მალგრამი: *(ცქვიტად)* მე კიდე უელსსა და ორკენის კუნძულებზე
მაქ ჩემი პრეტენზიები! თუ 60%-ზე ნაკლები მერგო,
ყაბულს არა ვარ!

ბ-ნი ერმიკო: უფ. თავმჯდომარევ! უნდა მოგახსენოთ, ასე ჩემი
ტვინი ვერ იმუშავებს — ერთი კარგი გაბოლების გარეშე...
ვერაფრით დავიჯერებ, რომ თქვენი დონისა და გაქანების ორ
ჯადოსანს, ერთიანი ძალისხმევით...

მარლაგრამი: ეგეც არი რა, ნიუტონის ბინომი! აბა, კოლლეგა, მე
შემომიდექ!

*(ორივენი თვალებს მილულავენ, რაღაცას ჩაიბურღუნებენ და მაგიდაზე
ორი მომცრო, წვრილი სიგარა თუ სიგარილიო ეცემა)*

დ-გ.: აჰა! შეგძლებიათ, თუ მონინდომებთ! *(დილინებს)* “თუ-
თუ-თუ, თუ-თუ- თუ, მონინდომებს კაცი...”

ბ-ნი ერმიკო: *(ყნოსავს)* ბრაზილიურია... რას ერჩი, უარესებიც მომიწევია.
მომიკიდე ერთი!

(სულ მალე ოთახში ლურჯი კვამლი დადგა და საქმეც დაიძრა)

მოქ. V

საქორწინო ღხინი

სიმართლე ითქვას და, ამ კატეგორიის სირთულის ჯადოსნობის
გაწევა ბიძა-დისშვილს აქამდე არც მოსწევიათ — საქმე იქამდე მივიდა,
ფერია მორგანასაც კი შეუამხანაგდნენ — აქაოდა, კეთილი საქმისათვისო;
თანაც ხუმრობა ამბავია — მთლად მიღმასამყაროელებს ვატანთ ქალს, ემანდ

არ შევრცხვეთო... ჯერ იყო და მაგიდების მისადგმელად ორი სამყაროს გაერთიანება გახდა საჭირო — მეფე მელიოტის ბუხრის დარბაზიდან ვიდრე ბ-ნი ერმიკოს კაბინეტამდე, ჩათვლით. აქეთა მხარეს სუფრა ევროპულად იყო გაწყობილი — მკაცრ სტილში, სტუმრებიცა და მიმტანებიც სულ შავ-თეთრ ფერებში იყვნენ გადაწყვეტილნი, კბილის გასაკრავად კი ბუტყებროდები და ნამცხვრის ციცქნა ნაჭრები ჩამოერიგებინათ, ლამაზად. სამაგიეროდ პირადორის მხარეს მუხის მაგიდებს სულ ჭრიალი გაუდიოდათ: ეს ტახის შებოლილი თავებით, ეს თხილითა და კომშით ფარშირებული გედები თუ ფარშევანგებით, ირმის შაშხის 5, ლორის 10 და ძეხვის 12-ნაირი სახეობაო, თაფლში ჩაწყობილი ნუშიო, დაშაქრული ვაშლიო, ათასნაირი ჩირი და ტკბილეულობა... დოქების, კათხების, თასების, ფიალებისა და ყანწყების ზომ მთელი გროვა იდგა! სამოსიც ისეთი შეერჩიათ, თვალი ავიჭრელდებოდა კაცს — დიბა-ატლასი, ტყავი და ოქრომკედი, ნაქარგი თუ რიოშ-ნამდვილი მარგალიტებით მოოჭვილი მოსასხამები, თავსაბურავები, გამჭვირვალე პირბადეები თუ თმებზე გვირგვინად დადებული ყვავილწნულები... გულამოღებულ კაბებზე ზომ სიტყვას აღარ ვძრავთ.

დიღერმა გოგიტამ — ე-ე, მაპათიეთ, *გოგიტა მენეჯერმა* ადრევე გათვალა, გაისარჯა და ლიკასთან ერთად ახლა სუფრის იქითა მხარეს გახლდათ წამოჭიმული, საპატიო სტუმრის სტატუსით. დედოფალი, გრძელზე-უგრძეს მეწამულმლეიფიან საქორწინო კაბაში, მართლაც რომ ზღაპრულ პრინცესას ჰგავდა და იყო კიდევ, ბოლო-ბოლო! ჯანოს, როგორც რომ ყველა სასიძოს ამქვეყნად (*და ეტყობა, იმქვეყნადაც*) მცირეოდნავ გაკვირვებულ-გამოშტერებული მხერა ჰქონდა, ხოლო უკვე გვარიანად შექვიფიანებული მელიოტ-მეფე გულთბილად უდიმოდა ვიღაც უცნობ და მისთვის *სრულიად* გაუგებრად ჩაცმულ პიროვნებებს...

ბ-ნი ერმიკო: *(ერთხანობა, ცდილობს ცალკე გვერდებარეული ჩანაწერები მიუსადაგოს ერთმანეთს, ცალკე — პნევმატური ჩაქუჩების ხრივინი ვადაფაროს):*

... და იმას მოგახსენებდით, რომ... ე-ე... რაკი არაფრით მეგონა, თუკი მე მომანდობდით მისალოცი სიტყვის წარმოთქმას... ე-ე... მინდა ჩვენს ახლადშეძენილ პირადორელ მეგობრებს... ასე ვთქვათ... თუკი ოდესმე დაგვდებენ პატივს და გვესტუმრებიან... მთელის გულითა და სულით... ე-ე... ძალისხმევას არ დავიშურებთ, რათა მთელი სიგრძე-სიგანით გადავუშალოთ... როგორც იტყვიან, თვალნათლივ დავანახოთ ცივილიზაციის მიღწევები და ასე ვთქვათ, გამოცდილება გავუზიაროთ... ე-ე... და ახლა ნება მიბოძეთ...

(სწორედ ამ დროს ჩაქუჩების ორკესტრი in toto ავუგუნდება და ბ-ნი ერმიკოც თეთრ ხელსაწმენდს დაახეთქებს მაგიდას... მერე მოწყვეტილ დაეშვება სკამზე)

მელიოტ-მეფე: *(ფრიად ნაამები სახით)* ძალიან კარგი! ახლა მაგისტრ მარლაგრამს ვაძლევთ სიტყვას!

მარლაგრამი: *(სკამზე შეხტება)* თქვენო უდიდებულესობავ, ბატონებო და ქალბატონებო! ჩვენი ძმა ერმიკოს ნახევარსაათიანი მოხსენების მერე, შეიძლება ითქვას, არც არაფერია დასამატებელი! და თუკი თავად ან ვინმე მისიანს ყელში ამოუვა ეს მისი ნაქები პროგრესი — *ჰი-ჰი-ჰი!* — ხმაურისაგან თავი ატკივდება, სუფთა ჰაერი მოენატრება და რიგიანი საჭმელ-სასმელი, წყნარი საუბარი და ტკბილი ძილი — ვთხოვთ ჩვენსა, პირადორში გადმოვრძანდეს... ასე ვთქვათ, კეთილი გულითა და აუმიღვრეველი გონებით ვეპატიყებით, *ჰუ-ჰუ-ჰუ!*

(ისევ თავის სკამზე მოკალათდება, ყველა ტაშს უკრავს, მხოლოდ მალგრამი გადახედავს ამრეზით)

მალგრამი: სიტყვას გიწუნებთ, ბიძაჩემო — არც სტილი გივარგათ, არც მხატვრული სახეები... სიტყვადქმნადობის არარსებობაზე აღარას ვამბობ!.

(გვერდზე მჯდომი ნინეტი ექაჩება სახელოზე და აჩუმებს)

მელიოტ-მეფე: სიძე-პატარძლის სადღეგრძელოს სერ მენეჯერი გოგიტა წარსთქვამს, ვიდრე სულ არ ჩაბუფბუფებულა... მიმიხედეთ ერთი!

(მ.გ. ლიკას დახმარებით წამოდგება ფეხზე, ჯერ თონეში შემწვარი ტახის ხელუხლებელ თავს მიაშტერელება, მერე დამსწრე საზოგადოებას მოავლებს თვალს)

მ.გ.: თქვენო ე-ე... აღმატებულეზავ, ძვირფასო მელისენტა და ჯანო, ჩემო მეგობარო! და თქვენც ყველა, რა თქმა უნდა...

გრძელი სიტყვა მოკლედ ითქმისო, გამიგია, თუმცა ზოგ-ზოგს
ამას რას გააგებინებ... აი, ნეფე-დეოფალმა გადაწყვიტეს,
ორივე ამ სამყაროში გვინდა ცხოვრებაო... აგაშენათ
ღმერთმა! ასე არ ჯობია? და ჩვენც ასევე, ჩვენც ასევე!..

*(თვალეებს ისე დააბრიალებს მარჯვნივ-მარცხნივ, თითქოსდა
ელაგებოდეს ვინმე)*

კარგად მახსოვს ის დრო, როცა ხალხი ბნელი იყო და
უმტკიცებდნენ — სამყარო მხოლოდ ერთიაო, მატერიალურად... ე-
ენდე! არა, განსხვავებაც არის, რაღა თქმა უნდა — მაგრამ სულ ერთი
დღით! აი ამ სუფრის იმ ბოლოს სამშაბათია, იმ სუფრის ამ ბოლოში
კი — ოთხშაბათი... და რა მერე?! დიდი ამბავი! სულაც ორი შობა და
ორი ახალი წელი არა გვაქვს?! და საერთოდ, ერთია ეგ — შობა-
ახალიწელი ქვია, მორჩა და გათავდა! გაგვიმარჯოს! ე-ე... მინდოდა
მეთქვა — **Prosit!**

*(ყველანი ფეხზე წამოდგებიან და გაბედნიერებულებისა სვამენ;
ორივემხრივ ისმის ყვირილი — Hurrah! და “მრავალყამიერ!”)*

ჯანო:

მადლობა ყველას... თქვენზე უკეთ მესმის, რომ მშვენიერი
პრინცესას ღირსი მე არა ვარ...

(სუფრა არ ეთანხმება, ისმის ხალხის გუგუნი)

არც ისეთი მამაცი ვარ, არც ისეთი მომხიბვლელი... სამეფო
კარის საკადრის უნარ-ჩვევებშიც მოვიკოჭლებ...

(სუფრა დუმს)

უბრალოდ, გამიმართლა და ეს არაჩვეულებრივი დღე რომ
გამითენდა, მაშინათვე მივხვდი — ჩვენი ძველი, კეთილი 31
ივნისი დამდგარიყო...

(სუფრა კმაყოფილებას გამოხატავს)

მელიოტ-მეფე: *(მცირედნაე იჭუნეულად)* ახლა, თუ ღვთის ნებაც
იქნა, ჩვენი კარის სასიქადულო მგოსანი, მეტრ ლემისონი დაგ-
ვიმღერებს რომანსს “*შაჰმა რაინდმა...*”

მორჩა, ამით უნდა დავამთავროთ — როგორც რომ მავანი იტყოდა:
“მეყოლეთ ვარდივით...”

ገ ሌ ገ ፍ ዓ ዓ ግ ደ...

სწორედ ამ რუბრიკით შემოგთავაზეთ შარშან თინათინ თოფურიას ერთი ვრცელი მოთხრობა, (მოგეხსენებათ, *მოკლედ* წერა დამწყებისათვის ისევე ძნელია, როგორც ვთქვათ, ზოგადად სონეტის თარგმნაა) ახლა კი იგივეს ვიტყვით — კონკურსის პირობებით გათვალისწინებულ 10 საუკეთესოთა სიაში მოხვედრის შემდეგ — “ეს ერთი და სხვა მრავალი!”

ოლონდაც, კასრ თავლს ჩვენში რატომღაც ყოველთვის გამოერევა ხოლმე კოვზი კუპრი და ჩვენც ის გვინდა, ათასგვარ კონკურს/პრემიებმა არამი გავლენა არ იქონიოს: მართალია, მათ შორის განსხვავებაც შეინიშნება (კონკურსებს *იგებენ*, პრემიებს — *არიგებენ*) მაგრამ ამასაც აქვს მედლის მეორე მხარე, ანუ — როგორცა ძველი ლათინები იტყოდნენ — *quid victor — ვინ დაჯაბნე?*

საქმეც ისაა, ამა კონკურსის უსტაბაშებმა ათივე საუკეთესო ერთ კრებულად დასტამბეს გრიფით “წერო”, აქ კი ისევე ფელინის იმ ფილმის სახელწოდება გაგახსენდება კაცს — წიგნის ტექსტის 8^{1/2} შემლილებზეა და... ვაითუ მათსავე მიერ შეფასებული! გასაგებია, რომ ერთის სათაური წმინდა წყლის ეპატაჟია და სხვა არაფერი (*à la “მთვარე, მაკოცე ტრაკზე!”*), მეორის შინაარსი — იმის ნაწერია, ვისაც სათქმელი არაფერი აქვს; მესამის გადაკითხვისთანავე ცხადი ხდება, რომ მაგის დამწერს 2 წიგნი არა აქვს ამ საუკუნეში წაკითხული (და ასაკს თუ გავითვალისწინებთ, ე.ი. სიცოცხლეშიც...) თუმცა ასეთი რამ ჩვენში ცოდვად არასოდეს ითვლებოდა — ერთი ასეთი კალმოსანის ანეკდოტად ქცეულ ნათქვამს გაგახსენებთ: *მე ბაბა, მწერალი ვარ, მკითხველი კი არაო!* ოლონდ როცა ახალგაზრდა (ე.ი. 60 წლამდე ასაკისა, მერე კი — ჰობ-ჰობ და გინდა-არგინდა, უკვე *ცნობილად* უნდა მოიხსენიო), მომწერლო ელემენტი თხრობას ასე იწყებს — “კაცს თავზე შრამი (sic!) აჩნდა...” — ეს არც ზოგადად ჩვენი მწერლობის უნიათობის ბრალია და არც ამ ახალბედას გამწვრთნელია მოსაკლავი — ვინც “წეროდ” სახელდებული კონკურსის მსაჯულ-განმსჯელები დააფინანსა, ისაა ტყავგასაძრობი!

ისე, 10-იდან ერთმა ზომ მაინც ივარგა, ასე გვგონია და ვბეჭდავთ კიდევ ამ ჩვენი ალმანახის ფურცლებზე, და იქნებ დარჩენილი 9 ცალის იმ ნახევარმაც ივარგოს ოღესმე...

ღმერთმანი, არც მთლად ასეთი გულარძნილი ვინმეები ვართ, მართლა გაგვიხარდება!



წითელი წიგნი

ანუ

the things you let go...

I

წინასწარ რას წარმოიდგენ, რომ ერთ მშვენიერ საღამოს *პეროვის* ჩაბნელებულ ბარში შესული, ვიღაც ქალთან მიუყუთულ მამაშენს გადაეყრები... ნესტოებდაბერილი წაიბურღუნებს — *მაშო! შენ აქ საიდან..?! ენა ხახას მიგეკვრება და პირიდან ცხარე ლუკმასავით გადმოაგდებ — შენ? ზურგს უკან დაბნეული მეგობრები ნელინელ გასასვლელისკენ დაიძვრებიან, ის ვიღაც ქალი კი, მთლად არეული, თვალს მაგიდას გაუმტერებს — მიემწერყინება:*

ორი ჭიქა, ერთი საფერფლე, ორი ნამცხვარი, თეთრი სუფრა, ვანოს ხელი, ხელში სანთებელა, ლურჯი სანთებელა...

— მეგობრებთან ერთად ხარ?.. ჩვენთან ხომ არ ჩამოჯდებოდი... გაიცანი — თამარი, ჩვენი საფინანსო განყოფილების ბურჯი! თამრიკოს გარეშე...

აქებს კიდევ.

ქალი უხეიროდ იცინის და მერე *კაი ვანო ერთი შენ კიდევო...*

— თამარ, ეს ჩემი გოგოა, რომ გიყვებოდი...

უყვებოდა...

— მაშო არა? — გაიღიმებს ქალი და ახლა თვალებს მაგიდიდან ჩემზე გადამოლაგებს: თმა წაბლისფერი, ტუჩები თხელი, ჯინსები — მუხლებგახეხილი, დგომა ბიჭური, საერთოდაც ბიჭური... ეს მე ვარ — მაშო, მამას საყვარელი გოგონა... გოგო რომ ვარ მხოლოდ მამას ახსოვს... *ჩემი გოგო!* — იტყვის ხოლმე და ნათქვამი თავმოწყვეტილი ქათამივით ჩაიქროლებს ყურებს შორის, სამჯერ წრეს დაარტყამს: “გოგო ვარ, გოგო ვარ, გოგო ვარ...” — და... — *ჩემი მამა!* — ოდნავ სახეშეცვლილი დაუბრუნდება პატრონს.

“მამას” მხოლოდ იმისთვის ვეძახი, ეს ცნება დავიწყებას რომ არ მიეცეს. ჯაბას თვითონ აუკრძალა — ვანო დამიძახეო... ერთად მუშაობდნენ და არასოლიდურად ჟღერდა ეს — *მამა-ა!* ლიზიმ კი ჯაბასგან თუ გადაიღო, არ ვიცი — ვანო, ვანო! — ჩამოეკიდება ხოლმე კისერზე... “მამამ” ოჯახის წითელ წიგნში გადაინაცვლა. მანდვეა სიტყვები — *ძილინებისა, ყოჩად, გიცდი, მომენატრე* და ისა კიდევ — “ზუკო”... მოკლედ, ასეა თუ ისე, მგონი სიამოვნებს “მამას” რომ ვეძახი. ორივენი შევიგრძნობთ ხოლმე ჩვენს “არსს” და ვჩუმდებით... მე—გოგო, ის—მამა...

* * *

უხმოდ ჩავსხედით მანქანაში: მე, მამა და ის ქალი...

შუშა დალაქული, რადიო დაბალ ხმაზე, თვალები პარალელურ წრფეებად — მიმართულება წინ და მთავარია ერთმანეთს არ შეეჯახონ, სიჩუმე დაახლოებით ისეთი, ჩვენი “ეკო” კლასის გულჩვილი დამრიგებელი რომ იტყვის ხოლმე: “ვინ იცის იქნებ დღეს შრილანკაში გადაშენების პირას მყოფ pol-pedentis fastigos ჯიშის *უნიკალურ* ბაყაყებს კიდევ ერთი წარმომადგენელი შემოაკლდათ?!” და მთელი კლასი წუთიერი ღუმილით რომ ვეგებებით ამ სამწუხარო აღბათობას... მოკლედ, უხმოდ ვსხედვართ მანქანაში... მამამ სადარბაზოდმე მიაცილა და მერე — კარგადო, თუ ზვალამდო თუ... სახლისაკენ გამოვეყვებით. ვზივარ და ცხვირში ტყავის სალონის უსიამო სუნი მცემს. სარკეში — მოციმციმე ვიტრინები, საჭესთან — მამა... ეს ის ადგილია წესით თხრობა რომ უნდა შეწყვიტო, ანუ როცა არაფერი ხდება, მოსაყოლიც არაფერია, უბრალოდ ზიხარ და იქვე უაზრო სურვილი გიზის — ერთი წამით ხელი გადაწო, მამას თითით შეეხო, შეამოწმო მართლა აქაა თუ არა. ზიხარ და ისე ხარ — აი, ქარი ხელიდან საჭირო ფურცლებს რომ გამოგტაცებს, ან საყვარელ ჯინსებში რომ ვეღარ ეტევი... არადა, მიმოიხადავ, — ყველაფერი ძველებურადაა: მანქანა, ჯაზი, ჩაწეული ფანჯარა... ასე ვბრუნდებით ხოლმე შინ... ასე ვუსმენთ საყვარელ მუსიკას — ბილი ჰოლიდეი, სინატრა, ფრანკლინი... ბარში თუ ვსხედვართ ან რესტორანში... ერთნაირ კერძებს ვუკვეთავთ და სიგარეტსაც კი ერთად ვაბოლებთ... (ო-ო დედამ რომ გაიგოს!!!...) ხანდახან შუა გაკვეთილზე დამირეკავს: — *მამო, სადმე ხომ არ გავიდეთ, წავიხემსო?* — მეც ინსტინქტურად თმაში ხელს შევიცურებ და მერე კიბეზე ისეთი ჩავრბივარ, თავი მერლინ მონრო მგონია... სულ ასეა, მეფე და მეფეს ჩაფარებულ ფიგურასავით ვართ, ძვრას რომ ვერ უხამ — “ქიში” გაიხსნება... ერთი წყვილი თხილამური ვართ, საათის დიდი და პატარა ისარი, მარჯვენა და მარცხენა ხელი, ან უფრო ახლოს — ცერა თითი და საჩვენებელი... ასე ჩამოვსხდებით ხოლმე სადმე, ერთმანეთს მოჭუტულ თვალებს გავეუსწორებთ და ყველაფერზე ირონიით ვსაუბრობთ:

— აბა, რა შევუკვეთოთ? შენი ამბავი რომ ვიცი, მარხვაზე იქნები... — *მენიუს* ჩაუღრმავდება მამა.

— ეგრეა, ღმერთს სად გაექცევი... — ირგვლივ თვალს მოვაველებ ცარიელ მაგიდებს, თითქოსდა რაიმეს ვეძებდე — ჩემთვის სამარხო ნამცხვარი შეუკვეთე, სამარხო კრემით და სამარხო შოკოლადით!

— მშენიერი არჩევანია, — ჩაიღიმებებს მამა — კაცმა ყველაფერი გემოვნებით უნდა აკეთოს.

ესეც ასე — თვალს მოგჭუტავთ და უკვე წარმოგიდგენია როგორ დაფრინავს “ღმერთი” ჩვენი უგემრიელესი “სამარხო” ნამცხვრების ირგვლივ. დაფრინავს და ინგრედიენტებს გვიმოწმებს: შემთხვევით რძე ხომ არ გაუურიეთ, შემთხვევით კვერცხი ხომ არ გაგვეპარა... აი ამას ქვია — მოცლილი.

— მაშო, ენდრო ხომ არ ვიყიდოთ?

მანქანით დოლიძეზე ავუხვიეთ.

— არაა, უკვე შევლებეთ. დედამ შელება.

სიბნელეში პირდაღებული ურჩხულებივით ჩაიქროლეს მშენებარე კორპუსებმა.

— კარგია, კარგია... ბევრი?

ახლადანთებულ ლამპიონებთან მწერები აცეკვდნენ.

— როგორც ყოველთვის.

თვალი კალიასავით მიხტის ერთი გამველელიდან მეორეზე.

— წითელი გამოვიდა? — თავისივე შეკითხვები ბეზრდება მამას.

— რა ვიცი, გამოვიდა რა... — ვპასუხობ.

რადაცის უკან დაბრუნება არასდროს მოგდომებია? ხელში ჯადოსნური ლამპარი გეჭიროს და — *ძველი დამიბრუნეო!* — სთხოვდე, ან მოსთხოვდე იქიდან ამომძვრალ ჯინს...

— ეგ სამიდან პირველი — გეტყვის ჯინი — ახლა მეორე...

— მეორე ის, რომ მინდა ლამაზი ვიყო. (რა დასამალია, მინდა!..) აი, ლიზი როგორიცაა, უფრო სწორად, როგორიც გაიზრდება...

— ეგ მეორე — ჩაეცინება ჯინს — ახლა მესამე, ბოლო სურვილი!

— უცნაური საღამო გამოგვივიდა — მანქანას სადარბაზოსთან აყენებს მამა და მერე ერთს რომ იტყვი და ცხრას რომ უთქმელს დატოვებ რადაცნაირად ისე, უხერხულად იყურება... თითქოს მე არ ვიყო და ვიღაც უცხო... თითქოს ჩვენ არ ვიყოთ და ვიღაც სხვა... თითქოს ხელი გაჰკრეს ფიგურას და ქიში გაიხსნა... მანქანიდან უხმოლ გადმოვყვები.

— რას ნიშნავს სიტყვა “უცნაური” ერთი ეგ გამაკვებინა... ეგვეც მესამე სურვილი.

შინ რომ მივდივით, ლიზის უკვე ეძინა. ამას მაშინვე ვამჩნევ ხოლმე, დერეფნის ბოლოს შუქი ჩამქრალია და სახლიც თვლემასაა მიცემული — ჯაბა კაი ხანია ჩვენთან აღარ ცხოვრობს და დედამ კი ჩაპისთან საუბარი ჯერ კიდევ ვერ დაამულაძა (რაც არ უნდა გასაკვირი იყოს ქალისგან, რომელიც ზოგადად ყველაფერს ახერხებს). ჩემს ოთახში შევედი და ხის კუნძივით მივეგდე ლოგინზე. მერე სიჩუმე, ფიქრი მსხვერპლს ჩასაფრებული მონადირე-სავითაა — ოღნავ მოვლუნდები თუ არა, მაშინვე თავს მესხმის... ფიქრი დაახლოებით ასეთი — თუ ერთ ყვავს იტყვის მე ერთ აგურზე გაჯერდები, ან საერთოდაც გავაპასავ თუ... ერთი ჯვარი, ერთი აგური, ორი აგური, ორი ყვავი, სამი გული, ოთხი გული — გეიმი და... ჩამეძინა.

II

ჩვენი ქარის წისქვილები, ან “სად იყო და სად არა” გზად შემოყრილი გველშაპები

ჩემი სიზმრები პეპლებით სავსე გალიაა. ბავშვობაში ბლომად დავიჭირე, ერთად მოვამწვევდიე და ახლა ღამღამობით, როცა ოთხი მილიონი “საინფორმაციო წყარო” მთელი ქვეყნის მასშტაბით, გემრიელ მთქნარებას მოჰყვება და მაგდენივე წყვილი ფეხსაცმელი თვალს გაუსწორებს საკუთარ ფიზიკურ და სულიერ სიცარიელეს, მე რკინის გისოსს ფრთხილად გავაჩოჩებ, ხელს გალიაში შევკაპარებ და გინდაც ნალექიანი ყავისათვის კოვზით ამომერიოს — დამფრთხალი პეპლები ჯერ გალიის კედლებს მიაწყდებიან, აკორიანტელდებიან, მერე ეს ფრთები — სულ უფრო ჩქარა და ჩქარა — ელვის სისწრაფით... ფურცლებს სწრაფად რომ გადაფურცლავ, ან კინოკადრებს ერთმანეთს რომ მიაყრი — წაშში 24... 24 კადრი და თვალსაც მეტი რა უნდა? მაშინვე გამოცოცხლდება წარსულის რომელიღაც, უკვე კარგად მივიწყებული ფრაგმენტი — სულ ერთი წამი, ან დიდი და ურყევი, ქვეცნობიერში კამეჩივით გაწოლილი მოგონება ერთმანეთზე მიწყობილი დღეების... ეს

წამიერი შეგრძნება ამხელა ტევადობით — ზაფხულის რომელიღაც, ხისკენ-წეროებშეხურებული დღე და...

ბრახ! — გაისმა სამზარეულოს შემოდებული კარიდან. ჯერაც თვალდაუჭყეტელს უკვე თვალწინ დამიდგა სამფეხა სკამზე შემომდგარი ლიზის ქვევიდან ზევით მაცქერალი, აჭარხლებული სახე — “აკრძალულ” თარომდე მიღწევის კიდევ ერთი მცდელობა... პირველი შვიდი — უშედეგო, მერვე — შედეგიანი: ცელოფნის კარგა მოზრდილი შეკვრა ძირს ჩამოვარდა და “ზუკოები” ბზრიალით მოეფინენ იატაკს.

— ლიზი! — შეიფრთხილა ლოგინში დედამ და სამოქმედო გეგმაც წამში მოხაზა: ლიზი დაისაჯოს, მაშომ ჩაბი გაასეირნოს, ვანომ ყავა დაადგას... მკვირცხლად წამოფრინდა ლოგინიდან:

— ლიზი, ახლავე ჩამოძვერი მაქედან!

ლიზი... ლიზი....

მგონი უკვე ვახსენე ჩვენი შიდა-ოჯახური “წითელი წიგნის” შესახებ. დრო-დადრო რაღაცეებს რომ ვისვრით ხოლმე ამ წიგნში და მერე მთელი გულით ვივიწყებთ. აგერ ბატონო, ეს ბოლო დრო იყო, მე და ლიზიმ “ზუკოს” სმა რომ დავამოუღამეთ. დიდი არაფერი — ფხვნილი და წყალი... არადა არ ვიცი... კაი ხანს ვერ ვიმეტებდით საწითელწიგნოდ. ერთ დღესაც დედამ აითვალწუნა (თუ ნელ-ნელა შეეპარა ჯაფრი, ვერ გაიგებ). ზუკოს შეკვრამ ჯერ სერვანტის მეორე თაროზე გადაინაცვლა, მერე მესამეზე, მეოთხეზე და ბოლოს ამ მეოთხე თაროს “აკრძალული” ეწოდა — ამით ყველაფერია ნათქვამი. ასე, თვალსა და ხელს შუა, დედას დი-ი-დი ძალისხმევით “ზუკოს” ადგილი ზოგადსასარგებლო, ალალ-მართალმა სასმელმა (კონსერვანტების გარეშე) — *კომპოტმა* დაიკავა, გემრიელად მოკალათდა მაცივარში და ფესვებიც ღრმად გაიდგა. ეგრეა, დედას ძალისხმევით ბევრი რამე მიიღწევა სახლში... დედა ადვილად დაგარწმუნებს რომ შემწვარ კართოფილს მოხარშული გირჩევნია, რომ დილით ჩაპისთან ერთად სეირნობას არაფერი სჯობს, რომ ოთახში ავეჯის გამოცვლა შენი ბავშვობის ოცნება იყო და ასე...

— რა ფერის ავეჯი დაგიდგათ? აბა მოიფიქრე! — ისეთი გაბრწყინებული სახით მეკითხება, გეგონება მთელი საქმე ამაში იყო, მაწუხებდა და ვერ მივმხვდარიყავი, აჰაა! ავეჯი! აი თურმე რა ყოფილა!

— თუ გინდა მწვანე, თუ გინდა ცისფერი, ნაცრისფერი... — *ამხელა არჩევანი!* — ჩემთან ოფისში რომაა, გინდა ისეთი?

— სულერთია. — ვპასუხობ. დგას და მიყურებს, ბავშვს რომ საყვარელ თოჯინას წაართმევენ, ისე.

— სულერთია... კარგი მაშინ, ჩვენ თვითონ შევირჩევთ... საერთოდ იცი მაინც რას გიმზადებთ?

რა თქმა უნდა არ ვიცი. მხრებს ვიჩეჩავ.

— პირველ რიგში, კარადას. — *თოჯინაც დამიბრუნე-ეთ!* — უყურე, აი აქედან — კარებამდე; იქვე წარმოიდგინე თანამედროვე სტილში დაბალი მაგიდა და თაროებსაც ახლით შეგიცვლით. — *რა ენთუზიაზმი, რა შემართება!* — რას იტყვი, როგორია? ხომ კარგს ვაპირებთ?

რალაც უნდა გუპასუხო (სიკვდილ-სიცოცხლის ამბავია):

— კი.

ეს დედას საყვარელი საქმიანობაა: ერთ-სავარაუდო-პასუხიანი კითხვების დასმა, მრავალმხრივი ნიჭიერების წერილმანებზე გახარჯვა და საქმეებზე “თ”-ებით ლაპარაკი, როცა თვითონ მხოლოდ იდეის ავტორია, აღმსრულებლები კი აქეთ — ჩვენსკენ მოვიკითხოთ...

შესაბამისად, ძნელი მისახვედრი არაა რას ნიშნავს: — მაშო, საფლაგზე აღდგომის კვერცხი არ წავილო-თ? არ დაგვაფიწყდეს რა... ესე, ორი-სამი... ერთი პასკაც გავახვიო-თ და სანთლები... სანთლებს გზად ვიყიდი-თ, ოღონდ მაშო, მოდი ფული დავახურდავო-თ ჯერ და ვანოსაც დავურეკო-თ...

გასაგებია.

მოკლედ, სად ვიყავი... ბრახ! — გაისმა სამზარეულოს შემოდებული კარიდან და “ზუკოები” ბზრიალ-ბზრიალით მოეფინენ იატაკს. საპნის ბუშტივით გასკდა ზაფხულის რომელიღაც, ხის-კენწეროებ-შეხურებული დღე და ბუსავით დავაჭყითე თვალები... დილა მშვიდობისა, მაშო! გარეთ გაიხედავ — მშვენიერი გაზაფხულის ამინდი... ჩვენი მორიგი ფორიაქიანი დილა... ეს ტრადიციული, ცოტათი თავბრუდამხვევი მაგრამ კარგად ორგანიზებული აყალ-მაყალი, რომელშიც ყველანი ვიცვამთ, ვსაუზნობთ და ვცდილობთ ღიზის ერთ ჯერზე მეტად მაინც არ შევეჯახოთ. ყველას რომ ვამბობ ეს ისე ჟღერს, თითქოს სახლში ოცი კაცი მაინც ცხოვრობდეს, მაგრამ ჩვენს დილას ეს სიტყვა ზუსტად შეეფერება. დილით ყველას სამ-სამი წყვილი ფეხი გვაბია, ოთახებს შორის ელმავლის სიჩქარით დავქრევართ და ჩვენ-ჩვენს გასაჭირს გმირული შემართებით ვუმკლავდებით... ჩემი მთავარი ამოცანა ისაა, როგორმე ან დედას დავემგზავრო მანქანით, ან მამას. ამის მოხერხება არც ისე ადვილია — ზუსტად რა ვიცი როდის გავლენ და ან დროში ვასწრებ და ველოდები, ან ეგენი მასწრებენ და... კარგად მეყოლე. აი, ღიზისთვის კი სულერთია — იცის, უიმისოდ მანქანა მაინც არ დაიძვრება! ზოზინ-ზოზინით ალაგებს თავის თოჯინა-წიგნებს ჩანთაში და სანამ “ხლოპცები” რძით ბოლომდე არ გაიჟღინთება, საუზმეს პირს არ აკარებს...

ღიზი, ღიზი...

არ მითქვამს, ლიზი ძალიან პატარა, ძალიან სულელი და ძალიან ლამაზი რომაა? უფრო სწორად — საყვარელი... “ლამაზი” ისეთი სიტყვაა — არასამვიდიწლისასაკო. — *ერთი ამას უყურე!* — იტყვიან ხოლმე გზად შემოყრილი უცხო დეიდები, ოქროსფერ თმაზე ხელს გადაუსვამენ და იმდენს აქებენ, გეგონება ლიზის თავად ეშრომოს და საკუთარი სილამაზე სიმწრით მოეპოვებინოს... ოქროსფერი თმა აქვს — ბუსუსა და ხვეული... წარბები მუქი, სქელი; წამწამები — გრძელი, ხშირი... ასეთი დაიბადა — ლამაზი. ჯერ შეიღისა... ასაკი, როდესაც თოვლის ბაბუას საბოლოო ყოფნა-არ ყოფნის საკითხი წყდება (წითელი წიგნის კიდევ ერთი კანდიდატი) და როცა მარტო წერილზე send-ის დაჭერით ვეღარ ამტკიცებ, რომ წამკითხველი ნამდვილად ჩრდილოეთ პოლუსელი იქნება... მოკლედ, შეიღისაა, საყვარელი და ცანცარა... თავი სამყაროს ცენტრი გონია (ან კი ვის არა) და ღრმად წამს, რომ მთელი ოჯახი მხოლოდ ლიზისთვის ვარსებობთ — იმისთვის, რომ ლიზი ბედნიერი იყოს... ჩვენც ვემორჩილებით ამ პროგრესულ მსოფლხედვას, ყველანი ჩვენ-ჩვენი რუბრიკით შევდივართ ჟურნალის ყოველდღიურ გამოცემაში სახელწოდებით — “როგორ გავართოთ ლიზი” და დღის ბოლოსკენ კაცმა რომ შეაჯამოს, კაი სახალისო ტირაჟი გამოდის: დედა — თავისი ახალი კულინარიული ჩანაფიქრებით, რომელიც ყოველთვის ჩანაფიქრებად რჩება; მამა — თავისი საძილისწინო დარიგებებით — როგორ უნდა იქცეოდნენ კარგი გოგოები და მე — დაახლოებით ისეთივე უცნაური ამბების მთელი კორიანტელით, როგორსაც ალექსანდრო უყვებოდა ლამაზ-ქალაქელებს და იმათთვისაც ალბათ ეს ისეთივე ჩინური იყო, როგორც ლიზისთვისაა ვიღაც “ნაგელის” უცნაური თავგადასავალი, ან “ხედზიუს” მეღნით მოთხვრილი თვალები... თითქოს მისმენს... მიცქერს გაღიმებული, მოუსვენრად წრიალებს იატაკზე წამოწოლილი ან მაგიდაზე ჩამომჯდარი და ვერც მიხვდები, გისმენს თუ პეპლებზე ფიქრობს. ამბავს თუ შეწყვეტ — გაგაგრძელებინებს, თუ მოამთავრე, ახლიდან დაგაწყებინებს... მოკლედ, ვერ გაჩერდები, სანამ თავად არ ჩათვლის, რომ დღის საკმარისი დოზა მიიღო, მაშინ ვითომც საერთოდ არ უსმენიაო — მაგიდიდან მოულოდნელად ჩამოხტება, არც გეტყვის მომბეზრდაო, ზურგს შეგაქცევს და ოთახიდან ჰერი-ჰერი... ამას “არ-მე-შენ-დარდებას სიმპტომს” ვეძახი და რაც არ უნდა გასაკვირი იყოს, ამის გამო უფრო მეტადაც მიყვარს ლიზი. ასეთი პატარა რომაა, თამამი, განებივრებული და რაც თვალის პირველი შევლებიდანავე ჩანს — ლამაზი...

* * *

სუფრას სამნი შემოვუსხედით. მამა აბაზანაში წრიალებდა. წყალს ხან მოუშვებდა, ხან დაკეტავდა, ხანაც ისევ მოუშვებდა...

კი არ ვუსმენდი — უბრალოდ, მესმოდა.

ლიზიმ მორიგი “ხლოპცების” შეკვრა გახსნა და ახლა რძეს, თეფშსა და კოვზს როდის მომაწვდიანო, ამის მომლოდინე, მაგიდას შემოუსკუპდა. ხელ გაშლილი ხელისგულები შემოაწყო. დედა ტელეფონზე ჯაბას ესაუბრებოდა... მერე რამდენიმე მხიარული წამოძახილი: “მართლა?”, “როდის?” და:

— მაშო, ჯაბა რეკავს — მაღაზია სათამაშოებით ავაკეთო! — მერე ყურმილს ხელს აფარებს — შენი ძმის მაღაზიაში ერთხელ არ მისულხარ, როგორ შეიძლება! როდის უნდა ვინახულო-თ?!. ჯაბამ საღამოს გამოვუვლიო და წაგიყვანს. ურჩიე რამე, რა სად დადოს... მივეხმარო-თ ცოტათი. შენი ძმა ბოლოსდაბოლოს... კარგი?

— კარგი.

“როგორ აღმოუჩინოთ ჩვენს ჯაბას ოჯახური მხარდაჭერა” — ესეც დღევანდელი დღის პირველი გველემაჰი! დედამ ხმალი იმარჯვა და მთელი ენერგიით შეუდგა ყველა წვრილმანი, მაგრამ მეტად საჭირობოროტო საკითხის გადაჭრას: ვინ მოაკითხავს მაშოს, რომელ საათზე, სად იქნება მაშო, როდის დაბრუნდება შინ, ვინ წამოიყვანს შინ და ასე... არა, მაღაზიის ნახვა მე თვითონაც კარგახანია მაინტერესებდა — სხვა თუ არაფერი, ეს მაღაზია ჯაბას “ოჯახური ბიზნესისაგან” თავის დადწევის პირველი მცდელობა მაინც იყო. როგორც თვითონ მომიყვა, შესულა მამასთან და მთელი სერიოზულობით დაუბრეხებია — ჩემი საქმის წამოწყება მინდაო. ჯაბა იმ ადამიანთა რიცხვს მიეკუთვნება, ოცი წლის ასაკიდან დამოუკიდებლობაზე რომ იქაჩებიან და საბოლოოდ მათ ამ “დამოუკიდებლობას” ისევ მშობლები რომ უზრუნველყოფენ. მამამ უყიდა ფართი, მოუწყო დახლები, შეუძინა პირველი გასაყიდი საქონელი და მხარზე ხელი ჩამოადლო, *ამყად* — “ჩემი ბიჭი!” ჯაბამ ფართი მოიწონა, დახლები დაასუფთავა, სათამაშოები თაროებზე შეაწყო და წელზე დონჯი შემოირტყა — “ჩემი მაღაზია!”...

— მე გაგიყვან და მე წამოგიყვან — აბაზანიდან გამოდის მამა. ოთახს თვალი გადაავლო: მაგიდა, ლიზი, მაშო... ჩაიდანი, ტელეფონი დედა... ტელეფონი, ჩაიდანი... მაშო.

— გეცლება? — ხელს ყურმილიდან იღებს დედა — ჯაბა, ვანო წამოიყვანს... და რომლისთვის მოვიდნენ?

მამა გვერდით მომიჯდა და პური მოიტეხა.

— ვანო, ექვსისთვის წაიყვან?

— კი წაგიყვან, წაგიყვან. — საყვარელი ყავა ჩამოისხა — ოდნავ რძე და ბლომად შაქარი.

— მისამართი იცი? — ბოლო საკითხებს აგვარებს დედა ისეთი სახით — “ყველაფერი ჩემი საზრუნავია ამ სახლში!” ან “მარტო მე უნდა მადარდებდეს?!”

— როგორ არ ვიცი, მე ვიპოვე საერთოდ ეგ ადგილი! — ორცხობილას ყავაში აწობს მამა და სიამოვნებისაგან თვალებს ნაბავს, პირში რომ აღნება რბილი ტკბილი და თბილი...

კი არ ვუყურებ — უბრალოდ, ვხედავ.

— კარგი ჯაბა, ექვსისთვის მოვლენ... — “გადაღლილი” შემოტრიალდა დედა.

ესეც ასე, პირველი გველეშაპი როგორც იქნა დავამარცხეთ და რამდენიმე წამი თავი განცხრომას მივეცით. უმრავლესობა სახლში საშინელი მიაშიტები ვართ: ყოველ ჯერზე გვეგონია რომ განცხრომა დიდხანს გაგრძელდება, ჩვენ-ჩვენ უმნიშვნელო ფიქრებში ჩავიძირებით ხოლმე და სულ რომ არ მოელო — მაშო, ავეჯვის ამბავი როგორ გადაწვივით? — უძალ თავს ამოყოფს მეორე გველეშაპი...

* * *

მამამ მანქანა მაღაზიის კიბეებთან შეაჩერა. სანამ ჩავიდოდი, რაღაც უნდა გითხრაო და სიტყვები თითქოს ზედ ფილტვებს დაეკიდა — გამაჟრჟოლა და შემახურა... — *ხომ ხარ ჩემი გოგო!* — მეუბნება ღიმილით...

ჯაბას მაღაზია გარედან საელჩოსთან დაყენებულ ერთ კაი ბუტკა-საგუშაგოს გავდა, არ ვაზვიადებ! შიგნიდანაც ერთი შავ-ბნელი, მუყაოს ყუთებით გადატენილი სორო აღმოჩნდა, რომელსაც ერთი მოზრდილი ნაგვის მანქანა, რამდენიმე ნათურა და კარებთან აბრა აკლდა: “საჩუქრების მაღაზია” ან “სათამაშოების მაღაზია”... ჯაბას ამ ორი სათაურიდან ერთი ვერაფრით ამოერჩია. მართლაც, გადამწყვეტი მნიშვნელობა აქვს — მაღაზია სასაჩუქრეა თუ უბრალოდ, სათამაშოების! ხომ შეიძლება სათამაშო საჩუქარი სულაც არ იყოს და საჩუქარი კიდევ — აუცილებლად სათამაშო?! შესვლისთანავე ეს მკითხა, რა დავარქვაო. კითხვა მეძნელა და პასუხის გაცემისგან თავი შევიკავე...

— მაშო, გუშინ თამარი რომ გაგაცანი ამაზე მინდა გესაუბრო. — იგივე, დაბალ ხმაზე აგრძელებს მამა.

თამარ, თამარი, თამარ...

— შენ ჩემი გოგო რომ ხარ ხომ იცი... ერთმანეთში საიდუმლოები არ გვაქვს... ყოველთვის ყველაფერს მიყვები და ახლა მეც რაღაც მინდა მოგიყვი...

რაღაც, რაღაც, რაღაც...

— მაშო, თამარს ძალიან მოეწონე გუშინ. მითხრა ხვალ ჩვენთან მოიყვანეო. ძალიან კარგი ბიჭი ყავს — ლუკა. შენზეა... აი ნახავ, დამეგობრდებით.

თაროზე გულდაგულ შელაგებულ სხვადასხვა ზომის ნაყარნუყარს ნელი ნაბიჯით ჩამოეყარე: პლასტმასის ჯარისკაცები, ჯადოსნური ჯოხები, ბარბის

სახლები... ჯაბა უკან მომყვება, შეფასების მოსმენა სურს და ხმას რადგან არ ვიღებ, ახლა ჩემს ხელებს ჩააცვივდა — აბა, საითკენ გაიწვევენო...

— მოგწონს? — ამოღერდა ბოლოს...

— ძალიან! ამდენი... (სიტყვა ვერ შევარჩიე) რამე...

— აბა... აქ პირველად რომ შემოვედით იმის შემეშინდა, რითი შევავსო-მეთქი და შეავსო კი არა იმდენია, უკვე თავზე გვაყრია ყველაფერი! აქეთ ათ-ლარიანები დევს, იქით ოციანი... — იცინის და სათამაშოებს მომგებიან პო-ზაში ალაგებს... — აი, აქეთ ესენი ძალიან ძვირიანებია...

— ერთი ათი წლის წინ რას არ მივცემდით ასეთი ძალაზია გვქონოდა... უფრო სწორად, ასე ვმდგარიყავით მე, შენ და ირგვლივ ამდენი სათამაშო... არა? — ვიღიმი და თვალი ფუმფულა ბაჭიებისაკენ გამიბრბის.

— რას იტყვი, ეს ბაჭიები ვიტრინებისკენ რომ შევატრიალო? — კიდევ ერთ ყუთს აყირავებს ჯაბა.

— არ ვიცი, მე მაგ ძვირიანებს დავდებდი, უფრო ეფექტურია! — ვამბობ და მორჩა... აი, ეს ის რომელიღაც წერტილი, რომელშიც თვალს პირველად გაუსწორებ უკვე კარგა ხნის შეუმჩნევლად გაპარულ ამბავს, ჯაბას შეხედავ და მიხვდები რომ შენ და ჯაბა სადღაც, უკვე მივიწყებული დღეების მივიწყებულ წამებში სრულიად უბრძოლველად მინებდით მარტივი ფცხიკინითა და ფრუტუნით დაწყებულ ამ შეუქცეველ და უკურნებელ სნეულებას... — ერთხელ და სამუდამოდ გაიზარდეთ.

— კვირას სადამოს რას აკეთებ? — პასუხს არ ელოდება მამა — სამსახურიდან გამოგვივლი და თამართან წაგიყვან... კარგი?

— კარგი.

III

“როგორც მთის ფიჭვი შეწებილი კლდეზე — ვდუმვარ. მასზე, ვინც მიყვარს, სიტყვა არ დამცდება.”

ტანინძაკი

“იმ ქალთან” გატარებული კვირა სადამო ასე ადვილად ვერ მოითხრობა. ყველაზე მარტივი ალბათ იმის თქმაა რომ ლუკა მართლაც მაგარი მასტი გამოდგა. *ზევით ადი, თავის ოთახშია და გელოდებაო* — ქალმა ლოყაზე მომისვა ხელი და ასე ერთი წუთის შესულები არ ვიყავით, უკვე თავიდან მომი-

შორეს. ერთი ახედ-დახედვა მაინც მოვასწარი: ქალი ქუსლებზე იდგა — “ვერაფერს იტყვი” ფორმებით: ისეთი გამხდარი არა, მოტკეცილი ჯინსები რომ ვერ მოეხდინა და არც ისეთი სავსე, შავ კაბას ვერ ეშველა... მოკლედ, არაუშავდა... კარგით-მეთქი — ხის დახვეულ კიბეს ჩქარ-ჩქარით ამოვუყევი და სანამ მამა ტყავის სავარძელში გემრიელად მოი-რბილ-კალათებდა მე უკვე ლუკას ოთახში ვიყავი. ყოველთვის მინდოდა ასეთი სხვენი-ოთახი მქონოდა! ლუკა აივანზე იდგა, ეტყობა ჩვენს მანქანას აკვირდებოდა და როგორ გადმოვედით... კარის ხმა რომ გაიგონა, ლოყებაწითლებული გამოვიდა — მე ლუკა მქვიაო და — მე მაშო-მეთქი. კაი საყვარელი ვინმე იყო, ჩემზე პატარა — ესე, 16-17 წლისა და მაინც თავი *ძან ძან* ეჭირა... პირველი ხუთი წუთი ყველაზე რთული გამოდგა — თვალები ჭერს ვაცეცეთ და ხელისგულები უხერხულად ვისრისეთ, თუმცა მალევე მივხვდით ერთნაირ გაუგებარ ამბავში რომ ვიყავით და ამან ასე თუ ისე ორივე დაგვაწყენარა.

— ჩემი ბიჭიც ძალიან კარგად ხატავს... მაშო, იქ თაროებზე ნახავდი... — გვერდით ჩამომისვა ქალმა, როგორც კი “ლუკა ჩამოდი ვანოს დაენახე!” — დამახებაზე ორივენი დენდარტყმულებივით ფეხზე წამოვხტით და დასჯილი პირველკლასელებივით “დირექტორის კაბინეტისაკენ” გავემურეთ.

— დიახ, დავათვალიერე... ძალიან მომეწონა. — ლუკას გაგხედე, აშკარად კმაყოფილი დამირჩა ასეთი მოკლე პასუხით.

— ვანო მიყვებოდა შენს ნახატებზე! — თავისას არ იშლის ქალი — ეს ჩემი ბიჭი საღებავებს ვერაფრით დავაჩვიე. მარტო ფანქრით ხატავს... არადა ისე მინდა რამე ფერადი დახატოს! ისეთი, ფერადი ნატიურმორტი რამე... — აქ ოდნავ შეეოვნდა, ეტყობა რომელიმე ცნობილი მხატვრის მოშველიება მოისურვა და ანკესი ღრმა ინტელექტის მორევში ჩაუშვა, თუმცა ასე უცბად ვერაფერი დაიჭირა და *რას ვამბობდიო*: — ლუკა, მოდი ვანოსაც ვაჩვენოთ შენი ნახატები! ჩამოიტანე რა...

— მერე იყოს დე... სხვა დროს... მერე იქნებ ერთადაც დავხატოთ რამე? — საუბრის თემას ცვლის ლუკა.

— აუცილებლად! — ოდნავ მეც წავეშველე, ერთმანეთს გადავხედეთ და ისევე ჩვენ-ჩვენ ფიქრს მივუბრუნდით: *აქ რას ვაკეთებ — აქ რას აკეთებ* სფეროდან.

— ნიჭიერი შვილები გვყავს — კმაყოფილი იყურება მამა და თვალს მიკრავს...

— გინდა მუსიკას მოვუსმინოთ? — ამაზე უკეთესს ხომ ვერაფერს მოიფიქრებდა... — ყურში ჩამჩურჩულა ლუკამ.

— კარგი.

ისევ ლუკას ოთახში ავბრუნდით, ლუკამ მაგიდის უჯრა გამოაღო, შიგ რა-
ღაც ქაღალდები აწი-დაწია და სადღაც სიღრმიდან სიგარეტის მიჭუჭყნული
კოლოფი გააძრო...

გულში გამეღიმა... *ძლიან, ძლიან სიღრმიდან ამოიღო!*

აივანზე გავედით, რკინის რიკულებს ხელები წავავლეთ და წამში ზედ სახ-
ლის სახურავზე აღმოვჩნდით. აქ მთელი ბაითი დამხვდა... ერთი-ორი მუთაქა,
რადიო, საფერფლე შიგ რამდენიმე ნამწვითურთ და მოკლედ, რაც გინდა
სულო და გულო... ლუკამ რადიო დაბალ ხმაზე დააყენა, უხმოდ ჩამოვსხედით
და გავაბოლეთ. თავში ძალაუნებურად ათასი ფიქრი ამოტივტივდა — მარ-
ტივი “ყოფნა, არყოფნიდან” და “ვის ყავს მამა ჩვენისთანასაგან” დაწყებული,
იმით დამთავრებული რომ ალბათ ჩვენი ეკო-კლასის გულჩვილი დამ-
რიგებლის ლირიულ გადახვევებსა და პათეთიკურ მოწოდებებს თუ
დავივიწყებთ, ყოველდღიური მონოლოგებიდან ერთი ჭკვიანური აზრის გამო-
ტანა მაინც შეიძლება — ბუნებაში ყველაფერი უხილავი ჯაჭვითაა გადაბ-
მული — ყველა ამბავი საიდანღაც იწყება, ყველა ამბავს თავისი მიზეზი უნდა
ჰქონდეს... მოკლედ, ხალიჩაზე გუბე თუ შენიშნე, ესე იგი დილით ჩაპის
გასეირნება დაგავიწყდა და ასე... ღირს თუ არა ამ ჯაჭვთან ბრძოლა, ამის
ასახსნელად ჩვენი გულჩვილი დამრიგებელი დაფაზე ხაზებისა და რგოლების
ხაზვას იწყებს ხოლმე და მონოლოგს “ექსპერიმენტის” მოყოლით ასრულებს,
რომლის დროსაც თურმე “ექსპერიმენტატორებმა” ირმების ჯოგი გააბედ-
ნიერეს და ღროებით ტყიდან ყველა მგელი კინწისკვრით გაყარეს. უნდოდით
შეემოწმებინათ თუ რას მოიტანდა შედეგად ბუნებრივი ჯაჭვის გაწყვეტა. რა
მოხდებოდა, თუკი მგლები ირმებს აღარ შეჭამდნენ? ახლა ამ
“ექსპერიმენტატორებს” ყველას სათითაოდ რაღაც მნიშვნელოვანი პი-
რადული ხასიათის პრობლემები რომ ჰქონდათ ეგ ფაქტია, მაგრამ მთავარი
ისაა, ბუნების კანონებს რა დღე ეწიათ...

აქ ჩვენი გულჩვილი დამრიგებელი სამ თითს წინ გამოიშვერს, თითქოს
პირჯვარს იწერდეს და კლასიც უკვე ათასჯერ მოსმენილი მკვეთრი ფინალის
მოლოდინში დაფის მალლა, კედელზე დახატულ სამ ცალ ბუნს მივამტერ-
დებით — მორიგი წუთიერი ღუმილით ვეგებებით ფაქტს, რომ ირმები
“ზედმეტად” გამრავლდნენ, დაავადდნენ და ამოწყდნენ...

ასეა თუ ისე, ეკო-კლასის აგერ უკვე თითქმის 12 წლიანმა განათლებამ ის
მაინც მასწავლა, რომ თუ პანდა მხოლოდ ჩინეთის რამდენიმე პროვინციაში
შემორჩა, ეს მხოლოდ ბამბუკის ხეების გაჩეხვის ბრალი უნდა იყოს... *ჰიპო-
ქსანტუსებსა* და წითელნისკარტა *turdus hilaris*-ს ვინ აწყენინა, არ ვიცი, მაგ
გაკვეთილს ბოლომდე არ დავსწრებივარ... იმ დღეს მამამ დამირეკა და კაფ-
ეში გავიპარეთ, მაგრამ ძნელი მისახვედრი არაა — ეგენი წითელი წიგნის
იქითაც გაუტევედნენ... საერთოდ ჩიტები კაი ჭირიანი ხალხია, მაგათი ამბები
სულ შექსპირის ტრაგედიებივითაა — ბოლოში რომ მაინც ყველა კვდება.

— ლუკა, სადა ხართ?! — ქვევიდან ქალის ძახილმა ფიქრებიდან გამოგ-
ვარკვია, ერთმანეთში ისევ ის აქ რას ვაკეთებ—აქ რას ვაკეთებ მხერა

გავცვალეთ და — სახურავზე! — მშვიდად ჩასძახა ლუკამ, ეტყობა ხშირად ამოდოდა ხოლმე.

— მერე, მანდ რას აკეთებთ? — შიგ კაკალგულში მთარტყა ქალმა. მხრები ავიჩეჩე და გამეღიმა.

* * *

— ვანო მოვიდა, ვანო და მაშო მოვიდნენ! — სამზარეულოდან გამოვარდა რაც შეიძლება წვეტიანი და რაც შეიძლება წითელი კვერცხით შეიარაღებული ლიზი (აღბათ ერთი-ორი საათი არჩევდა) — ჩამიპაჭუნე რა, კვერცხი ჩამიპაჭუნე რა!

— ვანო კი არა მამა! — ვუსწორებ და სამზარეულოში გავდივართ — ჩემთვისაც ერთი კაი კერკეტი კვერცხი ამოვარჩიო-მეთქი.

— ვანო, სად იყავით ამდენ ხანს? — მესმის კარს იქიდან...

— მაშო, აი ნახე აი ეს კარგია არა? — მთელი გულით მეხმარება ლიზი.

— ახალი საქონლის აღრიცხვა იყო და მაშოც დავიხმარე! — ფეხსაცმელს იხდის, კარებთან ალაგებს მამა, ქურთუკის შარიშური ისმის...

— ამ აღდგომა დღეს რა შემოგივიდათ ამდენი?

— აუ მე, მე ჩავირტყამ რა! — ცქმუტავს ლიზი.

— კარგი მიდი, ოღონდ ზედ წვეტს დაუმიზნე იცოდე! გვერდზე არ მომარტყა...

— თავის დროზე რა ხდება ამ ქვეყანაში, ასე რომ გაგიკვირდა... გადავითვალეთ და მაშინვე წამოვედით.

— ჯაბამ დარეკა, ერთ საათში აქ იქნება... მოდი ერთი ქინძმარაული გავხსნა-თ... პასქა, კვერცხი და...

— სწორია, სწორია! აღვნიშნოთ აბა?!... კაი ხანია ასე არ ჩამოვმსხდართ — ოჯახი!

ტკაც! — გემრიელად მოიქნია კვერცხი ლიზიმ, ჩამირტყა და გამიტეხა.

IV

"Come... dry your eyes, for you are ... the clay in which the forces that shape all things leave their fingerprints most clearly. Dry your eyes... and let's go home."

Alan Moore - Watchmen IX: The Darkness of Mere Being

აღდგომის მომდევნო ორშაბათი ჩვენთვის ყოველთვის სამშაბათს თენდება. ორშაბათის გზები გადატვირთული იქნებაო, ვფიქრობთ და საფლავებიც ზომ ვერსად გაიქცევინ... ყოველ წელს სამშაბათობით მივაშურებთ *მუხათგვერდის გზად* წოდებულ საცალფეხო ბილიკს და რახან მთელი თბილისი მსგავს ეშმაკურ ტაქტიკას იყენებს, ყოველ წელს ორ-ორი საათი ვყურუტებთ საცობში. ჭკუა დღემდე ვერ ვისწავლეთ, როგორც მთელმა თბილისმა. რა დასაძალია, საცობში ყველას მალევე გვავიწყდება რომ საფლავები მართლაც ვერსად გაიქცევინ, დედას საომარი შეძახილებით — “ერთი მიუსიგნალე მაგას, ვანო!” — ავწრიალდებით, მანქანას თხუთმეტნაირად დავატრიალებთ და იმდენს ვიზამთ, სანამ აქეთ ორი იმდენს არ მოგვისიგნალებენ. ვსხედვართ მერე და მხრებს ვიჩეჩავთ — რაღა დღეს მოუნდა ყველას ამ დაწყევლილ მუხათგვერდში ამოსვლა?!

საოცრება თუ გინდა!

— საერთოდ სისულელეა რა... ეს კვირა მე გეტყვი სად უნდა წავსულიყავით! — თავისებური წამოიწყო მამამ.

— სად? — იასამანს წურწურით წყალი გასდის და შარვალს მისველებს — ლიზის გადავხედე და თვალები ავატრიალე — სად უნდა წავსულიყავით?

— ისრაელში! ერთი კვირა... წარმოიდგინე ახლა იქ რა ამბავია. მთელი მსოფლიო იქაა. მაშო, წავიდეთ შემდეგ წელს, რას იტყვი? — უკვე ვიცი საუბარი საითაც მიდის და ვცდილობ მოწურწურე იასამნები როგორმე თავიდან მოვიშორო, გემრიელად მოვკალათდე... ეს წუთები ჩვენი ოჯახური წითელი წიგნის ყველაზე პირველი ბინადარია... წუთები, როდესაც *ერთობლივად* ვოცნებობთ, გეგმებს ვაწყობთ ყველაფერ იმაზე, რაც არასდროს მოხდება, მაგრამ საკმარისია ვინმემ ეს ხმამაღლა აღიაროს, მთელი ჯადოქრობა მაშინვე გაქრება. დედას ერთი გაღიზიანებული — “ვანო, აუხდენელზე ნუ გვაოცნებებ” — და კარგად მეყოლე, გამზადდა საწითელწიგნოდ! ახლა შეიძლება ითქვას რომ ამ გადაშენების პირას მყოფ უნიკალურ სახეობას ხელოვნურად ვუნარჩუნებთ გულისცემას — მამა თემას შემოადგებს, მეც თვალებს ავატრიალებ და... ყველა ბედნიერია (ყოველ შემთხვევაში ლიზი — ნამდვილად).

— ჰეჰ, მაგარი იქნება! — იასამნების უკან გადატანას ვცდილობ... იქ პასქები აწყვია და არაფერი გამოძის... — მერე იქ ხომ ისაა — მკვდარი ზღვა! ვიტივტივებო...

— აბა, წავალთ ერთი კვირა... გავირუჯებით, ისრაელს ვნახავთ, მერე თან რამეს თუ აღნიშნავ კაცი, ისევ ერთად არა სჯობს? ხალხში...

— ხომ ვამბობდი ვანო, ვამბობდი რომ უფრო ადრე უნდა გამოვსულიყავით... ახლა არ მოგვიწევდა ორი საათი... — ჩანთას აწვალებს დედა.

— მერე ამ დღესასწალებს ერთი ეგ სილამაზე აქვთ რომ ბევრი ხალხი ერთად ზეიმობს! ტაძრებს მოვივლით...

— აუ, მართლა წავალთ? აუ, რა მაგარია ვანო-ო! — სკამზე ხტუნაობას იწყებს ლიზი და ფოთლებზე შერჩენილი უკანასკნელი წვეთებითაც გემრიელად ვიწუწუბი.

— არა, ხო ვამბობდი, გავიდეთ-მეთქი ადრე! ვინ მომისმინა? მაშო, მოასვენე ეგ იასამანი! ისედაც რა დღეშია, საერთოდ ასეთი რამ გაყიდინა ვანო?

ყველაფერი დიდი და სერიოზული როგორი წვრილმანებიდან იწყება! მიზეზი ყოველთვის ერთი კილო უყიდელი პომიდორი, ლიზისათვის პრინციპულად არ-ნაყიდი სათამაშო, ან ერთი შელახული არ-საყიდი იასამნის თაიგულია ხოლმე. მერე თვალსა და ხელს შუა დედას წვრილმანი საყვედურებიც კი საოცარ მასშტაბებს იძენს — “რამდენჯერ შეგახსენე პომიდორი ვიყიდო-თ მეთქი” უცბად “შენ საერთოდ რა გახსოვს”-ით იცვლება და აი აქ კი წასულია მამას საქმე!

— სხვა არ იყო, რაც იყო ის ვიყიდე. — საჭეს ნახევარავტომატურად ატრიალებს მამა.

— ასეთს ჯობდა, საერთოდ არ გეყიდა! სხვა არც იქნებოდა ამ ნაშუადღევს... გეუბნებოდი არა, გამოვსულიყავით ადრე...

— გამოვსულიყავით მერე... — მანქანების გაბმულ კოლონას შეშლილი რვიანებით მიუყვებით.

— მაგას მე მეუბნები?!

— შენ გეუბნები! გითხარი არ გავიდეთ-მეთქი თუ ვერ გავიგე... — გზა ნელ-ნელა იხსნება და ჩვენც ნელინელ სიჩქარეს ვუმატებთ.

— საერთოდ არაფერი არ გითქვამს! საქმეც მაგაშია, ყველაფერი ჩემი საფიქრელია ამ სახლში...

მიყვარს იასამანი!

ყველაზე ლამაზი ყვავილია და სურნელი და ფერი და საერთოდ... მომწონს მუხადგვერდის ძლიერი ქარი მტვერებს როგორ უთამაშებს და ნაცრისფერი საფლავებიდან შიგადაშიგ თავს რომ წამოაყოფინებს... მერე ეს შავხელის-გულა პატარა გოგოები სათითაოდ ჩამოუვლიან და ისევ გასაყიდად ჩაარბენინებენ. საკმარისი ტაქტი კი ყოფნით, სანამ საფლავთან ხარ თავზე არ წაგადგნენ და ჩვენც საპასუხო ტაქტით ვპასუხობთ — პასქასა და კვერცხებს, რომ არ გაისვარონ, ცელოფნიდან ამოუღებლად ვუტოვებთ. ყვავილებს იქვე გაეშლით... ერთ სანთელსაც სიმბოლურად წამოვაცენებთ და მოვუკიდებთ თუ არა, მაშინვე ვტრიალდებით, ვცდილობთ შინისაკენ გავიყოლოთ იმის შეგრძნება, რომ მუხათგვერდის ისტორიაში პირველი საოცრება მოხდება და სანთელი ბოლომდე ჩაიწვება...

— რაც იყო ის ვიყიდე... — მეტად და მეტად ღიზიანდება მამა.

— გეუბნები, ეგეთის ყიდვას ჯობდა საერთოდ არ გვეყიდა-მეთქი! წელიწადში რამდენჯერ ამოვდივართ რომ... ხომ შეიძლება ერთხელ მაინც რაღაც ნორმალურად გავაკეთოთ?!

— ჯობდა არ მეყიდა? ვერ გავიგე — ჯობდა საერთოდ არ მეყიდა?! გადაგვეყარა მაშინ, რას გაშალე... საერთოდ გადაგვეყარა... მაშოს უყვარს აგერ იასამანი და წამოგველო სახლში! — სარკეში თვალს მიკრავს მამა. გვერდზე რამდენიმე სასოწარკვეთილი მძღოლის მიერ გაკვალული რაღაც შემოვლითი გზის მაგვარი გამოჩნდა — მარჯვნივ გადასახვევი...

— ვანო, ახლა ნერვებს ნუ მიშლი იცოდე და ღვედები შეიკარი კიდე... მაშო, ღიზი!. — მტრის ჯინაზე ახსენდება დედას და მორჩა, ახლა სანამ თავისას არ გაიტანს არ მოგვეშვება...

— დამაცადე თუ ღმერთი გწამს რა... დამაცადე ტარება! — მოთმინებას თითქმის სულ მთლად კარგავს მამა...

— ტარებას რას უშლის ღვედები?! ვანო!

— ჭკუას ნუ მასწავლი... ძალიან გთხოვ თავი და-მა-ნე-ბე!!!!... — მოთმინებას უკვე სულ მთლად კარგავს მამა.

— მაშო, ღიზისაც შეუკარი!.. — ხმას მაღლა უწევს დედაც — ვ-ა-ნ-ო!!!

“და გზა უვალი, შენგან თელილი, მერანო ჩემო, მაინც დარჩება” — მკვეთრი მოძრაობით მარჯვინისაკენ გადაუხვიეთ, ნახევრად გაკვალულ გზას ჩქარ-ჩქარით ჩაუყვებით და გულმა კი მიჩხვლიტა — რაღაც ისე არ არის-მეთქი, მაგრამ საჭესთან ხომ მამა იჯდა და... თუმცა ვიტყუები, მაგდენის გაფიტება ვერც მოვასწარი. ქვებმა და ბორცვებმა ჯანჯღარში მამას საჭე მთლად გააგდებინეს ხელიდან. მერე რაც მახსოვს ეგ იყო რომ რომელიღაც

ბორცვი ბორბლებ ქვეშ დაწყველილი ტრამპლინივით შეგორდა და მანქანამ სადღაც შორს-შორს იფრინა, ეგ იყო და ეგ...

საოცარია, რა უცბად ამოყვინთავს ხოლმე ადამიანში ეს მუდმივად თანმდევი მთავარი გმირის კომპლექსი. ზოგიერთში ისედაც სულ ზედ ტივ-ტივებს — ჩვენი ლიზის არ იყოს... ჩემში ხანდახან იჩენს ხოლმე თავს. ანუ ეს შეგრძნება, რომ რომელიღაც დაუწერელი რომანის გმირი ხარ, უფრო ისეთი რომანის, სადაც ბევრი არაფერი ხდება მაგრამ რაც ხდება, ყველაფერი ძალიან მნიშვნელოვანია... როგორ გინდა თავი მთავარ გმირად არ იგრძნო, როდესაც 120-ით მოძავალი მანქანით რომელიღაც ბორცვზე ავარდები, კლდეს შეასკდები, მერე ჰაერში სალტო... და გზის მეორე მხარეს ჩამსხვრეული ფანჯრებიდან არხეინად გადმოხვალ!. მერე დგახარ და ფიქრობ რომ სადღაც ვიღაც ეზოში მანქანით ნაძვის ხეს შეასკდება და კარგად მყოფე... ჩაბარდა პატრონს... ეს რაღაც თავისებური გადარჩევის სისტემაა — ვინ გააგრძელებს ამბავს და ვინ გადახტება წითელ წიგნში ან საერთოდ გაქრება უგზო-უკვლოდ... ვითომც საერთოდ არ ყოფილა. დარვისს თუ დაუფჯერეთ, მთელი საქმე ადაპტაციაშია... ვინ იცის. მერე ვიღაც გამოხტა — დარვინი შეცდაო და ამ თავშალიანებმაც მაშინვე აიტაცეს. მოკლედ, ადაპტაციაა თუ არა, შეიკარი რა ღვედები...

მანქანიდან უხმოდ გადმოვედით.

რაც არ უნდა გასაკვირი იყოს, იასამნებზე ხმაც აღარავის დასცდენია. იქვე მდგლოზე ჩამოვსხედით და თბილ ნიავს შევუშვირეთ სახე. ვიჯექი და იმას ვფიქრობდი, რომ ახლა ხელში ორი ჯოკერი და ოთხი ტუზიც რომ მჭეროდა, თამაშს მაინც ავრევედი-მეთქი. რაღაც უცნაური *მოხეზრების* გრძნობა დამეუფლა... აი, ერთი მაგისიცო რომ იტყვი... მგონი ყველანი ეგრე ვიყავით — უბრალოდ, ვისხედით ოდნავ გაბრუებულები, მერე ცოტა გონზე მოვედით, ვიდაცას სახლისაკენ დავემგზავრეთ და ხუთისთვის უკვე შინ გემოზე ჩაგულულებულები ჩაისა და დამტკბარ ორცხობილებს მივირთმევედით.

— ვყოფილიყავით ისრაელში, ხომ ვიქნებოდით ახლა არხეინად! — უკვე ხასიათზე მოსული ილიმის მამა.

— ვყოფილიყავით რა, აუ რა... — ისევე საყვარლად წამოენთო ლიზი — და ისა კიდე... ვანო, მკვდარი ზღვა რა არი? აი, მაშომ რომ თქვა...

— აბა ლიზი, თუ იცი შენ რა არის სიმკვრივე... — მუხლებზე ჩამოვისვი და დრო მაინც ოხრად გვქონდა, ახსნა მთლად ფიზიკის საფუძვლებიდან დავიწყე. მერე მარილიან წყალში მოტივტივე კვერცხზე გადავედი და... აი, რა წუთსაც ვერასდროს გავიმეტებ საწითელწიგნოდ, უკვე თითქმის ზღვამდე ვიყავი მისული რომ — მერე ისრაელში ხლოპცები იყიდება? — ვითომც სულ არ უსმენიაო, საყვარლად თვალებს მიფახურებს და ამ სიგრძე ლექციის მერე აი, ამას მეკითხება ეს ერთი ბეწო, სასაცილო არსება. რა უნდა მეთქვა, უსუსურად ავიჩიქე მხრები.

კაი ხანი ვისხედით ასე... მერე ჯაბაც ამოვიდა (დედამ დაურეკა — ეგეთი ამბავი მოგვივიდაო) და ერთი ტონა ფუძეფულა სათამაშოები ამოიტანა. ლიზი ჭკუაზე არ იყო... სადამო მართლა გემოზე გაგატარეთ. გვიანობამდე ვსაუბრობდით, ვიცინოდით და როგორც ხდება ხოლმე, ვისხენებდით ამბებს რომლებიც ჩვენს გარდა ყველას ცალ ფეხზე კიდიან...

* * *

მამა ხუთშაბათს წავიდა. ჩვენ აქეთ, სამზარეულოში ვისხედით და მანქანის ხმა მხოლოდ ყრუდ შემოგვესმა. დედა და ლიზი ბლინებს აცხობდნენ. უფრო სწორად, დედა აცხობდა და ლიზი ჭამდა. მობილურზე ლუკა იწერებოდა — მგონი რაღაც ხდება, რამე ხომ არ იცის. ტელევიზორში ტომი მორიგ ხაფანგს უგებდა ჯერის...

ალუბლის წვენს მთელი გემო ჩავატანე, ჭიქა მაგიდაზე დავდე და რამე რომ არ მეთქვა, არ შემეძლო...

— ყავისფერი, ჩვეულებრივი ყავისფერი კარგი იქნება.

დედა გაკვირვებული შემოტრიალდა.

— ყავისფერი მაგიდა და კარადა... ტყავის სავარძელი... რას იტყვი?.

მიხვდა რაზეც ვამბობდი და სახე გაუნათდა.

— მართლა ასე გირჩენია? უბრალოდ — ყავისფერი?

— აბა, შენ რას მირჩევდი რო-ო? მგონი იგივეს...

კიდევ უფრო გაუნათდა სახე. ასე რომ გაშლის ხოლმე წარბებს — დასვენებული სახის გამომეტყველებით, რაღაცით თითქოს ვგავარ კიდევ. ცოტათი...

— შენ რას იტყვი ლიზი, ყავისფერი?

— მე სტაფილოსფერი მინდა. ჩემი ოთახი სულ სტაფილოსფერი იქნება!

— მართლა? დე, გაიგონე? სტაფილოსფერიო!

— ლიზი, რად გინდა სტაფილოსფერი — თვალები აგიჭრელდება. ვარდისფერი არ გინდა?

— არა, სტაფილოსფერი.

— ეგეთი საღებავი არც იშოვება!

— იშოვება!

— ანუ კრემისფერი?

— არა, აი, როგორც სტაფილო!

— კრემი!

— სტაფილო...

— კარგი რა ლიზი...

— რატო არა?

— კარგი რა...

ლიზი ჯერ მოიბუზა, სახეზე ეს თავისი ჯიუტი გამომეტყველება დაილაგა... მერე კი საყვარლად მხრები აიჩეჩა და ახლა რაღაც სერიოზულ არგუმენტს გააძრობსო — ორივემ ყურები ვცქვიტეთ...

— თოვლის ბაბუ არ არსებობს! — წელზე დოინჯი შემოირტყა ლიზიმ და რაღაც უჩვეულო, როგორი მეტყველი თვალებით ამოგვხედა...

— ???

დასასრული

3 2 1 b 0 5



ორი საათი რუმერკუარში

“მე ვკვბუნავ, ეშმაკ...”
ა.ს. პუშკინი

I

ვარ ანტიფაშისტისტი და ანტიფაუსტი;
იპ ლიბე ცხოვრება უნდ აინ ქაოსი.
დას ისტ სასურველი, მაინ ოფიცირენ
დემ ცაიტ ცუმ ფაუსტ ცოტა შპაცირენ.

II

არ დანებდა პოლონელთა ფანდებს,
მოენატრა თავის ფატერლანდი.
იზიდავდა სიბრძნის დიამანტი,
აეჭვებდა საკუთარი ანდე.
არ უფრთხოდა ქალებს, როგორც ღოლოს
სექსზე ცხარედ მოკამათე, ბოლოს
ფაკულტეტზე თამაშობდა პოლოს.

შეისწავლა ბანქოს კატეხიზმო,
შემდეგ კარტეზიანიზმი იძმო,
ეგო-არტეზიანიზმიც იზმო

ღრმად, და აღარ სურდა ზევით...
სულ არ ჰგავდა იგი კლაუზევიცს:
ვერა ფლობდა ხრიკებს ბრძოლა-ზავთა
რადგან ფატერ მას ღურგალი ჰყავდა.

ცუმბაიშპილ თარეშობდა ჭირი
უნდ ქოლერა უნდ ტუბერკულიოზენ,
გაიჩხირა შვარცე პაპიროსენ,
რომ დაეცვა საკუთარი პირი.
იზიდავდა მას ბოშა თუ მავრი
შემდეგ იგი გახდა ბაკალავრი,
მას დიდება არ ახვევდა თავბრუს
და იმღერდა: “კემბრი... დინოზავრუს...”

გერმანელ კაცს ჰკუა ერგო სულ —
თუ კოგიტო, მაშინ ერგო სუმ.
გერმანია მართლაც, უბერ ალლეს
(ვენის ვალსი ატკობს ყურს და თვალებს),
კრაკოვიდან ჰერი! გზები — მრუდი,
მაგრამ მაინც სულ არ არის ცუდი,
როცა გელის კათედრა და ლუდი.

III

მრუმე ღრუბლებზე გადმოდგარა მთვარე, ვით ვაცი.
უხარმაზარი ფოლიანტი. დაჰყურებს კაცი.
შუბლზე ნაოჭი და თვალები ბეცი თუ ბაცი,
მათში ირევა არაბული ხლართების ქაცვი.
ხელებში უთრთის კორდოვული შავი გრიფელი
შორი კუთხიდან უთვალთვალებს ბნელი პროფილი —
ვინმე არაბად წოდებული მეფ-იბნ-სტოფელი.

თავგი ხრავს თახჩას და სანთელი მკრთალ ნათელს აფენს.

“ჰერ დოქტორ, კმარა – ძილის დროა!”

“ო იავოლ, შლაფენ...”

შავი ხახები ერთდროულად ღნავიან: “მიაუ...”

უცებ შემოდის უხმაუროდ იდიშე ფრაუ.

მოაქვს შიშხინა ერბოკვერცხი, შესარგოდ ეგოს

ჰერ დოქტორი კი უკირკიტებს კონვერტს და დინჯად

აწერს: “გოტ შტრაფე ინგლანდ, ლონდონ, სერ ფრანსის ბეკონს”.

მოვლენ, მიდიან – სტუმრეულნი, ფიქრნი, ეშმანი...

მოვლენ, მიდიან, მიდუმდიან წელთა ეგვანნი...

სიტყვები, დარი, სამოსელი თუ კაეშანი

მიდის ყოველი, რადგან დროა გარდაქმანი.

...

მან არაბულს გაუსინჯა დვრიტა,

სანსკრიტი კი სულ ამაოდ ჭვრიტა.

ძალზე გვიან, მაგრამ მაინც: ჭიტა!

ვუნდერბარად უცებ გაიჩითა

აინე კლანე ფროილან მარგარიტა.

უცებ აფრინა ქაიროში დეპეშა მტკიცე

და ეშმას სულის დათმობაზე თანხმობა მისცა.

მაშინ თვით მეფი ჩამობრძანდა, მან გადაიცვა

სამოსელი და არ უნდოდა ფიცი და მტკიცი,

ის უკვე იყო გარდაქმნილი. ბოლოს გარისკა

და თაიგულით ქალიშვილის ბუდუარისკენ

გასწია ჯიქურ და ქმნა ვენი, ვიდი უნდ ვიცი.

IV

იპ ლიბე სინათლე, იპ ლიბე სიზუსტე
აბერ არ გეგონოთ ეს რაღაც სისუსტე.
თქვენ შპრეხენ — გულგრილად ვერ მხერდაო ქალებს?!
დას ისტ ნიპტ მარტალი კველა, დას ალლეს.
ეს შეთანხმება მახტ დერ გროსსე მინუს.
ნამდვილად შპრახე, მახტ დერ გროსსე სინუს:
ნაინ გეჰაპტ გრდზნობები აჩვენო ვინმეს.

კაცს ალლეს ვერ მოსთხოვ, არ არის ძლიერი:
“შეჩერდი წამოლო, ხარ შენ მშვენიერი!” —
ჩვენ შორის ეშმაკი ციბრუტობს ცბიერი
და ჩვენგან ყოველ წამს ამ ფრაზას ელის.
ადამიანი კი, მაინ ლიბე ჰერენ,
მერყევი ვინმეა, ამას სწორს წერენ,
თუმც ზოგჯერ გმირული ელფერით ჰფერენ,
მაგრამ ვით გოეთეს, იღბალი შევლის.

უნდ გროსსე დიხტერმა შეცდომა მოცერა,
ლამის სიუჟეტი ა განცე მოცელა,
შერ გუნომ აცბუნა არტისტი ქალობა
თომას მანს ცაუხდა თავის ხელმოცერა.
და მაინც, ხელოვნება ეს არის სინათლე —
კონცერტში ტკუილს სდჟობს სამოთხის გალობა:
დი კუნსტ, მთავარია გრდზნობების სიმართლე.

რა მოხდა, მას ჰქონდა სიკვდილის შიში,
მან კარგად იცოდა ეშმათა ჯიში,
ჩაწვდა იბნ სინას თუ ჰალენის ნაწერს,
სახსრებში იოლად აშრობდა ვასსერს.
შეეძლო გაეგო ასაკი ხეთა და
ვარსკვლავთა სავალ გზებს წინასწარ ხედავდა.
მაგრამ ღმერთისა კი — აინ ვენიგ, სულ ცოტა რამ
ნიხტ — დოქტორ ფაუსტმა არა იცოდა რა.

V

არის მისტიკა, არის რწმენა, და არის ღმერთი —
ეს ყვაღეფური სხვადასხვაა და მაინც ერთი.
ზოგიერთებს სწყენს სულისა და ხორცის ორობა
ურწმუნობა სიბრმავეა, უფრო — ღორობა.

ღმერთი დაგყურებს, ჩვენ ავცქერით. მაგრამ გვიანი
ჩვენნი სწრაფვანი უმწყობრო და უწყებრივია.
უფალი არის ბუნებრივი. ადამიანი?
ადამიანი ალბათ უფრო უნებრივია.

ამქვეყნად ყველა ადამიანს აქვს თავის ჭერი —
არცთუ იმდენად საიმედო, ამიტომ იგი
როდესაც გულში შეუძვრება მზაკვარი მტერი
ცხოვრებას უკვე ველარ ხედავს ეშმაკის იქით.

ასეთი გახლდათ დ-რი ფაუსტი; თავად
მარლოცა და გოეთეც ასეთნივე. თვით თომას მანი —
ინტელიგენტნი, მომღერლები და არცთუ ავად
სახსენებელი მკითხველები სხვანი და სხვანი...

ღროის დინება მიიღენის მათ ყველას ერთობ
და სპობს მათ გზა-კვალს, დონნერვეტტერ, ტალღა უცები.
იქნებ მოასწრონ და იკითხონ: ვიდრე ხუალ, ღმერთო?
და გაარჩიონ, რას ეტყვიან შორით მუზები.

პატიოსანი გერმანელი ცურიუკ, ო ფატერ!
არ უცდის როდის მიიყვანენ ბოლო კარამდის,
შარვლის ჯიბიდან ამოიღებს შემართულ ვალტერს
და ვალტერ-კლოზეტს მიაშურებს აწ და მარადის.

VI

ფროილიან, ვას ისტ დას ინკუბუს?
ინკუბუს დას ისტ აინე კლანე გლობუს —
ნოხ გროსსერ დიხტერ გიოტე გეაძლევს რებუსს.

ვაიმარში კი ნისლი იდგა მქისე,
და გასაღებიც აგვაცალეს ისე,
ვერაფერიც ვერ გავიგეთ მგონი —
ამაოა ეკერმანის გონი.
არაფერი აღარ შეგვრჩა ხელზე
ვართ მატროზენ, დარჩენილნი ხმელზე.

სული არის ამოცანა რთული;
მისტიკა კი ნიშანია სრული
დამარცხების — წაწმედლილი, კრული...
იპ ბინ, არ ღირს საკამათოდ უკვე.
ცუმბაიშპილ, ჭერი — სახურავის თავზე,
ლექსით მეტი, კაცით — ნიცმე გავზე.
მახსოვს ნიშში ღვთისმობელის სახე,
და ლოგინში ფრიუმტუკობა უხვი.

სექტემბერი, ზმორი, მთვარე სრული,
კულიანის კრუტუნს მიაქვს სული.
ბალიშის ქვეშ ამოვიდე ცული,
წამეშნაპსა ნეტაე... აპბემახტ!
იავოლ, ზეპტემბერ — უჟმურობის ფაქტორს
ერთვის ის, რომ სადღაც უჭირს ტრაქტორს.
მსურს სიცოცხლე. “ფელკიმ ბეობანტერ”.
გუტ ნახტ, მაინ ლიბე ჰერრენ, ია — გუტ ნახტ.

1965/1991

ბ ს ზ ა ა ბ ც

ბ მ ს ვ ც ა ბ ო

“სამართალმა კური ჭამა...”

ანუ

გუბერნატორი კომბლე

იყო და არა იყო რა, ღვთის უკეთესი რა იქნებოდა ქვეყანაზე... იყო ერთი კომბლე. ცხვრები ყავდა და დილიდან საღამომდე იმათ მწყემსავდა; მერე, შინ დაბრუნებული, ცხვრებს რომ დააბინავებდა, დაჯდებოდა და კომბლებს თლიდა. ხელი კი კარგი ჰქონდა და კომბლებიც მაგარი გამოსდიოდა, ოღონდ იმის ნახელავს მუშტარი ბევრი არავინ უჩნდებოდა და უკეთესი დროის იმედად, სხვენში აწყობდა ხოლმე.

ერთხელაც, შინ რომ დაბრუნდა, ხელავს — ერთი ცხვარი დაკარგვია. წაეიდა საძებრად. ბევრი იარა თუ ცოტა იარა, ვილაც მაზალო ტიპს გადაეყარა — ჭრელი ქვედაკაბა ეცვა, ცალ ყურში წყვილი საყურე გაერჭო, მხარზე ვიდუოკამერა გადაეკიდა... *გიჟია ოხერიო*, — იმის დანახვაზე ერთი კი ბრახიანად შეუთამაშდა წარბი ჩვენს კომბლეს, მაგრამ იფიქრა — *უცხოელი იქნებო*, მაინც დაზოგა და იმის პირსინგ-ჩაცმულობაზე კრინტიც აღარ დაუძრავს — გიჟი თავისუფალია ჩვენშიო. მაგრამ თურმე არც მთლად მასე ყოფილა საქმე.

სალამ-ქალამის მერე, აქეთ გადმოხვეწის მიზეზი რომ გაიგო, ძაან გაუკვირდა კომბლეს: თურმე აქაურობას ერთი დათვი შემოჩვეოდა და მთელი დუნიაც იმაზე იტეხდა თავს, როგორ გაეგდო ეს გაუმაძღარი და დაუპატიჟებელი სტუმარი. ამ უცხოელსაც მისი ინტერესი ჰქონია თურმე.

დადარდიანდა კომბლე: ცხოვრებაში თავსატეხი ისედაც არ აკლდა და ნაამბობმა თან ხომ გააოცა, თან დაადარდიანა კიდევც — ეს რა უბედურება ყოფილა ჩვენს თავსო.

— TV-ს მაინც არ უყურებო?! — გაიკვირვა უცხოელმა. — იმხელა ჯილდოა მაგ ჩემისაზე დაწესებული, ხონთქარამდეც კი მივიდა ხმა და შენი ერთი ცხვარი ვის რაში ენაღვლებო...

— ე-ე, რა ტელევიზორი, ახალუხი ვერ გამიუთოვებია უდენ-უგაზობის გადამკიდესო, — დაიჩვილა კომბლემ.

— მერე, მე აქ რისთვისა ვარ? მოდი, ერთად ვიჩალიჩოთ — გრანტსაც გამოვაყოფინებ მერინოსის ჯიშის ცხვრის მოსაშენებლად — ხო უნდა დაუბრუნდეს ბოლო-ბოლო მთას მთიელი! საჯიშე ვაცებიც ჩემზე იყოს, პირდაპირ შოტლანდიიდან... ისე, რომ იცოდე, გადმოცემით, ჩემი პაპი-პაპის-პაპა ჯვაროსანი იყო და დიდგორის ველზე იბრძოდა თქვენთან — დიდგორი ხო გაგიგია?

— როგორ არა, იქაც მიძოვებია ცხვარი, სანამ აქეთ გადმოვიდოდიო, — იხტიბარი არ გაიტეხა კომბლემ.

— საერთოც ბევრი გვაქ — ეს მთებიო, გუდასტვირებიო, ბოხოხე-ბიო... ჩაღლევაც გვიყვარსო — თავისას მიერეკებოდა ჯვაროსანთა შთამომავალი. — კაცები ჩვენცა ვართ და დათვის ბეწვის ქუდიც გვზურავს — ჩვენი დედოფლის სასახლესთან, აღლუმებზე მაინც არ მოგიკრავს თვალიო?

— ე-ე-ე... აბა რა ვიცი, მოკლული დათვის ტყავში ჯერ არ მინახივართო და... — გაკენწლა კომბლემ.

— ჩვენზე ამბობ მაგასო?! — ემცხეთა გადამთიელს, — თქვენ რომ აქაურ ლომ-ვეფხვებს დაერიეთ, ვითომც სულ ვეფხისტყაოსნები მყავდეთ, და ქედსიქიდან გადმოსულ დათვის კი სულ ბაბა-ბაბა უძახეთ, რატო აქამდე არ გადაგჭამათ ყველანიო.

— რამე იყოს, არც თქვენ აკლებდით ტკბილ ხმასაო, — ჩაიბურტყუნა კომბლემ.

— დოკუმენტურად დადასტურებული სამხილი გვჭირდებოდაო, — ტრენინგი ჩაუტარა იმანომ, — სანამ ფაქტზე არ დაიჭერ, ქურდიც არ არი — ჩვენში სხვანაირად არ მოსულაო... ახლა აგერ მაქ ყველაფერი ვიდევოზე აღბეჭდილი, შენ ოღონდ მხარში ამომიდექ, ნადირობის ცივილიზებულ ფორმებს უზიარე და ყველაფერი OK იქნებაო.

დაჰკრეს ხელი და მთებს ორი მხრიდან მოუარეს.

მიდის კომბლე და რას ხედავს — დიდი მურა დათვი წამოგორებულა კორღზე და ღმუის ჩუმ-ჩუმად.

— რა დაგმართნიაო? — ეკითხება.

— ნაღვლის ბუშტი მაწუხებსო, — თავი შეაცოდა დათუნიაძ.

— იქნება და კუჭიაო? — ჩაეძია კომბლე, — ცხვრის ღუმეში შემწვარმა ხორცმა იცის ხოლმეო. თანაც, მოპარული ცხვრის ხორცი ხომ ორმაგად აწვება კუჭსო...

— არ დაიჯერო, ჩვენი ერთმანეთზე გადამტერება მოსდომებით ვი-
ლაც-ვილაცეებს და ეგააო!

— ვიდეო-სამხილები რო დაგიღონ, მაშინ რაღას იტყვიო?

— ჩემზე ვინ რისი დამღებია, თუ ძმა ხარ — ჭიანჭველასთვის არ დამიდგამს ჯერ ფეხი და თაფლსაც კი არ ვპარავ ფუტკრებს, აქეთ მოაქვთ პატივისცემის ნიშნად!

— რა ვი, აგერ მთის ძირში ერთი ვინმე სტუმარი კაცი შემხვდა, შენზე ისეთები მელაპარაკა, თმები დამიდგა ყალყზეო...

— მაგათ უჯერებ შენო?! — გაღაირია დათვი, — ეგენი მეგობრებში ჩორტის ჩამოგდებით არიან ცნობილნი, დაწანწალებენ მთელ მსოფლიოში და რაც ცუდად დევს, სულ თავისი გონიათ; ხორცს სათოფზე არ ვეკარები, ვეგეტერიანელი ვარ — თაფლი, გიორგობებზე ძმაკაცებში თითო სირჩა თა-
ფლის არაყი და მისი ჯანი! კიდე მაყვალი, კენკრა, რკო, სოკო და რა ვიცი...
ტყეში საჭმელს რა გამოლევს, ემაგ ხოლესტერიანიანი¹ უბედურებიდან კი
ღმერთმა დამიფაროსო.

ისე ჭიკჭიკებდა, ერთი პირობა კომბლეს ეჭვიც კი შეეპარა: მართლა
რაღაცას ხო არ მამამაღლობს ის ვილაცააო.

— ისე, რამე რო იყოს, — შეაპარა დათვმა ნირწამხდარ კომბლეს, —
მაინც ჩემთან მეგობრობა გერჩივნოს გადამთიელებს: მეზობლები ვართ ბოლო-
ბოლო; შენ ერთი ურემი კაი კომბალი გამოთაღე — აი, ბზისა თუ იქნა,
მთლად უკეთესი — ხალხურ რეწვას დიდი გასაყალი აქ, ხელით ნაკეთებ
რამე-რუმეებზე ჭკუას კარგავენ ეგ უცხოელები და თქვენებური კომბალიც
ხომ განთქმულია მსოფლიოშიო; ამასობაში ტურიზმიც აყვავდება და საერ-
თოდ, ამ უაზრო მწყემსობას შეეშვი, არ მოცდე — თაღე კომბლები, ფარას კი
მე ჩავიბარებ და ნამატით ჩავაბარებო.

“გველსა ხვრელით ამოიყვანს ენა ტკბილად მოუბარიო” — სულმნათი
რუსთველისა არა გსმენიათ? ამ ჩვენს კომბლეს კი გველობისა რა ეცხო,
ცხვარი იყო ნამდვილი... დაუჯერა, ენდო და... ენდე! კარგი ტურაც დაიჭირა:

¹ ქოლესტერინი – ზედმეტცხიმოვანი საკვებისაგან გამოწვეული ძიან ცუდი რამე.

ერთ დღესაც რომ ააკითხა დათვს, როგორ მიდის ჩვენი პარტნიორობის საქმეო, რას ხედავს — რის კომბლები, რა ფარა — ამ ჩვენს დათვს ყველაფერი დაუნიაგებია — აღარც კომბლებია, აღარც ცხვარი და აღარც ცხვრის ტყავი — დაუიღლიაგებია და წაუღია ჩრდილოეთში: იქ ფაფახების ბიზნესი აუწყვია და შეთავსებით, თაფლის არყის კონტრაბანდა არ დაუწყვია ქედგადმელ ტურებთან?! გარდა ამისა, ეს — რაჭული ლორიო, ეს თაფლიო, ხე-ტყეო და რა არა — ბოროტი ენები მერე იმასაც ამბობდნენ, თოვლსაც კი ეზიდებოდა ქედგადამა — ზამთრის ოლიმპიადისთვის, ნაწილს კიდე დუბაიში ჰყიდდა ეკოლოგიურად სუფთა სასმელ წყლადო... ეს კიდე არაფერი, კბილი რო ატკივდებოდა, გაზის მილებს და ელექტროგადამცემის კაბელებს ღრნიდა თურქე და ზამთარში ასე შეატოვა ყინვას მთელი ეს მხარე!

კომბლე აქეთ ეცა, იქით ეცა, პატრულმა — ჩვენი მანქანები ორხიდიანი კი არაა, მოკვლევის ჩასატარებლად იქ ვერ ავალო; მეზობლებმა — თოფ-იარაღი ჩამოგვართვეს და ნადირობაც აგვიკრძალეს — ეგ თქვენი საქმე არაააო... მოკლედ, შავ დღეში ჩავარდა და ერთხელაც, ისევ იმ უცხოელს არ გადაეყარა?

— გადამრევთ თქვენო! — შეიცხადა უცხოელმა, — ეს ოხერი, არგონავტებმა ერთი კინკილა ტყავი წაიდეს და აქამდე ვერ მოგიხელებიათ, ამან კი მთელი ფარა გაატყავა, ხორცი და რქა არ დაგიტოვათ და — ვითომც არაფერი! გამოტყვერებოდა თავისებურად და ძინავს ალბათ სადმე ტკბილადო...

— ეჰ, ისევ მე თუ გიშველი, თორე ცუდადაა თქვენი საქმეო, — ამოიოხრა მერე, — არ გყოლია შენ ჩემს მეტი პატრონი და გულშემატკივარი! მოკლედ, ახლა რას ვშვებით: ტრადიციულ, კომბლით დაჟეგების მეთოდებზე უარს ვამბობთ — ვერც საერთაშორისო თანამეგობრობა გაგვიგებს და ცხოველთა დაცვის ლიგაც თავისას გაახურებს... თანამედროვე, ჰუმანური ხერხებით უნდა მოვუღოთ მაგას ბოლო!

მოკლედ, ასეთი გეგმა დასახა: დათვს ტაბლა სუფრაზე ვპატიჟობთ — ეგ იმისთანა მსუნაგი ვინმეა, უარის თქმა არ არსებობსო; ერთი ყუთი ნაღდი შოტლანდიურ ვისკი და ამბავი ჩემზეა, ხინკლები და პურ-მარილი კიდე შენ იკისრე — ეგ ჩემისა მართლა ვეგეტერიანელი ხო არ გგონიაო?!

— მერე მაგით რა ხეირიო? — გულუბრყვილოდ იკითხა უაზრო დროსტარებაზე გულაცრუებულმა კომბლემ.

— მერემ იკითხოს მერესი, მაცალე და ნახავო... დათვსაც მოგაშორებთ, ჯილდოსაც ჩაგახუტებ და ერთ კარგ ქეიფსაც გამოვრჩებითო.

დაყაბულდა კომბლე და ვითომც არაფერი — ყოფილ პარტნიორს მობილურზე დაუმესიჯა: სადა ხარ კაცო, სად დამეკარგე, ამ შაბათს პატარა პურ-მარილი მაქ და იცოდე, არ დამაღალატო — ხო იცი, უშენოდ ლუკმა არ გადამივა ყელშიო... იმ მსუნაგმაც — ჩემი რა მიდის, გული კი დათვისა მაქ, მარა მგლის მადლო და სხვის ხარჯზე ქეიფს ნაჩვევი, იოლად წამოეგო ანწუხზე...

კომბლეს ისე გადაეხვია, ვითომ მისი არც ვალი ქონოდა, არც ვახში... მერე უცხოელ სტუმარსაც კაი ძმაცაცივით დაჰკრა მხარზე ტორი, *დუ იუ სპიკ ინგლიშო?* – ჩაეკითხა ინტერესით და სუფრის თავშიც გამოიჭიმა. ეგრევე, ჯერ ნახევარი ყუთი ვისკი ჩაისხა ხახაში, ზედ მეგრული აჯიკაც მიაყოლა, ჭუტა თვალეზი გადმოცვენაზე გაუხდა, იქვე მოლზე წამოკოტრიალდა და მოჰყვა ბლავილს: Широка страна моя родная – Много в ней озер, морей и рек... მერე ჭადარა მთების დათოვლილ მწვერვალებს მიაშტერდა, თვალზე ცრემლი მოერია და... Ах, ты степь широкая-о – დასცხო...

ოღონდ ეგაა, სევდას მალევე მოერია და საქმეზე გადავიდა: ოხშივრიანს არც გაპიწკინებული ხინკალი მიაკლო, არც ცვრიან მწვადსა თუ ბადე-ქონში გახვეულ გულ-ღვიძლზე გაუღვია თავპატიჟი და ცხელი ყაურმითაც კარგად ჩაითუთქა ყელი... ამდენი ველარ მონიელა, გასკდა ბორჯომის სმით, გაეებრა მუცელი, ნაწლავების გაღ-ახლართვა დაემართა და წაიღო წერილიცა და თქვენი ჭირიც — გავიდა გაღმა!

დათვის ტყავი, როგორც წესია, პრეზიდენტს აახლეს — იმან კიდე გრძელზე-გრძელი, გარნა დინამიური სიტყვა წარმოთქვა დათვის ტყავში გახვეული მგლების თაობაზე, სპეციალური ბატალიონის შექმნაც ბრძანა, რომელიც დათვს კი არა, უვიზოდ ჩიტს აღარ გადმოაფრენდა ამ მხარეში; სასახლერო-გასამხედროებული ბანაკ/რეგიონის გუბერნატორად, უზენაესი დეკრეტით, თვით ჩვენი კომბლე დაინიშნა, ხოლო მისი კილტოსანი მეგობარი — ამა რეგიონის ინსტრუქტორ-მეთვალყურედ და უშუალოდ პრეზიდენტს დაქვემდებარებული, საპატიო დათვისბეწეჭქუდიანი თოფოსნების რაზმის წინამძღოლად განამწესა (ორმაგი მოქალაქეობის მიღების მერე, რასაკვირველია).

კომბლეს ჩვეული პასუხისმგებლობით მოეკიდა დაკისრებულ მოვალეობას და საქმეს გონივრულად ააწყო: უპირველეს ყოვლისა, თავისთან კომისარიატები გააუქმა და ჯარში გაწვევა მხოლოდ გამოცდების ჩაბარებით ხდებოდა (*კომპიუტერი, დახასიათება უბნის რწმუნებულისაგან, უნარ-ჩვევები*). იმდენად შეუვალი განლდათ და პრინციპული, არც ვინმე ნათესავ-მეგობრის შვილსა თუ გინდაც ახლობელზე ნაცნობობა/პროტექცია არ ჭრიდა. არ გადიოდა არც ხვეწნა-მუდარა, არც “ზევიდან” რეკვა და არც რამ საბოძვარი...

აშენდა და აყვავდა იქაურობა; ეგაა რომ ხანდახან, ათიათასში ერთხელ, ერთი-ორი გზააბნეული, უცხო თვითმფრინავი თუ შემობოდილდებოდა ხოლმე კომბლეს მისახედ საჰაერო სივრცეში, იმათი ჩამოგდებული ბომბები კიდე ჯიუტად არ ფეთქდებოდა და ნაჭერ-ნაჭერ, თურქეთში იყიდებოდა ჯართად... მაშ!

ჭირი იქა, ლხინი აქა, ქატო იქა, ფქვილი აქა!



ნაცარქექია ინტერნეტში

თავი I

ამ ჩვენ გმირს სახელად მერაბი ერქვა, გვარად ალვანი გახლდათ და თავისი სახელოვანი წინაპრისა ბევრი არაფერი იცოდა — ცხოვრობდა თავისთვის ბედნიერად და უდარდელად ვერა-ვაკის გასაყარზე, მამის დანატოვარ ძველ, ბუხრიან სახლში, დროს ძირითადად ქეიფში კლავდა და კაი გვარიანი მსმელის სახელიც ქონდა დაგდებული; ნაბახუსეზე კი ხან წიგნების, ხან კიდევ ნაცრის ქექვით იქცეოდა თავს.¹ ნაცარქექიაც მაგიტომ შეარქვეს.

არ დამიწყეთ ახლა, ამ პატიოსან, ძირძველ თბილისელს ინტერნეტში რა უნდოდაო?! გვაცალეთ, ბატონო — სულ წვრილად მოგახსენებთ ყველაფერს...

თეთრი მელას² რჩევით ბანკში შეტანილმა დანახოგებმა ჩაიღურის წყალი რომ დალია და ქეიფს ვიღა ჩივის, თავის რჩენაც კი გაუჭირდა, აიღო და მთელი შემორჩენილი ავლა-დიდება სანაოსნოს ბიზნესში დააბანდა. ოღონდ ამ საქმისაც ბევრი არაფერი გაეგებოდა და თვითონ უღვაშზე რომ ენდობოდა სხვას, სწორედ იმ სხვებმა, უკაცრავლი პასუხია და “გადაადგეს”, უნამუსოდ გააცურეს და ბოლოს მთლად მშრალზე დატოვეს: ისე წაუვიდა საქმე, იძულებული გახდა, მამისეული სახლ-კარიც გაეყიდა...

ყველაფერს მოიკლებდა, ოღონდ უბუხროდ ცხოვრება ვერ წარმოედგინა, ამიტომ ერთი მოცუცქნული, ოღონდ ბუხრიანი ოთახი იქირავა სადღაც გარეუბანში — ძველებურად მიუჯდებოდა ხოლმე, ქექავდა ნაცარს, კბილებს აკრაჭუნებდა და შიგადაშიგ, თავისთვის ბურტყუნებდა: “იცოდეთ, არავის არაფერი შეეშალოს — *მე-რა-ბ-ალ-ვანი ვარ, მე-რა-ბ-ალვანიო...*”

ვითომ სადარდებელი აკლდა, ერთხელაც მერიიდან გიგის ბიჭები დაადგნენ — ამ ბინის ყოფილ მესპატრონეს ბუხარი უკანონოდ ჰქონია გაჭრილი ჯერ კიდევ იმ საუკუნეში და ახლა სამართალი უნდა აღსდგეს, პირადად მერის საგანგებო ბრძანებულებით, საკვამური უნდა მოგინგრიოთ, ბუხარი — დავლუქოთო. ერთი ისიც ითქვას, ათასი ბოლიში კი უხადეს —

¹ თუმცა მავანი (გვარს არ დაეასახელებ — განათლების ჩვენი ყოფილი მინისტრი, მაგალითად) ასე ამბობდა — ეგ მაინც ერთი და იგივეაო...

² ელო ბაბუს ეძახდნენ ასე — მოფერებით...

ჩვენ პატარა ხალხი ვართ, ვინ რას გვეკითხება, უფროსების ბრძანებას ვასრულებთო... მერე დაამატეს — სულ ზომ არ ვშლით, ჩემო ბატონო, გქონდეთ, ისარგებლეთ, ოღონდ ცეცხლს კი ვეღარ დაანთებთ შიგო.

მერაბ ალვანმა, როგორც ჩვენებური სტუმარ-მაპინძლობის წესია, იქეთ მოუბოდიშა შეწუხებისთვის, თითო ჭიქა ჩაიც შესთავაზა, გაიკვირვა კიდევ — ვერ გამიგია, რას ერჩიან ამ პატიოსან ხალხს, მშვენიერი კარგი ზრდილი ახალგაზრდები არიანო... ოღონდ მერე, რომ გაისტუმრა, რაღაც კი ემცხეთა გულში — ცეცხლი თუ არ დავანთე შიგ, ეს ბუხარი რიდას მაქნისია, ზამთარში არ გამათბობს და ასე საგულდაგულოდ დალუქული, ზაფხულში სავენტილაციოდაც აღარ გამომადგებაო.

ამ გაჭირვებაში ერთი, მასსავით ხელმოკლე და შეჭირვებული მეგობარი მაინც შერჩენოდა ჩვენს ნაცარქექიას, საბავშვო ბაღიდან თანშეზრდილი ქაიხოსრო და იმას შესწივლა — ასე და ასეა საქმე, ჩვენი ხე-ტყე ზომ გაიზიდა, შეშა სანთლით საძებარი გახდა, ნაცარიც შემომეფანტა და ახლა გაცივებული ბუხარიღა შემრჩა, ისიც — დალუქული!

ქაიხოსრომ — მე რა მაბადია, რითი გიშველო, ერთი დაფეხვილი, ადამ და ევას დროინდელი, ჯაბახანა კომპიუტერი მაქ, აღარაფრად მარგია, მაინც საბერძნეთს მივდივარ ფორთოხლის საკრეფად და იქნებ შენ მოიხმაროო... შეხვალ ინტერნეტში, იჩეთავებ, ხალხს გაიცნობ, ასე ჩეთაობა-ჩეთაობით იქნება მერე შენც გამოადგე ვინმეს რამეში! ბოლო-ბოლო, ნაცრის კარგად მქექავი კაცი არც ინტერნეტში დაიკარგება, ასე გამიგია მეო...

ეს ამბავი ჭკუაში დაუჯდა ნაცარქექიას, წამოიღო მეგობრის კომპიუტერი, პროცესორი გაუქმებულ ბუხარში შეტენა — ზედმეტ ადგილს მაინც აღარ დაიჭერსო, მონიტორი — ადრე ფეხების შესაწყობად გამოთლილ ჯორკოზე შემოდო, ხელში თავუნია-მაუსი მოიმარჯვა, შევიდა ინტერნეტში და... გაქრა კაცი — დაიკარგა!.. მას მერე, კარგა ხანი არც აღარავის მოუკრავს იმისთვის თვალი.

თავი II

აფორიაქდა მთელი უბანი — რა იქნა ეს კაცი, სად დაიკარგაო... იმისი საკვამურიდან ბოლის ამოსვლას აღარავინ ელოდა, ოღონდ ბინიდან ჩამიჩუმიც რომ არ ისმოდა, ამან შეაშფოთა სრულიად სამეზობლო.

ამ დროს კი ჩვენი გმირი საიტ-საიტ დაბორიანობდა გზაბნეული და ვინმე ჭკვიან კაცს ეძებდა — ეგება და დამაკვალიანოს როგორმეო. ბევრისა-

გან გაეგონა: ინტერნეტში ერთხელ მოხვედრილი, მერე და მერე ნებისმიერ კითხვაზე თვითონ პოულობ პასუხსო.

ბევრი იარა თუ ცოტა იარა, ხედავს — ხრამია, გაღმა კი ადამიანი-ობობა საკუთარ ქსელში გახლართულა თავიან-ფეხიანად. ნაცარქექია აქეთ ეცა, იქით ეცა, ვერც skip-ი ქნა და ვერც სკუპი, მოკლედ — ჩიხშია.

— Back მიეციო, — გამოსძახა სპაიდერმენმა.

— ჩვენში ეგ არ მოსულაო, — იუკადრისა ნაცარქექიამ, იშვირა ფეხი და რომ ეგონა, Forward მივეციო, Slip გამოუვიდა და შიგ ხრამში არ ღურთა თავი? ბედზე, რბილად დაეცა, დამშრალი მდინარის სილიან ფსკერზე. იქვე ბოთლი ეგდო, ნაღდად რაღაც ანტიკვარი — ცვილის ბეჭდით დაბეჭდილი; ახსნა და რას ხედავს, ერთი საწყალი ჯინი არ გაჭედოდა ბოთლის ყელში?!. წლობით უძრაობა-უსაქმობისაგან ისე შევსებოდა ფერდები, ვეღარც იქით იყო და ვეღარც აქეთ.

— მანდ როგორ მოხვდიო? — გაიკვირვა ნაცარქექიამ.

— მაშ ჰურიებს³ ვინ დაიჭერს, კარგო — ბოთლებში ხომ სულ ჯინები ვზივართ... ანუ, ვსხედვართ და ზიანს არავის ვაყენებთ!. ნაღდად ასე ყოფილა ეს და თუ ჩემი ძმა ხარ, მიშველე რამეო, — შეჰღაღადა ჯინმა. მიიხედ-მოიხედა ნაცარქექიამ, მაგრამ Escape-ს ვერსად მიაგნო. ერთი ამ პროგრამის დედაცო — მოზრდილ რიყის ქვას დაავლო ხელი, ბოთლი მიამსხრია და ჯინიც გაათავისუფლა.

— მარად შენს მსახურად მიგულე, უგონებათმახვილესო — თავი მდაბლად დაუკრა ჯინმა, თან იშმუშნებოდა — ეტყობა, გვარიანად მოხვედროდა ბეჭებში...

— რომელი ხონთქარი მე მნახე, მსახურები დავიხვიო... აწი ბოთლში მაინც ვეღარავინ ჩავსვამს, თავისუფალი კაცი — ფუი, ეს რა ვთქვი — ჯინი ხარ, ჰოდა ეგერ, იმ გამწერებული ჯეელის გამოხსნაში დამეხმარე, ეგ იქნება შენი მადლობაც და კეთილი სამსახურიცო — მიუგო ნაცარქექიამ.

— აგაშენებს ალაპი, მაგას როგორ დაგზარდებო, — თქვა ჯინმა, ნაცარქექია დაიილღიავა, ციმციმ აიტაცა კლდის წვერზე და სპაიდერმენიც გამოიხსნეს.

მერე სამივე ერთად გაუყვა ვირტუალურ გზას. ბევრი იარეს თუ ცოტა, ერთ დაჭაობებულ დაბლობს მიაღვნენ. ამ ჭაობში თურმე ცნო-

³ მაჰმადიანური მრწამსით — სამოთხის ლამაზმანები.

ბადსახიანი ვინმე გობლინი შრეკი სახლობდა. ერთობ მოწყენილსა და მარტობისაგან თავგაბებზრებულს, მისი ტომ-ჯილაგის არა ქალი არ მიჰყვებოდა ცოლად — ცხვირს იბზუებდნენ, მანდ რა გვაცხოვრებს, ხომ დაგვჭამა კოლომო... და ფარულის ნატვრით სულ ამას ნატრობდა შრეკიც — ერთი ეს ოხერი ჭანჭრობი დაშრებოდესო.

ნაცარქექიამ გულთან ახლოს მიიტანა გობლინის სატკივარი: მახსოვს, ერთი ქალი მეც შემეყვარდა ნამეტნავად, მაგრამ არც მე წამომყვა — ნაქირავებში ვერ ვიცხოვრებო...

— ე-ე, საქმე რო საქმეზე მიდგეს, ჭაობის ამოშრობას რა უნდა, — გმირთა ვარამს ვედარ გაუძლო ჯინმა, — შენ ისა თქვი, მერე თუ იხარებს ხედ რამე?

— შანსი არააო, — იმედი გადაუწურა სპაიდერმენმა, — ჩრდილოელი ქონდრისკაცის, ორთავა ბოროტი ჯადოსანის ავი თვალი ადგას აქაურობას! თქვენ რა გგონიათ, მაგის აგენტების დვენას გადაყვევი მე — ვიფიქრე, ახლა ჩემი დროა-მეთქი და არ გამაბეს საკუთარი ხელით გაბმულ ქსელში? მოკლედ, ჯერ ეგ ჯადო უნდა აიხსნასო. — დაიჟინა.

— მერე, ეგ როგორ მოხდებაო? — იკითხეს ერთხმად.

— როგორ და, იმ წუწურაქ ჰარი პოტერს რო რაღაც ჭკვიანური ქვა ქონია, *ფილოსოფიური ქვას* ეძახის მგონი, სინამდვილეში *კეთილდღეობის გენერატორია* უბრალო, ადრე *შიოს მარანსაც* იტყოდნენ ძველები და ის თუ უშველის ჩვენ გაჭირვებას! აზრზე არა ვარ, სად იშოვა. მასონების⁴ ნაბომები თუა. ისე, მაგარი რამეა — წყალს ღვინოდ გადააქცევს, ღვინოს — წამლად, გაჩეხილ ტყეებს და გაპარტახებულ მიწას — წალკოტად, გაყალბებულ არჩევნებს გაასწორებს და საერთოდ... მაგრამ რად გინდა, ხელიდან გააგდებინებ?! სულ გადაავიწყდა, ობლობაში როა გაზრდილი, რაღაც *პროგლო-მასტი*⁵ გამხდარა და აუჩემებია — ჯერ საქმე მაჩვენეთ თქვენი გაკეთებული და ქვის თხოვება იქნება, NATO-ში შესვლა თუ ევროგაერთიანებაში გაწევრიანება, ეგ მერეო...

— მაგარი ანგარიშიანი ვინმეა ეგ ჩემისა, მართალი ხარო, — კვერი დაუკრა სპაიდერმენმა.

— ე-ეჰ, პლანეტას ეგენი მართავენ და რა გინდა, რომ ქნაო, — ყურები ჩამოყარა შრეკმა.

⁴ მაგარი უცნაური ძიები, მშენებელ-კალატოზთა სამმო, ოდითგანვე სოფლის შენებაზე რომ დებენ თავს.

⁵ პროტესტანტ-გლობალისტ-მასონი; რას ნიშნავს, ჯერ ბოლომდე ჩვენც არ გვესმის კარგად (რედ. შენ.)

— წავიდეთ, დაველაპარაკოთ, კაცურად ვუთხრათ ერთი-ორი სიტყვა, გაგების ამბავია ბოლო-ბოლო — სიტყვა ჩააგდო ნაცარქექიამ, — “გველსა სვრელით ამოიყვანს ენა ტკბილად მოუბარი!” — არ გაგიგიათო?

— არაო, — მიუგეს ისევ ერთხმად და ჩაუდგნენ კვალში.

თავი III

ბევრი იარეს თუ ცოტა იარეს, მართლა ზღაპრულ ქვეყანას მიადგნენ: გზებს ხელახლა დაგება არ ჭირდებოდა, ქუჩებს შამპუნით რეცხავდნენ, ცელოფანის პარკს ვერ იპოვიდი სადმე დაგდებულს, მანქანები ფეხით მოსიარულეებს გზას უთმობდნენ და ხალხი კიდევ მხოლოდ გადასასვლელებზე გადადიოდა და ისიც — მწვანე შუქზე!

ბ-ნმა პ. პოტერმა, იქაურობის გამგებელმა, დიდის პატივით მიიღო სტუმრები — რაზეა ბატონებო ლაპარაკი, ქვეყანა რაც მეტი იქნება წესისა და რიგის მიმდევარი, მოქალაქეები — საღი აზრის ყურადმღები, რაც მეტი ჭაობი ამოშრება, გზები დაიგება, სტუმარ-მასპინძლობა მომრავლდება, ტურიზმი აყვავდება, მაგას რა ჯობსო! ოღონდ ეს მითხარით, თავად თქვენ რისი გამკეთებლები ხართ, რა გივარგათ თქვენს მხარეშიო.

— როგორ თუ რა! — ყინჩად მიუგო ნაცარქექიამ, — ჩვენი ღვინო გამთქმულია მსოფლიოში და სმა-ჭამაც სანაქებო ვიცით — სხვები თუ პატარას წაკიკინან და მერე ჭიქა ღვინით იკოკლოზინებენ ყელს, ჩვენში ჯერ სასმისს დავეწაფებით ხოლმე და ლუკმას მერე მივატანთ — ემანდ ფარცაგი⁶ რამ არაფერი შეგვემთხვასო...

— დი-ი-დად უცნაური სმა გცოდნიათო, — გაიკვირვა ბ-ნმა პოტერმა.

— თუ გნებავთ, გავეჯიბროთო — აჯახა ნაცარქექიამ, — ნებისმიერი ტევადობის ჭურჭელი მომეცით, რაც კი სასმისად გამოდგება და მერე ჩვენ ვიცით... მერაბ ალვანი ვარ, არავისში შეგეშალოთო!

შენ რა ბალვანიც ხარ, კი გეტყობაო, — გაიფიქრა მისტერ პოტერმა, ეშმაკურად ჩაედიმა და — ბატონი ბრძანდებიო, — უთხრა სტუმარს. — აი, ჩვენს მუზეუმში მამონტის მარცხენა ეშვის ყანწი ძეგს, აქაურ მელექს/მეისტორიეებს რომ ჰკითხო, უხსოვარ დროში ჩვენს ეროვნულ გმირთა-გმირს დაუცლია და ერთი ზღაპრული, ცა-ფირუზ ხმელეთ-ზურმუხტოვან უცხო

⁶ ცუდი რამ, ავი ზნისა.

ქვეყნიდან ჯილდოდ წამოუღია... თუ მაგ ყანწს ყველა ჯერი-ჯერზე დაცლით, აირჩიე, — გინდა ყანწი, გინდა ქვა-გენერატორი — მთელი 10 წლით, შეღავათიანი იჯარის ამბავში დაგითმობთო.

— მოსულაო, დაყაბულდა ნაცარქექია.

— რას შეგები, გადაირიეო?! — აყვირდა შრეკი, — მაგის დამლევი რომელი ვართ, ხო დაგვისკდა კუჭებიო...

— გეუბნებოდით მე თქვენ, უფასო ყველი მარტო სათაგურშიაო, — კვერი დაუკრა ობობამ.

— ნახევარი ცხოვრება ბოთლში მაქ გატარებული, მე კიდე ღვინო და ლოთობა მინდაო?!. — თავი მოისაწყლა ჯინმაც.

— კარგი, პო! სირცხვილია... მარტო დავლევ ყველას მაგივრად — ძმა ძმისთვისაო, შავ ღღისთვისაო — არც ეს გაგიგიათ?! *ე ფრენდ ინ ნიიდ იზ ა ფრიენდ ინდიიდ!* — სახელდახელოდ მოუთარგმნა კიდევ ნაცარქექიამ.

— ეგ მგონი კიო, — თავები დაუქნიეს მეგობრებმა და დაყაბულდნენ.

‘Delete!’ — თქვა ნაცარქექიამ ჯადოსნური სიტყვა და ყანწის ტუჩს საკუთარი ტუჩი დააწება. ერთი რომ დაცალა, ჰარიმ თვალები ააფახულა, მეორეზე — სათვალეები დაიორთქლა, გაწმინდა და მერე ისევ დაიკოსა ცხვირზე, მესამეზე — ბაკალავრის ქუდი მოიშეღიპა და გაოგნებულმა ჭმუჭვნა დაუწყო; მეოთხე ყანწიც რომ დაცილა, ნაცარქექიამ — ჩვენში წყვილზე გაჩერება არ იციან და ერთსაც, თუ გინდა, შენს სახელზე დავლეეო!

— ამ ჩემს დიპლომიან მჩხიბავ-ჯადოსნობას რა ვუთხარი, რა ტყუილად მიწვალა ამდენი წელიო! — წამოიძახა მისტერ პოტერმა. — კოფერფილდ-ვადაჭკორიას წყვილ-წყვილად დაუდგეთ თვალი, ასე უცებ ამდენ სითხეს ეგენი გააქრობდნენო?! — აჰა შენ ეს ყანწი, აჰა შენ ეს ქვა და ეს ბაკალავრის ქუდიც ალალი იყოს შენზეო...

შეუდგნენ ჩვენს გმირს აქეთ-იქიდან მხრებში ძმაცაცები და გამოსწიეს შრეკის სამოსახლოსკენ, იქ მისულებს კი ჭაობის ნასახიცი აღარ დახვდათ! რაღა ჩარა იყო — მალე იმის ქორწილშიც მოიღხინეს — გობლინს ვინმე ბერძენი ქალი ელენეს მოყვანა გადაეწყვიტა ცოლად და ქვეყნის ოთხივ კუთხით მოეწვია კიდევ ვირტუალური სტუმრები — მათ შორის, ცოლის მხრიდან, სწორედ ჩვენი ქაიხოსრო არ აღმოჩნდა მაყარში?! ელინები⁷ ოდით-

⁷ ანტიკური, ანუ ძველი ხანის საბერძნეთის მოსახლეობა.

განვე აფასებდნენ თურმე ქართველ მსმელებს და მასაც თამადის უებრო მოადგილის სახელი ჰქონია გაგდებული. ერთმანეთს დანატრებულმა, უბედობით უცხო მხარეს გადახვეწილმა თანამემამულეებმა გვარიანი დრო ატარეს — გობლინ-ჯინ-ობობა არ დარჩათ დაუთრობელი! მერე, თვითონაც რომ შექეფიანდნენ და ერთი-ორი სუფრულიც შემოსძახეს, ისეთი სევდა შემოაწვათ და ისე მოენატრათ ჭადარა თბილისი, ნეფე-პატარძლის დიდი ხვეწნამუდარის მიუხედავად — უთქვენოდ აქ ცხოვრებას რა ფასი ექნებაო — მაინც ხელი-ხელ გადახვეულები, ბანცალ-ბანცალით გამოუყვენენ ინტერნეტიდან შინისკენ მიმაგალ გზას:

*მეგო-ო-ბრებო!
მეგობრებო გშორდები-ით...
შინ მივდივართ, მივალთ გემშვიდობები-ით!
ინტერ-ნეტო — რა კარგის რა-მა ხარო-ო...
იმე-დია — ხშირად დაგეჩეთები-ი-ი-თ!..*

ყანწი, რაღა თქმა უნდა, წამოიღეს — აბა მაგას როგორ შეელოდნენ და ფილოსოფიური ქვა კი, იგივე *კეთილდღეობის გენერატორი*, ახალდაო-ჯახებულ შრეკს უფეშქაშეს — “აბა მე რა შავ ქვად მინდა, სალ კლდეებს მაგაში გავცვლი?! ყანწი იყოს და გაგება, დანარჩენს თავისით მოეკლებათ...” — ძმაკაცს საჩუქარი არ დაამაღლა ნაცარქექიამ.

— ეგრეა, ჯიგარი ხარო! — ბეჭედი დაუსვა მის სიტყვებს ქაიხოსრომ, — არც მე ვარ ბერძენი ფერმერი და არც შენ მყევხარ ბილი გეიტსი — ორივენი ბედკრული იბერიის შვილები ვართ! წამო, იქ დრო შეიცვალა, ახალ ხელისუფლებას ჩვენნაირი, უცხოეთში ნასწავლი ხალხი სჭირდება, გვერდში დავუდგეთო. ბოლო-ბოლო, ეგ კომპუტერი მე გაჩუქე და მევე გაგიყვან აქედანო. — ხია Restart-ს და ისევ იმ ნაჭირავებში არ ამოყვეს თავი?!

გაიხარა ნაცარქექიამ, მამონტის ყანწი რომელიღაც კულტურის ფონდს გადასცა უსასყიდლოდ, სამაგიეროდ ახალი, ბუხრიანი ბინით დაასაჩუქრეს და ქაიხოსროც ინფორმაციული მენეჯმენტის უსტაბაშად მიიწვიეს იმავე ფონდში — შესაბამისი ანაზღაურებით, რასაკვირველია...

ოღონდ საქმე ისაა, ინტერნეტიდან გამოსვლისას, ჩვენს ქაიხოსროს თურმე Save-ის მიცემაც არ დავიწყნია და ნაცარქექიას ბინიდან შებინდებისას დღემდე მოისმის ხოლმე უცნაური როზროხი, დილაუთენია კი ვიდაცა მოკლეზე, სახურავ-სახურავ მიხტუნაობს ორიოდ ყუთი ჩაციებული “ყაზბეგის” მოსატანად, არ ცხრება მრავალხმიანი სიმღერა და გამხიარულებული ბუხრიდან ერთად ამოდის კვამლი და ცვრიანი მწვადის სურნელი...

ხო იძახდა კაცი — *არავის არაფერი შეგეშალოთო* — არ გამოდგა მართალი?.

Ვ Ბ Ა Დ Ბ Ვ

Ბ Ვ Ვ Ვ Ვ Ვ Ვ Ვ Ვ Ვ



თარგმანი თუ გრანტიყლაპიობა?

ჩვეულებისამებრ, უარყოფითი სარედაქციო დასკვნა საყოველთაოდ მიღებული ფორმულით იწყება ხოლმე: "სამწუხაროდ..." და ა.შ. ამ კონკრეტულ შემთხვევაში კი სამწუხარო მხოლოდ ისაა, რომ "ღია საზოგადოება — საქართველოს ფონდის" კოორდინატორთან უნდა დამეზუსტებინა, ნამდვილად დასრულებული თარგმანი გადმომცეს, თუ რაღაც გაუგებრობის გამოისობით, პირველადი ხელნაწერი, ანუ ე.წ. "შავი პირი" ხომ არ ჩამივარდა ხელთ... პასუხი ასეთი გახლდათ — როგორ გეკადრებათ, ევ თარგმანი უკვე რედაქტირებულია, ჰონორარიც გადახდილი და ახლა მხოლოდ დასტამბვის საკითხსა განვიხილავთ!

ხელნაწერის (sic!) ზოგიერთი გვერდი იმდენად გაკრული ხელითაა შევსებული, ხანდახან ეჭვი მიპყრობდა, მართლა ასეთი სისულელე ეწერა შიგ, თუ თავად ვერ ვახერხებდი ტექსტის სწორად ამოკითხვას... ამას დაუმატეთ რაღაც-რაღაც ვარიანტები, რომელთა შორის არჩევანის გასაკეთებლად თავი აღარ შეუწუხებია "მთარგმნელს", ვიღაც აშკარად გარეშეს მიერ ჩასმული ურთიერთსაწინააღმდეგო სტილისტური ჩასწორებები, გამოტოვებული ან, უბრალოდ, უთარგმნელად დატოვებული მთელი პასაჟები და სურათი, ვფიქრობ, ნათელი ხდება...

ისიც ითქვას, რაც უფრო თვალშისაცემია ლაფსუსი და რაც უფრო მეტად საცდურია იგი რეცენზენტისათვის საქილიკოდ, მით ადვილია მისი შემჩნევა და გასწორება რედაქტორისთვის, მაგრამ თუ მათ რაოდენობას გავითვალისწინებთ, აქ უკვე რედაქტორი კი არა, სხვა მთარგმნელია საჭირო. ამიტომაც მაგალითების რაიმე კლასიფიკაციის მიხედვით მოტანას, ვფიქრობთ, აზრი არა აქვს; უბრალოდ, ნებისითი წესით დავაფიქსირებ მხოლოდ მათ, რომლებიც გადაფურცვლისთანავე მომხვდა თვალში და რომელთა მსგავსიც, დარწმუნებული იყავით, ნებისმიერ გვერდზე შეგიძლიათ აღმოაჩინოთ:

- 1.საერთოდ გამოტოვებულია თავი Cultural Roots (p.9).
- 2.ასევე გამოტოვებულია IX თავის სათაური — The Angel of History.
- 3.საკუთარ "მესიური დროს" თავადაც დაუეჭვებია და იქვე, ეტყობა სამომავლოდ, დედნისეული Messianic time მიუწერია...
5. "...მთავარი არც თავისებური ბარაბადური (!) არც პაგანი არ იყო, რომლებიც სახელმწიფოს მნიშვნელოვანი ინტერესის საგანს წარმოადგენდნენ, და რომელთანაც მას მხოლოდ არქეოლოგიური კავშირი ჰქონდა. (გვ. 136)

აქ აზრი, სტილი თუ გრამატიკა-მართლწერის მოთხოვნები იქით იყოს და, მთარგმნელს **ბარაბუდური** და **პაგან** (ინგლ. წარმართი) ორივე ხუროთმოძღვრების ძველი ჰგონია! ამ მოსაზრებას გვიმტკიცებს იქვე, სულ ორიოდ სტრიქონის შემდეგ გაკეთებული დასკვნა: "*საბოლოო ლოგიკური შედეგი ლოგო გახლდათ — პაგანისა თუ ფილიპინებისა*". (დაგენაცვლე! გ.ჭ.)

6. მან შექმნა "უძველესი მონუმენტების ჯგუფი, ამ კლასიფიკაციის შიგნით სეგმენტირებული, გეოგრაფიული-დემოგრაფიული ნიდერლანდური ინდოეთისა (!) და ბრიტანული ბურმის (!) ოთხკუთხედი. (ავოე! გ.ჭ.) გვ. 135.

დედანში ჩახედვის გარეშე, პირადად ჩემთვის ამ აბლაუბდის გაგება, უბრალოდ, შეუძლებელი აღმოჩნდა:

It created the series "Ancient Monuments", segmented within the classificatory, geographic-demographic box "Netherlands Indies", and "British Burma". (p. 185).

7. აი, რაც შეეხება დებულებას, თითქოს "*კოლონიალური სახელმწიფო არა მხოლოდ ისწრაფვოდა საკუთარი კონტროლის ქვეშ სრულყოფილი ვიზუალურობის ადამიანური პეიზაჟის შექმნას*" — აქ უკვე, ვგონებ, დედანმაც ვერ გვიშველოს... (იქვე).

8. თუმცა, უნდა მოგახსენოთ, ალაგ-ალაგ მთარგმნელის კეთილსინდისიერება პირდაპირ გულისამაჩუყებელია:

"რუმინელი და თჰაი — *(ეგენი ვინაა, არ ვიცო) ერთნაირად იგებენ + ნიშანს*". **{დმერთმანი, სწორედ ასე წერია! გ.ჭ.}**

არცოდნა არცოდვააო, გამიგია; მაგრამ როცა წიგნში ერთი 30-ჯერ მაინც შეგხვდება სიტყვა Thailand და მიაწერ — *Thai რაია არ ვიცო* — ე.ი რაღაც ვერა ხარ, რომ უნდა იყო, მთლად ისე...

საკუთარი ჭკუა დასარიგებლად არავისთვის მემეტება, მაგრამ ზოგადად, ამგვარი ტექსტის სათარგმნელად ჯერ ალბათ იმით უნდა დაიწყო კაცმა, რომ გაიაზრო, როდის და როგორ მოიხმარო ცნებები *ეროვნება, ეროვნულობა, ეროვნული* და *ნაცია, ნაციონალური, ნაციონალისტური*... თორემ რა გა-მოდის? რა და ამგვარი რამ:

"*თითქმის ყოველ წელს გაერთიანებული ერები (!) ახალ წევრებს (!!)* იერთებენ (!!!) და მრავალი "ძველი ერი" კი, რომელიც ერთ დროს ერთ მთლიანობას წარმოადგენდა, ახლა "ქვე"-ერებად არის დაყოფილი თავიანთ ფარგლებს შიგნით, ნაციებად, რომლებიც ერთ მშვენიერ დღეს ამ ქვენაციონ-

ალურობის გაუქმებას ლამობენ.” (გვ. 2); და იქვე: "მარქსისტული მოძრაობები და ქვეყნები ესწრაფვიან არა მხოლოდ ფორმით, შინაარსითაც ნაციონალური ხასიათის გახდენს, ე.ი. ნაციონალისტური".

მართალია, ეროვნულისა და ნაციონალურის, როგორც ცნებების ხმარება ჩვენში იმდენადაა გზა-კვალ არეული, რომ ოფიციალურად გვაქვს ეროვნული ცირკი, ეროვნული ზოოპარკი და ა.შ., მაგრამ ეს ვერაფერი თავისმართლება იქნებოდა...

მოკლედ და მარტივად, იმის თქმა მსურს, რომ ფრაზა — "რატომ არის ბურჟუაზიის ეს კატეგორია (სეგმენტი) თეორიულად მნიშვნელოვანი, როცა იგი სახელდებული და განსაზღვრულია წარმოდგენილი ურთიერთობების თვალსაზრისით" (გვ. 3) — გამონაკლისი კი არა, სწორედაც დამახასიათებელია წინამდებარე "თარგმანისათვის".

და ბოლოს, ავეიაობაში თუ არ ჩამომერთმევა, ერთი რიოში მარგალიტიც:

"ჩემის აზრით, პტოლომეის ცდაში "გადაერჩინა ფენომენი" — ორივე — მარქსისტული და ლიბერალური თეორია, — სუსტადაა წარმოდგენილი და სასწრაფოდ მოითხოვს (verbatim! გ.ჭ.) მომავალში კოპერნიკის თეორიისაკენ რეორიენტირებას". (გვ. 3).

ღმერთმანი, აღარაფერი მეთქმის.

PS: ოღონდ აქ ერთი მზაკვრული შეკითხვაც — ვთქვათ, ნახევარი წლის მანძილზე (ამაზე სწრაფად 300-გვერდიანი წიგნის დაკვეთა-თარგმან-მოწონება-რედაქტირება ნაღდად ვერ მოხერხდებოდა!) როგორია ფონდის საგამომცემლო განყოფილების ერთი ოფიცრის, ექსპერტთა საბჭოს თუნდაც ერთი რომელიმე წევრისა და ბორდის ასევე ერთი წევრის ჯამური ხელფასი? როგორ დავიჯერო, რომ მათ თუნდაც ერთხელ მაინც გაეხსნათ ჭუჭყიან-ზუზდიანი ხელნაწერით (რაიც ფონდის წესდებითაა აკრძალული!) სავსე ეს საქალაღდე და მერე სუფთა სინდისით მიეცათ "მთარგმნელისთვის" მისი კუთვნილი ჰონორარი? და ახლა კიდევ გამომცემლობა "ცის ნამს" * დასასტამბი ფული სურთ გადაუხადონ?!

თუმცა, როგორც იტყვიან — მათი რა მიდის რო?..

PPS: არანაკლებ ნიშანდობლივი გახლდათ “ფონდში” მოკალათებული ჩემი ნაცნობ/მეგობრების რეაქცია წინამდებარე დასკვნაზე: *ოცი, გია — ბევრი ვიცინეთო...* და რა მერე? წიგნი გამოიცა და რა ხანია, შუშისკარიან კარადაშია თავმომწონედ გამოდებული, ფონდის მაშინდელმა უსტბაშმა, უფ. დარჩიაშვილმა კი ძაან-ძაან შორს დაიჭირა ჩემგან მისი გადაფურცვის თხოვნა — ეგ ერთადერთი ეგზემპლარი შეგვერჩა, კარადის გასაღები კი დაგ-ვეკარგაო...

PPPS: ისე, ვთქვათ და ჭკუა ეყოთ, ანუ — ხელახლა ათარგმნინეს მავანს: შესაბამისად, ახალი ჰონორარის თანხა და ხელფასების კიდევ ნახევარი წელი ხომ უნდა დაეუმატოთ საანგარიშოდ?.

გაიხარე... და გიშლის მერე ვინმე?!

ბ ს ჯ ო მ ზ ს ო

ქ ვ ს ზ . . .

Valeri Chkadua:

HOW NOT TO BE AN ALIEN
(Jelter-Skelter Mythstories of
Georgia)



II

Strangers in the Daylight

*What thou givest away is thine;
What thou keepest is lost.*
Shota Rustaveli¹

I don't stick out in Thailand.
Siamese Cat²

In the beginning of the 12th century, king David the Constructor³ - called “Constrictor” by his enemies – the great warrior and politician, and notably famous for his religious tolerance, united the country, fought numerous battles against the invaders and brought crucial victories to Georgia.

As was the practice of those times, king David had mercenaries from the North employed in his army. The locals called those foreigners Kivchaks.⁴ In order to prevent friction between Kivchaks and local population, David gave orders to show hospitality to those outlanders and provide them with most needed things. Here is a story told by a Georgian layman – it is about the times of the abovementioned king David who ruled the country with iron hand, Kivchaks who felt themselves more at ease in Georgia than in their steppes and cultural incompatibility in general.

¹ Shota Rustaveli, 12th century poet, an outstanding representative of Georgian Renaissance, author of an epic poem *The Knight in Panther's Skin*. The book was so popular and highly valued, Georgians used to give it to their daughters as a dowry.

² Cats don't talk (Ed.).

³ King David the Constructor, alias David the Builder, also known as “The Sword of Messiah”. Georgia became just about an empire during his reign. In 1121 his 56.000 warriors defeated 300.000-strong allied Muslim army, headed by the Caliph of Baghdad, thus preventing the advance on the Crusaders' headquarters in Syria-Palestine (Ed.).

⁴ Kivchaks were nomads roaming North Caucasian plains (Russian name is Polovets/Kipchak). King David brought 40.000 Kivchak families and settled them in Georgia on condition that each family would provide one warrior for the king's army. They served king David well, but a century later, circa 1230 they turned coat and joined Jahl-Al-Eddin's Arabian-Iranian troops. Their further fate is unclear: either they became assimilated with Georgians or they left the country together with Jahl-Al-Eddin's retreating army, taking along their families (Ed.).

We left town gates an hour ago – my baby doll and me. We got married in autumn and come summer, when roads dried up, she started nagging that she was home-sick and she missed her parents who lived in the nearby village. How could I refuse my angel? So we set off early in the morning and there we were trotting along the waterfront. I felt the dizzy smell of field flowers and bushes in blossom all the way. Slight breeze was lolling treetops lazily and rippling the surface of the river. Every friggin thing around was so quiet you could hear a butterfly fart.

I halted my horse to give him a chance to nibble at grass when my lovely – she was riding at my back – started giggling and said: *‘Look at that funny man squatting at the river. He’s lapping water like a dog!’*

One glance at his clothes and weapons told me he was a Kivchak serving in king David’s army. Now, those Kivchaks were good warriors but they looked real funny. I was fresh out of army myself and I’d fought alongside them a few times but I still didn’t dig their alien ways, their strange lingo, and their queer faith, which to my mind, was no religion at all. And they often behaved like animals but I kind of respected them for their fighting skills though. Besides, king David’s orders were like, don’t you dare to harass them, make them feel cozy here, and what not. By the way, the king was married to a Kivchak lady,⁵ so it said it all. Well, who was I to go against king’s orders, anyway?

On twigging us the Kivchak rose to his feet – he was a stocky man, built like a brick shit-house – and came up to us. His horse followed him sluggishly. He looked at me with his eyes like two piss-holes in the snow, then stole a glance at my sweetheart and said:

*‘Pshrat qlug mleshka clat’.*⁶

‘I don’t get you, man. Can you speak Georgian?’ – I told him.

‘I do’, he said, ‘Hello, I’m Kivchak’.

As if I wouldn’t know! You couldn’t mistake a Kivchak for any other foreigner – they stuck out like sore thumbs in this part of the world.

‘Hello, Kivchak!’ I said, ‘How are you doin’?’

‘Now that you remind me, not as well as I’d like to. I’m hungry as a steppes wolf.’ – He glanced at my bulging saddlebag and licked his thick lips.

⁵ It’s a historic truth (Ed.).

⁶ Linguists still argue what language Kivchaks spoke (Ed.).

‘Be my guest’, I said and dismounted. When I was helping my wife get down, her dress rode up and her legs – my lovely, she had legs like two exclamation marks – flashed whitely. The Kivchak gaped at her as if it was the first time he saw a live woman. Then he turned to his horse, pulled down a piece of rug he used for his saddle and spread it over the grass.

I unpacked my saddlebag and laid out our trip-ration. Three of us my lovely wife, the Kivchak – and –me sat around the makeshift table and had light lunch. I mean, my baby doll and me had light lunch and the Kivchak had a heavy dinner – he gobbled up every frigging thing from smoked beef, goat cheese, hard-boiled eggs and white bread to red wine.

He managed to exchange a few words with me at that. He said he’d fought in a couple of battles king David carried against Turks. I told him I had the luck to be part of those campaigns too.

‘I knew you were a warrior at the first sight’, he grunted and looked at me in approval.

‘How come?’

‘Easy. The way you move and speak’, he smiled to himself. I was puzzled a bit; I had no idea I behaved in any special way, different from others.

Looked like he had drunk too much of wine. That red one of mine was the pride of my family, we’d been making it for centuries and it had a bite like a Damascus dagger – half a dozen cups were enough to fell a bull. The Kivchak burped with satisfaction, turned his face that looked like the rear end of my horse and gave an eye to my lovely wife.

Now, my baby, apple of my eye, she was a real head-turner – she had two of everything – so I dug his hankering after her. ‘Look, soldier’, he said, staring at my sweetheart, ‘be a real man – give me your woman, will you?’

I was dumbfounded. I lost my speech though I shit-listed that cock-eyed bastard at once. ‘What do you mean, be a real man? Do real men in your tribe give their wives away like domestic animals?’ I glared at him and felt blood rush to my head.

‘Sure they do’, he said and showed his yellow teeth: ‘I’ll give you my horse in exchange. Trust me, it’s a good deal, soldier’. He looked at me like he was sure he’d made an offer I couldn’t refuse. Then he caught my baby by her plait and started smooching her with his dirty turnip-trap. My lovely tried to push him away but she was too weak to get rid of his bear hug. She looked at me as if saying ‘What kind of a man are you, letting the stinking barbarian do this to your wife?!’

‘Let her go, you gutter-minded son of a bitch!’ I roared and reached for my sword. As if he’d been waiting for my move, the Kivchak jumped back and turned to me quickly. When he faced me, he was brandishing his crooked scimitar.

My sword was half out of its sheath when his weapon flashed like lightning and cut my shoulder. I got real mad. Now, this Kivchak could have been a good warrior but he didn’t know half of the tricks I’d learned during my seven years in the king David’s army. I feinted as if I intended to attack him from the right and when he shifted his weapon to ward my blow, I drove the blade deep in his throat.⁷ ‘That’ll teach you to fart in chapel’, I said, withdrew my sword and stepped back.

The Kivchak fell to his knees, dropped his scimitar, and started coughing blood. He was half-dead already. ‘All right, soldier’, he said in a hoarse voice. ‘You win. Now you can cut off my ears’.

I remembered Kivchaks had the custom of cutting off the ears of a defeated enemy but Georgians didn’t see any sense in this kind of medical operation on dead people. ‘Keep your frigging ears to yourself’, I told him and sheathed my sword. The Kivchak fell backward. Then a shadow of a smile touched the corner of his lips.

‘You are a good man, soldier’, he said, ‘Take my horse and my money’. He fumbled inside his jacket and held out a thick purse: ‘These are your rightful trophies’. I didn’t move. He dropped the purse on the ground, looked at me eye to eye for a second or two and then said: “Think of it as a dying man’s request’. He shifted his gaze to my baby doll that had blacked out during our short combat and was now sprawled on the grass. I turned and started towards her to get sure she was all right, when his hoarse whisper stopped me. I came up closer to him to make out what he was trying to say.

‘I did it on purpose’, he mumbled and looked down at his bloodstained chest. ‘I’ve always wanted to know what made you Georgians tick. Now I know’, he said and closed his eyes.

‘What happened?’ My sweetheart’s voice startled me badly. She’d recovered her senses and was standing at my side swaying like a drunk. ‘Curiosity killed the Kivchak’, I told her and petted her pale cheek.

⁷ Actually, this is where the most popular Georgian folk poem “Encounter with a Kivchak” ends. However, Vano claims that he, being the direct descendant of that very guy who encountered the Kivchak, knows better. He insists the authentic story has been passed from generation to generation in his family and that the ending was tossed away by some romantic and stupid bards (Ed.).

Well, that's nearly all of it, except all my life went ass over tits after that cursed day. The same night we came to her native village, my wife, my beloved, that double-crossing, triple-clutching bitching whore ran away with her former lover-boy taking the Kivchak's purse with her. Then I realized why she had been so double-damned homesick. Too late, I guess.

As for me, I had to take to the woods because king's men started hunting after me for killing a Kivchak. I joined a gang of outlaws and soon became their leader. We used to hold up well-off noblemen and traveling merchants and people made up heroic legends about us. Folk singers used to chant how worthy we were, robbing only the rich, never the poor. It looked strange to me – who else could we rob, anyway? What a darn thing can you take from a poor man?! But that's another story and has nothing to do with this one.

But I still have to say this: when I had quiet moments between stick ups and get-aways, I would often ask myself, what the hell did that arsy-versy Kivchak mean when he said he knew what made me tick?⁸

Actually, this story has two morals.

One: Some people are strange; others are stranger (s).

Two: Think twice before you do away with your enemy – he could be doing you a favor.⁹

⁸ I'd like to have an answer on that question too (Ed.).

⁹ How true, how true! (Ed).